

墙东类稿

陆文圭

文硕阁

wenshuoge.com

目录

关于我们	3
提要	5
卷一	6
卷二	12
卷三	24
卷四	30
卷五	35
卷六	44
卷七	54
卷八	63
卷九	72
卷十	79
卷十一	88
卷十二	97
卷十三	107
卷十四	117
卷十五	125
卷十六	142
卷十七	153
卷十八	163
卷十九	177
卷二十	186

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 集部五

提要

墙东类稿二十卷 别集类四【元】

臣等谨案墙东类稿二十卷元陆文圭撰文圭字子方江陰人幼而穎悟博通经史及天文地理律象医药算数之学宋咸淳初以春秋中乡选延佑设科再中乡举以老疾不应徵召卒于家事蹟具元史儒林传文圭当南宋之末年已二十余入元後五十余年至泰定天历间尚应聘设教于容山至顺末犹为陈敬叔作安定祠记又数年至顺帝至正初始卒最为老壽惟史不载其登仕版而集中吴县学田记有至元辛卯余领吴县学事语似亦曾为教官然辛卯为世祖至元二十八年文圭年只三十余而记中乃有余愚且老句与文圭情事不合或此记本代人作而失于标注欵史称文圭之文融会经传纵横变化莫测其涯涘东南学者皆师之今核所作史言不谬史又称其邃于地理考核甚详今检集中惟存辨毛穎传中山一条余悉不载殆散佚不可考矣是集本二十卷世久无传今从永乐大典中蒐采遗佚共得文三百余篇诗词六百余篇仍依原目厘为二十卷虽割裂之余重为缉缀亡失已多而据所存者观之固元初褻然一作者也乾隆四十六年九月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

卷一

钦定四库全书

墙东类稿卷一元 陆文圭 撰经解

志学解

小戴记曲礼上篇古之遗言也陆农师音读以十年曰幼作句絕以下弱壮等字皆仿此新安朱氏以为有理今从之幼而学者兼小大学而言十九以前为幼则自八岁至十五而入小大学矣古之生子能言则教之是时知思未有习化未有前言至论日夕薰聒涵泳善心珑琢美质久而安习保固完全私智偏嗜不能入矣二十成人可以胜衣冠冠礼曰弃尔幼志醺而字之责成人也然体犹未壮故曰弱三十则血气定矣可以授室合二姓之好以事宗庙有父道焉四十曰强孔氏曰强有二义智虑强气力强吕氏曰强则材成材成者智虑定则谋事审气力完则任事果故可以出仕然必至於五十閱理深而熟更事久而精然後可以为大夫五十曰艾艾发苍白色服政为大夫也仕者始为士以事人治官府之小事大夫者居上以长人治邦国之大事盖才可用则命之仕德成则为大夫其间非无早知夙成之人也以为养之熟则成效着而收功博不待其成而用之则有美锦而学制未能操刀而使割也芄兰之支童子佩觿虽则佩觿能不我知言成人之佩非童子之饰其才能不足以取知於我也婉兮变兮总角卯兮未几见兮突而弁兮言总角之童戴大夫之弁躐等而居於位也大抵士修於家学优则仕王事鞅掌东西驱驰者不过二十余年耳未四十也才纵可以有为而不当使之为己六十也才犹可以有为而不欲使之为其用人也有制其待人也有礼六十曰耆筋力既衰不任其劳可以使人不可以使於人也七十曰老不服戎不与事外则致王事於君内则传家事於子仕止矣八十九十曰耄耄愒忘也七年曰悼悼怜爱也耄者老而知已衰悼者幼而知未及尊老而慈幼故不加刑焉周官司厉七十者与未齿者皆不为奴汉律未及八岁与八十以上非手杀人不坐皆古之制也百年曰期颐期有两音郑氏曰期要也孝子要尽养道而已严陵方氏曰人生以百年为期由是而上则过乎人所期由是而下则不及人之所期矣朱氏曰期音朞取周朞之义期谓百年已周颐待养而已其义为长此章自始至终每十年一变盖数起於一止於十天地奇偶之数阴阳生成之理每至於十则必更人也者受天地之形孕阴阳之气孰能违其数而逆其理哉故十年则必异其名至其时则必异其事幼与弱之类则名之异矣学与冠之类则事之异矣昔者先王制礼立法以律人心劝学崇化以节民性使人学问审博血气充盈志意坚定少者待其成壮者服其劳老者享其壽未用者无躁进之心当退者无不知足之戒人生其时沐浴圣泽舞蹈仁风耳目聪明四肢安逸夫夫妇妇而家道正长长幼幼而王政行虽孤鰥之民冻饿之老犹得与昆虫草木各遂其生况凡民之秀为学士大夫者哉当时王道修明风气长厚根本全在学上学不是空言要措诸事业致知诚意所以治其国明善诚身所以治其民这学不是词章之学浮靡用不得不是训诂之学肤浅行不得虞典教胄子周礼宾三物直是後日要得他用如桑麻谷粟凿凿皆精实公孙侨曰侨闻学而後入政未闻以政学者也此之谓矣然学政不是在下自扶立得直须上之人辅翼振德方始成就中庸曰率性之谓道修道之谓教人自襁褓以至成童便有这个性可尧可舜不教则失之圣人能

尽己之性以尽人之性其必由学乎学所以修性也自天子至庶人未有不学而成者也学废则礼废冠礼废而成人有童心不弟之源昏礼废而嫁娶不待年不壽之源考比之礼废而官制坏不治之源饮射之礼废而养老缺不孝之源嗟乎其来非一日矣春秋时已欲毁乡校如郑然明者青青子衿在城阙兮诗所以刺之也郑蕞尔国也而王朝之大夫已有不悦学如原伯鲁者故闵子马讥之曰夫必先有是说而後及其大人曰可以无学无学不害下陵上替能无乱乎谓邪说兴於在下而在位者习而听之不可长也又曰学殖也不学将落原氏其亡乎一大夫不说学闵子马即忧其亡当时未必不笑子马之迂也然自古不学而杀身者多矣虽然此可为仕而不学者之戒未仕而学则将奈何曰孔子我师也昔者孔子生而知之而曰我非生而知之者好古敏以求之者也考之世家孔子生於襄公二十二年庚戌儿时陈俎豆设礼容此十五志学前後时节昭公二十五年甲申适齐景公问政此三十立时节定公元年壬辰孔子返鲁退修诗书礼乐此四十不惑时节九年庚子为中都宰一年为司空又为大司寇十四年乙巳摄行相事与闻国政则年五十六矣正知天命时节其後适卫适陈适宋哀公十一年丁巳复返鲁则年六十八矣正耳顺时节方且序书易诗正乐十四年庚申西狩获麟作春秋後二年壬戌两楹梦奠七十三终焉则到从心不踰矩时节才一二年而止耳然自志学之年至从心之境皆闻道之岁月也嬉戏陈俎豆之夫子即负手曳杖逍遥之夫子学无少壮之异也夫子焉不学而亦何常师之有子奚不为政而是亦为政惜也用舍行藏之不自必绥来动和之不复验使天假之年且八九十且百岁且得邦家则贤於尧舜远矣其生也荣其死也哀如之何其可及也然人皆以夫子为不可及夫子则曰何有於我哉又曰学之不讲是吾忧也然则学者又当如何盖尝论之困而学之视学知当十倍其力时过而後学视幼学当百倍其力列子有云百年壽之大齐得百年者千无一焉设有一者孩抱以逮昏老居其半矣呜呼人生世间少壮之日盖无几也自人事言之至六十则精神止矣复何为乎自学道言之则自始以至终未没齿之前皆战兢之日也岂独学而仕服官政而已乎语曰四五十而无闻焉斯亦不足畏也已无闻谓无善道之可闻非名位之无闻也人不可不知道使其知道顔子不为夭使不知道彭聃不为壽生世间一日则有一日之责百年则有百年之责天地无穷尽则道无穷尽学亦无穷尽昔者睿圣武公九十方作抑戒以自警其诗曰乌乎小子亦聿既耄其盛德至善如緑竹猗猗皆自切磋琢磨中来赵文子年未盈五十而谆谆焉如八九十穆叔知其弗久刘子知其耄及后子知其将死盖春秋时犹有先哲之格言君子之先见以後无此学矣然则嗇其精神以夺造化之巧外其形骸以与太空者游非达者乎曰律以圣门之绳尺则彼为虚诞此专务实不可同年而语矣子在川上曰逝者如斯夫又曰朝闻道夕死可矣上一章是个不息字下章是个安字呜呼汉儒以来此义不明久矣

诏诰

拟求贤诏

盖闻上古之治君臣同心开广贤路宣招四方之士是以上下和洽海内康平其德弗可及也朕纂承丕绪敬仰休风托於士民之上夙寤晨兴念虑万方不忘元元惟恐羞先帝盛德当今之务务在得贤而已昔仲弓季氏之家臣子游武城之小宰孔子犹海以贤才问以得人明政无大小以得人为本今天下贤者智能岂特不如古之人乎患人主不求之耳夫十室之邑必

有忠信三人行必有我师今阖郡不荐一人是化不下究而积行之君子壅於上闻也士奚由进自今以後令郡国选贤举能岁以为常贤士大夫有肯从我游者吾能尊显之布告天下使明知朕意其有明德达材者必身劝为之驾遣诣京师或年老疾病勿遣

拟劝学诏

盖闻古之设庠序与学校所以教养人才将以致用也书不云乎不学牆面莅事惟烦呜呼自周衰以来先王之道浸微浸灭法度多缺礼乐废坏图治者以古为迂措事者以苟为得士习於空言礼义廉耻缺而不思朋党比周靡然成俗伊欲黜汉唐之浅陋追尧舜之高明乐育天下之英才使修洁之士充於朝廷孝弟之风行於乡党何修何饰而致乎此自今有敦行谊谨名节明经笃学者有司具以名闻朕将考择而用之以劝於尔衆浮华之习吾所不取咨尔多士尚懋戒哉

拟郡国水灾赈贷诏

吏有从南方来郡国被水百姓散流者衆保聚不完扶老携幼困蹶道路朕甚悯之洪范五行初一日水皇之不极厥罚常阴朕夙夜靡寧思执其咎古者有水官水得其性时修其利又吏牧民者为浚陂塘立堤防以消息其灾今不豫具无及已有司其议所以赈贷之秋稼不登流庸未复农失其业有可以佐百姓者条奏其宜将施行之郡国不能为朕究心徒文具者以不职论明诏中外知朕意焉

拟汉文帝十五年令诸侯王公卿郡守举直言极谏诏

盖闻古之圣人莫不求贤以为辅翼大禹为三王祖亲拜昌言成汤统正万邦从谏弗咈未尝自广以狭人也高皇帝建英豪屈羣策见善若不及从谏若转圜故能平暴秦定海内今朕获保宗庙以微眇之身托於公侯之上夙夜战栗永为百姓之急明不能烛德不能绥何繇以承先帝之业今上而诸侯王公卿下而郡守不闻有荐一人以匡朕之不逮者何欤其令有司明扬在下博选能直言极谏者进登於朝朕当亲策以当世之务古不云乎荐贤受上赏又曰举能其官惟尔之能其布告天下使明知朕意

拟韦处厚除翰林侍讲学士诰

朕以幼冲嗣大历服未堪家多难惟古先哲王皆以讲学为务朕思乐忠谏博习之士朝夕讲论经理辅朕之不逮期致於治尔以孝闻中第擢科扬历中外先帝寘尔补阙上疏剴切深所嘉獎坐事出守旋入掌纶诰朕惟翰苑职亲地禁时复侍朕讲说非卿经行修明莫膺此选卿宜勉之以事先帝者事朕可

表

贺即位表【天历二年八月】

日月并明相继四方之照乾坤再造复开万世之基上符帝心下慰民望钦惟皇帝陛下人伦笃至天性谦冲方退处於青宫本无心於黄屋当年历数传舜始於传尧今日讴歌之啓乃不之益欲三让以天下大一统於域中明诏载颁圣恩广被臣某等身居南土心拱北辰象御六龙喜风云之际会鸡垂丹凤均雨露之沾濡

太皇太后上尊号贺表

统嗣正名即履至尊之位谋谟独断尽归太母之功宗社既寧臣民胥庆钦惟太皇太后陛下亲承圣绪光绍丕图思帘帷拥佑之深恩举典册尊崇之故事式彰孝治敬表徽称臣等薇戍虽勤笋班莫簪未央殿上一新天子之仪兴庆宫中曲尽家人之礼

贺正表

五位乘乾时正六龙之御三阳为泰天开万象之新寰宇清和熙朝欢洽中贺钦惟皇帝陛下克明克类乃圣乃神偃武修文两尽为邦之要崇儒重道重弘选士之规当周历之甫颁侈汉仪之高会臣等欣逢盛世逖守偏州献岁发春班阻陪於玉笋与天齐壽颂遥祝於盘椒

万户府贺正表

三阳内长开万世之太平万国咸寧侈三朝之元会庆流宗祏欢动臣邻中贺钦惟皇帝陛下道迈羲轩德深尧禹表章经术崇正学於诸儒振耀武功懔余威於殊俗乃参稽於乾纬爰乘执於震规臣等出戍柳营阻陪椒宴四方来贺职徒限於虎贲万壽无疆心实同於兽舞

拟行省进乡试合格进士花名表

详延有诏议始於太常大比献书名登於天府严郡国举人之制体朝廷劝学之心窃惟贤才本所以致太平科目亦足以得奇士自後世虚文之专尚而古人实行之浸非赋敏八义诗成七步竟有看花之志共夸摘藻之工何补於时焉用此辈止可束之高阁岂宜寘彼周行遂令塲屋之久虚或致山林之长往兹盖钦遇皇帝陛下尊崇正道长育英才表经术以淑人心黜辞章以新士习臣某等身居南省面向北辰他无称职之忠惟有举能之益乡以询五物艺可考於周官郡不荐一人罪敢逃於汉吏

拟谢赐进士及第表

天下文明幸际风云之会人才长育方深雨露之恩铃声才撒於棘闱胪句忽传於枫陛百年旷典万国懽心窃惟成周献贤能之书先汉试茂异之策虽渐兴於科目未专尚於文辞迨作赋自擅於凌云而明经或嗟於扫地俗士浸多於塲屋遗才间老於山林不遇昌时曷除弊事

钦惟皇帝陛下修道谓教取人以身追三代之淳风崇四方之美化表章六艺示至道之恢宏罢黜百家开正途之壅塞臣等器非适用学未通方随羣谩踏於槐花出衆偶穿於杨叶蒙恩赐第释褐起家以道事君敢谓词章之小技尽忠报国惟知节义之大闲

代谢进士及第锡燕表二首

龙飞圣主昭赉火之文明鹿鸣嘉宾庆需云之燕乐丁辰何幸抚已奚堪窃惟零露瀼瀼诗歌令德嘉鱼汕汕时遇太平此明良千载之相逢岂疎远一朝之敢望考慈恩题名之故事侈闻喜锡燕之异观多士属心八方倾耳钦惟皇帝陛下美化厉俗明德新民推至诚乐与之心成恭已无为之治曾是布韦之贱得沾醉饱之恩臣等小器易盈大亨敢受虽食藿之腸未变而倾葵之志难忘国利观光真自它而有耀臣能归美岂报上之无心

山下火赉仰昭代之文明云上天需预嘉宾之宴乐一时盛举千载难逢窃惟衍以至诚式播嘉鱼之什食而将意载歌鹿鸣之三登兹太平淑我多士顾惟饭糗羹藜之子素乏含英咀华之能玉陛胪传误尘上选琼林宴逮有玷清班钦惟皇帝陛下驭臣以礼覆物皆仁设庠序学校以明伦崇礼乐诗书而立教勤於作士既成追琢之章务在养贤又得飪烹之道臣等无任

牋

代上皇后牋二首

北陆回春天肇开於泰象东朝献岁人共仰於坤仪庆集宫闈欢腾臣妾中贺恭惟姜嫄圣瑞太姒徽音万物资生有赖顺承之德二南美化兹为正始之基当甲观之呈祥宜辛盘之荐祉某等职居下土身际昌期成三阳辅助之功莫名地道上万壽怡愉之颂愿罄臣忠泰爻用事喜交长於三阳坤道居尊实资生於万物祥开北极瑞藹东朝中贺恭惟柔德孔嘉徽音是嗣凤仪垂范母道万年燕翼貽谋孙枝百世当六寢化成之日值三朝元会之辰某等薇戍方勤椒花莫献踉踉济济阻陪星拱之班怡怡愉愉遥祝天齐之壽

代上皇太子牋二首

祥储甲观衍昌历於无疆斗指寅杓瞻前星之有耀龙楼初晓鹤禁方春中贺敬惟德稟元良身居嫡长问安视膳不辞鸡寝之勤入学承师尤重虎闈之选式开震治用介繁禧某等属守偏方欣逢华旦青宫主器将貽万世之谋金监献忠愿上千秋之录

泰阳三长是为内健之爻离日两重咸仰继明之象式开震治用介壽祺中贺敬惟明有敬仁素称贤圣决大谋定大事已位储宫行正道闻正言尤亲帝学自天有庆与物为春某等职在鷹扬情驰鹤禁筓班莫造阻陪元旦之仪柏酒遥斟敬祝前星之耀

代贺太子立詹事院牋二首

震从一索初开绕电之祥离继重明咸仰前星之耀庆延宗祏喜溢人寰中贺敬惟玉润重晖
银潢毓秀龙寝修问安之敬虎闱习齿胄之仪甲观崇深已先昭於圣瑞春坊邃密复妙柬於
英材左右皆良闱庭交贺臣等远临小垒幸际昌期芑水燕贻已极本支之盛芝山鹄举会看
羽翼之成

震宫主器传正统於一家甲观储祥记神光之满室庭闱有庆宗社无虞中贺敬惟毓德星辉
凝姿玉润主鬯居少阳之位体元扶太极之尊岐嶷天生入已优於圣域忠贤日近选尤慎於
春坊某等卫列虎贲情驰鹤禁元良大本成苍姬燕翼之谋左右正人助炎汉鸿飞之羽

墙东类稿卷一

卷二

钦定四库全书

墙东类稿卷二 元 陆文圭 撰 啓

谢邓善之佥事取中乡试第二名啓

桑榆已晚自怜野老之余龄花柳无私均囿化工之一气敢诧曹参之功次自甘胡旦之筹输窃惟举场得失之间亦系士子穷达之分白头病叟不入时妆黄吻少年反轻宿学揶揄风汉指撚陈人倘非青镜之明悬未必朱衣之暗点昔嘉佑之变文体有欧阳以典贡闱能使西崑尽崇古雅虽子瞻疑为子固公亦何心然刘晖即是刘几士终有命岂意数百年之後复见第一流之人伏惟某官岷峨之英鍾吕之器自胶庠而发轫即艺苑之飞声扶云汉分天章衣被昌黎之文彩上会稽探禹穴网罗太史之旧闻进而仪表於禁途出则澄清於列部风猷久着品藻尤精遂令跃冶之不祥竟使处囊而立见如某者发已种种视亦茫茫不记阿婆三五之时堪笑老翁七十之状纵使恋袍之情厚奈何戴笠之分殊况当诸公衮衮之同登又无笔势翩翩之可识谁烧虎尾竟暴鱼鼈空思看花扑面之尘尚记枯梢号寒之苦既殿奔而策马肯报役以焚舟随衆滥吹复先中隼然而一鼓之气已衰竭再往之计终渺茫嗟既失於东隅怅莫图於南海人之伦五尚不废朋友之琢磨士之品三又何必功名之芥蒂姑安愚分以答殊知

谢友人贺请举啓三首

壮不如人尚记东西涂抹之戏惠而好我远贻四六骈俪之文自惭白雪之盈头敢望青云之平步况刘蕡下第方叹遗才而雍齿且侯未愜舆论战而弗捷庸有报志胜之不武何以贺为然长者赐则不敢辞况氓也周之亦可受三美为粢再拜以登老娘之孩儿幸免倒絙之诮幼妇者少女永藏絶妙之词

眉有点黄笑阿婆之年老书来尺素叹少女之词工加之及物之仪假以过情之誉半世诵兔园之册颇厌啁啾一朝思鴈塔之题分无侥幸计偕偶与台馈何为旅庭之百既登肃使之三敢後甚愧丈人厚相期春日看花得意之荣请为游子吟当念朔风枯梢号寒之苦白簪头上甚矣吾衰黄点眉间又何足喜自笑阿婆之涂抹误经佳士之品题窃惟举场之开偶类骰子之选刘蕡下第我辈安得登科雍齿且侯吾属将来无患知孟明之举必再顾子玉之贺不堪惊百实之旅庭忘屡空之在巷我之大惭人以为好果符韩愈之言世皆欲杀意独怜才深感少陵之谊

答黄子高贺啓

大比兴能偶随鼓篋衆工奏艺遂滥吹竽谁言韩信之无双终让萧何之第一今老矣无能为

已可吊也而又贺之窃惟士论之重轻不系科场之得失固有幸而获选而况患在不明喜瓦釜之争鸣指康瓠以为宝如某者空疎未学婉晚余龄黄卷一生名不成於汗竹青灯残夜眼空对於昏花肥腴春深薄言于耜饥鸥江晚相与忘机忽逢芝紫之诏颁不觉槐黄之心动手编蠹吻身效蛩吟虽曾拜鹿鸣之三然竟作鷁飞之六焚舟之愤未已伏枥之志犹存牵帅老夫之重来不满识者之一笑漏尽钟鸣而不止头童齿豁以何悲婆比少年奈丑何翁如小儿直戏耳有来赞喜益重惭惶顾惟雌甲之衰曷称受辛之美伏惟某人璠璣国器黼黻人文曾穿杨叶以策勲宜对薇花而演诰暂淹骥足姑正臯比公瑾与伯符同年已服先登之勇管仲云鲍叔知我恐貽再战之羞拜赐之多诵言则赘

回李义夫贺啓

素练不精宜从下黜朱衣误点忽占上游方将景迫於崦嵫敢望名登於员峤如某者无丈夫志为童子师精舍说书花飘讲席空山振屐鸟怪儒衣试羣踏於黄槐偶再攀於丹桂顾安取此无所用之伏惟某人负不羁之才抱深藏之器竹亭无锁窥仙鹤之避人兰社有香听迂莺之求友笑我老娘孩儿之戏宠之外孙女子之辞虽摘藻之甚工奈栖枝之无分击北溟之鹏水不能怒翼以上飞逐东野之龙云惟欲低头而下拜稟酬厓略感激轮囷【原注无锁李竹亭名金兰社李文会名】

上克诚宣差啓

闻所闻而来君惠未忘是以在此悲莫悲兮别予去不遇岂所欲哉盖新妇虽处於两姑而烈女不更於二姓巢父寧掉头而不住少陵空回首以尚怜犹可辞乎亦无及已如某者已何曾闻道百齿未至达尊三深林每好於入山乔木肯思於出谷谁云水部之索价乃以石生而为媒既不能以礼辞又焉可以货取偶因再命竟昧一来所恃今谋人以为亲不思新令尹之必告微失吾尝同僚之义遂致子来几日之疑夫推车惟主可行而操刀安能独割恩欲已出怨使谁当今一邑化行无上作下应之效多门政出有甲可乙否之嫌狐裘彫茸吾谁适从贝锦萋菲亦已太甚然苟合则留不合则去故前受之是今受之非殊不思事大夫之贤友士之仁不失为利器守先王之道待後之学正所谓食功况卷书必立之师师何至为人之患而大事则从其长长本无絶子之心或使之或尼之非人所沮其处也其久也何日之多先生欺余迟迟吾行也弟子惑甚望望然去之靡不初鲜克有终早自图可以无辱类我类我忠焉能勿海乎归欤归欤知者为无礼也臯比勇撤马首欲东齐门之瑟不投楚市之钳将及岁聿云暮焉能待之秋以为期会言近止权輿不设於四簋馈赆敢望於兼金未免伤廉何以报德兹盖伏遇某官西山间气东观名流几年闭风露之帘一夕听星辰之履制锦小烦於妙手弹琴聊写於清音缁衣之好方新终袍之恋如故鲁献子有五友非惟百乘之家汉卓茂为三公始自一县之宰公岂久淹於展骥吾将亟返於屠羊衆人畜之报以衆人莫我知也今日用我否亦今日惟君图之欲谢分毫辄凭寸墨

回唐阴二君见招啓

为文责沈恨未覩於云天有句嘲边怪颇同於雪日夫何拱璧以先马欲起中廕之病驹得非所蒙愧浮於感伏惟某人林尊望族兴识名家人依处里之仁士愿友乡之善事大夫之贤者久闻武城澹台之贤有子弟而诲之宜得昌黎韩愈之诲顾自惭於樗栎岂足与於参苓侍坐未参於丈席之间传?乃出於束修之上筐将厚意物及多仪分无三鱣之升空有双鱼之遗馆奚待假求自有於余师币可以交见尚容於他日

回唐主事再招啓

卜见以大人方喜遂识荆之愿梦为二竖子不幸有采薪之忧退卧周南翻思渭北甚矣衰也久矣使之止或尼之岂意恋袍复加聘币昔者疾小愈不望於医来前日受今非终惭於货取不敢请固所愿也我不识能至否乎辞受俱难进退不可伏遇某官仁而下士意独怜才加四簋每食之勤订一樽重论之约而某驾回已俗漏尽不休前度刘郎恍不知於岁换今生杜老倘得及於春游

回句容蒋教谕见招啓

老夫耄矣不入时粧先生欺余使代匠斲嗟举才之误甚感知已之忻然伏惟某人京岷名流茅峯秀脉文辞之炳云汉为章於天渊源所渐庠序以化於邑肯偕武城莒父之宰来游康成元方之间弃其学焉可乎以所事事之过矣法筵龙象必取笑於旁观讲坐臯比又奚烦於勇撤小迟覲面相与论心

回岑应奎山长啓

远方下士愧百拙之无能大人先生闻一言以自宠堪笑老翁七十之状尚思阿婆三五之时随踏槐花偶穿杨叶终然举子之刺竟遭考官之疵谓士衡之患多俾曹参而俱次进恐复贻讥於狗曲退而姑卒業於鱣堂手披百篇不免诸生之笑子来几日竟为长者所先惊雌甲之偶同辱受辛之嘉惠兹盖伏遇某人词林孤凤学海老龙现丁卯之文星出而为瑞题癸巳之石壁隐不求名人皆为斲以汗顔公独凭轼而观戏孺子可教诘华袞之过褒将军肯临即臯比之勇撤某扫门虽晚倾盖如新载披贯道之文深感怜才之意上飞怒翼不能击鯢水於南溟下拜低头惟愿逐龙云於东野

回句容夏君范投啓

敬为曾南丰每私诵陈无已之句近舍皇甫湜乃徒取白乐天之名得非自厌於家鸡未免骤惊於越犬况尚论取友无出一乡之中而患在为师远求千里之外疑之者问不相及之马恶之者挥从何来之蝇幸倾盖之方新辱贻书之甚宠奇哉抉云汉分天章之手施之被薛荔带女萝之人信流水之知音奈阳春之寡和伏念某就木之矩有蓬之心始焉壮而欲行之今也老之将至尔桑榆落日独倚行藏之楼花柳前村都非欢娱之地免园之册子虽熟雁塔之题名不存食牛之皮已七十矣抁鹏之翼奚九万为偶闻武城之歌遽下洪都之榻此非子之坐

笑於列以何堪谁谓汝无家怀其安而不去遂作他方之游客孰为当道之主人伏惟某官吐凤词工屠龙技进爱子以方之义教人为善之忠屡撒皋比盍扶鸠杖泳南溟之泮水采彼茝芹修句曲之宫墙敬夫桑梓既不怪南州之雪方将逐东野之云【原注来啓云上下四方思随东野】论心甚真握手恨晚友士之仁者虽非利器之良工适子之馆兮不忘缁衣之永好

回陆静远招入义塾啓

北面弟子欲就良工东道主人误邀俗驾方小窻之听雨忽广坐之披云虽同为吴郡之宗敢自认汾阳之谱伏念某空空末学冉冉余龄屡曾鵬鹗之横秋久似蛟龙之失水烂熟兔园之册半费精神峥嵘麟阁之名徒劳梦寐乏温故知新之益蹈芸人舍己之非说诗不至於解颐读书谩夸於便腹岂意痴顽之老子亦如起废之浮屠俾摄皋比聿观龙象兹盖伏遇某人山川清气海岳雄襟能庇寒士以万间得育英才之三乐曰见义不为无勇而教人以善为忠家塾一新生徒四集盍取多闻之友共收半学之功某适从何来非所宜据安得秋阳之暴皜有惭幽谷之迁乔政恐犯孟氏之好为虽欲强曾子而不可庸蜀日粤岭雪难逃衆口之见嗤北海水南溟云愿挟诸君而远到拜命之辱奉币以登

代回句容程宰啓

闻弦歌之声知能施於有政行束修以上愧不足以为师偶得荆州刘公之书欲下南昌孺子之榻古有此礼今非其人伏念某童而习之老无能已以吾长乎尔苦来日之无多莫我知也夫抱遗经而独处青眼一顾白头如新幸无邹子之先容肯索李生之高价兹盖伏遇某官鸣琴多暇制锦甚工士元非百里才何尝不治冉求可千室宰岂曰未仁姑小试於牛刀乃先求於骏骨伊欲逐云龙於东野又疑惊雪犬於南州楼漫想於行藏门当谨其出入未敢从容於函丈正须俯伏於仞墙以吾为邑长於斯固将学道则爱人也有笑於弟子之列安能受业而解惑哉聊抒下情少需後命

请曹教啓

学必有师其闻道也先父不责善故易子而教凡洁以求进者吾未尝无海焉恭惟某人貌古神清才高学博一过目而史辄诵八义手而赋已成渊源所渐范模甚正某子侄辈少壮不努力孩提巧相如就有道而未正焉微斯人谁与归也昔长者絶子非子絶长者闻决意以先归今童蒙求我匪我求童蒙愿降心而俯就

谢徐教啓【原注除讲书】

入学招诸生幸过昌黎之仙伯读书破万卷惭非老杜之奇才拜命虽荣抚心自愧窃惟讲书之选以待博学之人论史不及子长班孟坚解经不如康成孔安国无抱负者奈观听何必来狗曲之讥适重鱣堂之辱如某者性天粗敏门地颇寒少亲师友之渊源揅说古今之得失每自负不碌碌者今何为是栖栖与所谓功名三年之学不至於谷其於经传一卷之书必立之

师虽误听菊榜之铃素不齿芹宫之籍嗟小子狂简成章不知所裁幸有司公明有善者率以録盖伏遇秋云双鸛春浪一龙身闲梅阁之仙游手葺杏坛之生意园蔬芜秽昔容樵牧之童水藻精神今选英髦之士致令跃冶预在铸金某敢不更参诸老之门尽足三冬之学後生躡等莫逃鸣鼓之衆攻异日说书不满斲轮之一笑

立坊请王麟楹并谢保举啓

某年逢九三大耄之嗟时无八十常珍之养甚吾衰矣莫知我夫每追思孔文举其人幸不生汉建安之末举贤荐祢衡之表旌德立郑公之乡起当代之文风传他年之佳话顾惟先辈素号名流有若无实若虚柔不茹刚不吐彰善而瘅其恶当仁以让於师一加华袞之褒百倍青萍之价门阑之色多喜意亦颇浓玉帛所及皆余我何以报有一樽酒兴来欲尽於君懽无百年人会後未知其谁健倘不遐弃幸赐早临

回学生曹无易投啓求跋其先人所修家谱

亲幸未至於涂人又岂止五世之泽师不必贤於弟子当自成一家之言载披鸿藻之摛词尤见青蓝之出色窃惟曹叔振铎之裔昌於延陵季子之邦簪笏相传箕裘不坠宜登名於竹简奚借重於刍言西山之记睦亭惟存真氏老泉之引族谱自述苏宗况今家学之心传尚有父书之手泽何勤四六引喻再三方愧狗之续貂犹幸蝇之附骥友古人尚论其世已与君为再世之交後死者得与斯文但慚我非能文之士薄言申谢不敢先施

贺朱南伯受鄞县簿啓

伏以桑可怀鵑想泮林之久乐枳难栖凤喜贤路之初升匪为簿书之能乃有民社之寄昔在元晦曾仕同安至今思畏垒之居犹未忘紫阳之教虽泉明迴隔而官氏相同会见今人能行古道某年砭砭以犹学发种种而奚为嗟老死其无闻知後生之可畏是我主簿已素简於上知谓君中书行即膺於大用

谢人壽啓

蹉跎五十九年无能为矣擘画二三百岁不亦难乎荷缁绁之故人念婆娑之老子申之善颂餽以多仪既推介壽之恩敢後拜嘉之礼绣段辱美人赠何以报之斑衣作小儿啼聊复尔耳

回尤叔永弟壽啓

有弟远方嗟鴈行之中断揆余初度偶龟息之尚存分甘晚节之衰猛省平生之过拊我之恩莫报友于之义不敦思之几欲无生至此又焉足贺特以连栖之树来加一瓣之香岁以为常饋之则受我生壬子慚非君祝之妙龄昔有卯君更比子瞻而高壽

回繆惟肖弟壽啓

忆荆花之成树可惜分居叹樗木之不材偶因得壽岂意亲亲之义能推长长之心乃睠生辰特承嘉惠祝以斑衣之雅戏申之黄绢之好词欲令周子之兄得奉老莱之母式相好矣何以报之举池塘春草之诗有如昨梦酬风雨夜来之约共乐余生

回生日啓二首

涂抹少年曾有飞黄之志婆娑晚景遂成尚白之玄多谢故人颇哀老子记我湘江之初度享之平陆之多仪素丝有类於帀将玉羽奚烦於经换?飴喜成功於新妇香 令乞巧於神夫更分邻烛之辉又致瓣香之敬拜嘉敢不图报则那辱远使之駉駉答空函而咄咄罔之生也幸而免有愧圣人之遗言饮且食兮壽而康曷勤君子之善祷

阿婆涂抹曾记少年老子痴顽可怜晚岁自叹乐天之白雪敢期梁颢之青云初度再临俱存有感独荷故人之缁绁远驰肤使之光华剪南海之香沈刻邓州之花蜡载酒不烦於问字换鹅何待於写经瓜以乞神夫之灵面以借新妇之巧粲然庭实充此室虚敢不拜嘉未知报德笑矍铄翁当六十三岁甚矣吾衰与渴睡汉争第一二筹壮哉此志愿回善颂还祝巍科

回表弟惠则之贺壬戌生日啓

凯风寒泉之思已慚子道落霞秋水之句允属天才顾有弟之最强肯厥兄之弗念华予晏岁享以多仪爰三肃以乃登奈七襄之莫报老者颁白况又当二首之年贈之乘黄无以结同心之好

戊辰回生日啓四首【原注七十七岁】

于渭之阳我见舅氏在浚之下莫慰母心抚存歿以兴怀念劬劳之难报我辰安在君惠未忘岁复岁能常继乎亲其亲亦可受也耆英会上敢齐彦博之年靖节诗中独感孟嘉之传

安乐窝中多尧夫之十岁耆英会上与潞国以同年自怜衣褐之穷仅能食粟而已荷诸公之假借容老子之婆娑余光已薄於崦嵫善颂至形於嵩岳殊不念庚寅之枯槁谁能记甲子之泥涂此一瓣香岂讚扬之敢受余数尺锦愧裁答之未工

吾衰也久矣犯老而不死之讥人交而敬之有爱欲其生之意揆余初度享以多仪香涎剪龙海之云花炬割蜂崖之蜡汤饼既宜於深注笼禽未免於生燂喜手开谏议之槭知腹免将军之负维其旨且有我指如此异味必尝俾尔壽而臧以心却之他辞不可敢无下拜是用登嘉【原注起联一云疑年而使年分甘久辱吾老以及老是谓善推】

臣老无能为矣不惜余生人交久而敬之独存高谊已废蓼莪哀哀之什骤歌伐木许许之诗

惊百实之旅庭忘屢空之在巷我生之初尚无造嗟皇皇欲何之长者有赐不敢辞使仆仆尔亟拜

回人壽啓

东有啓明西有长庚问生辰其安在字余灵均名余正则虑行道之犹非初焉年富以力强今也形枯而容悴几逢初度自厌余生八千岁为春为秋古无此理九五福曰壽曰富他有其人我非良士之皤皤君有故人之恋恋无父何怙无母何恃终不乐於余心尔酒既旨尔殽既嘉乃用将其厚意何敢不恭之却第慚匪报之投

答慈云长老壽啓

某恨不托西方极乐国几曾瞻南极老人星孰晏岁以华予在远方之瘦弟释氏亲抱送每笑大儿之位卑弥勒迟下生不见阿婆之年少拈香一瓣祝壽八旬铸铁为限任鬼拍手笑人借板与槌请师逢场作戏信难问口且莫皱眉

回无华弟壽啓

姓虽鸿渐齿本雁行元方季方未必皆难为孔氏释氏似曾亲抱送嗟哉念母之不见岂曰事兄之未能每於初度之临辄致瓣香之祝老夫乘兴欲东游思听对床之夜雨明年此会知谁健且揖在坐之春风

回吴季仁壽啓

老子闲居方辟三三之径故人相问适当九九之期纵难保於百年喜又加於一日问生辰其安在虽後甲以何伤尔殽既将我心则喜壽八十单一岁将没齿以何言醉三万六千场方开口而大笑不妨命驾相与盍簪

回表弟惠则之壽啓

见我舅如母存焉今则已矣求乎弟事兄未也古犹难之况於中表之间讲此寻常之礼每逢降寅之初度必有受辛之好辞更加及物之仪益重怀亲之感甚至废蓼莪读不亦悲乎如云无渭阳情焉能有此四者具美矣美矣再而拜受之受之

回汤氏贅壻啓

辽濶先生之裔及见闻孙凄凉内相之家有齐季女一言作合二姓为婚令弟学士绰有祖风青氍可复某女幼离母训绣组未工自伤贫而嫁之难辄从壮则贅之礼立冰有请种玉何烦俄筐篚之厚将愧琼瑶之莫报女不嫁凡子定知此士之非凡我疑是老奴但愿与君而偕老

回薛壻启

齐兄机名嗟久荒於乔木与诸任齿幸新托於女萝偶因一语之投遂结二家之好英嗣据床坦腹士器非凡某女举案齐眉姆仪未习订金既定种玉奚烦兹逢纳聘之期敢负论财之愧婚媾采葍已言就於尔居币帛承筐又以将其厚意便蕃所锡肃拜已登

回王氏壻聘启

兄弟式相好韓如棣鄂之华男女得及时蕢若夭桃之实正埙篪之共乐宜琴瑟之永谐令弟卓有才名列滕阁三王之次孙女劣无容德生华亭二陆之间作合自天于归有日宜尔室家之壺厚其筐篚之将何以报之永为好也会言近止迨其吉兮橙橘当时旅百既光於庭实柳梅近腊喜多行见於门阑

代聘启

两家生子得及乎男女之时二人同心实重以婚媾之好已订百金之诺今陈五两之仪令侄女四德俱全宜家宜室而某子一经未就学礼学诗既鸣凤之允谐信委禽之非强夭桃灼灼是为亲迎之期采繁祁祁喜有来归之日

代袁聘李启

泛滥奉高之器莫振衰宗声名元礼之门敢攀华胄数仗立冰之语始谐差旦之期令爱在室有仪积工於组紃而某侄过庭无诲废业於简编托根望桃李之春徙荫恨桑榆之晚将子无怒愧乏於良媒待我不来果成於後嫁久矣镜台之人老终然杵臼之仙成虽过结发之年幸有齐眉之日赤绳系足信可验於前缘红彩纏缸慙莫将於厚意

代张聘李启【原注小姨】

留宾翦髻贤可佐於尚书对妇画眉才不如於京兆恃通家之宿好谐再世之前缘令侄女姆训婉从礼不愆於内则某男父书粗读教何有於义方幼年悞中於雀屏中岁暂昏於鸾镜昔参政为薛公之两婿而龙图娶赵氏之九姨曾谓小儿敢希先辈偶仗冰人之语重寻月姊之盟幽女同归正值九月授衣之节鲁人不敏敬陈二年纳币之仪【原注起改云门阑多喜知异味之相投江海一生愧长身之已老】

代李聘陈启

王孙觉贵自惭非李监之家公子出盟安敢望陈人之妇爰仗立冰之请遂谐种玉之缘令爱四德兼能夙娴姆训某子一经未熟初就师谟卜既叶於飞凰射偶逢於中雀问盟已定纳吉有期陈鴈币之五寻侑鲤鱼之尺素六月徂暑近仙桥驾鹄之秋三星在隅候宝扇迎鸾之夕

代陈聘徐回启

择聘徐吾犯妹何待委禽卜妻陈敬仲卿将谐鸣凤信两美其必合不三年而有成令弟学士庸敬在兄有似棣华之韡韡某侄女幼孤依母不知桃叶之萋萋方将借巧於天孙未免盛言於月老用币必百两深愧於论财及物享多仪谨从而拜赐两家生子乐得男女之及时十月为阳多见门阑之喜色今兹纳采何以报琼

代李回陈聘启

师友通家敢尚记登龙之旧子孙有国已先开鸣凤之祥睠然二姓之欢殊非一日之雅令嗣允文允武已尽读於父书侄女言德言容岂足称於女史因久交而愈敬辱前好之不忘远赐鱼緘旅陈鴈币筐篚之将甚厚琼瑶之报未能聘则为妻聊苹蘩之是奉归而宜室看华实之相辉

贺梁介轩婚后

兹审年似刘郎婚如崔氏点易悟枯杨之义操琴感飞雉之音妾咏藕花何须媒氏郎骑竹马不记幼时既协凤占即看熊梦乐得淑女求我士迨其今兮疑是老奴未免俗聊复尔耳

贺人纳妇启

有子克家择日授室富而好礼遥知百两之将贫不以财愧乏万钱之贺顾献芹而何补幸采菲之不遗妇嫁曰归望门阑之喜色客来不速希左右之先容

生男有室归子宜家百两盈门窃鄙荆钗之俭三星在户交辉花烛之光某久辱恩知欣逢庆事微芹采献副楮别陈

贺人赘壻启

兹审令爱孺封吉符鸣鴈仙侣乘鸾男室女家正婚姻之大义君车我笠见故旧之交情谐两家生子之盟为百年偕老之计里闾称叹姻党交欣亲迎则得妻喜见雀屏之壻嘉会以合礼愧非鹿野之宾不腆菲仪具陈副幅

回俞亲家七夕问信

某方结奴车而送鬼又逢女隶之祠星竖子居育若我何举室困纏綿之疾天孙司巧不余界终身怀蹇滞之忧顾何人与白以论文忽此日道甫之问讯天上想秋期之近人间望月影之圆先之俚六之文粲然旅百之实谏议緘开於阳羨右军经写於山阴傲神夫以香 诧新妇之?飴喜具四美莫报七襄第占鹊喜之声豫卜鸾和之吉臣有大拙自甘长竿犊鼻禪之贫君

惠称盟会见绣縗孔雀屏之美

贺冬启

葭飞六琯苦人事之相催梅寄一枝想江南之无有既七日来复为得輿之喜况二人同心如断金之坚顾囊一钱之不留而家四壁之徒立不腆敢犒从者岂曰以充君庖是谓献芹何图报李去寒食百五日此其时乎待明年第一筹属之子矣更祈茂对以迓方来

与王君明贺冬启

才夸赋日笑五色之竟迷节届书云喜一阳之又复觉我襟怀之春盎任渠头脑之冬烘莫遽嗟吾道之穷且共祝斯文之壽葭飞琯内已占子月之初爻梅占花头豫卜丁年之佳?

送冬节启

白雪摧年笑夜行而不止黄云纪节喜阳长於方来此其为君子之亨无以效野人之献伏惟学士抱黄鍾之器当缇室之期暂六鷁之退飞终羣龙之接武自伤贫女岂知绣线之添犹望故人或有绨袍之恋

谢贺冬启

六鷁退飞壮心已矣一阳来复生意茁然缅怀蓉浦之仙人远饷梅檐之诗客珍饌翦园蔬之味玉尘瀹汤饼之香兮柑载咏於苏诗乞米敢烦於顔帖粲然四美暖此一寒爰肃使以拜嘉并修辞而致祝冬烘错认已迷古赋之日华昼短添长请绣今时之花样

答魏教授启【原注时支学粮未得】

某抱病既多惟须药物吟愁已极不觉梅花感令节之书云致微勤而献曝初非引玉何意报琼履阳之七方来受物之三为粲然监侯之粟未贷而使者之馈忽来活我以斗升既不免车中之呼畜之如犬马安敢为门外之獐

答冬至启

影添长线七来复道之亨印启斜封百致旅庭之实维其旨矣何以酬之伏惟某官居然硕果之才允矣黄鍾之器立节凜冰霜之洁存心秉松栢之坚茂对殊休益孚永好而某叹病怀之萧索感节序之峥嵘竹屋多寒久冷地炉之火梅檐小暖顿回江驿之春

谢心困同年冬节送物问病启

与伯符同年所少者非一月往子輿问疾莫逆者无四人嗟天时人事之相催感棣萼梅花而成咏聊尔献野人之曝胡然增驿使之春是谓报琼敢图返璧爱玉体享黄发愿同百岁之期添弱线动浮灰均纳一阳之庆斐然裁答无任感藏

冬至谢子渊兄弟送启

已觉年深风送退飞之鷁又惊岁晚日迎长至之阳吟有檐梅食无瓶粟荷埵簾之伯仲记笔砚之交游心怜野叟之贫岁有廩人之馈问子桑而裹饭此意良勤射后羿以弯弓彼颜有腩

谢夏君范惠鹅酒麪启

君子觐止适我愿兮尊者赐之维其嘉矣幸不拒以訑訑之色又乌用是駢駢者为饼餌香来恨无新妇之巧做麪蘖醴作不待稚子之能賒粢物者三感德惟一簋食每饱想渠渠容夏屋之中鼎肉可尝敢仆仆辞大门之外

谢人惠鷄酒书达而物不至启

伏承高明遥念孤寂赐之双膳先以乘壶偶被饗人之窃更并与从事而乌有不成享也可复许乎嚶嚶辱远赐之来咄咄答空函而去聊资捧腹更约论心

谢友人惠诗墨启

老子作戏未免逢场羣儿不量殆几撼树怒水蟹而不释传市虎以皆惊江生忌王式之来辕固为公孙所目斩颐从教万段卖斂不直分文或按劒以生疑或弯弓而反射妬能自古好善何人伏惟某人阿阁翔鸾渥洼神骏敛翮睨倦飞之羽神手观汗顔之工方且驱臂浮图为师对丑道士联句手加拂拭力借吹嘘色丝幼妇之词过於褒宠子墨客卿之宝勉以琢磨衆好衆恶而必能察焉谁毁谁誉而有所试矣动而得谤况无韩愈之虚名意独怜才有感杜陵之高谊斐然申谢誓以珍藏

谢送物启二首

八十常珍无望深衣之养九三大耄尚能鼓缶而歌方拟合於朋簪忽远承於使聘穀核旅庭之百羽毛充庖之三饮膏恨乏於浅斟煮饼旋加於深注侑之以黄绢幼妇之句煜然为绛县老人之光皤皤膂力既憊可吊也而非可贺仆仆问馈亟拜不受之则为不恭

扶灵壽杖每笑孔光结老人星曾嗤杜甫但愿生前一杯酒何须身後千载名敢夸多喜之門闌惟饋相邀之泥泞与故人饮自谓中圣人可乎有显者来姑以犒从者而已

代回任送物谢启

方旋五马忽惠双鱼有约论心尚未申於契濶开緘见面已先辱於勤渠惊旅庭之实数取之多愧物土之宜一无所有予者伤惠郤之不恭所喜有母以尝羹岂敢对客而卷锦朋友之馈不拜使肃以登玉帛皆君之余我何以报稟酬匡略感激轮囷

墙东类稿卷二

卷三

<集部,别集类,金至元,墙东类稿>

钦定四库全书

墙东类稿卷三 元 陆文圭 撰策问

制使

问春秋王人序於诸侯之上其奉使之始欤然王人微者非有生杀予夺之权也伯主阳推尊之耳汉之部刺史非今之宣慰司与唐之观察非今之廉访按察与太守得人足矣焉用部刺史与刺史得人足矣焉用观察使与部刺史观察使得人足矣又焉用遣使专行与汉元狩六年遣博士等六人分行天下存问鰥寡孤独举独行之君子所举者何人与始元元年遣廷尉王平等五人持节行郡国问民所疾苦地节四年遣使者循行郡国问民所疾苦汉之民何多疾苦与五凤四年诏以前使使者问民所疾苦复遣丞相御史掾二十四人循行天下举冤狱察擅为苛禁深刻不改者所谓苛刻者指前使者与指郡国之吏与遣使者矣又以御史掾继之岂使者不足任使与唐陈子昂有言出使巡按天下莫如择仁可以恤孤明可以振滞刚不避强御智足以照奸者然後以为使輶轩未动而天下翹然待之矣今宰相奉诏有遣使之名无任使之实徒令百姓治道路送往迎来不见其益也子昂之言切中时病然当时何时母乃不可与言而与之言与昔有便宜持节发粟以振贫民者母乃矫制与昔有埋轮都亭劾大将军者母乃犯分与昔有登车揽轡慨然有志澄清者何为不免党锢之祸与昔有以御史出使能动摇山岳震惧州县者何为所行不逮所言与诸生援古证今以对勿激勿谀

养士

问庠者养也校者教也夏专於教周专於养何与养养老也国老庶老何以别上下庠东西序何以分制可考与米廩虞庠也所以藏粢盛非以廩士也五十养於乡六十养於国七十养於学未七十者不可养於学与五十异粢六十宿肉七十贰膳八十常珍皆何所取给与古之士已仕者也未仕者庶民也不得谓之士子輿氏有曰下士与庶民在官者同禄足以代耕而已未升俊造之列者谓之民材指庶民之有材者也庶民不过百亩之田而已游庠序之间者官给之与自给之与东都修黉宇千八百五十室游学至三万余生史不载其营造廩给之费所出唐天宝间二监学者千百数有司乃有学徒废官廩博士濫天禄之讥以此推之廩士之费皆官物也其费隶於何官与监学自掌之与近世学校之盛名都大邑学租以数千石计偏方小县亦不下数百焉天恩浩荡凡贫难老病之士咸沾及之然谓之士则衆所推服者也不为衆所推服者可及之与为衆所推服者可不及之与贫难者可恤也富连阡陌目不知书者在所当黜与老病者可矜也年少惰游不肯任事者在所当黜与风宪之纠核正官之提调有司之干预或过於严则拘或过於宽则弛如之何则可出纳之吝则有司存何以在四恶之列食之虽寡用之既舒何以为生财之道可以与可以无与可以取可以无取取不伤廉与不伤惠

如之何则可若夫版籍不明何以厘之莱田多荒何以辟之监临自盗何以禁之逋负积弊何以澄之养士之计亦学校急务也幸详以告

士行

问尧舜之道孝弟而已矣孝弟果足以尽尧舜之道与舜事难事之亲烝烝乂不格奸所以谓之孝象忧亦忧象喜亦喜不藏怒不宿怨所以谓之弟尧之孝弟果见于何书与孟子何以并称之与王季立而泰伯之荆蛮诗何以言其因心则友则友其兄则笃其庆与君陈曰惟孝友于兄弟岂孝於亲即能友于兄弟与孔门德行科止四人闵子骞以孝称人不间於其父母昆弟之言是也仲弓父贱而行恶顔子先顔路而亡二子不闻以孝弟称何与岂孝弟不足尽德行与曾子养志可谓孝矣而不在德行之科何与信义二字五常中之二也有子曰信近於义似合而为一何与子曰君子义以为质信以成之又分而为二何与人而无信犹车之无輓輓也乃曰言必信小人哉何与君子不亮乌乎执亮信也乃曰君子贞而不谅谅小信也何不同与小邾射不信大国之盟而信季路之一言以其无宿诺也夫子与蒲人盟既出东门而背之岂要盟神果不听与羞恶之心义之端也诸侯之馈曰其所取者义乎不义乎而後受之以不恭也故夫子受阳货烝豚然孟子於齐王馈兼金一百而不受果合於义乎舍生取义二者不可得兼也子路结纓而死知食焉不避其难之为义而不知食辄之禄为非义也召忽舍生者也何以为匹夫匹妇之谅与管仲之不死果合於义乎夫孝弟信义士君子之美行也夫子以称孝称弟为士之次又何与孟子谓大人言不必信又曰非义之义大人不为又何与方今诏下兴贤务选实行必欲乡党称其孝弟朋友服其信义然後取之诸君读圣贤书为君子儒平日之所讲明而服行者果不出四者之外与愿析言之以祛有司之惑

试策

问隋立进士科初试策而已其法昉於汉孝文时有若晁错孝武时有若董仲舒公孙宏其策可考乎错之策明五帝三王五霸之道惟人情终始一节可读余皆泛而不切之词当时何以取之乎仲舒发明天人之蕴舒徐而不迫纯正而不阿何以不当帝心一而至再再而至三乎公孙阿禹汤而薄周公帝何以喜之乎虽然汉之策士去取犹出上意後世则付之有司耳有司公欬明欬犹可言也不公不明则业精行成者皆屏之矣又何以能达上听乎明王可为忠言而诸公不喜生语为士者将专攻上身乎将发愤懣讥公卿乎将上负天子而并负所学乎诸君次年皆将上春官盍各言尔志将以覘斜日丹墀之对

科举

问圣代运啓文明举百年之旷典招多士以兴贤甚盛意也博观往牒历代举人之制其详可得闻欤虞朝敷奏以言是时以言举人欤所奏之言不见於典谟何欤周礼六德六行六艺之目不闻以言举人何欤孔门四科乃有言语宰我子贡之言语可得闻欤汉世孝廉之科取实行也贤良方正止於对策而已以行取之欤以言取之欤隋唐以来谓之策试策始於汉欤後人以词赋并取始於何时欤汉赋最古贾谊司马相如扬子云班孟坚张平子之流最善鸣者

也有益於治道否欤三国而下左潘陆谢之徒极力模仿不及汉远甚唐韩柳复志惩咎等作亦能髣髴於骚否欤明水披沙律赋也近於戏矣亦载之集中何欤方今辅弼之建明专取明经不尚词赋其说曰经学所以修身齐家治国平天下词赋是文之空言吟咏景物而已词赋为空言是矣明经果有用之学欤论语为帝师而党王氏明经举进士而八风舞汉唐之人才何言之相反欤抑厌浮华而取实行不专在于言语文字间欤然不以文取人又何以知其行欤今五经皆本之先儒又参之以四书可谓知所务矣抑古赋与律赋均之空言何别欤诏诰章表虽翰苑之储也然岂非空言欤策以经史时务觐所学也仲舒与孙宏并进裴垍与僧孺同流用而後见欤伊欲经学明而人心正辞章有用而絕浮靡之弊时事谙练而无疎缪之讥何道而可诸君博古通今之才愿闻其说以觐所学

江浙人材

问江浙古扬州域也秦为会稽汉唐以来析为郡县不可胜纪地产人才亦有可论者乎吴延州来第一流人物让国不居卒亡其宗是欤非欤言游吴人文学桥犹存也不仕吴而仕鲁何欤伯言幼节父子与吴存亡走玄德抗叔子才略如此不肯仕汉何欤建中之敬輿庆历之希文皆间气也论諫百篇天章十事有可施於今日者欤闽粤谿谷之蛮古不通中国武夷出朱夫子而西山相继其後四书诗易纲目皆成书也律吕新书读书甲乙丙丁记古所无也学者於此有能究心者否与敢问

课试

问诏下宾兴自甲至癸於是四大比矣澄江士渊藪前乎三举乃未有一人上春官者何欤岂学之无素欤今兹战艺不思所以刷前耻欤学校所以教养人才教养所以备选举也州郡贡之以行考官试之以文文固不可少欤月课堂试所以校文也所以拟乡闈之试也前辈谓试者争高下得失非义逊之风不若改试为课均之时文也课与试何别欤朝廷待士至厚提调有长官训导有博士月有课季有试所以作成人才也挟册而吟泚笔而作者何少欤闻鼓而食指廩而赋者何多欤抑未有劝惩之道欤有司举行于上或者沮遏於下又何欤岂高才不屑於应举欤抑下才自弃於科举之外欤昌黎有言诸生业患不能精无患有司之不明将来闾郡不荐一人岂不为有司之耻欤吾榜得人最多岂不为多士之荣欤槐花将黄举子不忙何欤敢问经疑何以免穿凿之失经义何以免套括之弊诏诰何以免失代言之体章表何以免失告君之体古赋何以及司马二班对策何以类晁董公孙试摭言之将以窥所蕴

水利

问海於天地间为物最鉅幅员万里东南北皆距海而止惟西海未有考或以瀚海青海当之是与否与登莱之市青红变灭信有之与四明之岩光彩现相信有之与蓬莱之山在何许与尾闾之泄在何地与黑水西夷之水入于南海禹贡可详与云帆杭稻之转来自东吴唐诗可考与使节之崎岖饕道之艰险至元以来尝行之矣古道荆棘不知几年蛮商海贾长年三老所不能知也创而开之者谁与姑以耳目所接言之西浙之苏杭东浙之台明温越皆濒海也

鱼盐之所出职贡之所有其利不赀秦汉时自会稽以南以为不毛之地不牧之民何欤陰阳气数盈虚消息亦有时欤宋史载苏公轼守杭杭本江海之地水泉咸苦於是濬茅山之河以受江湖濬盐桥之河以受湖水民获其利然此特导江湖之水耳未闻沧海之为患也考之图志青白沙镇前後洋街坦头沙坑皆海之涨地也自盐官之邑北至秀之海盐昔有以堤扞海今水利不修龙宫失职井邑民居尽为所贪啗齷之勢未已何以御之欤祈禳有术欤厌胜有方欤堤防用人力与消长委天数与朝廷有道宰辅贤明百神受职行见玄冥退舍川后静波矣或者过虑试相与筹之母徒曰土克水

水旱

问水旱之灾尧汤被之矣八年于外六事自责圣人之用心也人皆知之蓄积多而备先具其事可得闻与国不幸有数千里之水旱胡以相恤五行失性阳雨不时浙之西江之东渺为一壑自淮以北沿于宿亳弥月不雨蝗蝻遗种二者兼之矣備御之方抑有可讲者与庸田之设所以筑堤防浚沟渠亦既後时将无益与抑岂可不为後日之虑与山川之神所以司陰阳雩坛之禱坊门之塞果有益与将应天以实不以文与賑廩劝分非目下之急与矫制擅发国有明禁何古人不之恤与大姓闭籴愚民强借官法两施亦有良策与检核之令半是虚文贪吏受赇以十为百何以得其实与寬租已责通商惠工非权宜之策与田毛既空调度何出孝文減半之令果可行与债有公私权行倚阁贫者之利富者得无怨与舟车所至负販通行非懋迁有无之术与关津邀阻价值高昂禁之欤抑听之与守令牧民牛羊立视其死黜陟之典可举与汉唐远矣富公青州苏公彭城刘忠肃真文忠江东之政朱文公浙东之绩诸君亦尝讲求之与此时务也其悉心以对将以覩俊杰焉

備荒

问壬戌之秋浙西水旱相仍民食大禼朝廷軫念元元议賑貸之民获更生有司奉行惟谨实惠犹未遍及何与然事已在前矣天时无常继今豫备之策不可不讲立堤防浚沟洫厚儲蓄修义仓之法严检核之令孰便孰否孰利孰害请条陈之将转闻于上

策

儒学吏治

问尝闻圣门之言曰仕而优则学学而优则仕仕之与学每相因而不可相无也何必读书然後为学特子路率尔之言致取诮於夫子郑子产曰侨闻学而後入政未闻以政学者也譬如田猎射御贯则能获禽若未尝登车射御则败绩厌覆是惧何暇思获使斯言非妄则未之学者决不可使之仕也皋夔稷契所读何书伊傅周召所习何业而所就无非有用之学于斯时也不闻儒吏之说也後世儒吏之说兴遂判学仕为两途矣至汉有儒术饰吏治之语儒吏之分其殆起於此乎萧曹丙魏之徒以刀笔发身其果能合儒吏而为一乎唐宋以科第取士有不由科第出者輒共嗤鄙之而循良之吏代不乏人吏而不儒或有之矣未闻有不学而仕者

子游闻之夫子曰君子学道则爱人小人学道则易使盖言上而公卿大夫下而府史胥徒皆不可以不学也贾谊曰大臣特以簿书期会不报之间以为大故又曰移风易俗使天下回心而乡道类非俗吏之所能为也俗吏之所务在於刀笔筐篋而不知大体信乎不学而仕者真所谓俗吏也何足算哉彼有猴冠麟楦钳署尸餐仰视俗吏之踵若不能以追而及者此辈更可闵也呜呼吏而不学可乎或者则曰周勃之重厚少文霍光之不学无术赵普之半部论语寇準之不及读书皆足以寄大任临大节若此者可无待於学也随何酈食其以腐儒败事张禹孔光以经术误国王安石之徒又以经学乱政因谓深於儒者未必能习於吏也遂使无学者皆得借是以藉口然则儒又果无益於人国乎噫古者之吏非今日之所谓吏员也古者之儒亦非今日之所谓秀才也不求夫古之仕古之学而切切焉析取舍於今之儒今之吏只见其扞格而不相合耳当今圣明灼见吏弊悉易以儒真救时之良法也然吏奸已极革之诚宜而取吏於儒得才能凡愿为酌中之说以俟观民风者采焉

儒不习吏谓之拘儒吏不业儒谓之俗吏儒谓吏曰务刀笔筐篋不知大体吏诋儒曰有人民社稷何必读书二者胥失之然君子不以为吏之过而以为儒之过夫儒者学周公仲尼之道者也周公仲尼者荀卿氏之所谓大儒扬雄氏之所谓真儒也四海皇皇枕奠于京周公用於周之大效也齐人章章归其侵疆仲尼用於鲁之小试也岂博而寡要劳而无功者耶儒於道最高与天地并焉可与簿书期会之间较优劣也彼之所以敢较吾儒者以儒者之效不白於世耳周公仲尼以前儒之名未立也契敷教夔典乐皋稷陈谟安得无书可读耕野之夫开口说仁筑岩之叟开端言学安得无业可习特书非後世之书业非世俗之业耳自周礼有道得民治得民之说而儒始与吏为对自秦人焚六经以法令为师而儒大为吏所摈自汉人以经术饰吏事而儒又为吏所假司马九流以儒者为一流刘向诸子以孟子为一子刘歆七略以六艺为一略彼司马氏刘氏父子汉之所谓名儒而自贬其道如此毋怪乎法家刑名家之喙喙争鸣也吁有由矣泗上亭长布衣时萧曹已为吏掾故酈侯入秦相府先收图籍而不收博士所掌之书平阳侯相齐避堂犹舍盖公而不用齐老先生之说规摹大略可见乃翁素不修文学而萧曹赞之彼随何酈食其之徒正复说客之靡耳而例以腐儒目之腐则腐矣何儒之有周勃霍光皆重厚可托之人然勃少文尝东乡坐召诸生趣为我语其不逊如此一旦逮捕勃窘不知所为行千金狱吏吏以牋背示之幸而获免勃乃叹曰吾今知狱吏为贵也霍光不学谓儒生多谗人子喜妄说狂言心尝嫉之一妄男子诣北阙公卿错愕不敢发言京兆尹至引春秋断之光乃叹曰公卿当用有经术明於大谊者吁狱吏受赇变易狱词京兆证经误引古义汉朝皆不之觉可笑也已史言高祖开基萧曹为冠孝宣中兴丙魏有声然丙魏与萧曹又自不同少卿学诗礼皆通大义弱翁学易对策高第皆稍习儒业因孝宣好法律刑名故二人总领衆职奉行故事考核名实以称上意然相业亦止此尔太子尝侍讌请用儒生帝作色曰汉家自有制度奈何纯任德教乱我家者太子也以当时观之孝宣之言为过然元帝以後孔光张禹用事依阿洶恣党奸误国卒如宣帝所料用儒之弊一至此哉虽然汉儒守章句非科第之秀才也汉吏长子孙非案牘之吏员也走马看花浮薄是习雁行钳纸贪墨是营唐人又愧汉人矣内翰条贯隔截太甚中书吏额纷争不息宋人又愧唐人矣人才不古每况愈下少知治体者岂不为寒心哉或曰坐雪夜地炉之顷定先取江南之策即半部论语之赵书记吟野渡孤舟之句收澶渊一掷之功即未读汉书之寇同年人焉用多学为哉半山老子垢面读书异时青苗取役大为民害是以学术杀天下也余应之曰赵韩王为相焚利害文字於通

衢寇萊公用人叱堂吏不肯檢例簿二公之所為亦非俗吏之所能為也王荊公祖老佛之緒余談管商之末學未為知道者安得以此病吾儒哉大抵近世一種議論上自台閣下至郡縣以趣辦金谷為才以勾稽朱墨為智以不報期會為大故以謹守繩墨為無能納賄成風與奸為市習熟聞見以為當然至於岩穴隱伏之人守道而莫前門戶孤寒之士無階之可入羣非迭毀極力擠排儒風不振久矣朱博謂諸生曰吏奉三尺律令從事亡奈生所言何且持此道歸待堯舜君出而陳之俗吏所言大率類此今天將興唐虞之化而堯舜之君出焉萬邦黎獻共惟帝臣諸生幸得遭遇其時當建萬世之長策輔太平之隆基毆一世之民跡之仁壽之域關朱博之口而奪之氣可也豈止明經取青紫夸一時而榮一鄉哉雖然崇儒道者非止設科目之謂也抑吏權者非止減資品之謂也崇化厲賢彰善瘡惡孝弟申明於庠序之間勤儉儀刑於表着之位意向招徠可以鼓舞羣動政教清明可以臨照百官詩曰鸞飛戾天魚躍于淵豈弟君子遐不作人此之謂也

卷四

钦定四库全书

墙东类稿卷四 元 陆文圭 撰策

选举

问孔子四科曾子不预何与或曰参尚少也有若长矣亦不预何与或曰是从我陈蔡之门人也是与否与德行四人吾无间然宰我有听言观行之戒子贡有不幸多言之讥其言语亦有失与聚斂也具臣也危而不持也颠而不扶也果足以为政事与春秋之作游夏不能赞一辞文学安在与三千之中取七十焉七十之中取十哲焉然而四人之外犹有可疑者甚矣才之难得也汉唐至今以科目取人始也选之以德行又试之以言语又考定其文学之高下既中矣然後责之以政事一人之身四者欲其兼備不又难得与古之论人各取其所长後之取人不问其所短何与皆所未喻也诸君子试评之

有圣门教人之法有朝廷取人之制教人之法有高下优劣之分取人之制有兼收并蓄之意孔门之四科以德行称者四人以言语称者二人以政事称者二人以文学称者二人後世谓之十哲而先儒以为皆从我陈蔡之人曾子有若子张之贤皆不得预孔门之高第弟子固不止此而此亦非夫子之言也门人因夫子皆不及门之叹而记此十人且并目其所长然其才品之高下优劣则各因此而可见盖顔子三月不违仁闵子之孝无间言伯牛之騂且角仲弓之可使南面四人之德行吾无间然矣予赐以言语称而圣人有听言观行之悔有不幸言之戒是言语犹未当也由求以政事称而圣人有为国以礼之哂有聚斂附益之攻是政事犹未纯也游夏以文学称而圣人修春秋不能赞一辞是文学犹未至也圣人设教洙泗一时门人蒙被教育如羣饮于河各充其量闇闇者侃侃者行行者达者艺者辟者嘒者而圣道之传以鲁者得之是四科之说犹未足以尽人才也吾夫子以庇覆生民之器历聘列国辙环天下卒老于行一时门人顔天於陋巷騫适於汶上牛終於牖由死于台子夏适於西河之上无一人得君行道以少摠平生之学者盖春秋乡举里选之法不行宾兴大比之制已坏诸侯弱卿骄大夫侈世臣专政陪臣执命贤人在下无阶之可仕无路之可升白首槁项於深山穷谷之中埋光匿彩终古不见可叹也已陵夷至于战国大坏于秦经入咸阳之市儒入瓜丘之穽而仲尼之徒熄矣汉兴诸儒区区修补百孔千疮绵绵延延如一髮之引千钧时君世主或表章宗尚或厌弃鄙薄随其好恶为之轩輊而吾夫子之道自若也由汉至唐以门地任子弟以科目取孤寒不出两途门地之弊不过纨袴而已不过膏粱而已科目之弊尤甚焉拘於声病止於雕刻言语尚未能也况於文学珉中玉表卮貌蜡言文学尚未能也况於政事画饼充饥谈河止渴政事尚未能也况於德行盖科目之弊极矣天朝神武混一区宇科场条贯废格不用一埽场屋向时之弊士始知有务内之学真人勃兴天下文明断自宸衷不由奏请遵成周乡举里选之法考宾兴大比之制明诏有司必以乡党称其孝弟朋友服其信义为先猗欤盛哉不图今日复见成周也执事先生首主斯文之柄下策承学以孔门四科之别而有感於今日取人之制愚不敏窃有叹焉孔门之教人一人各专一科而今日之取人一人欲兼四科岂人

才盛於古耶是不然一人各专一科者直指其实事也一人欲兼四科者髣髴其意也愚生固不敢厚诬圣代以为无人然四科以顏子为先顏子之下不闻复有顏子千顷之黄宪不足比也四科以子夏为後子夏之歿不闻复有子夏小冠之杜欽不足数也士固不望其人人如顏淵然何可以不希顏淵也士固不望其人人如子夏然何可以不慕子夏也今以孝弟信义取人纵不如孔门之德行而事亲从兄交友待人之际可轶蕩於规矩準绳之外乎今以五经四书取人纵不如孔门之文学而格物致知穷理尽性之学可视为空谈止於套括而已乎今以古赋诏表取人纵不如孔门之言语而代王言而主讽谏宣上德而尽忠孝可不以诗书为程準而止於宏博而已乎今以时务对策取人纵不如孔门之政事而朝政之得失民间之利病斟酌於古便宜於今者可不以董贾为比拟而止於制科而已乎呜呼以千余年科目之积弊而骤革於今日以百余年文体之不振而更新於今日为多士者当何以称明诏而奉隆旨哉劝学崇化风厉四方上之人责也行义达道尊主庇民下之人责也诗曰追琢其章金玉其相勉勉我王愚敢诵此诗以为今日贺诗曰有斐君子如切如磋如琢如磨愚敢诵此诗以为多士劝

农桑

德者本也财者末也农桑本也商贾游民末也上之人外本内末则财不足下之人弃本逐末则财不足是故重在务本圣人守位以仁聚人以财理财正辞禁民为非以农桑为急务人一日不再食则饥终岁不制衣则寒饥寒迫於人之肌肤欲其亡为奸邪虽慈母不能保其子君安能保其民哉是故导其衣食之源絕其饥寒之路民可使富也自耒耜取诸益而茹毛之风革自衣裳取诸乾坤而衣皮之俗易三皇邈矣制莫详於虞周禹贡豳诗啻啻皆精语三壤成赋而秬秠粟米供於甸服之内桑土既蚕而织文丝臬纳于贡筐之中于耜举趾饁妇同於南亩十月纳禾之张本也采蘩猗桑筐女遵於微行九月授衣之收功也人徒见虞周之民无冻馁之患者而不知三事以正德居先六府以修谷为主罚二十五家之里布以禁游惰通三十年之国用以均出入上不外本而内末下不弃本而逐末虞周可谓知生财之道矣自时厥後井田废而无土着之民生之者寡矣封建坏而去班禄之籍食之者衆矣徵用其三而民有殍为之不疾矣彻取其二而君不足用之不舒矣邹国一叟恳恳为时君言者不过五亩之宅树之以桑百亩之田勿夺其时而已此一章凡三见终始不易当不夺不厌上下交征之时而进不饥不寒然而不王之说安得不以为田夫野老之俗务耕奴织婢之鄙谈然仁政之本莫大乎此自仁政之说不售战国折入於秦秦为无道虐用其民男子疾耕不足於粮饷女子纺织不足於帷幙民力不堪秦亦以是虚其国汉兴天下草创百姓思乐息肩文帝恭俭寬仁爱人节用帝亲耕藉田以供粢盛后亲蚕公室以供祭服不可谓不务本者诏令数下一则曰为酒醪以靡谷二则曰纂组以害女红不可谓不务本者然不能使末技游食之民转而缘南亩奚止酒靡谷而已不能禁倡优下贱之人不得为后饰奚止害女红而已汉之为汉五六十年公私之积犹可哀痛贾谊晁错掇拾孟子余论复屡屡陈之谊之言曰仓廩实而知礼节一夫不耕或受之饥一女不织或受之寒生之有时用之无度则物力必屈今背本而趋末者衆淫侈之俗日月以长天下财产安得不蹙错之言曰圣王在上而民不冻饥者非能耕而食之织而衣之也为开其资财之道也今地有余利民有余力生谷之地未尽垦山泽之利未尽出游食之民未尽归农也二子亦可谓知本之论然孟子专论王道二子杂伯者富强之术观者不可

不察也今南北混并天下一家烟火万里农桑满野昇平之业视汉有加然而经制不定徵敛无艺赋入虽广调度实繁天时不登地力有限加之大官窃禄小吏侵渔商贾操市之奇赢缙黄侵国之经费困穷失职贪惰成风长此安穷救之无术设使晁贾二子复生於今日亦当苦口进言而昔所建明有宜於今世者有司条陈之以次施行可也杏花菖叶东作方兴戴胜鸣鸠柔桑可采兹惟时矣孟子曰民事不可缓也惟上人之留意不然二月卖新丝五月粜新谷将有诵聂夷中之诗者

田制

问孟子答井田之问曰夫仁政必自经界始又曰经界既正分田制禄可坐而定也正经界均井地平谷禄诚为国家之先务矣自秦废井田开阡陌汉因之无所改至王莽欲复井田更名天下田曰王田皆不得买卖于是农桑失业百姓日以凋弊魏文行均田法最为近古历周隋及唐而定均田口分世业天宝以後归于兼并之家而口分世业坏矣使井田可复何为王莽行之而弊使井田不可复何为魏唐行均田而便於民抑井田之法非口分世业之谓耶方今笃行仁政经理田土酌古揆今富国便民之事无出於此或者奉行未得其策滋以病民遂使良法美意藐然无成效诸友讲明于此熟矣愿相与推求其要以俟他日大廷之对

封建古法也司马晋行之而叛者起肉刑古法也汉文废之而人心悦井田亦古法也新莽傲之而失业者怨然则古法不可行耶曰不可行则古人不行久矣夫行古人之法当得古人之意故有尊贤亲亲之意则可以行封建之法有尚德缓刑之意则可以行肉刑之法有损上益下之意则可以行井田之法不得其意而守其法是为徒法徒法不能以自行吾观孟子答文公井地之问凡二章始言贡助彻之异继言公田世禄之制又言君子野人之别而终之曰此其大略也若夫润泽之则在君与子朱文公释润泽二字谓因时制宜使合于人情宜于土俗而不失乎先王之意也然则先王之意奈何曰恭以礼下俭以取民仁以行政其在上者如此庠以养校以教序以射而人伦明相友助相扶持而百姓睦其在下者如此当是时也白坟黄壤青黎之地皆声教渐被之余而陇上辍耕之夫安得鸿鹄之兴叹乡师党正闾胥之间皆德行道艺之选而绦县老人之年安得泥涂之久辱大田之诗曰雨我公田遂及我私言天意本雨我君之田我因蒙其余惠耳噫嘻之诗曰骏发尔私终三十里戒尔民当大发其力于尔之私田无尺地之不耕也苏氏曰上之告民则先其私民之奉上则先其公上下之间交相忠爱如此法禁以厉之坎号令以迫之坎刑赏以诱之坎亦君民相与之意耳阡陌开而贫者无立锥王田禁而市道有泣涕仲舒师丹限田之请不行於汉汉民之不幸也魏文周隋均田之制卒定於唐唐民之犹幸也塞兼并之路减田宅之价此议法之善者口分给老小世业传子孙此立法之善者然亦徒法而已杨龟山尝论王荆公新法之弊引明道先生之语有关雎麟趾之意然後可以行周官之法度大要归於正心诚意之效龟山盖深识此理岂鄙儒之所能语俗吏之所能知哉度田之法为之以渐持之以久本之以信济之以宽严而从於宽权之以义利而主於义酌之以今古而宜於今慢经界者始于污吏务财用者始於小人与其百姓不足不若君不足与其有聚敛之臣宁有盗臣渊中察鱼不祥置中掩兔不仁大弦急则小弦绝耒耜夺丁男之利丝纆竭红女之力普天之下莫非王土岂屑屑计此桑宏羊宇文融之故智不可用也昔周世宗夜半读元微之均田图慨然叹曰此致治之本也诏颁其图使吏民先习知

之期以来岁大均天下之田彼区区五代之君犹能留意民事如此况上嘉唐虞之令主乎昔郑子产为政一年国人诵之曰取我田畴而伍之孰杀子产吾其与之及三年又诵曰我有田畴子产殖之子产而死谁其嗣之彼区区列国之卿犹能不失民心如此况愿为稷契之良臣乎迹者经理之法良法也有司奉行未得其意尧仁如天亦既与之更始矣快活条贯次第举行执事犹以成效藐然为疑何哉仆也识字耕田夫耳愿受一?而为氓乡校议执政夫我则不暇

流民贪吏盐钞法四弊

策者所以料成败计得失明是非审利害也词藻云乎哉记诵云乎哉科场废不用四十余年学士老弃林丘遗书束之高阁然时文之弊亦扫地尽矣天诏兴贤策以经史当世之务以求博古通今之才于是执事下诰承学以四者之弊书生不达时宜颇谙往事管窥壁听粗有千虑之一得敢因明问而条陈之盖今日之弊有四所以救弊之策十有二救流民之策三一日择守令二曰轻赋役三曰议赈贷天灾流行国家代有区画儆御在得其人古之循吏所至郡邑浚陂渠立堤防课农桑广储蓄四民乐业安土重迁设遇旱潦恃以无恐今也为人择官不为官择人千里之师帅教令不先百里之父母抚字不职郡邑无承流宣化之人朝廷无考课黜陟之法常平之政不修社仓之义不劝劳徠不怠招集有功者不闻显赏阖境逃移户口稀疏散者不必受罚何异受人之牛羊立而视其死欵此守令不可不择也小民难保天亦哀矜本固邦宁若古有训昇平之时犹宜轻徭薄赋灾歉之後岂堪虐使苛徵且乡田同井谁甘死徙维桑与梓岂不怀归而余粮栖亩责之全租一室县罄算之口赋检覆之额未宽追呼之费已重役半饥之氓隶兴不急之工役良由此邦之人莫我肯谷所以逝将去女适彼乐郊九重勤恤之旨屡颁田里愁叹之声未息是谓上慢而残下不能已溺以视人何异扼饥者之吭而夺之食乎此赋役不可不轻也民以食为天不再食则饥方其遇灾之始倘为措置之方通商劝分薄敛已责但有苟旦夕免沟壑之计谁无恋坟墓保妻孥之心惟其守死之余遂起逃生之念山墙野水露宿草行蒙袂嗟来傍人门户岂得已哉而所至之处不能存恤官吏便文自营封廩不发驱之出境委曰无他愚谓宜留者给之闲田贷之牛种行者与之裹粮续其口券复业者返其田宅正其疆界利其家复其身可也凡此破除之费一出公上之储国家富有四海仁圣视民如子岂与琐兮尾兮流离之子较是区区者哉此赈贷不可不议也革贪吏之策三一日清选法二曰均俸给三曰严纠劾官之失德宠赂日章源之不澄其流滋蔓方今大小之职颇稀清白之风良由入仕之初但由保举夤缘请托靡隙不钻既仕之後不试贤能日月为断不推功效阅阅是先吏掌铨曹有如互市视阙之久近计秩之崇卑尚未属厌不无淹滞高下在手迟速在心营求之力既殫取偿之意愈急驱车在道见物垂涎不畏莫夜之知殆成白昼之攫而况幸门旁启中旨特颁又出于常调之外者此选法不可不清也分田受禄古有常制苟无君子莫治野人吏俸不足以代耕人情必至于内顾虽欲洁身势有不能故其廩糈宜从优厚王事鞅掌终窶且贫勤而无怨者能几何人非礼不怀非禄不劝见便则夺者夫人皆是今越在内服取家辽远不遑将父京师薪米旅泊良难月之所得不供日之所需故人思补外不乐内迁越在外服则大江以南优于内地圭田之多寡视列郡之肥瘠差等不为定制有无不能相补夫不足以养其身而徒以禁其欲欲无侵渔百姓难矣此俸给不可不均也总于货宝古有常刑杖之朝堂罚不为过今列郡置于监司监司统于御史又有监察之职迭司举

案之权然而根党钩连顔情易稔交通诡密冤状莫伸当道之狼慑不敢问依社之鼠忌不欲言间有不畏强御之才反招过为矫亢之咎未能致辟旋已报闻遂令碌碌之徒思受容容之福甚至与奸而为市有同监主之盗财风宪谓何纲纪日坏岂所望于天子耳目之官哉此弹劾之不可不严也拯盐法之策三一日减官额二曰省职员三曰恤亭户盐者国之宝天之所生地之所产晴风朗日苦雨陰霾盈缩有时消长不一自兴利之臣图进身之阶但知数羨遑恤额亏视初立法不啻数倍岁煎之利有限官给之本几何输既求赢出宜长价灰砂夹伪铁两求余况揜越于官豪致抑塞于商贾出门之引转鬻在场之数虚包长此安穷救之无术不思公私之积务要流通慈父稚子情所不忍上损下益於计曰宜此官额不可不减也转运之职始于开元在後租调度支漕运盐铁酒酤贡举按察之权皆隶此官今既分有所属所掌唯盐似宜从简而张官置吏有如大夫六曹分案动至溢员公事既稀复营差委场官已备安事催煎案牘无多岂宜典史如监运称盘之类检校管勾之名色目横生弊端百出一官之下必有数卒纵横井邑莫敢谁何衣食所须包苴所入盐课之外他无藉手巧为支破公然剋剥利亏于官而不亏于此辈害及于下而不及於汝曹设使尽汰冗员正亦何妨国计此职员不可不省也滨海之民以牢盆为业勤苦尤甚春不得避风尘夏不得避暑潦天时不顺则失其利官本不敷则失其利盐丁逃役则失其利利耗民散亭场空虚于是迁拨之令行而亭户重受害矣黠者行赇而规避弱者吞声而受役倚权上交于台府发愤变激于里闾破产立偿轻生何忍令甲虽严于私贩巡兵陰纵其横行势有相容情难独禁莫若效古之法听其与商人为市而官收其税数年之间亭户稍得苏息而官亦无不利焉而其法又当熟议而行之此亭户不可不恤也称钞法之策三一日住印造二曰节用度三曰禁奢侈古者以货为币采铜为钱无所谓楮也汉以鹿皮荐璧民间未始行用唐有飞钱之制轻装以趋四方合券而取京师楮之渐也今中统之造五十余年矣物以少而贵多而贱贱则折阅贵则宝重此势然也易之以至元以五準一犹云可也更之以至大低昂太骤民听惶惑已行辄罢亦势然也故虑楮之轻莫若住造民间鲜得市价自平取数既多後何以继或虑经用乏阙则又有说矣此印造不可不住也朝廷初平中夏是时未有钞法贸易不过丝银科差以是为準官府创立制度一新征伐四出调度繁兴未闻有乏财之忧也江南既平库藏充溢金帛如山而用之者舒矣外而四方之朝聘内而千官之俸秩近而诸司之侍卫远而边庭之供亿日增月盛时异事殊而况赏赐滥及于俳优营缮力殫乎工木商舶市宝价莫得名藏室翻经费不胜计山林莫供于野烧海水终泄于尾闾桑谷渐空工役方急楮轻物重职此之由真人践阼躬履节俭力改前非然财散不可复收弊久未能损革此用度不可不节也勤俭者衣食之源奢侈者匱乏之本古者衣服有常上下有制今倡优得为妃后之饰皂隶可僭公卿之服涂金织翠佩玉曳縞物直如之何而不穷古者游末有禁务农为上今鸣钟鼎食酺酒割羊何曾下筋万钱不足毛仲请客百事皆備财产如之何而不耗今世以豪侈相尚俗以淫靡相煽上行下效风流波漫惟其取之无术用之无艺是以生者莫给作者莫供盖钱陌轻微百物腾踊之害小而工贾得志兼并伤农之害大此奢侈不可不禁也故凡四者之弊已陈於前而十二策之可行与否则在乎上之人择而用之耳然探本寻源又有所在而明问之所不及则草茅管见亦未敢究极而言之也执事览之终篇勿以为老生之常谈

卷五

<集部,别集类,金至元,墙东类稿>

钦定四库全书

墙东类稿卷五 元 陆文圭 撰序

古今文孝经集注序

孝经大学二书先儒无有分经传者离经析传自朱子始二书皆孔曾传授心法二传成於曾氏门人之手经文首尾相应文势连属辞约理备言近指远非圣人莫能及传文分章画句次第相承井井不乱其为覆解经文无可疑者窃尝伏读二书自心而身而家而国而天下自天子而诸侯而卿大夫而士庶人自格物致知至於絜矩自爱亲敬长至於追远大义数十若网之有纲若裘之有领顾自汉儒以来笺释不明久矣东阳厉君直之参考孝经古今文萃诸家自为一编西州史先生为之序先生之言曰自古国治而天下不治者文王是也家治而国不治者曾闵是也身治而家不治者舜是也予读而疑之已而得其说曰文王之国纣之天下也曾闵之家定哀之国也舜之身瞽瞍之家也吾家吾国吾天下斯治矣二书本末古今不易易之则乱申之则治以余之说读厉君之书思过半矣虽然大学经文二百五字一字不可损益传十章错简虽多存者皆格言也孝经经文四百六十二字已不免离析增加之失传十四章多裂取他书之成文而格言所存无几矣大学传引诗十二朱子取其反覆吟咏意味深长孝经传引诗十朱子刊去其文二书去取甚明厉君真此谈彼何也君曰世以孝经为童蒙小学之书不知其兼大人之学今吾本朱子之说阐而新之使为人子者知立身扬名之义全而归之父母之身庶孝道之一助云尔余曰孝经为童蒙之书未害也张禹传论语杜钦明五经童蒙之弗如君方诣阙献书闻余语默然良久曰吾不负所学

三国六朝事实序

尝怪舜禹所都在太行以西黄河以东而巡狩朝会之地南抵苍梧东并会稽相距万里何哉想其时风气肇开民物阜殷笃近举远四海为家无南北疆理之殊也自太伯仲雍之窜而中州视荆蛮为陋自若敖蚡冒之兴而荆蛮与中州为仇自巫臣子胥之奔而吴通於上国自勾践范蠡之起而越伯於东方并兼於秦亡秦者楚也总一於汉分汉者吴也自吴黄龙迄陈祯明三百二十一年皆都建业迁武昌江陵者仅十年耳晋地最广乃承中原播荡之余陈地最狭实继侯景丧乱之後其间创业之君如权如裕下至萧衍霸先之流皆有可纪及其亡国则奢淫昏暴之所致归命侯而下是也辅治之臣如逊如安下至王俭徐勉之徒皆有可书及其误国则权奸谀佞之所致孔范而上是也是区区六朝者其胤祚之修短其风俗之媿恶其法度之兴废其官制之沿革其兵戎之胜负其盛衰强弱之势其混合分裂之形其得失是非之证上稽天时下察人事前列简册後存龟鉴呜呼悲夫潼川杨君手编江南六朝事实畦分田列粲然有条其嗣师文出以示余余三复焉为之废书而泣仰屋而叹嗟夫余不幸而不生於

舜禹之朝身不及见太和之盛幸而不生於六朝之际目不及覩危乱之形俯仰遗编神融意会杨君之作是书也有心哉或者见其门分类别谓是可以训童蒙利初学噫童蒙所当知者奚止区区六朝事实而已不有班马诸书乎杨君不取乎班马而顾为是区区者杨君之意余能知之非童蒙之所敢知也杨君名某生端平甲午春秋六十有七矣

喜雨诗序

壬戌之岁夏仲不雨秧苗渐稿里农皇皇郡官僚各出俸金议祷龙湫湫在沙山之麓距城六十余里衆憚暑莫往同知州事理侯伯雍慨然请行即日买草屨屏驹从步出城东门至横塘之西陰云骤兴雷雨交作衣裾尽沾侯露次於野晨诣湫上焚香而退四顾村野甘泽沛然老稚迎拜懽声载路土民争为歌诗以献而属叟为之序夫天之苍苍不可俄而度惟至诚能动之祷祈之法一以诚为主求之而应自顾何以得此不敢以为喜求而弗获不敢怠吾心退而省其愆春秋传曰闵雨有志於民者也僖公務农重谷可谓有志矣故经书六月雨而诗有駉以颂之今之歌诗与古不类亦颂之遗意也殆以志喜云

农桑诗序

泰定改元甲子制书下郡县以学校农桑为急务官吏奉行惟恪是时秣陵路句曲令程君首劝率十有六乡课种桑四十余万株布满一县县治後有废圃隙地荒秽不治君手摘瓦砾吏民争趋焉旬余平坦植桑八千森列如戟暇日引县庠诸生观之登丘四顾而叹曰桑者衣之源而惰农弗知今吾先之劳之後人必有享其利者夫民难与虑始而可与乐成也於是诸生争为歌诗以记其事君勤於治民尤留意学校招师训以规矩士竞於教弦歌之声相闻真能以诏书从事者其治行为江东诸县最云

瑞麦图序

大德改元之九禩春三月至尊发德音下明诏务农重本养老恤贫议贷寛徭赐今年官田租什二所在金谷逋不能偿者悉蠲除之万姓大悦先是江浙岁比不登旱涝为灾有司体核未能如式元元怀忧膏泽随下所以孚格天心导迎和气信有兆也夏五月麦大熟甸人献麦一茎三穗得诸暨阳白鹿之原民许氏家其占为有年州人动色相庆谓前所无图以诗之侈张其事请闻於上惟汉之渔阳吏善为政两岐之歌流传至今盖生物一本乃理之常生二生三为奇为瑞今兹奇瑞视汉有加夫年之丰凶虽系乎天亦系乎政之得失政自上而下者也善政致祥兹其验矣守土臣不敢自以为功谨摭民谣列之篇次自附於唐叔得禾之义以显扬国家之休命

任叔寔遗藁序

余往来古杭五十年纳交南北胜士甚衆庆元任君叔寔籍籍有文名曩一见於南谷坐上恨不得倾盖而语泰定间君之嗣子良吏於澄川因出先人手泽示余将摹而传之余然後尽覩

君之文记序碑铭高古特甚长吟短韵清雅有余无一点尘俗气近世号为文士略无能过之者彼皆树声望而躐清要俯玩一世志得意满而君独困蹶坎壈布衣终身不沾一命命也夫时也夫命者厄於天也时者穷於人也每观汉隋唐史所载诸人遗集无虑数千百家宋尤倍之然传至今者百无一二非惟一时所作不足以传後而宋以前无锓梓手抄默记故为艰得近世镌刻尤多流传至广传而好之者鲜矣况敬而服之乎叔寔之文可服者也良金美玉定价於当时而文人才士定价於身後叔寔未没时忌而訾之者亦有之矣呜呼後世岂无扬子云哉眷本脱误数十字余一一是正而归之子良慎宝之哉

玉田词源稿序

词与辞字通用释文云意内而言外也意生言言生声声生律律生调故曲生焉花间以前无杂谱秦周以後无雅声源远而派别也西秦玉田张君着词源上下卷推五音之数演六六之谱按月纪节赋情咏物自称得声律之学於守斋杨公南溪徐公淳佑景定间王邸侯馆歌舞升平君生处乐郊不知老之将至梨园白髮吴宫蛾眉余情哀思听者泪落君亦因是弃家客游无方三十年矣昔柳河东铭姜秘书闵王孙之故态铭马淑妇感讴者之新声言外之意异世谁复知者览君词卷抚几三叹

送丁仲谦归东鲁序

山东之地古多君子守经学而矜节行其天性则然自齐鲁建国以迄唐宋风俗不变矣不幸六七十年连厄於兵故家遗老典刑文宪日以湮坠然其间岂无特立独行之士卓然不为流俗所变者岩居野处顾亦莫得而知焉而江左僻在一隅声问复不与中华相接尤未易知之也岁在丙子天下大定车书同文轨自南而之燕者道济汴自北而游宦者乐江浙繻节往来道路无壅於是周公太公之先烈仲尼孟轲之遗迹名臣贤士之风猷悉得於所见所闻而江南之士见闻日广余尝有太史公之志欲周流天下访古尚友考德问业而困厄未之能也庚辰冬仲谦丁君实来申江君鲁人也余一见而知其为隐君子矣已而交之愈深知君愈详君性刚介遇事辄发不屈撙於物好面折人短不少恕权贵或召之辞不往或往议论不合拂袖竟去故见者严惮之然闻人一善咄咄誉之不离口诲诱後进獎予人物谆谆惟恐不逮间与人谈时事先见逆料如龟卜然人服其识所守廉洁非义所在一介不取与人交责以善道急难则以身赴之虽挫厄不悔其为人大略如此亦可谓特立独行卓然不为流俗所变者矣以今山东之地而有古君子其人岂非圣贤之流风遗泽尚有可寻者哉余以文翰辱知於君间谓余曰吾老矣无经世之志又性寡合与物多忤将屏絶人事耕田筑室退而老於济河之上子盍有以赠我余应之曰君修身守道老而弥笃余少年学未知方何以为赠自念今别之後当益潜心增所未能养所未至使异时学业少自表见於世庶不负知己而卒为善士也君其许之乎君笑曰然因笔以志之

送史药房序

陆子读孟轲氏书至周霄问仕一章喟然而叹童子隅坐而问曰夫子何叹曰嗟乎非尔所知

也曰出疆载贄礼欤曰礼也曰其礼可得闻欤曰孟氏固言三月无君则皇皇如也仲尼亦曰鸟则择木木岂能择鸟乎曰左氏之言是非孔子之言也昔者箕子过故殷墟而麦秀之歌闻者泣下终不臣周老死朝鲜之东武王非可事之主乎乌在其择木也曰箕子纣之诸父贵戚之卿也宗国颠覆固无臣仆之理矣曰孤竹君之二子岂贵戚之卿欤踰燕而北不识朝歌之市也扣马而谏采薇而食武王非可事之主乎胡为乎首阳之颠也曰武王应天而顺人二子特立独行而不顾者也夫特立独行君子之高致非天下之通义也殷士肤敏裸将于京则天下从之不从者独二子也曰殷士之归周京犹夏士之在商庭也士之仕也夏不可则去而之殷殷不可则去而之周周衰政靡土裂则之鲁之晋之秦之楚矣仕如此其急也然则烈女不践二夫之庭非欤曰何可非也士固为知己者死女固为悦己者容也以衆人遇我则衆人报之以国土遇我则国土报之矣曰豫让侠士未闻圣贤之大道圣贤之心亦以衆人待其君乎曰迟迟去鲁三宿出昼孔孟固未尝以衆人待其君然而合则留不合则去可则进不可则退未尝滞一国而淹三年也曰孔孟之皇皇为贫而仕欤抑将以行道也曰固将以行道亦有时乎为贫盖谏行言听膏泽下於民君子之心也抱关击柝乘田委吏岂其所欲哉诚不得已也君子救世之心重而利己之心轻利己虽轻而所以自任者极重救世虽重而所以去就者甚轻学者宗孔孟是曰中道贤者过之不肖者不及也曰後世之仕也为贫而已矣亦有如古人之行道者乎曰四海之大九州之广不可谓无人耳目所接则西州史先生者亦其人也曰先生何如曰先生博学而笃志由义而居仁守先王之道以待後学之兴宗孔孟之教者也曰先生大儒世莫能用其将遁世而无闷者欤曰先生之心以为一命以上皆可以利物故虽褻裳而濡迹犹或屑为之然枉道以徇人则亦弗为也道之将行而斯文未终丧也先生进而得位斯民犹得以被先生之泽天未欲平治而岁月不我与也则着书立言俟往圣而期来哲亦先生心也曰然则用舍可必乎曰用舍天也童子何知焉居数日先生将如京师帐饮郡城南楼陆子为坐客举其语先生微闻之笑曰余行亦良苦子自爱毋多言

送曹士开序

江南以儒试吏名不登礼部者不在吏部选其弊也士不能执弓矢而国以弱亡天朝神武混一区宇尽矫前弊以法制从事自中州而之官南土者大率皆资性纯朴材力猛健之士故所至俱以吏能显而精其能者亦自谓毛锥子无复用也岁在庚辰济陰曹君士开佐暨幕府始至观其议论州人相与惊曰曹公儒者今儒者亦为吏耶已而观其政事则又相与惊曰北方儒者不徒以其名闻顾有实用如此耶君闻之笑曰儒之道顾安止此於是益聘名士崇礼学校孜孜焉求所未闻公退之暇书籍不去手执贄而见者无贤不肖悉延纳盖将食举箸而废者日率三四以为常其好贤乐善之心出於天性士亦以此多归之故声名籍甚同僚有忌其异己者每加排毁甚则以谤加之君亦不顾居之自如盖君子进德修业如川之方至渊源深厚盖非初来时比矣瓜已熟而代者不至君久任谙江乡风俗益留意民事会开浚漕渠修东征楼船符檄旁午调度繁兴跋涉雨雪中竭力尽瘁寝食俱废民以不扰而事亦集邦民德君之深而君每自言权任不专恨不能尽致力也丙戌春东征事解始获释印其秋北归祖帐於江城之隅士若民泣别者以千数拥马首几不能行或曰异日绾州绂乘使者车公其复来乎或曰公不来矣兰台鸾坡横飞直上岂再落南乎郡士陆某从旁解之曰留暨阳惠止一州在朝廷惠及天下一州不若天下之广也则皆应曰诺君遂策马径去是日也歌诗以饯者甚衆

衆属某为之序故书

送何泽仁序

一潭何先生咸淳间横经申浦余时尚幼习举子业先生一见器重为忘年友朝夕相过从浩歌饮酒抵掌谈古今事意人间世此乐常有也乙亥春溃师江上器卒满城守弃印绶去先生独留州人奉以为主肩輿巡城叱乱卒归营伍塹关自守閱月警报益急一夕余与先生对榻而卧偃仄无寐余曰时事奈何先生叹曰吾妻子附海舶归守先人坟墓知得达否吾留有死尔会盗起西境上斩关而入先生衣冠坐讲堂上左右侍卫皆散盗不敢犯请与俱出遂东如海陵後有自淮南来者曰先生卒矣呜呼天不予善人以至是也心事之落落能白於後世否耶自先生没余更忧家事益废与世益弗谐索居十二年矣今年春永嘉二士扣门谒入视之其一则泽仁何君也余曰是非一潭先生子耶曰然因记从游时泽仁才十许岁隅坐撰杖屨眉目如画曾几何时而今之志气耸壑而昂霄矣追思曩时殆涉梦境君顾不能以尽记忆也余方悲慨之余继喜善人之有後盖不可谓天道之无知而犹冀其卒有成也则从而扣之曰君今何学今来何为君曰自昔之归家国俱破北望泣血何嗟及矣踽踽独行之身尚赖宗亲之老与乡之二三父友克相以有立也黛井之西先人之敝庐在饮水读书其上将终身焉又思男子之学壮而行之於是有四方之志吾先子死事朝廷尝録其劳不肖孤大惧弗任愿有请焉不识以为何如余谓四方之志非独吾子有之余壮年亦窃以自负也心与事以交驰志与命而相违视天下事无不可为而终不能以有为故不欲为之矣吾子之欲为之也齿方新而气方鋭人力无不至焉天其卒有以相之亦未可知也然吾尝闻之士起徒步致富贵过家上塚衣锦昼行者季子买臣之为也下泽之车款段之马浮沈乡里优游卒岁者少游林宗之为也昔人各行所志尚论者互有取焉永嘉多名流雁荡白鹤意其有隐君子者子归试以余之言复之其必有所择也

送史德甫序

史自文惠起书生跻位保傅家传鼎鼎门列桀戟汉之金张唐之萧崔也二百余年下逮德甫五世矣乃始被服儒者从诸生游调官暨阳学舍德人之容吉人之辞望而知其为佳公子也其文雅而不浮其行端而不倚退而服其为贤师儒也余於德甫有世旧交与余深间谓余曰李文饶薄进士而重先泽於义何居余曰文饶姑未暇论先文惠非进士乎文惠教授永嘉迁太学正异时勲业家乘详矣君忘诸乎嗟夫书生未易少也六经经世之具庠序教化之源学官卑之无甚高位然抱关击柝之上也德甫曰不然抱关击柝为贫而仕尔官於学者大将以行其道而今莫之行也次将以行其志而又莫之行也吾有先人之敝庐一区有负郭之田二顷则不为是行矣余曰是顔子之意也彼顔子也居於陋巷足不至米廩东序之间然一日为邦则乘殷之辂服周之冕鲁诸生必不办此君其勉之德甫曰子言濶远於事情姑相与论学事尔何至是余曰士不希顔奚学而可德甫默然居无何卒解官去祖道城南相与握手举畴昔语感慨久之遂书以为赠

送甘公亮序

岁在甲午仆始得废地数亩於城东隅与老农圃鉷基蓑笠从事一日饭已憩息檐下乡之耆士帅羣子弟造庐而请曰郡博士甘君公亮老於文学讲授有师法性方介闻人善誉不容口嫉恶如仇讐朝夕饭脱粟肉不兼味始至米廩告匱择慎金谷者司之出纳弗与闻已俸外一毫勿取复捐半以繕学以故士竞劝殿阁门庑丹堊一新人皆称其廉能同列有欲云云辄持不可皆大怒久而见其无私卒亦心服居二年代者已至人曰铨法以考计资君未及格奈何君曰克让美事也不知其它顾小吏趣持印去多士太息固请留不可则相与投牒有司请留君有议欲闭蕃空舍中者衆谓博士实知子今博士垂去子计将安出仆笑曰诸君奈何不听公亮去乎吾闻公亮寓浔阳时终日徜徉匡庐泉石之下悉取柴桑翁诗和之昔翁以乙巳岁仲秋守彭泽令冬十一月间督邮至即敛裳宵逝在官适八十余日固不复为资格计也渊明本不计资格资格何足以得渊明哉嗟夫後世考课之法非古之法也後世学校之制非古之制也君子之仕也大将以行其道而莫之行也次将以行其志而亦莫之行也则亦已矣公亮负三宜去诸君奈何不听之乎出处无心久速无期见可而仕不可则止一宜去太夫人老矣事君之日长事亲之日短二宜去况柴桑以高风规我庐山以泉石要我三宜去仆年四十始学灌园不复闻当世事为我致意公亮何不寻君遂初赋耶衆闻仆言恍然曰是不达时宜不足与计者去之居无何公亮卒受代去仆追而饯之南塘之涂授以前说公亮叹曰是吾心也闻命晚矣公亮名某其先广汉人仆江陰陆某也

送洪中行序

余读宋史至洪忠宣公奉使女真始末未尝不为之废书而泣曰嗟乎孔子称使於四方不辱君命忠宣有焉假令尚在愿为之执鞭而不辞者也乙酉之春始识公之裔孙中行父於钱塘清规雅量拔出流俗余敬慕之後又七年访君湖上扣门沿花径登小楼繙诗册罢相与道忠宣旧事慨然久之君曰吾老矣功业不建惧无以承先志奈何余曰君以树功立业为先志耶先世忠贯日月志存社稷然早岁崎岖於穷荒之北晚年流落於炎瘴之南吾知其有所不堪也世家子弟经明行修厚自谨飭无愧古人足矣功业成否所不问也君默然久之以书来言曰吾世居歙徙乐平之洪岩忠宣一枝在青田山中则吾之所自出也移家来杭颇更人事性疎懒寡合自计难与久处姑返吾屠羊之肆子宜一言赠我余记桓温尝问客曰小草一名远志何也客曰在山为远志出山为小草安石在座有愧色每评此事以为安石之出志在苍生异时匡济危朝力遏勍敌八公草木皆为疑兵其为小草也大矣则其出未可少也至於桓伊抚箏之际新城筑垒之余安石之愧其在兹乎君老布衣功业不就出山未久辄归可无安石之愧然吾闻是行也实捧省檄而去昼锦之荣不亦微乎请卒辞之不然君自以为远志或误指为小草若何青田山中多异人隐士会有能辩之者

送曹子昭归隐敬山序

余友曹子昭幼有隼材通经史能文章尤工歌诗曹暨大族祖若父以文行鸣於乡家饶财子昭散施都尽少豪气鋭谓功名可拾取屡举辄不中久益困不得志挟所有走江湖抵钱塘爱其山川留居之乙亥岁江南大乱自钱塘复归於暨奉其母依於族之庐家徒四壁立上雨旁风人不堪其忧子昭读书着文不辍故学日进声誉日高而贫亦日甚然性刚不以贫故屈摺

又好议论人短长故忌者日衆时天下方尚武功庠序废坏吏不由科第进士昭独俯首於文字间艺与时左遂郁郁不得志一日慨然谓余曰吾穷而不达与人动辄得咎命也夫吾老矣不能与新贵人竞敌山之麓诛茅三间将归守先人坟墓愿闻一言以自宠予持酒与穀候於道左祖其行而告之曰百花百草之英逢春芳秀已而秋霜拂之顔色剥落物之所遭时也吾道在世间屈伸消长亦有时焉士之出处视时为之去就昔汉州什邡县吏民恶猾难制特不喜秀才每儒服谒县门者吏辄坐门下骂辱之盖宋初时沿五代乱离儒风不竞如此至天圣嘉佑间宇内太平荒州僻邑诵声洋溢耳凡曩时平江南平蜀名将家子弟皆衣白衣从乡进士举於有司夫彼此各一时也其姍侮崇尚之意不同时有显晦道有污隆君子行法以俟命而已矣故曰用之则行舍之则藏矢志而不忧遯世而无闷岩穴之侧溪涧之滨采美钓鲜苦调清吟使百世之下与盘谷少室齐高持此以较人间世之毁誉得失也不犹鸿鹄之於鷦鷯哉子昭行矣勉之山居暇日当和渊明归去来辞以见寄子昭曰诺遂书以为别

送福安梁学正序

史汉载瓯闽之地谿谷水石深险不测篁竹丛生无城郭邑里以为不毛之地不牧之民自汉迄唐始大通於上国然其人安於山泉禽鱼之乐不去其乡不为北官间有习文章吏事者止为本州州佐县令而已闽士出闽自欧阳詹始詹与昌黎韩愈陇西李观清河崔羣等游声名籍甚愈称其事父母孝与朋友信唐世闽士一人而已自唐迄宋南方之学大兴家通诗书乡习俎豆儒宗项背相望公卿胥此焉出如詹者盖不数也福安梁君以丙子丁丑之乱去其乡侨居暨水之阳聚徒讲授一日泣谓余曰某不天夙丧其亲宗族又殲於兵二十余年墓槨犹未树也每对门人诵蓼莪之诗为之废卷欷歔今秋调官平阳学舍窃升斗之禄以餬余口而吾亲不及养矣言讫则又泣曰南雁荡之南吾庐在其下今之归扫除先人坟墓凡宗族未举之丧竭力襄事读书教子终吾天年而已干禄非吾事也况邻邑桑梓之邦非吾父兄即交友也安敢为人师乎余应之曰为人师者亦教之孝弟而已庠序所以明人伦也昔欧阳詹不能卒父母之养於违去京师之後昌黎哀之今君能举父母宗族之丧於乱离飘泊之余後世复有昌黎则必许之矣虽然人子之孝殆不止是立身而诚委质而忠抚衆而慈皆孝之推也师必师孔孟学顔闵如詹者真不数也君筮仕之始行矣勉之勿曰是处士之大言老生之常谈大言者人所难言常谈者俗所不谈也

送卢彦远总管序

廉者臯谟九德之七管子四维之三於四端属义非止一介不取也廉有棱隅有分辨此君子之大节故汉世举孝廉居家以孝守官以廉可以转移风俗顾当相与言利之时不夺不厌於此有人焉饮水啮蘂玉雪自持非瑞世之麟凤耶卢侯彦远之尹暨阳也寛而不弛辨而不扰敬士如宾视民如子人皆爱之而不忍欺终三年私谒不至铃下尝曰吾以不贪为宝或笑侯不能以脂膏自润侯处之泊如也代且至倒囊无归贄余一马鬻之僦民居步出入间从士大夫游觴咏陶然不自知五马之贵也侯大参之子翰林之弟无一点纨袴习被服受用如寒素太夫人年高左右侍养无违菽水尽其欢心侯内行醇备金玉人也尤以廉着居家逾年起擢州路总管府尹行有日士民咸惜其去辞曰馈赉侯一不受余贫者姑赠之以言维柯山郡赵

清献公之故里侯下车必首谒祠下一琴一鹤千载高风侯视之可无愧焉如嘉佑熙寧立朝之节成都会稽临民之政侯勉之

送李良辅同知北上序

天下郡国之吏可知已便文营私侮法以为奸怀利以自殖是人也盖十之九矣拘职而弗敢以不勤畏义而弗敢以不廉惧法而弗敢以不谨是人也盖十之二三矣若夫正大而不私循良而有守寬惠而能断是人也千百之一耳高唐李侯是千百之一也侯世业儒自山东兵难衣冠转徙士族子弟失其故业流为吏商降为农吏者多矣独侯昆弟偕以学行鸣於乡历扬中外二十余年其为政以诗书为本以利民为心累更繁剧才干优裕簿书出纳毫髮不欺听断审允明察如镜元贞中通守延陵威惠旁行适宪官廉问所部同僚皆以罪去独侯以清白称秩满同知暨州暨与常邻熟侯之政闻其来而悦之延陵之民争送出境涕泣而去犹岁时问遗至今不絕其得民心如此昔杜祁公自乾陵移守凤翔二邦之民争於境上一曰此我公也汝夺之一曰今我公也汝何有焉欧阳永叔侈书其事以为美谈以侯观之谁谓今人不如古也侯在二州治状不可殫举而二事尤着朝议括民隐田使者迎合增无名之赋十余万常民苦之侯执不肯署使者临之以威卒不为动民相率诉於上援侯为证卒蠲其大半侯由是大忤权要暨阳东南古河导湖入江岁久湮塞高原不利侯建策浚治议者惮役谤沮百端同列疑之侯自请督役往来雨雪中与畚鍤者杂居民力不罢水势大泄溉田十余万顷会是岁境内大旱禾得不槁人始服侯之识而深德之是二事尤着者也盖侯之为人喜礼接士大夫常寬假之而所至多与僚案不合喜为百姓兴利除害以身率先而豪猾奸民一毫不贷是所谓正大而不私循良而有守寬惠而能断者非耶侯为当路所知他郡有疑事辄委审核在暨三年席不暇煖代者至州人遮道不听其去侯亦爱其土俗简静山水明远遂筑室而留居焉丙午春将如京师歌诗饯者盈轴余谓不足以尽侯之美故叙其梗概於篇端俾来者有考焉

送黄节山序

永福黄君久客余乡余屏居学道未之识也一日访余而言曰吾世业儒宋乾道中曾大父魁天下子孙文行相续遂为龙屿名家不幸陵谷迁夷世祿之胄降为编户官吏特不喜儒差徭必首及之以故吾家无中人百金之产而里中之役一二岁必间及焉曩者吾父因役毀家吾幼而早有事焉长而又有事焉筋力疲於将迎精神弊於期会泰山之虎搏噬不尽则不止吾不获已弃家北出与吾母诀泣曰儿以先泽殒坠大恐顾今仕者类徒手获儿才不後人老弃荒陬自苦无益丐儿身以往遭时休明人思自奋宜得所欲旋以报母束书晨行北首燕路钜公贵人咸?异之居半载选部以不及格报闻卒困而归归慚於乡人遂馆於澄江里中今四年矣吾日怀亲知亲之亦吾怀也吾其归哉何以贈我余闻其言而叹曰呜呼好尚时也遇合命也子何戚焉且士岂必於仕哉诗史以娛志耕釣以娛老水菽以娛亲庶人之职也庶人召之役则往役召之见则不往见义也今乡之出也是不往役也都之入也是往见也义何居焉而况子有母哉议者谓温峤絶裾与王尊叱驭事不同西上叩徠王已仕汉也北出晋阳温犹未仕晋也劝进之使岂无他人虽身都将相戮力江左终天之痛犹莫赎也子太夫人年高且喜且惧归哉归哉它年瑞石再移龙爪复花出未晚也当子之时由子之道明善以诚身致命以

遂志如斯而已矣

送朱南伯序

里中朱君南伯少余数岁姿性穎拔进不可御经子百氏书无不读下笔无停思一纸数千言老宿敛衽不敢当去年秋策马东游燕齐诸公贵人钦其才剡诸朝得海陵郡文学於其行也客饯诸郊祖而祝之余亦在焉客谓余曰伟哉朱君是行也子何以赠之余曰吾将告之以讲学昔张安国妙年射策第一声满江左入司帝制出典方岳张公钦夫送之以序不过勉其讲学而已朱君材名虽不减安国然荐书之除非如射策之荣也文学之职非如方岳之重也余於钦夫无能为役朋友琢磨之谊顾岂以此为嫌哉夫气质之美有限而问学之功大名利之乐至浅而理义之味深语孟童而习之微辞奥旨关洛不能备也五经圣人之成言阙文疑义朱子不能释也史氏往古之明监废兴沿革永嘉不尽详也讲学讲此而已游艺博文学之细也修已成物学之终也昔为子弟今为人师矣昔教於乡今教於国矣此考德问业时也此多畜前往时也若夫终身布衣不沾一命命也再命三命亦命也何足为朱君道哉海陵郡江淮雄胜景德寺之东富公读书堂在焉今之扞海堤则范公监西溪盐仓时所筑也往事近三百年矣朱君倘有志乎客曰朱君好古敏求之君子也子言云云请书以问之

墙东类稿卷五

卷六

钦定四库全书

墙东类稿卷六 元 陆文圭 撰序

送宋春卿序

癸卯冬十一月春卿宋君自暨阳幕迁江浙行省掾州人咸惜其去先是君未至长官以喜怒臆决赏罚吏翼之以威州民重足而立君至之日风采立变事无巨细疏决如神两造在前君一览辄曰甲某直乙某当罪吏请托不及行?眙相顾走白诸长长或不听吏叩头曰某官清直不敢违长又不听君出幕廷争曰事如是如是不如是不得行长愧谢乃已同僚或怗曰州事一由幕府耶君亦谢曰此公事也论曲直而已非较胜负也由是上下服其诚信州人有啸诺之歌晡退即闭户谒不得入豪右节朔以馈至门守者曰无污吾门不速去且获罪自後人迹絕不至人或疑其简傲然喜与士大夫游举觞花竹间谈笑赋咏陶然终日与临政时如二人焉辛丑孟秋一日余与春卿会饮军将家日正午北风大壮江水怒溢入府寺漂庐居君策马冲雨径去家中人散莫知处一不顾急诣府闭关徙囚按处其民明日大发仓廩官吏争持不可请俟朝命君怒曰老弱栖苴上饿立死奈何不以一身救数千人命擅发之罪我独蒙之不以累诸公当是时君自视如汲长孺閱数日廉访赵公至嘉君仓卒处事有法力荐之君名益振至是秩满代迁老稚太息泣下杂然呼曰宋君舍我去奈何余晓譬之曰一掾史叙迁细事耳然所系重盍听其去衆曰何也余曰今郡县官教敕无素簠簋不饬罢不胜任甚衆间有一称职者指目为异反羣诟而非之不少旌擢至满岁碌碌代去是亡以风列城也使今之佐天子出令者自掾史而上举尔所知省部而下各择其人岂不足以致异乎使春卿既迁之後不变其初异日立殿陛争是非如在州时岂不足为贤大夫明者能举人贤者不负所举非相为赐也两尽其道尔余老矣无补斯世然忧民之心与敬贤之意一饭未能忘也因是喜而书之

送马伯亨序

儒与吏不相入久矣汉起丰沛萧何以刀笔取功叔孙以衣制求媚帝之厌儒自是始矣解冠已甚何至於溺之乎贾生有言使天下回心向道非俗吏所能为也生谓俗吏不知大体而大臣短之谓生新学欲专擅权夫定经制兴礼乐岂新学之所能当时大臣留心簿书期会之间以为大故此正贾生所谓俗吏其不喜生也宜哉然生讥俗吏是己生於儒者之体亦未得其全也生精敏有余而纯正不及才比仲舒有余而学比仲舒不及汉儒以仲舒为首两相王国正身率下动以礼法治行卓然有儒者之效当时张汤赵禹顾以深文巧诋为公卿而仲舒卒老於家岂胜叹哉魏晋以後选法不定隋唐以来科目大兴而循吏之效不及两汉则有由矣国朝深鉴前代之弊斥去浮华废科場不用一切以格例从事官吏日月资品累次而升上有定制下无觊心此所以为善也及其既久用事者不通於学学者不适於用夫学者不适於用是六经载籍皆事外之空言也用事者不知学是三纲五常皆法外之赘物也亦惟学不适用用之辄败是以用事者不悦学谓学果无用也俗儒不知时变彼固以此藉口殊不知俗儒之

无用今可弃也俗吏之不堪用今不可缺也以可弃之儒而视不可缺之吏儒固不胜吏也薛宣有言吏道以法令为师可问而知能与不能何可学也当时以宣言为然夫宣有子不能教乃谓吏不当学何其缪也衆以为然者真时俗之见耳善乎王通氏之论曰吏而登仕非古也古者士登乎仕吏执乎役盖吏而能学可谓之士已吏而不学执役之材耳邺中马君伯亨儒世其家妙龄志学经子之正史传之博百家之杂靡不该贯古今之成败人事之得失制度之沿革靡不考核高谈娓娓逼人持论略不少恕好扬人之善而不隐人之恶以故誉之者不少而忌之者亦衆教授江南书院不数年入吏部选年未及格退补为吏待次六部君忻然曰吾儒者也吏余事耳归别其亲束书北上人皆羡之余独曰儒与吏不相入久矣孤寒竞进媚之阶也党亲磐踞争之府也其慎之哉清心可以省务检身可以范俗非俊杰不足以识时非器识不足以致远呜呼其慎之哉

送萧仲坚序

隋唐选士之弊至宋尤甚数尺之纸谓足以尽已之长三日之场谓足以考人之素文未必工也况实学乎学未必充也况实行乎行未必顾也况实用乎识治体者深病其故无术以救之虽文公私议不过改经义之式均州解之额而已乡举里选之制疑不可以复行也夫斯文关陰阳之运而易代有好尚之殊国朝刊削浮华敦崇简朴废科举不用三十年来一洗时文之陋场屋遗才老死岩壑後生新学无荣进之诱专志诗书颇知古人为己之业当是之时立礼兴化敬教劝学可以一变至道奈之何武夫豪卒诋诃於其前庸胥俗吏姗侮於其後以故士之自珍者远引而深遁而嗜进无耻者屡却而复上主事者患其然於是创为茂才异等之法不拘常制所以求卓犖之器别庸常之品也大德乙巳暨阳以萧君仲坚应诏君汴之考城人世家望族徙家南来客婺处间多从儒先长者考德问业讲学明理笃志力行夙夜不怠奉母以孝事兄以弟训子弟以严闺门之内肃雍如也君性寡言稠人广会敛襟危坐恂恂如不能及其商论古今剖析是非逆决利钝如指诸掌盖有沈潜精密之功而无粗厉跌宕之习是可以当此选矣夫重己者不至於求人而用人者好人之求己以好求己之心而待不求人之士士所以不至也贾生之英董生之雅上不得於君次不得於相而絳灌以军功显田窦以戚属贵杜张以刀笔进犹谓汉有人乎君负贾董之称而膺茂异之选遇合未可知也余独有感於历代选举用人之法与夫立法之弊详为君言之掌铨衡者或有取焉则所以待君者当何如哉

送焦君实杭州学正序

杭故都也三学盛时江湖湖浙闽蜀之珍萃焉桥门冠带动以万计名未登三学者待次於杭谓之天府之学升进之阶视列郡为优校官选第一流非进士前列不预考未终旋入馆阁故当时之士贵以肆其得也身持风裁口吐清议上攻帝躬次及宰辅儒有益於人之国其失也雷同比周廉耻道缺章句流为小技行谊不以相先儒无益於人国也呜呼法之弊六七百年矣而弊莫甚於六七十年之近学之士盖千万人矣姓名百无一二传焉文章亦百无一二存焉其故何哉有志之士未尝不慨然太息於斯也气运衰竭崇极而圯三学之地废为官署鞠为园蔬过而问者莫知其处独杭为江浙都会之府学得无恙亦不复如曩时盛矣游士散归

土著居民习为吏商廊舍悄然不闻弦诵华髮台背之老或三五人持钵传餐使柳子厚见之必不能仰视其徒而三十年来校官之选称职者寡则亦无怪其徒矣呜呼任是责者谁欤吏性不喜儒阳尊而陰嫉之铨选之初不复区别其能否例加摧抑幸其废职败事则羣诋而笑之夫士修之於身不以穷达易操行之於家不以古今废礼措之於国不以用舍徇人若夫躁焉而与时竞也汨焉而取俗谐也贸贸焉而莫知世之軋已也则吏之羣诋而笑之不亦宜乎里人焦君实吉士也好学而甚文入部选十年复出杭为学正於其行也为叙近世学校盛衰之故而及夫正己治人之方抑野人之言非後进之君子所乐闻也呜呼是焉足以光子之行乎

送乔州尹序

冠氏乔侯仲山於大德丙午自杭来守暨夏大水居民缚筏以居米直腾起侯下车吏抱牒以次历阶而上侯却去不省曰噫吾受命驰暑涂五百四十里解倒悬急缓之即毙今为从容理簿书时耶豪右幸岁灾封廩自殖细民晨入市携什器易斗粟日晏徒手返妇子相携泣牧不忍坐而视其议出粟劝分等赉之高下勿强违者以法绳之令始下豪右大耸各罄所有有无相通饥者得哺余寢平侯始视州事精明而简静严而不残清而能通私谒及门距不得入成牒来上剖断如流狱无淹囚庭无留讼纲纪粗立明年丁未旱潦相仍岁大禋谷比不登价复增倍侯曰令之必行先自上始首捐圭租糜粥以饲饥者同列效之州人不劝而化得粟若干令饥民无出乡乡为设局公券以给之犹不赡则力请於行朝官为赈贷久之不报州有财赋粮额隶正官禁钥严甚侯辄发之吏叩头曰不俟旨易官粟比擅兴罪奈何同列瞪目相视不下笔侯曰吾独署字它日代偿不以累若等且吾以拯饥获戾甘受如飴吾为汲长孺矣既而割下诰专发状侯辨折数四卒无以加是岁饥而不害明年春招怀流佣垦剔莱芜贷以种粮寬其徭役秋大熟田社晏然州遂无事乃兴起学宫考核隐田先是掌计者去其籍土廩告匱侯分遣吏属口授规画履亩而实之租额几及升平时恶其害己者譁然议之主者利其利陰欲败其事侯不听持益坚籍既成藏之有司副在学宫岁入大充公膳丰渥视礼殿卑陋奠跪无所创增前楹高深广长準昔有加度书籍三千卷范礼器五百斤前所无也教养备具多士属心相率援借寇故事请部使者以闻会秩满侯亦倦而归矣侯通经术工文章明治体习文法干略优裕真公辅之器而小试於一州州负侯侯不负州也余以?氓深辱侯知余亦深知侯也归有日士歌诗以饯之余叙其梗概焉古之为序者叙其所以然弗着美也着之所以劝後也侯之美多矣大者恤民养士余弗着略之也略之侯志也吁龚黄之美班史叙之侯似不及也今州县之牧民者不及侯多矣此序所以有感而作也

送陶中山序

余旧读韩文考异王伯大音释至毛穎传蒙恬伐楚次中山注云中山在秦东北非伐楚所当次此固寓言然亦不为无失是固指中山为古鲜虞之墟矣及考地志则金陵之溧水有中山羣兔所出造笔者资焉非定之中山也况顷襄以来徙壽春城吴虚之楚非复子囊城郢之楚则猎中山以惧楚虽寓言要自有据韩公博洽未易訾而注书者亦难矣辛酉岁莫余病起扶杖倚门有客来过手携行卷则中山陶君邓宪善之门人也余惊问曰君冀方唐尧之裔而徙

居定武者乎曰非也世居大梁而宦游於昇往来溧水间以此山自号云尔然则韩子之文因君之号而益彰程子所谓不可漫读者此亦一验欤余因叹古中山雄跨赵地北抚燕西魏唐以来世袭为强藩近世残弊荒凉霸气销歇韩昭文苏内翰之流风遗烈无可考而况於建业下州之培塿者乎则其湮没草莽人不复知有此山者固其宜耳陶君齿壮学鋭异时当以功业自见与山东西将相齐驱中山自此知名矣

送张菊存序

人伦有五朋友居一其道大矣曾子称昔者吾友以能问不能以多问寡世指以为颜渊然颜子二十九而卒卒时曾子才十三岁始在舞雩童子数中已能追圣门第一流相与考德问业於陋巷之中既没而犹思之其笃於友谊如此士穷居百世之下尚友古人百世之上考其问学自修之懿验其切磋琢磨之实岂无闻风而兴起者乎吾友张子仲实与余交十余年矣岁在甲申余适钱塘君年甚少新有诗名风致清远器宇高朗翩翩佳公子也於是始倾盖定交暇日命奚奴负诗囊并辔游南北两山穷泉源坐石上联句掘野笋而煮之日晏忘归时事一不挂口余时随计上省君敦谏甚苦又作诗讽切之余感其言拂袖径归杜门不复出後数年客自杭来者谓仲实经明行修诸生迎入学师事之省台贵人籍籍道仲实名字余私念君人品甚高志不轻就殆家贫亲老将为禄仕计耳又数余年再适钱塘一见相与道旧感慨久之君学识超诣世故精练余遂不敢直以诗人命之谓为余言自子别去得良友一人曰邓子善之善之性温亮朝夕相勖以理义之学有过必规吾爱而敬之子岂愿见之乎余旧游南北山时已识善之岁月于迈余髮尽白落落与世寡合如弩马下垂放置於陇牧之间无复驱驰千里之志闻二子之高谊深知会友讲学之益未尝不自悔於离羣索居之久而不得日从之游以求闻其所未闻者也久之余还故山仲实调官暨阳学舍乃得日从之游相得欢甚君又能落其骄荣养之以冲和敛其英华趋之於平实屏诗文久不复为专覃思於六经由是其学大进余益畏之而衰惰之余亦复赖以自警仲实以其亲之在杭也岁一省焉居二年受代去谓余曰吾以斗禄养亲而吾亲不乐远游是以不获长在膝下吾罪大矣将告归而不得吾子一言非古人相赠出处之义顾余不敏何以赠君惟忠孝古人节而君春秋方壮事君之日长事亲之日短矣孟子曰事亲若曾子者可也曾子犹为仅可者吾日三省能为曾子否乎唯子勉之小人有母愿与子交勉之子谓善之良友也归而告之必以吾言为然或谓仲实故王孙宜践修厥猷志在勲业良亦至论然处士无是言也仲实西秦人少余八岁云

送曹士宏序

荆扬二州山水清远其土广博其气温厚其俗轻扬昔舜禹巡守所至然贡赋之外人才不见书传考之左氏鬬谷於菟蒹艾猎沈诸梁皆楚人公子季札吴人周以前则无闻也三国而人才始盛周公瑾陆伯言其尤者乎晋唐宋而大盛谢安石陆敬輿范希文其尤者乎秦汉则无闻也近世以科目取士以资格任官宋过江百五六十年不能破规矩用一士士亦无一人能自出於规矩浮诞补缀之词章清高虚旷之议论怠玩姑且之政事百五六十年而後亡者独非幸耶嗟乎如吾与士宏者亦曩时场屋中二士也追逐时尚揆说得失少年之悔多矣吾老且疎度不堪用屏伏闾里为村学究日与童孺相周旋而士宏所知皆当代贵人所至从名胜

游声望?然顾俯首为巡徼吏不屑意今之所谓品官者士宏不得而升也视学究所得无相远矣嗟乎士岂以穷达贵贱而动其心哉顾吾之才可以用世与可以用於世者何如耳今夫山东长於刀笔冀北习於鞍马而荆扬之人亡国之俘也固不敢与之度长较短以并驾於当世奈之何廉耻寡鲜者嗜进而无厌材术空疎者投试而辄败呜呼此固士宏之所以逡巡退却缓轡徐驱於骏奔之後者乎古之君子穷不美达之所有达不变穷之所守仰愧於天俯忤於人虽宰天下有不为也内省不疚则一巡徼吏可以抱膝而长吟嗟乎此岂易与俗人言哉士宏辩博隽伟有志当世不知江之东西浙之左右亦有与君上下其论者乎子文以下诸贤之功业亦尝考论其故乎往者不复见来者未可期志士仁人没齿有余憾矣士宏北上见当代贵人并以是告之其不可告者慎勿告也

送丁师善序

至治壬戌夏浙西旱秋大水灾沴相仍稼不登者十九行省选官按视所部而丁君师善实来暨州州北阻江东高而南下以故旱潦皆及里胥旁缘或不以实闻丁君疑之谓人曰贫民诚可悯奸民不可纵也墙东老叟闻而告之曰牧民者职在於民不损犹应言损故当以宽为本不奉法者义不容私民之情伪尽欲知之故当以严为本然仁意流行於密警之中大纲振举於节目之内严之中又未尝不以宽也今恶检田之不实而归其责於州县州县则归罪於里胥里胥未免取偿於细民细民抑纳而无所诉而里胥之所获则自若也昔人有言检放之弊在於後时而失实後时所以失实也州县近民者也稽之未敛驱车而出履亩而视之尽在吾目中矣时固未为後也获既空矣种既易矣後來者无所考矣田固不能言也田不能言而里胥代之言里胥之言则为民也其意则为已也而亦不尽然也怀刑而畏法者间亦有之然则如之何大学曰无情者不得尽其辞大畏民志此谓知本本者何明德是已丁君学问渊源以经术饰吏事廉平而明恕不可干以私本既立矣尚奚以余言为哉

送陈无逸赴攸州博士序

攸故长沙邑贾太傅褚都督之文风治绩意其犹有存者近始陞州陈君无逸为之博士陈龙泉世家侨寓雪上距长沙里数千将行道过友人陆叟之庐君慨然曰家贫不仕非古之道也仕而为贫非士之志也是行也吾得已乎哉叟应之曰往来屑屑不惮烦者王良所以见弃於其友也然良司直也太守也无忠言奇谋而取大位友所以弃之也今君博士也其位卑也又初筮仕未屑屑然也吾未敢以弃吾友也吾闻之朋友之义出与处皆有赠焉昔贾太傅之适长沙也前吊原而哀死後赋鵬以轻生悲愤其本怀旷达其寓言也移梁之日卒郁郁而死褚都督之徙长沙也再迁而桂三迁而爱以蝼蚁之命乞怜於昏庸之主还陞下笏何其勇也上表陈情一何惫也古之君子穷理精至养气完厚用舍无预於已祸福各安所遇忧世之情乐天之意并行而不相悖今二子之仕也知进而不知退知得与存不知丧与亡或激而愤或惧而哀然则生平词藻之劲瞻翰墨之精英蔚然於当时者皆无本之木无源之水也呜呼惜哉虽然有才如贾有节如褚用之不尽老岁月於湘潭之境贾尚北还褚竟南迁岂不悲哉杜少陵最善评亦有高名前後回首伤神之句重可悲也顾君子成人之美春秋责贤之备二论自不偏废况尚论古人而较其短长亦格物致知之一事处人所以处已不可恕也今陈君之行

也涉洞庭下湘水登衡岳之峰览古兴怀岂无有感於中者南中多士岂无与君上下其论者先正清规劲节照映一代君之才之学克绍其美台阁器也州博士何为者故以汉唐二子之功业望之望其出於二子之右也则吾之所以赠君者岂不厚哉君笑曰王良之友未能以是言也握手别去

送陈元复序

永嘉叶正则与周南仲孟良夫兄弟上下追逐庵庐拥被通晓诘难南仲论辨纵横衣袖腾举两眼尽赤正则疑之後遂默默然亦心服其文上折旁峻不杂今人之体也莆田刘潜夫与邹子益曾景建黄天谷语谓邹专佞佛黄涉猎道家书不能精惟景建浩博扣之不穷潜夫畏之二人者不足以涉其藩也前修往哲文献相仍求益友之良规绎讲师之绪论穷日累夕此乐何可数得文运衰歇雅道雕丧流风百年不絶如缕余僻处墙东乡中子弟南北胜士时辱与之游虽其浅深高下不能一槩而未见有髯之絶伦者陈君元复自山中来长身玉立眉宇昂霄与人商论不能下气一言制胜闻者抚掌所谓絶伦者非耶余朴学无师坐守章句如蝇钻蠹不出故纸而君旁搜百氏横贯九流悟性超入直诣津梁此学胜也余文思苦艰呻吟累日仅一二句不棘人口而君落笔奇伟如騄耳不羈自放於渥洼天驷之外此艺胜也余数奇不偶习隐终世甘与百草腐化而君妙龄驰誉籍甚方将诣北阙上书朝奏暮召建当世治安之策此才胜也君今而後致知而力於行明体而达於用循精粗之序审缓急之宜殆将进於道矣奚胜负之足言嗟夫潜夫正则今无其人也其人亦未闻道也余将与君游广信问鹅湖究当年朱陆坐中之争书中之辩以求真是之归而余老不出乡君北上有日落奈何君瞠目不答长啸径去

送家铉翁序

五方之人言语不通嗜欲不同性善则一修道之教所以明此善也先皇帝武定内难文致太平举中原百年之旷典大比兴贤天下之士雷动响应山岩薮泽之间搜罗殆尽而殊方异俗释搆掉甲理冠带习俎豆来游来歌蹈德咏仁莫不洗濯思奉明诏立跻臚仕然有司事不素讲学识浅陋考择不精故举一遗百莫厌士论如家君铉翁辉和尔氏其先居於北庭右族托克托太师宁国公之裔孙幼颖悟自命不凡脱去纨袴习修孔氏之业读文公之书应江浙进士举及格贡诣京师旋报罢自是杜门养志闽宪闻其才而辟之君亦欲以所学自见不辞而就寻调行台御史府掾泰定丙寅余自暨乡出应容山县聘授生徒於学君以六月虑囚随二绣衣至县一见握手如旧交谓余曰知子名久矣乃今胥会於此相与道家世出处本末慨然久之君貌嶷嶷美髯如戟神采逼人必能晓畅官事顾御史职无不统奚止狱讼而已今不幸南北方数千里水旱民且狼顾赈救之方未知攸出奸豪侮法官胥贪墨黷缘纵弛三尺无所施君能援经守律引义力争何事不济汉掾史多为三公当时流品未分士竞节行避驄埋轮之举非一手所能安知在下无佐之者御史风闻言事耳目不可无也君年富气鋭功业未可量余老墓木且拱惜不及见之姑叙梗概而已

赠朱自明序

龙图授羲龟书畀姒赤文綠字能读者谁天球谁篆琬琰谁写凡是物也东迁於洛之时失之乎西入咸阳之时焚之乎惜哉相府所收之图书户口厄塞之数耳竹筒载之乎木石刻之乎皆不可考已秦玺篆玉汉侯王印章黄金者销毁铜铁至今犹有存者伯喈石经髣髴石鼓之遗自洛阳迁邳弃掷殆尽更入木椁始於後唐不意读兔园册子人其功乃出於蒙恬蔡伦之上四百年来海内文字皆托之木矣书多而学者倦於读坡翁所为太息鹤山屡作藏书记亦申言之弊岂易革哉丙寅夏余来容山朱晦自明见於明德堂上鄱之浮梁人也余扣之曰习举子场屋之文乎不答曰为刀笔簿书之业乎又不答徐曰吾祖敷文尚书穆陵之师也御书楼犹存焉云汉昭回之章则族多而散裂去之矣岸谷转移落拓不振浪走江湖性颇好古工图书篆刻之学游戏三昧而已儒幼而学之吏亦尝试焉皆能之而不为者也余闻其言而心怪之会县庠立文宣王加封碑君即解衣盘礴而周旋焉体制甚古乃知韬光晦迹之士藏於医卜技艺之间者世多有之道虽小而必有可观未可谓壮夫之所不为也其秋余将归朱亦西向秣陵来求赠言余不知所以言也一笑握手而别

送王君章序

阮嗣宗与阿咸为竹林之游任达不拘谢安石与玄等为东墅之宴屡费千金识者皆非之杜牧之誉阿宜之读文韩退之夸阿买之能书其後二子亦无闻焉高沙王君章挟其侄文宪文密来从吾游穷经稽古讲学习文刻苦勤励鷄鸣而起夜漏尽十刻不寐爱日孜孜其志亦可尚已记丁巳冬余过其里重湖渺茫芦葭夹浦雁声西北来墟烟萧瑟犹不改昔年边塞气象欲访故里遗民求孙莘老秦少游少章兄弟风蹟了不可得王氏世居兴化高平文正公尝宰是邑必有异政而叔侄俱生晚亦莫之闻也时代更换人物衰谢可为太息吾子有意振起之乎鱼蒲蟹稻之乡生理粗足无求於四方故虽孔道而宾客商旅之来居者少独从师取友义不可阙则越境而求焉丙寅孟夏三子从予适容山之阳授业明德堂上久之余又将如金陵生告归省亲岁终将复来余呼而谢之曰嗟乎语孟庸学诗书易春秋邹鲁之学在焉述之者河南程子建安朱子胡蔡之徒相羽翼之句为之解家有其书至足矣学不出乎此朝廷设科取士亦不出乎此子归而求之蚤夜以思穷探力践希圣希贤之阶治人治己之术当自得之何必借视於盲假听於聾哉百岁老龟方曳尾於泥涂之中而鵷凤之雏邈紫霄而上征时或逍遥过之亦不复下视之矣

送吴仲鲁序

天历间乌江吴仲鲁来与仆游讲易墙东之下将归省其亲丐一言以为别仆病未能也其请至五六不倦乃为之言曰昔仲由去鲁谓顔渊曰何以赠我顔渊曰何以处我二子相与言不过墟墓间事何其不切於事耶盖孔门弟子羣居仁义道德言行忠信皆已讲习无余无可言者今吾子学博而气鋭宏中而彪外将有用於时仆请以易为赠易曰君子以言有物而行有恒又曰君子藏器於身待时而动又曰君子以俭德避难不可荣以禄是三言者於已切於义当於时宜子其识之仆年八十将槁死林下不及见子功业之成矣抑未死以前皆临深履薄之日月也子何以处我仲鲁不答太息而去豈庚午夏至之日

送州同知序

至顺庚午十有一日昭信校尉同知江陰州事纳琳哈喇秩满代归祖帐城南乡大夫士庶咸集墙东陆叟在焉或问之曰昭信君何如人也叟曰其先开国重臣列戟之家翩翩佳公子也廉勤而明恕心清如水门无杂宾才干优裕左具右宜涖事之初适盐官海溢采石扞堤部丁夫以往时其寒暑而噢咻之先期办集民以不困未几方隅俶扰人情疑沮驰驿上省参预机密事定而归会舶货集鄞山市易难其人旋檄君往目不视珠犀身处膏脂不肯自润视元估倍增人服其无私最後藏室翻经泥金费钜又以委君监视严密铢两无渗漏三考之中在州仅数月差委无虚日席不暇煖而瓜已熟矣虽惠泽之施未洽於一州而孜孜民事无顷刻怠异时登台阁秉枢要河润九里犹冀江浙蒙福也传曰公侯之子孙必复其始象贤也叟言未既衆欢然曰请书之以爲君贈且以爲後來者勸於是乎书

送赵敏道序

吾幼攻举子业剽窃律赋经义套括以争名於场屋间吾之大慚人以为大好焉已乃事大繆礼部条贯束不用武夫健吏鸱张而儒其服者例遭讪侮吾故习弗能改度世不相容遂屏居林谷取选杜而下诗韩欧而下文诵而仿之技短不克进念士之所学又有进於是者旋为贫讲授复取四书六经诸史百家与诸生相切磋究之久之若粗有得其行己不敢有畔於道居家不至获罪於乡党朋友历考古今成败兴衰治乱得失之迹亦欲少自表见当世时不我与日月其滔幸会真人勃兴文运重开江浙以予充贡於是周览山川观光上国公孙子之徒仄目相视卒报罢归暨庚申再贡则不敢复往矣今年垂八袞墓木将拱然犹栖栖不遑宁处海诱後进不息其志亦可悲夫钜鹿赵敏道侨居桐汭不远数百里来从吾游刚銳而诚笃勤苦晨夕不倦是可与共学者将归省亲求贈言以自勸吾应之曰学有序躋等非也学有本游艺末也必若文公大学章句序中以年之长幼分学之大小撒去记诵词章之习专为修己治人之术然後谓之学吾平生所学颠倒失序虚浮无本不足为法不愿吾子法之也盍亦务其远者大者乎或笑于列曰敏道之来将以学文干禄也昌黎读书城南诗欧阳荣乡亭记亦如是而已有是哉子之迂也吾又应之曰讲学以明理修辞以居业词达意而止不以藻丽为工本根深固则枝叶畅茂以此应试何害於道哉大儒程伯子子朱子皆登进士第横渠张子亦应制科何害於道哉孟子谓友天下之士为未足当尚论古之人谓道若大路然归而求之有余师非求诸人求诸道也安用使吾抗顔为蜀之日粤之雪也耶

送程仲谦服阕回长兴州序

至元中今宪使中丞曹公士开为暨阳幕长朔望辄率府司县吏诣学讲习经史继以夜分秉烛而归余时代博士升讲习惰弗省者听之往往引睡独程君吉甫年甚少志甚銳与之语甚解若可与共学者余甚嘉之终以王事鞅掌役役州县不得卒业於吾夫子之门有子仲谦卓落不羣然亦俯首於簿书筐篋间自吴兴路吏丁内艰而归闭户读书复遣其子羽从予学习尤颖悟夙成通春秋经下笔娓娓数百言殆将以儒起家辛未冬仲谦服阕复如吴兴来与余别求一言以自勉予因是有感焉子生三年然後免於父母之怀故三年之丧达乎庶民此良

知良能有不待学而东汉旧制公卿二千石刺史不得行三年丧刘恺陈忠屡谏不听夫公卿不行而百僚行之二千石刺史不行而小吏行之有下而无上何其倒之颠之也古之帝王所以笃化美俗率民为善因其自然而不夺其情民犹有不及者而况毁礼止哀灭其天性乎故建武以一时简易之政礼义之方实为雕损今天下一家自大德以来三年之制有诏通行大臣以至小民无敢冒丧犯禁者此善政也吏无大小皆可以为政孝弟政之本也人人亲其亲长其长而天下平而况於一偏州乎仲谦勉之矣余迂儒不堪时用讲授乡里五十余年与君父子三世相周旋惜哉今耄矣墓上之木拱矣将不及见两山乔梓之荣矣吁

赠华玉谿序

昔马文渊少有大志就边郡畜牧积谷数万既而叹曰凡殖货产贵能施赈也否则守钱虏耳乃尽散施之转游陇蜀仕洛阳为建武名臣封侯取印绶人皆荣之其弟少游独不谓然曰士生一世但取衣食裁足乘下泽车御款段马死守坟墓乡里称善人可矣後伏波征交趾往浪泊西里间仰看飞鸢跼蹐堕水卧念少游平生时语何可得马氏昆弟所见不同出处亦异未见有文渊少游合为一人如玉溪华君者也华氏锡山巨族羣从数十人以财雄一州君尤奇伟不凡喜宾客重然诺轻势利义着闾里名闻江浙朝廷尝命以品官不屑就家居养志优游自得傲睨物表己巳庚午间旱潦相仍岁大祲蒙袂緦屨者相枕於道君惻然悯之开发仓廩左餐右粥一境赖以安宪府闻而剡荐民怀其惠士诵其美争为歌诗余谓救荒之政权在上则顺而易在下则逆而难然出於官吏之手则又有敛散不时抑配不均之患出於乡大夫士而有司不预焉则无侵欺之弊而实惠及民矣然大夫之贤士之仁者未易遇也华君可不谓贤且仁乎或曰在礼家施不及国陈氏以家量贷以公量收春秋讥之殊不思子贡之在圣门以一布衣而问博施济衆圣人告以立己立人达己达人之事盖讲明者学施行者政使子贡为百里之宰治千乘之国安知其不能施济特患其不能博且衆耳分有穷达仁有小大势使然也余年八十终窆且贫无复当世之志异时有纶巾少年如周郎者来求赀粮君家何止两困能指一困以予之否

送朝请大夫江陰州尹序

暨阳一州如斗大北倚长江东西南距邻境不百里地狭而不衍土瘠而不腴乐岁郡计犹不支况自天历至顺以来兵徭繁兴旱潦交作饥殍满野疠疫阖家黎民廩廩靡有子遗赤子失乳而呼父母宛陵张侯适於是时来守是邦国手一着死枵转活於是抉摘弊端来求隐瘼以赈恤为第一议亲行闾井家至而口给之劝分务穡公贷私助竭力尽心弗遑寢食洒风沐雨不憚勤苦生意稍苏坏证略补则以其暇日起建学宫延聘儒宿教养兼举风化骤兴侯接纳虽广庆馈不通讼有曲直手无高下户有消长役定等差为政三年五事告备不惟巨室之所慕而下得细民之欢不但僚属之所敬而上延台省之誉以乔木之故家留甘棠之遗爱盖侯之为人也明简而惠慈恭寬而信敏真良吏之模楷而郡国之师表也古之良吏为治无赫赫声而所去见思侯今未去而人已思之矣歌谣碑碣洋洋盈耳侯何以得此於民间哉於此见人心之不可诬而公论之不终泯也至顺壬申立春後一日阖郡人士设祖帐於南城墙东叟陆某书於席上

送唐子华序

水心叶公评天下山水以吴兴为第一其山脉地络融液浸灌者莫非气之至清盖仙圣之宅非人世也每自恨海滨之人山凡水俗不得生长其地而尚友其贤豪嗟夫水心之恨亦余恨也吴兴人物唐以前勿论宋徙钱塘湖为近辅宗英戚畹邸第相望淮蜀闽广之彦仕於朝迹行都而居者尤多壬申癸酉余始弱冠习春秋受学於梅坡卢公公扳以登诸老之门如存斋陈公本心文公止堂高公陵阳牟公皆一时之望余俱得拜床下卢寓苏台晚归闽陈以下聚居霅上曲阜既烬灵光独存虽清规苦节照映湖水而夕阳古木日就枯摧人之云亡恹我寤叹至元以来子昂最颀出成甫之昆弟无逸之父子皆辱与余交而甲寅举首庚申联贡则无逸之兄而周氏之父子也後来之秀余不及识者甚衆猗欤盛哉今子华居文物之乡鍾山川之英而气宇清高干局优裕诗文敏赡笔墨精絶亦後来之秀者也分教江壩席不及煖省台交委殆无宁日未几而代者至归囊无余貲钱句有盈轴推年长者一人为叙余不敢辞嗟余耄矣将从诸贤游於地下而君方强仕余不见其学力之日充而器业之晚成矣俯仰百年废兴存歿浮云逝水往而不返悲夫一日之别辄数日作恶然岂特为吾交友之私情也哉

墙东类稿卷六

卷七

<集部,别集类,金至元,墙东类稿>

钦定四库全书

墙东类稿卷七 元 陆文圭 撰记

江陰改州记

至元二十八年秋七月二十三日江淮行中书省参知政事臣公楠奏暨阳与毘陵郡壤地相接户不满七万设立总府非是请改州隶毘陵管内省并司县各一减官吏俸数十於事理便制曰可是岁十二月擢乌噜克锡布哈为州长官刻印之任始至问民疾苦皆曰江乡土狭民瘠介在一隅以故无大徵役今以属州事统府其情不吾察奈何侯曰第安之吾在毋恐既而急符数下调发无虚日泝流供给回远百里民疲於奔命讯报淹留囚多瘐死兵廩不时率有怨言侯慨然曰吾受命作牧民瘼即吾瘼也乃率州之士庶力请于朝愿以州隶行省事得直达免旁郡牵制之虞未报会至尊新登宝位勤恤民隐宰执条具以闻玉音曰俞令下之日士庶呼舞恩若更生侯亦喜曰今而後得专治吾民矣治之朞年政平讼简州以无事朝廷嘉之秩满迁常州路同知总管府事先是公尝为此郡治中常民喜公之复来而暨民惜其骤去也於是述置州之颠末谨刻诸石俾来者有考且以寄去思之情云元贞二年六月壬子州民陆某记

江陰路重修总管府厅堂记

江陰故一县隶常管下中析为军至元丁丑陞路建总管府府治枕子城北隅厅事直府治北迤北堂曰双桧经始本末郡乘逸不复录岁月深矣栋宇雕落新者日趋於故故且摧压江风飒来屋瓦皆震雨骤至泥潦没踝吏抱牒褰裳以登非所以崇瞻听澄智虑也成德李侯思恭来尹是邦一日视事庭上顾而叹曰居馆必葺前贤所贵隶人之垣邻国所讥吾受命天子作牧千里居弗称是何以见吏民乎顾调度方急供亿日繁州力竭矣安所从出乃召幕亿孙君昭牛君宏李君恭让谋之皆曰役不可不兴而费不可强取也於是集州之豪右大姓觴于庭而告之曰吾为若主若等皆有阖庐以避燥湿寒暑而吾覆压是惧不可以居今为此役非以奉已也代至辄去岂长享此顾不如是不足以待後之贤者而牧汝民尔觴半坐者皆起顿首曰愿尽力於是木植金石之具髹彤黝垩之工一日毕集畚者甃者斤者圻者主给其直官无所预创始於至元二十六年己丑之春正月夏四月堂建秋八月厅建设三时而民不告病既成广深高长视昔加倍基厚础博楹桷丰硕钜丽突兀真百年未见之伟观也经营之力可谓勤矣嗟夫上之字下仁也下之奉上义也亦惟吏有勤於恤下之心故民有乐於趋上之心此一役也仁义具焉抑古之循吏如文翁召信臣之属兴起营造为美谈不知当时其费一出於官耶或民乐输之也今海内殷富文轨万里而州县厨传萧然常有不给之叹亦复何哉当是时也贤侯良佐并心竭虑鳩工力於经常之外幻瑰杰於圯陋之余於法宜得书矣圭版籍一

氓力不能佣谨记成事以诏来者

浙西道院记

暨居江水之陰西南百里而近所统狭无监临隶属之烦所处僻无将迎传送之劳所治简无争鬪讼狱之器古称浙西道院道院云者谓其清净简易无为而化如真仙隐士之居穷林絕岛迴隔尘凡不知其为官府之处也江南道院十有余所淮东南则如臯崇川江东西则当涂高安湖南北则临武长林闽之临漳广之苍梧皆是也而暨独称于浙右浙水至钱塘分流左右其间列郡十有五六惟暨最微衆大不如杭奢丽不如苏富庶不如湖秀然暨独被美名者则以暨之俗非苏杭之俗暨之民非湖秀之民也昔者延陵公子崇退让之节于争夺之吴春秋嘉之实启封于兹土而衣冠之藏隶刻犹存香火之祠绵历不废渊源渐被有自来矣入其境农朴而嗇力耕而奉公百工之器质而不竄拙而无华商贾裁通有无而无高货厚殖之家士大夫处善循理好学而不奔竞入其官府官吏畏法而不私守职而能勤平旦视事日晡而散庭寂如水旁有老桧槎牙双立清风肃然令人心醒道院之名不虚得矣園亭故有扁後迁之厅西己丑张温父所书又七十有七年而郡人陆某为之记

江陰修学记

暨阳文宣王庙宋景佑中博士范宗古立高平文正公记之自是即庙为学绍兴中王侯棠始立学官讲堂斋室略备迄今百七十余年补敝架陋岁积月深大惧无以妥先圣之灵示列郡之则至尊登宝位之首年至元三十有一年也诏天下郡国修夫子庙立教养法越明年元贞改元复申明之於是同知江陰州事密拉建议请以诏书从事广平石侯穆尔布哈甫下车与州判官陈君臯忻然戮力日率其工徒命博士范君搢董其役閩州人士相与竞劝輦材输直聿相厥成金石土木之具髣髴黜陟之工不日毕集庙南向前峙三门东西列两序绘先贤像冠纓甚肃後余八斋中立讲堂翼以二夹室崇其北为藏书之阁东序之东建学官厅事西序之北筑小学基下至米廩庖湍内外缮修断壁朽椽无复存者经始於乙未夏落成于丙申春役止期月而百七十年之伟观复旧功可书也衆议徵记於余谨识本末岁月如右若夫设学命教之意入德正己之方前志备矣故不书六月既望里士陆某记

江陰重修学记

皇庆改元暨阳庙学告成熟成之东平曹侯也初州有贍学田散漫数十顷比岁以来利己者去其籍无以稽数之多寡制用之出入米廩告匱掌计数易土患之侯下车祇谒先圣延问诸生顾瞻礼殿栋桄将压或崇其轩瞰乎前楹侯曰噫非制也盍撤而新之士恍然徐应曰诺侯曰患力不足耶是不难命取故籍履亩而核之抉廋隐量高平额均赋实乐输相属仓庾既盈侯曰可矣召匠计之卜日蒞事以辛亥正月告迁於先圣遂毁故庙增博其基广硕其础筏木於仪真輦石於苏台是断是斲是寻是尺高甍鉅桷摩切霄汉丹碧绚丽观者目眙期年迄工春丁上日释奠礼毕在泮饮酒多士举觴於侯曰奕奕新庠鲁侯之功敢以为公壽侯曰未也殿崇而庀卑势不相及弗称为笑顾吾力惫矣孰能为我成之在席之士丘介夫而下四十有

余人起而对曰公敬教劝学惠我无私畴敢不尽力凡东西庑四十有六间重葺而新之三閼月而成不愆於素断壁朽椽无一存者望之如引绳如舒翼高深广长面势适平於是庙学成而侯代者至矣相与谋请镌石记侯之功以示後之人或曰是役也博士周君济掌计赵由道宣力居多儒吏王应麟马瑗实董其事合谋兼力以迄于成今独归功於侯何也曰着其首也为之首者为之功也侯闻之笑曰因其资而为之劝其人而成之吾何功姑叙始末以识月时俾後來者一日必葺可也侯名定国字安卿为治所至有声云壬子夏五记

重作泮宫楼记

诸侯曰泮宫泮泮水也以节观者鲁颂八章章八句美僖公修泮宫也序以为修诗以为作作之功倍于修矣古有学无庙庙以祀先圣暨无学即庙为学昉於宋嘉佑三百三十余年矣宫墙之上南有楼当涂而高不避风雨岁久弗支天历己巳宛陵张侯蒞事之三日谒大成殿望楼下车顾瞻栋梁凜焉将压心惕不宁询掌学计者曰祭祠廩膳外有余裕乎对曰有侯曰可矣命工视之楹桷朽腐瓴甓毁拆无一可恃者侯曰噫旧贯不可仍也尽撤而更之辇石庀材赋工僦直明年庚午落成不愆于素高深长广视昔有加栏槛凭虚檐牙飞动丹碧焕出云表前对笔峯旁资丽泽芳莲净植芹藻相依光风徐来生香不断二月初吉鸾旗蒞止聿观厥成济济多士从公于迈咸曰邦侯之德惠我无私请纪侯绩以配史克衆属於墙东老人老人叹曰吾幼入小学及闻长者言兹楼之修百年间凡几见矣金谷之糜亦广矣往往架漏补苴苟完一时未几即圯主者骤更幸身不及见之耳巍巍宫墙岂传舍欤传舍犹当一日必葺而况於近圣人之居欤今楼之成非修也作也高明而广大岂徒以远眺望而已将以进诸生於尊德性道问学之地二三子懋敬之哉思有以副侯之盛心是役也前博士察布哈董其始唐君代之克相其终咸宜书遂刊之石以诏来者

教授厅壁记

吴兴唐君子华谓予曰近代居官者有厅壁记记前人姓氏暨阳校厅独无有何也予曰昔有之今亡矣亡者何代革也唐君曰噫五十余年矣往者如电旧志可续乎予曰可乃自至元丙子以来追书之徐君元凤而下得姓氏若干将勒诸石请予记之予谓教官不与他职等他官职乎民教官职乎士士者民之拔萃不当以治民之术治之也仁谊以淑其心礼法以束其身陶而铸之存乎学博而通之存乎辞率而先之不言而信存乎德行岂不难其人哉唐君清淳而文雅洽古而畅今和而不流嘉善而矜不能真修洁博习之士可以为人之师表矣岁洊不登米廩垂罄君赴分宪百里外丐赈饥之粟以哺之守者曰此民食也君曰士亦民也姑贷以周急请贷之卒受粟而归既而官索其直君以已帑代输士免填壑德之深有献利者籍江沙塲入官重征之里胥旁缘学田数百亩亦在籍中君力争数四且援旧碑为证主者莫能夺乃归田此二者有功於乡校当并书之或曰题名者直书某人某人美恶自见今着唐君之美可乎余曰皇甫湜吉州刺史厅记数百言专美张公形之歌謠且曰名氏迁次末也编以能者为首垂为後式请循此例士皆曰然故书君名君於天历二年某月之任至顺辛未良月乡贡进士陆文圭记

江陰州新作刻漏记

夏官挈壶氏下士六人壶浮箭之器以水火守之水以沃漏火以夜视刻冬爨鼎也漏之箭刻昼夜各五十冬夏之间有长短焉故有四十八箭古法则然夫历象以授时历步天之数象测天之器也天之苍苍不可俄而度岂真有神人凌倒景薄日月往参乎其间而寸量之哉行度之逆顺迟速其初孰从而知之且制器以象之耶盖造端创始非上哲不能若成法已具则一有司之职掌足以专之矣然东方未明颠倒衣裳从来已有不得其职者而非挈壶氏之罪也近世州县治所各置刻漏於谯门之上与军中鼓角相应所以节兴居时号令也所在废置不常制亦异暨之谯楼徐侯藏作於宋治平二年之乙巳明年丙午铜壶漏刻成军判官唐淑问记之距今三百一十有六年矣中更多故壶毁不存延佑中初置陰阳博士员而苏台王君实来江陰搜访旧闻惧为缺典请范铜为之州长官下咸主其议鳩工集费踰年而就案验如式俾郡人陆文圭识其岁月而为之铭曰智者创物循环不忒昼夜有经维政之则志其始貽後代善视之俾勿坏至治改元重光作噩之岁立秋日记

江陰什物记

古者郡国经费仰给县官财得调用百姓无所与近世法禁益密官吏廩禄之外余不得自擅故资用乏絕凡岁时燕享使客迎劳之具不得已取之民间旁缘侵渔民以益扰而事不集盖通以为患而莫之能救也暨阳一小州尤陋而贫供亿无所出州长官以下建议捐己俸斥余财官造什物所需毕备同知州事理伯雍躬督其事凡而服饰器用咸精其能既成以授有司棣而藏之理侯旋去衆议镌石画如右以谕来者夫其事虽微官与民胥便思其始之勤而防其後之毁以图于永久是不可以不志

重修安定先生祠记

子车氏歿洙泗无嫡派择不精之荀扬粗有见之王韩君子无取舂陵起而太极图通书显关洛承而易传西铭着斯文天畀圣人之体用具焉然水寻其源木茁其芽则自三先生始三先生者胡翼之孙明复石守道也宋景佑宝元间三人读书泰山之下以古经学为天下倡师道既立学者靡然从之而安定先生之徒最盛苏湖两学教法最备太学取以为式因着为令然先生累举不中第因定雅乐两被召而已以乐知先生者浅矣谓通水利边防历法者尤浅虽圣人之体用广大精微不止如門人刘彝之所言要之濂洛以前亦未有一人识见如先生者先生为范希文蔡君谟欧阳永叔所敬而又能识程正叔之为人则其学可知已何天下知之而当时屡举之试官不识也科目不足以得士信然先生生于海陵歿于杭葬于乌程之何山故湖有祠泰亦有祠泰祠旧在郡泮之西宋景定癸亥提举吴蒙更建书楼斋亭内外完好海陵被边日寻干戈湔定之余吏以柱後惠文为急先生之道晦而弗彰既一星终鞠为茂草天历庚午泰兴陈敬叔由汴省贡士来长书院顾瞻栋宇有愴于怀首捐圭租续以已帑不资旁助尽力经营自堂及溜新构六楹长廊继修遗像改饰祭器什物皆复前规始庚午九月迄辛未三月梓人告备州尹李某判官赵某实赞其成摄直学以董工者公七世孙敬子也公裔尚数人贤者一人主祠于是敬叔来徵文以志岁月余记开封胄监昔有先生祠绍圣中林自一

妄男子为博士闻诸朝撤去自乃主绍述者先生非元佑人何恶焉吁无是非之心非人也祠之兴废于先生之道何所损益焉夫是以见人之好恶相远流芳遗臭皆当不朽虽美陈也实诛林也先生有知疑以余为隘至顺壬申清明日暨阳陆文圭谨记

吴县学田记

至元辛卯春三月余领吴县学事始至进拜先圣退立庑下顾视壁宇萧然衿佩简寂叹曰壮哉县而学弗称是何欤有士揖余言曰兹学之建始绍定戊子赵公汝訖所为也六十余年新者故矣视为传舍日不加葺田畴多荒会计不当又称贷而益之土廩无继则衆散而去弦歌之音不闻久矣近岁里中赵君纠録于学慨然闵之率乡之右姓各以租助计亩若干方将嗣有建请未卒事代去故籍可复也余复叹曰赵君今安在今人而能为此也耶利之入人深矣官于学者常禄之外姑取赢焉未见有能廉者也千金之家廩有余粟则厚以自奉未见有能施者也余不识赵君何如人乃能闵士之穷劝人以义乡之右姓乐与共成之其志可谓仁哉是不可以无纪也昔三代盛时人各里居田各井授自国子而下为士者皆出于乡遂之夫家而入学有时故士得自食其力不仰给于县官自田制坏乡治废士失其守反不如农工商贾之有定业也为民者四今加而六异端之说由是入焉浮屠之室老子之宫鸣钟击鼓闲坐而食者通都之内日不知其几千人聚而给之者谁与女嫗之敬信吾无讥也勇夫健卒固舍其身而奉之矣闾巷之无知吾无责也士大夫之家固捐所有而予之矣无他福田利益之说惑之也子朱子有言曰先王礼义之宫与异端鬼教之居孰正孰邪三纲五常之教与无父无君之教孰利孰害今赵君之举行也舍彼而之此其有得文公之心者乎抑学校之道二教与养而已中心好之曷饮食之养者之责也佻兮達兮在城阙兮教者之责也余愚且老婆娑此行窃承荒乏之余大惧教养有阙幸居是邦以友士之仁者乐赵君之事书而刻之庶有闻风而起者乎虽然赵君信有德于士矣士之饁于是粥于是何以报德愚闻之曰士无事而食不可也有人於此其君用之则安富尊荣其子弟从之则孝弟忠信乃免素餐之讥矣饱食逸居而无教则近于禽兽孟子谓亡恒产而因无恒心者民也士则有恒心矣士有常产而犹无恒心何以自拔于民哉

陆鲁望祠堂舍田记

唐陆鲁望居临顿里皮日休以为吴中胜处不出郭郭旷若郊墅为作趣泉浇竹候雨种莲之诗又有别业在甫里距城东四十余里则先生自谓四邻多是老农家网鱼缲车之具在焉清风素节照耀江湖之上今白莲院即先生故居而祠堂在其右里人指其地云此当时鬪鸭栏也裔孙元吉舍苗田五十亩以供祠堂祭祀繕修之费俾僧某主之夫舍田之事微矣微而必书者以见陆氏之裔今而尚存甫里之业久而不坠者也夫先生一隐沦之士耳同时若平泉庄之草木奇章公之石其权力有百倍於先生者矣再传之後已不能保而二家之子姓无闻悲夫尚论者固不以彼易此也先生之泽岂止五世而已哉元吉字安仲余所为作字说者好学而尚义与其弟德原字静远舍田建家塾以训吴中之子弟时人美之於是鲁望为不死矣

適斋记

杨侯伯通以中原世家出牧暨阳暇日谓墙东叟曰吾读书之斋字之曰通叟为我记之叟曰诺然不敢请其义退閱尔雅云通遵率循也郭疏云转互相训也通聿音义同说文通作吹从欠从日亦声於义皆无当惟文王有声之诗凡四通字朱传以为未详古注云通述也孔李苏氏皆从之以为文王能大其先人之声康诰之书亦曰今民将在祗通乃文考绍闻衣德言蔡氏云敬述文考之事继其所闻而服行之质之诗书然後喟然叹曰侯之取义其在是与盖侯之大父金朝进士第一器识宏伟论谏忠谏政事絶人贞佑正大间为台阁名臣见於闲闲赵公遗山元公所志人品可知已从驾大梁歿谥文献昔齐王俭卒礼官欲以文献谥之王晏不可卒改平头宪字宋三百年丰功钜德之臣不少亦无一人得此諡者文献圣人之所重杞宋尚不足徵公之得此其人品又可知已今侯家世相传踐修厥猷追孝于前闻人不亦休哉或谓继人之志述人之事非下臣所能是不然继述达孝也自天子达于庶人一也文王大先人之声康叔祗文考之德文王未尝称王方伯也康叔诸侯也今之牧守古之侯伯也继述胡为而不可彼朗陵传或附曹太丘至羣而忘汉独何人哉大雅云无念尔祖聿修厥德

凝道堂记

有物混成先天地生吾不知其名字之曰道道犹路也路者人之所共由道即理也理者人之所同得二气停分五行错布人得之而为人其端有四益之以信而为五常其纲有三附之以兄弟朋友而为五品百骸九窍皆有妙用万善衆美必有要枢孰主张是道也非耶道之源远流矣经子可考者十有二人泝文武而上至尧舜而止沿仲尼而下至孟轲而止愈原道曰尧以是传之舜是之一字果何所主此非凿空撰语愈殆有所见耶执中之旨略於鲁论详於禹谟愈学不至此其见道分明豹一斑耳至谓轲死不得其传则非也道散宇宙间无古无今有其人则聚无其人亦未尝息荀扬王诸子谓非知道不可谓之知道不可得其一遗其一非不志道德不至也夫道者事物当然之理德者行道而有得於心者也而异端之说曰虽有拱璧以先駟马不如坐进此道夫道在我者也岂真有一物而待於人进己乎又曰失道而後有德是道德为二物而先後之分尤非也异端起正学坠悠悠千四百年後道出於舂陵再出於河南几於顔子不死复出於建安几於仲尼复生由其气质清明学术纯正穷探力踐默契道体而用工亦精密矣道备於诸君子之身吾闻而知之反而求之吾身则无有乎尔岂降才尔殊哉德性不尊无以进高明之域问学不道无以造精微之阃道自道人自人血肉之躯与义理不相管摄块然物尔嗟夫道不远人而人去道远矣郑公鹏南家碣石之阳揽轡淮浙间掌行御史府孝廉公直详明果决风裁凜然名振一时岁晚倦憩卜居兰陵佳山水处诛茅作室聚书会友讲习其中揭以凝道二字夫道者修己治人之术上士闻道顺而行之中士闻道勉而行之下士闻道则笑之虽不笑不足以为道而勉强者亦未易多得公於道有闻亦既勉强而行之矣惟至圣达天德此古圣贤潜心不息者也本於率性成於谨独择善以诚身而已中庸之学公服膺久矣学固所以致道也然学道则爱人天下顒顒方赖於公公岂山中人乎中庸之二十七章既开修德凝道之端终以明哲保身之义语意前後不类朱子释曰道之大小无所不体故居上居下在治在乱无所不宜呜呼此义精矣疵贱姓名未能望履舄之余光倅来徵记盖有不知而作它日升堂尚能为公敷绎其义公折衷之

止善堂记

赵相迂翁为句曲樊君子芳书止善二字以名其东偏之室义出曾子书儒先发挥殆无余蕴大概研精而未及粗究理而不言事其於天性人伦之本问学操修之益威仪德容之盛所以形容至善极矣而行者止於王畿飞者止於丘隅各止其所而不迁以至仁敬孝慈信之目皆知止而得所止者就其说推之敬不止於陈善闭邪必以舜之所以事尧事君则敬之至也孝不止於服劳奉养必以舜之所以事父则孝之至也触类而通所居之位不同则所止之善不一然人人何以得如舜哉不得如舜则善未得为至也不得为至则未可止也人多误认至善为善恶之善非也乃事理当然之极精微之至有不可得而名者姑以至善目之若孟子所谓可欲之善乐善不倦其为人也好善则乃善恶之善而非此之谓也然孟子之善学者可跂而致而大学之善则圣贤之极功未易以一蹴造其域也樊君居是室也仰而觀其名俯而思其义一经十传皆吾几案间物讲习服行如炊之熟矣近而求之父子兄弟夫妇之间交友之际各止其当然之则父慈而敬子孝而箴兄爱而友弟敬而顺夫和而义妻柔而正此谓礼之善物於止善之义为近樊君殆庶几焉君积勤果行居仁乐义处闺门睦与乡间信子侄彬彬敦敏志学有东都马氏少游昆弟之风为三峯名家樊君又进不已沿其粗而入其精着於事而依於理揭名坐右常惺惺法也昌黎有言阳子可以为有道之士今虽未能及已将不得为善人乎吾於樊君亦云

明善斋记

明善斋者吴中周君子华读书之屋也天下之物未尝有无对者故善与恶对或曰善与利对利亦恶也中庸言明善不言去恶何也明善所以去恶也学先致知而後力行明明之也即明明德之明也能明乎善则能诚乎身矣明善致知也诚身力行也小人闲居为不善见君子则掩其不善而着其善非不知善之可好恶之可恶也不能实用其力耳不能实用其力者不诚也不诚者由不明也明则诚矣子华之为人恢廓自信笃实无伪好读书作诗然自幼即亲簿书期会之事故精力为所夺宦途中辗转二十余年临事不苟是非必辨所至与官长忤必得直乃已嫉恶之心太重故忌者衆自度不为时所容深有退休之志遣其子及甥从余游有意于讲学明理者间为予言学无精粗理无钜细致知之极功可以知天地之化育小而言之听讼之未使无情者不得尽其辞亦明善新民之一事也故吾于小大之狱必以情而不敢高下其手虽未能以善及人而不自欺人亦莫吾欺也尝扁中庸之语于室以自儆子为我发其意余曰刘玄德有言勿以善小而不为勿以恶小而为之此玄德所得于郑康成陈元方讲学之语也彼号为以经术饰吏事如公孙宏倪寛者能发此语否乎今子华则能行此语者也吾尝以为中庸此章与孟子合而孟子利与善之间一章界限尤别白学者不可不体认而居官者尤不可不以为戒也子华忻然曰君言甚善当并志

勤敬斋记

宋咸淳间中吴胡君壽擢第进士筮江陰尉妙年秀拔文雅政术表表一时守器重之罗致幕府郡事皆属焉守啸诺而已余少君五岁时习举子业间谒铃下顾视燕坐之室扁曰勤敬余不敢请其义已而时事浸异君解印绶去自是不复会者十有七年辛卯春余如姑苏揖君馆下容鬓苍皓几不复识顾余而叹曰与子别久矣昔吾自江上归也家国俱破忧患并集独行

踽踽贾用不售今老矣遂无田庐可以具饔粥蔽风雨吾性简伉不能效新贵人辄与时竞间独追念幼闻长老之训惟勤惟敬以是立身以是居官则免于戾吾书诸绅将终身焉今弃于时不复有进取意然行已无愧四十余年犹前时之处子也吾虽贫而不惰於志吾虽废而不怠於学吾旧知子斯义也子盍为我言之余生晚谢不敢当不获命则复于君曰勤敬之义广矣昔者睿圣武公九十有五作懿戒以自儆使人诵於其侧其诗曰夙兴夜寐洒扫庭内维民之章又曰慎尔出话敬尔威仪无不柔嘉其勤且敬如是故诗人美公学问自修之盛而緑竹猗猗之诗所为作也君年不及武公之半退然若不胜衣而有任重道远之意家无中人百金之产而有畏天命悯人穷之心此自古志士仁人之所以为难而後世放达豪侠者之所不屑为者也每观魏晋易代之际士以风流相命登山而啸临流而觴咏据柳而锻由窰而入抱瓮而睡一时诸贤之心以为身不得位於朝志不得伸於时痛谗邪之害正忧明膏之自煎故发愤而寄於斯也然其迈往不屑之韵习以成俗倚仗虚旷望空为高正始永嘉之际国事日非诸贤不能救也而甚者不免其身呜呼悲夫当时学者明庄老之自然贱圣人之名检也大学之道自天子至於庶人壹是以修身为本勤敬修身之目也乌有懈惰其肢体袒跣其手足以是为达者乎吾闻之处世之道惟自治可以止乱惟逊言可以避祸惟勤学可以救俗惟持身可以范世魏晋诸贤未之讲也君读书稽古穷攀力践此义熟矣余髮种种视君瞠若乎其後顾窃有志于学有志于当世请从君发明其义而相与懋戒之君曰诺哉

怡顺斋记

杜元凯序春秋内传云优而柔之厌而饫之涣然氷释怡然理顺然後为得也先儒以为此数语非深知读书之味者不能道元凯有左氏癖因其癖也故得其趣岂惟左氏凡读经书者不得其理则不得其趣抑左氏长於议论而短於理如君子曰之类背理亦多以其善叙事也学者爱其浮华而读之者亦不觉其浸润之入人深也然理一也有义理之理有文理之理左氏於文理可谓顺矣特不纯於义理耳读者尚为之怡然而况於圣贤之经书乎而况於义理之顺者乎筌者在鱼得鱼而忘筌蹄者在兔得兔而忘蹄言者在意得意而忘言所谓意者亦顺乎理而已理顺则意乐乐则乌可已乌可已则不知手之舞之足之蹈之昔庖丁善解牛手之所触肩之所倚足之所履膝之所踦皆中理解也其言曰臣始解牛之时所见无非牛者三年之後未尝见全牛也见其理也以神遇而不以目视恢恢乎游刃有余地矣提刀而立为之四顾为之踌躇满志即怡然理顺之譬也虽然此文理之理非义理之理也桓公读书堂上斲轮者笑之斲轮之妙得之于手而应于心口不能言父不能以喻其子子不能以受之父此理之至也古之人与其不可传者死矣所读之书则古人之糟粕耳以书观书而不以理观书乌能造其奥之深而为之跃然也哉余友夏君仲实博学而强识稽古而能文与其弟仲宾友爱甚笃於所居之东偏筑室三间榜曰怡顺昆季藏修于内焚膏继日埵箴唱和常棣之华韡然乡人皆称之黄君子高为之作记亦既发明兄弟怡怡之乐矣而於元凯书中隽永之味未之及也余复衍其义焉嗟夫枝叶扶疎根本之拔也华藻敷腴朴素之漓也今世之士负学问矜文词蔚然取光宠于一时者有之矣反而求之闺门之内伦纪之间放利而多怨挟财而致争伤手足之谊失妯娌之欢有耕夫贩妇之所不敢为者而读书之家或为之是非吾书之过学而不思致知而不力行之过也若然则呻其占毕虽自号为通儒亦何益哉仲实闻余言怡然曰请书之遂书以为後记

与闲堂记

舜之孜孜为善也鷄鸣而起周公之思兼三王也坐以待旦自强不息法天运也是故圣人惜寸陰衆人当惜分陰志功业者汲汲焉犹不肯流连光陰废弃时日昔人流涕於髀肉之消辛勤於百璧之运何乃自苦如是不如是不足以有为尔然而道德之味无穷功业与时消长徒竭智虑疲精神穷日夜之力以侥幸於万一幸而得之震耀於一时春华过眼随即摧谢而沉於下是一等析秋毫之利较锥刀之末以与贾人子卖菜佣争者乎嗟夫人生百岁稀矣自婴儿以至成童勿论壮有室矣强而仕矣三四十一年间可喜可愕可忧可悲者何限未几壮而衰耄而倦视听减而精力疲漏尽而行不休盖棺而事未定可哀也已岂造物者使之然哉以予为此拘拘也老庄之学者悟于此发为心斋坐忘之论室虚生白湛如也彼虽无见於圣学纯亦不已之妙比之拘拘于造物者则天与壤之间也里中陆君振之好学笃行幼以孝谨闻性不与物竞其先庄简公四持宪节扬历二十余年晚虽倦游不及享丘园之乐振之当袭爵让於其弟无几微见於色又出居里第之西偏筑室数楹以与闲名之盖取尧夫晚凉散步诗中天与一生清闲之句意以萧散自处也命余记之余考尧夫先生始学於百源之上坚苦刻厉不就席者数年夜半深雪山中危坐潜心虚静见理明彻所以能推乾坤万物之情尽内圣外王之道其工夫可谓至矣初年取友周流吴楚齐鲁梁晋之郊年三十余始居西洛蓬荜环堵逍遥自如嘉佑熙宁两召不屈主簿推官岂足为先生浼哉安乐窝中莺花高卧天津陂上酒月追陪盖生于太平长于太平者先生之身而俯仰天地浩然无媿者先生之心也所谓英迈盖世之豪岂得以散人逸士例视之哉因述尧夫一生出处大致以告振之使知道学自修之功不可以顷刻怠而营营於富贵利达以歿其身者固不敌一日闲居之乐也二说相须其义始备

居隐堂记

刘澹翁为周君国用书其坐右之室曰居隐而求说於墙东老人老人曰春秋时王道衰天地闭贤者退而穷处散之四方名姓不求人知如荷蓀之丈人耦耕之沮溺狂歌之接舆或适齐适楚适秦蔡或入于河入于汉入于海皆隐居以求志者而圣人以为闻其语未见其人何也盖此与下句当对看求其志守其所达之道也达其道行其所求之志也孟子所谓穷则独善其身达则兼善天下意为近之若耕莘钓渭之人足以当此春秋诸人谓之隐居可也尚未知其志之何如而况於达可行之道乎宜圣人以为未见也国用骇曰非是之谓也吾世居田里饱山林之味族大而离侨迁暨城之北一帘之外闐闐也淮浦江濱之客刍蕘之子负贩之夫旦暮出入城门之轨日深而吾独键关下榻不交人事日高而起日入而息结庐在人境而无车马喧咏渊明之诗优哉游哉聊以卒岁安敢自附於古人隐者邪予曰是何伤哉古人以市为大隐而山林为小隐盖地虽近而心则远迹虽动而神则静也君有子七人应门户聚彩衣于膝下击鲜奉旨更起舞献壽乐不可支当时君自视如陆贾贾虽家居犹时与太尉丞相往来画策君自幼无宦情布衣终身人罕见其面所以得安其居而遂其隐者诸子盖有助焉余发皓皓生子不得力夜漏垂尽而役不休可叹也哉

墙东类稿卷七

卷八

钦定四库全书

墙东类稿卷八 元 陆文圭 撰记

悠然亭记

济与漯交流漯久枯而济旁出源西北来环齐之疆东会于章丘之明水滙为东西麻湾而绣江之水出焉江自县东迤西而南故参政可与张公之别业在其左令子元朴实继先职构亭其上而命之曰悠然介李侯复初徵记于墙东陆叟叟曰噫异哉公之名亭也昔渊明守彭泽令仅八十日不肯束带见督邮赋归去来词返柴桑里闲居重九秋菊盈园持醪靡由空服九华寄怀於言方其徘徊东篱之下悠然自得谓此中有真意盖低头采菊举头见山景与心会所以为奇而人或改见字为望字遂使此句神采索然以见之出於无心而望之则有心也此老曾襟洒落真寄兴於山川之外高情逸韵今古一人而已张公以家世入仕遍历清要声望赫赫三十余年遂跻台省长官值中朝多故国势抢攘之际南北驱驰朝受命而夕引道诏书敦迫使者旁午马足车尘不得休闲以疾辞冰床重茧鲜食而寝血气未动不得免焉推枕而起皇皇焉未知税驾之所岂复有倚窗寄傲登臯舒啸一日之乐哉李侯曰不然叟所见者迹也而未知公之心也王仲淹有言心迹之判久矣渊明之时非今之时也公之心渊明之心也世以渊明为隐者渊明岂无功名之志哉观其命子之篇历叙陶族之兴追想桓桓长沙之业自以晋世衣冠耻事异姓义熙以後止题甲子故得朱氏纲目晋徵士陶潜之书则谓渊明为隐者非知渊明者也谓渊明有志於功名者亦非也公则深知其心矣然则黄金横带驰骋於淄澠之郊人以为公荣而遥遥白云郁郁长松公之兴已在乎西山之西东山之东矣叟默然侯曰吾二人问答即记也试以复于公何如叟曰诺敬书以授之时天历庚午上巳日也

本竹山房记

余读书江上闭户罕人事师君彦应自吴中来风度凝远器局修整望而知其为儒林之老宿行辈也余从之游一日袖文示余曰此吾友人史君敬輿记吾本竹山房之作也吾之先蜀眉阳人本竹则眉之永丰山名也距州七十里而近其地产竹穹林秀壁仙官羽士之所宫师氏永丰之望家於下数世矣始吾幼而出峡泝江涉湖忧患风雨更数十年退而老於闾盘之内因结小楼二间榜曰本竹以识吾一饭未尝不在瞿塘西也史吾同郡知吾为审记文云然子谓何如余应之曰昔春陵城西有村曰濂溪周先生居焉先生晚过九江爱庐阜不能归筑室其下以濂名溪张钦夫祠堂记中所谓寓於他邦而不忘其所自生者是也先生人品甚高不由师传默契道体千载而下知有濂溪而溪之所以得名则鲁直诸人未之知也诗云维桑与梓必恭敬止处父母国之道也古者井牧之法四民乐业安土重迁中世士大夫离亲戚弃坟墓宦游忘归侨寓它境爱其山川乐其风俗留居之者十率八九岁月云暮所历既倦则故乡之思日夕在望盖首丘之情有不能忘者每观子瞻苏氏之文见其兄弟壮岁出蜀飘泊彭宋之间颠沛岭海之上忆喜欢而至劳远梦指江水而誓欲归田言不及践而眉山之苏遂为颍

滨阳美之苏矣师氏以经学行义世其家百年之间文献相承其功名虽未及苏氏兄弟之盛而优游乡里没称善人亦无苏氏当年之忧患雅德之论固不以彼易此也今吾彦应少年之出或者其有苏氏功名之志已而落魄不偶终身流寓至於扁故山而自号以寄西归之怀自附於周子濂溪之义君子固深嘉其志而亦悲其身之不遇也虽然周子从容道德而处心於得丧之外故其处也乐以忘忧非士所宜法耶苏氏喜文章好功名而寘身於是非之内故其出也多忧鲜乐非士所宜戒耶既以此说复于彦应顾儿居仁书而识之亦以自儆云尔

碧岩记

王君宝臣世居?水之阳胄出金国完顏氏为漠北贵姓祖父昆弟列官於朝君总角趋安西幕府以忠谨闻会权贵人当国崇货无厌利君宅一区使左右怵君且曰若欲宦乎与我即可得君辞曰先人敝庐也且不愿仕君母夫人愠曰此言何为至我即不幸吾母子死其下权贵人大不乐时用事久睚眦立齏粉君曰不与必忤我吾谨避之耳索马疾去南抵江淮先人故吏多在焉闻君至大喜争致之君往来其间浮沉数年郁郁不得志一日诏下东征君慨然自奋请具囊羽从军提銳卒操舟入洋中请先登岸击贼会主将班师寻以君董海道饷事由东吴转输辽碣鲸波荡滹岁一往复壬辰夏五漕臣议更盐法偕君出司事过申江访予寂寞之滨余前未识君君为予叙出处本末握手出肺肝语且曰吾州太行迤北古桑乾河侧铁山峙其左玉山耸其右旁有碧落之岩穹林巨石冰崖千仞吾儿时钓游其下日宴忘饥当时以口语心异日买田筑室终老於是今四十年矣关河陇海崎岖万状二毛始见髀肉皆消此志犹未遂也顾念得姓以来二百余年积笏满床不可以当吾世而坠先泽以故黽勉从事不敢告劳然故乡先壠寒云夕照梦寐每堕其间尝即寓居榜曰碧岩不忘本也子为我着其说余曰君侯知马伏波之事乎昔者马伏波衣羊裘起从军遨游凉蜀间从弟少游尝谓之曰士生一世但取衣食才足乡里称善人可矣後伏波击交趾女子住浪泊中仰视飞鸢跼蹐堕地忆少游平生时语不可复得尝对宦属从容言之自恨归计不早言犹在耳及侯新息佩金紫复将楼船出九真将骑兵出雁门据鞍矍铄请击五溪蛮卒之壶头不进曳足卧石室中终身不复践少游之语今君侯春秋方盛有茂陵壮士之风当其往来江淮此伏波遨游凉蜀时也及其征海东渡辽碣此伏波击交趾住浪泊时也碧岩之号寤寐家山於是思少游平生之言矣今而後君侯投簪解佩御欸段马乘下泽车过家上冢击牛酺酒以宴父老然後寻儿时钓游处返吾初服优游卒岁不亦可乎不然九真之南雁门之北五溪之西唯君侯马首是瞻则碧岩虽在吾惧萝月之凄凉也君闻余言默然良久曰子言有理吾方图之子其书以授我乃书以授之

一山记

暨居浙尾北瞰长江直郡治北枕江之下有曰君山以楚黄歇得名山形小而势蹲无崇岗翳谷以凭阻其高深然开郡千百余年而君山郡主山也其西南则秦望青高其东则由里后敌凤凰诸山环趋而拱揖之故君山虽小最甲於诸山每遇春风花时秋涛雪月之景诗豪墨客游人士女登临而觴咏行歌而坐啸山之胜概不可弹述余尝欲卜庐其下为终隐之计而未果也赵君鼎之家於山之左朝夕与山相接已而避地去家侨居城西南隅距山数里所舍幽

遂而闐闐疑若与山不相闻也晨起推其户故山之青忽排闥而入数峯低昂若远而近若伫立以俟若顾眄咫尺而不得语也赵君喜而叹曰吾与山有宿缘耶何追逐而不相舍也因自号曰一山而谒记於余余思赵君少时以故国佳公子挟豪贵驰骋於当年谓功名可唾掌取时移事改卒困厄不得志方求田问舍皇皇焉无所之此陈元龙之所窃笑而欲卧君於百尺楼下者也然出处殊时老少异见隐居求志遯世无闷亦君子之高致也试与君倚浮远之栏呼大江而问之自楚以来更国几姓春申之後閱世几人彼之豪奢富贵朝荣夕悴殆如秋种之花而一山苍苍千岁不改自古高人逸士所以定舍彼而取此者盖有以也赵君其远返故庐毋使猿惊鹤怨以动草堂之灵余异时樵服拜于庭下负薪汲水以相从请分此山一半鼎之名孟鑄少余一岁云

观稼亭记

杨子筑亭於野圃之上命之曰观稼领客登焉客曰异哉子之名亭也山有嘉卉隰有荷花汉南之梅洧水之芍药皆足以供诗人墨客之翫若稼者田里间事村氓野老之所务且须襁褓之具在焉子何观之有主人叹曰书无逸诗七月皆言稼穡之艰难周公岂欺我哉自天子至于庶人一是以农事为本故孟春躬耕帝藉三推孟夏司徒巡行命农勉作秋省敛而助不给若庶人则三时之间沾体涂足尽力于南亩者也今吾与子命名曰士幸免服田之劳偃仰一亭之上徘徊四顾开口而笑举箸而食得无犯素餐之讥乎客曰然请为耕田之歌歌曰畇畇兮乃疆乃理春阳兮俶载良耜耕泽泽兮或耘或耔甘雨祁祁兮以膏我稷黍载获济济兮万亿及秭曾孙不怒兮农夫乐只歌罢主人大悦酌酒介壽而退

横舟记

清晖堂之东得支径出外圃行数百步曰梅台台下为池池岸种木芙蓉夏秋开花掩映緑岸迤北为横舟阁阁础入池与台相直望之如画舫然壬辰秋予侍公登其上徘徊四顾扣舷而歌之歌曰采芙蓉兮中塘羌欲济兮无梁留帝子兮北渚阻美人兮西方櫂木兰兮双桡清风吹兮野飞航晨赳墟兮争渡溪口无人兮满船夕阳夕阳兮柰何归来兮沧浪波上兮寒烟水禽拍拍兮葭莼苍苍倡渔歌兮和汝起渔罾兮鸣榔忆孤注兮仓卒尚不如老巴东之乡拾涧草兮忘忧又何必森戟与凝香歌阕而退

宾月亭记

永嘉山水甲东浙而南雁荡占胜处第一山据平阳邑南林壑幽秘源洞纡演衆峯?呀互相吞噬岿然出奇者三十有六里人叶君家焉瞰江筑亭面揖紫翠水遶栏角鸣一夕山空无人鹤唳松顛长天卷云晴碧万里叶君步至亭上手执铁如意浩歌离骚九章歌未阕有客径入坐上寒光炯然神爽逼人清迴出尘俗表叶一见惊喜顾谓客曰子非織阿望舒之流乎吾闻凤凰之楼鵙鵙之观眺蟾之台影蛾之池妙舞清县宵乐未央子胡不往而独於荒江之濒穷崖之下辱以访予得无淮陰侯之过樊将军乎客曰王侯贵人之家歟以延我亦未尝不往然彼岂知吾之心者哉吾性孤耿每逢骚人羈士苦调清吟萧然而长往者心辄爱之故今夕造

子愿与定交可乎於是主人大喜举酒属客酒半酣主人起舞客曰吾往年与谪仙对酌花间李谓吾不解饮尝停盃而问我以古人之事後又与雪堂老人游于赤壁矶下闻吹洞箫声相与举孟德乌鹊南飞之诗吾行天下知心仅得二士今子成三人矣主人闻之益喜笑语良久以如意指客示童子曰汝见吾平生有此客否童子假寐弗应须臾太白西没野鷄初鸣客辞主人而退期以来夕复会亭下叶如期而往候至夜分俄陰云骤兴风雨交作客遂不至叶君怅恨久之後数年道过蓉城以其事语友人陆某遂为之记

菊轩记

霜露既降秋芳独妍香而耐久枯而不坠故其功益壽延年人谁不爱菊然爱者即指为渊明则不可九日闲居东篱独酌兴直寄焉耳世遂谓渊明爱菊然则松菊犹存抚孤松而盘桓谓渊明爱松亦可演而伸之爱莲花者皆周茂叔邪况今时之菊殊非渊明之菊也陶宏景言菊有甘苦二种花有黄白二色生南阳酃县最难多得宏景梁人上距晋宋不远度渊明所赋之菊亦止此耳史正志范至能谱菊近六七十种已倍本草数十而陶未之见也然详其名品俱甚平平无絶奇者近二十年海上吴中延及江左种种瑰异叠见层出干高踰八九尺花大径三四寸五色浅深金粉绚烂殆与西洛牡丹广陵芍药相伯仲史范又未之见也岂天地之气时有所偏聚而人力之工巧转移其间神功造化有不能违者非草木之妖邪使渊明复生手掇其英未必不疑其美而艳以为尤物而弃之也然则土脉之美恶植物之盛衰识者必有所感矣鄱阳叶君宗陶蒔菊盈轩持以示余余何言哉噫时今非昔花亦今非昔矣渊明之高山景行今犹昔也孟子曰诵其诗不知其人可乎是以论其世也是尚友也

万松堂记

芙蓉城东北可二十里有曾氏山庵後为礼敬寺寺後有万松之堂龙泽上人游方而归介钱唐仇仁近诗为其师求记於墙东叟叟曰堂之钜丽吾未尝寓目焉乌乎记它日过之门庑深寂花竹淨娟寻师方丈拾级登堂坐语未竟忽闻笙簧之声起於壁後寥寥喁喁高下疾徐似中律吕方倾耳听之雄风飒然衆窍怒号如海涛万顷浩浩汤汤澎湃触石骇逸奔雷拢百川而东之也为之悚然以惊主僧微笑顾童子啓扉但见苍松满山修者偃者直者仆者耸者桷者礫硪多节者拳肿者甲错者虬髯者披发者蒙雾而膏染烟而黛枝若翔鸾根若踞虎目覩之不能状手约之不能数兹其为万松之山而筑堂以临之者取岁寒之义欤吾闻一生二二生三三生万物自一生万万不为多会万於一一不为少此物理也有以少为贵者故渊明喜孤松之秀矜独树之奇今师种松充牣岩谷将?堂阶千岁乎将规匠石栋梁之材乎将为樵夫斧斤所薪乎将受雨露所培乎将遭霜霆所摧乎吾与师皆不能知也师曰吾佛法悠久愿力宏大叟无虑且叟以万松为多乎芥子可纳须弥也叟不荅是夕留宿山中顾窗上月影鬢髻皆为龙蛇夜且半猿声四起孤鹤长鸣拥衾不寐童子侍侧曰猿鹤时时出自松间来听吾师说法耳堂成於某年某月住山无极愚公别山参公今嗣孙某人某云

三皇殿讲堂记

至元戊寅诏下所属收拣明陰阳医术之士是岁十月天雄赵珪实来江陰领本路医学医始别籍为户除徭役赵受代去又六年子德新来嗣父职武林徐谷阳副之先是太医院奏医学久废後进无师谓宜随路设学置博士弟子员岁时讲肄制可于是中书省建言各学创三皇殿春秋释奠着为令符下本路施行间程李二将军献地若干于城之西南乃即其处度材鳩工赵徐二君躬董其役岁在丙戌五月辛未殿成越八月丁未堂成朔望师弟子跪谒如礼退而升堂相与讲述其一家言矣夫素问难经灵枢等书其徒相授以为邃古之秘源远不可追考殆与炎帝神农书黄帝兵法之说相类然其旨蘊工巧理气融贯知陰阳之故标死生之本济人泽物其功殆出于诸子百家之上识者以为六经之外不可以无是书也世不可以无是书而技之精妙又非书之所能尽者昔长桑君授扁鵲以禁方而戒毋泄其传公孙光授淳于以奇方而愿毋以教人上池之水菑川之法今人不能知也然则堂之讲是惟无斲轮者在下有则必笑之矣会其徒徵记于余余儒家者流挟其师之说以鼓动斯世力顾不及彼也尚何言哉

芹塘记

国朝仁育含生周恤民瘼命京师郡国皆立医学置博士弟子员以季春季秋之三月九月释奠于三皇仪视孔庙前代所无觊见也暨祠在子城东南隅地迫民居涉堦而北不百武有兵马司旧址前列诸峯後带江水面势寬敞庙食为宜延佑初守乔侯迁而筑之正寢巍然庙貌甚古余弗称是岁久且圯天历己巳某始至伏谒祠下顾瞻楹枳心惕不宁退与同列谋之同知州事刘君信甫慨然任责各捐已奉率属鳩功佣匠僦夫民不知役写放邻郡之制绘塑善济公岐伯神应王扁鵲以下十人侑享从祀如十哲门庑讲室下至庖湑位置得所又以余力整砌苦墙通渠引流百废具兴落成有日嘱记於某窃惟古人所居之馆一日必葺况古圣人之居朝廷之所严事者哉某与刘侯则既免於戾嗣而葺之岂无望於後之人哉或谓鸿荒之说圣人恶之者扬雄氏之驾说也

常州荐福寺记

晋陵郡荐福禅院创於唐天佑间正?玄策二师坐寂之地丛林仪矩甲浙之右至元乙亥用师江南常为兵冲守臣以拒战死破城之日并堙木刊而三百余年之荐福卒烬於劫火中惟佛殿钟楼仅存涉江而北抵暨阳界寺有田二千八百余亩宣和中郡人卜居士舍以饭僧兵後其徒散之四方而田为豪有力者所据丙子春僧笑岩来居之聚其徒以讲其师之说出余力以翦刈其荆蒿残砖断甃幻出化人之居既又诣官讼理卒归其侵疆而寺之旧观咸复壬午腊月过暨访余具道本末求余文以志其起废之岁月余闻而叹曰盛衰兴废数存乎天而人力不预焉然所以盛衰兴废不假乎人则数亦不能以自行昔唐之将亡也兹寺创焉其废也以宋之亡与干戈实相终始疑若有数行乎其间则其废而复当兴也固有待乎其人今笑岩即其人也笑岩虽为浮屠其学干略勤敏类世之有才者故所向如愿而其功皆得书余独於复田之事重有感也自西域王子以舍为行中州化之彼怵於因果报应之说本非正道其用意则亦善矣世之贪者至攘臂而攫之取非其有之谓盗其良心无复愧耻闻卜氏之风亦可以少省哉笑岩名普悦暨之永陵人

延庆庵记

距北江数里所转柳巷而西石径萦回过野桥林樾扶疎屋瓦参差梵音经声殷殷与海潮相应答而山僧野衲之所栖东西行人之所回顾者颍川陈氏之精庐也始榕山君既寢疾豫为终制粤瞻舍北乐哉斯丘既得吉卜经之营之手植松桧成行鬱鬱佳城白鹤来翔既又筑室於其旁以为享祀焚修之地名之曰延庆招僧可明如晦居之明来请记余惟祸福感应之理盖天人精?之交而陰阳善恶之积相摩相荡反复无端而真有不可诬者故释家有福田利益之可求而易家亦有积善余庆之可必然求之说出於有心而必之说则无所利而为之也每观于公之高门王氏之三槐执券索偿如取诸寄而造物者卒如其所期亦若有陰相之者岂其理之必然而气不能不随之欤抑气以类相从善感之者亦善应故人无不老之壽而有可延之庆壽止於当年而庆流於百世故也榕山君富而不骄以济人利物为心时艱岁歉江淮间全活甚衆种德深矣陈氏而未艾也其在君之二子乎慕学而甚贤好施而不倦天鍾庆于是不在其身而在其子孙懿氏之占殆复验矣

报恩庵记

佛之道以无为宗以实为妄以身为幻苟利于物肌体髮肤舍不复惜独其所居庄严靚丽费亿万计通都大邑招提兰若无虑数百区鸣钟而会击鱼而食涧丘岩石之下尊师老宿结精庐以依焉者亦复金碧焕出林表与前所谓佛之道絶不相类余每恠之尝试以扣其徒皆不荅讲师智满一日谓予曰吾祝髮时尚幼辄通大义时时为人讲说谓得三昧会失意权贵人擒致于理事幸得释擲拂子径去一鉢游方几二十年晚归乡里吾老且倦念不可无把茅以盖头乃即售山之东村曰张岐择爽垲地几弓右控大河左揖定山环流叠嶂图景献状鸠工赋役合岐夷甾数楹草荆游息其中沥十指血书华严八十卷椟而藏之扁其屋曰报恩嗣吾法者惠日法泽与有力焉不幸早世嗣孙妙粹实继其役苦思精志铢积寸累不数载山畚增衍林木陰合视前所构十加八九追念往昔五十年间如一昼夜是非荣辱浮云散灭维是荆始之勤不有纪也後世莫知其因纪之何如余应之曰佛之道以无为宗以实为妄以身为幻是身本空居于何有无恩无怨不知所报余与师处于今世梦也师之居梦境也又欲以是传之後世然则此梦何时觉耶师笑曰吾今日相与问答亦梦中语也昔显公谓天衣禅师云恁麼也不得不恁麼也不得恁麼不恁麼总不得此事如何余默然不荅居数日师命其徒来徵记因次第其语授之且曰吾二人问答未竟百年後复当为丛林一大公案师曰然命刻之石师朱氏暨之双牌人

永福庵记

僧友山介余友义夫来请记其先未诺也请至七八而不倦余友之言曰师陈氏世居白鹿之新桥曰陈巷者族所聚也师幼有至性弃家游琴川受业淨居久之弃去主高氏之奉亲庵高氏微周氏以礼致之後主东舜之衍庆与周合谋崇饰其宇掇拾衣鉢俾匠石费居数年猛省作曰吾陈氏子吾亲安在而为他人地乎即日挑包问讯家山泛埽松楸买田营室意想心画种种庄严经始大德之己亥越丙午迄工佛法圆成闻者美之今过东誉村望之丛林蔚然隐

隐闻钟铎声者永福之庵也其中有庭翼如有丘旷如者他年求息之所也于是师之愿力宏矣请子志之以示其徒俾世守之勿坠其勤无不可者余闻而疑之儒者宗孔氏立爱惟亲奉先思孝报本追远于五性属仁与礼墨者师瞿昙断爱欲之源等慈悲之施屏弃六亲逃居山泽苦形链志灭尽衆有并灭而寂亦无灭者今师之云云殆用世法不出于世卒堕世网中类家人子年少浪走不自饰晚依田园家累百金顾景自惜惟恐于其子若孙一旦废坠而谆谆遣诫及之也此其着想正与瞿昙氏之教相戾至于敦族怀亲结庐墓左孝思老而弥笃则甚似吾孔氏之学耳世有墨名而儒行者岂非昌黎公之所愿交者耶抑文畅之序公从柳子厚所请也余于昌黎无能为役独念子厚谪居湘中北望城南先墓所在寄托村隣刍牧不禁自恨不得如马医夏畦之鬼受子孙追养者每读其文而悲之死者如有知闻师之风亦少愧哉师名谦益求记时年七十余矣

常州路玄妙观庄田记

犹龙氏之道清淨无为斋心寡慾然为之学者聚其徒以请其师之言又象其天之主宰而事之于是乎不可无室以居无田以食夫人居而求安食而求饱此在吾易中所谓神而化之日用而不知者邪富者壤有余蔬贫则贷粟亦既清淨寡慾犹未免此又岂非吾有大患为吾有身者邪延陵郡玄妙观实故天庆元贞初赐今额观基晋永嘉中中尉毛公舍宅为之观田则宋端拱中教练使陈公所施有年所矣乙亥南风不竞师燬焉一城为墟道士执左契藏之地中幸得不毁于是道录可道樊公帅衆先入披榛莽屏菑翳堂观粗立庄田多为豪右所据诣官讼理悉归侵疆真静阍公继领观事复核隐租修明故籍副在有司钤以印章乃合元额并後续置及道俗所舍条例项目凡若干顷亩议勒之石以垂永久居敬蔡公又继之创祠室具香灯以祀施主之考妣师资且欲镌其姓字以劝来者今住持云岩华公痛前人之志未就不远百里踵门谒记余嘉前後数公之勤嗣续弗怠弗私其躬吾儒教中能自树立鲜及此者故为之着其颠末观中人饘于是粥于是以餬其口者可不知所自哉或曰是则然矣抑嘆潦之不时出纳之弗谨则如之何曰天下有道却走马以粪自今以始岁其有矣况神人居藐姑射之山乘云气御飞龙能使物不疵疠而年谷熟哉若夫管钥司存是其尘垢粃糠奚敝敝以为事天历己巳重午日记

资敬观舍田记【原注代作】

余赖前人余庆袭箕裘之业顾惟鞠育深仁欲报罔极不能守志庐墓手护松楸亲扞采樵者以誓毕此生之愿规墓傍地可置万家河流径其左?以修竹树之嘉木垣而筑之构宇于其上延道流居之请于朝以甲乙住持着为例晨夕香火上以致封人之祝下以存丰氏之祧又虑春秋享祀无以供粢盛而饘粥于是者无以餬其口惟是先畴之畎亩不敢爱籍而置之观中者为顷二十有畸为米豆若干麦若干石有畸制其出纳为之品节美余则储之以给创修之费後嗣之贤者斥而广之以成吾志其不贤者勉而守之母去其籍毋毁伤其薪木可也昔李文饶记平泉庄有毁吾一树一石者非佳子弟而洛阳之乱醒酒石已为监军所得刘梦得游玄都观桃花千树後十四年重来则兔葵燕麦荡摇春风耳世故相寻人事相感令人悠然兴叹由前之说吾子责也由後之说观中人责也乃刻规约于左方年月日嗣子某记

资敬观记

资敬观者永安华氏宜珍昆弟之所建也观以居道家者流而名出於儒书何也华儒者也儒者则曷为从道非慕道也慕亲也宜珍之父指山君力本以起家力学以起宗乐施予不求名所树立甚宏濶里閭称德人不幸中壽以歿大德之末岁在丁未窆于梅里之吕桥厥施既遐二嗣竞爽追孝于前人乃即其旁辟地十数亩筑道士之庐河流萦回地势亢爽松栢茂蒨水竹靚深道过西桥者望之如化城之居钟磬声时出林杪居人指曰此资敬之观也夫敬一也迹之事父远之事君孝可移而忠能竭其力则能致其身矣伤哉华氏之亲之不逮养也而犹幸雨露忧惕之怀之有所托也事亲之日止矣而犹幸事君之日长也华君致远之器自今展拓此敬施之於家则男女正位勿嘻嘻也施之於朝则责难陈善勿沓沓也施之於民则经营尽瘁勿燕燕也是为资敬之义岂曰黄冠雅拜祝圣人壽而已乎岂曰深衣坐讲席为国人矜式而已乎存之以不倦之诚续之以必葺之勤保之以勿坠之训则此观与天壤俱存可也或曰华氏之先有隐德焉其子孙又封崇之九京可作安知其不遡颶风而上征载云旗骖玉鸾以就羽人於丹丘乎而惓惓乎兹土也曰是非儒者之言也夫孝子不死其亲而非此之谓也刘盛读孝经曰诵此能行足矣焉用多读而不行乎嗟乎此儒者之言也宜珍名玠尝为吴学正与弟璋俱以孝友闻

栖真道院七元阁记

浒江之浦昔有栖真道院宋嘉定壬申道士周志静所建陆守玄俞至洪共成之岁久潮汐吞噬势不能支至大己酉其徒管元范徙居州治虞山之阳又十有四年至治壬戌王清仁香远复建七元阁於殿後規制崇敞殊侈旧观介余友李刚直求记於余余辞不能李不可数徵余文余扣之曰七元之义何居李曰在天成象在地成形维北有斗其星七谓之元者尊之也事出道书余因思王介甫尝作临川祥符观三清殿记止书其屋楹窗户之深广至作九曜阁记则又书其溪山登临之胜与夫兴造之岁月直谓此阁为游人之壮观而已三清九曜皆秘而不言岂非儒与道两家九流各专其一固有所难言者乎李曰不然神鬼神帝生天生地在太极之先而不为高先天地生而不为久长於上古而不为老伏羲得之以袞气母维斗得之终古不忒禹强得之立乎北极蒙庄氏昔有是语也且天之苍苍其正色耶其远而无所至极耶其亦有宰之者耶天固亦有道耶道之为物惟恍惟惚兮恍兮其中有像惚兮惚兮其中有物古之博大真人哉冲漠无形变化无常安知其不乘云气御飞龙游乎六合之外其神凝使物不疵疠而年谷熟以降福于下民则祈禳祷禱之地似不可无也余曰然吾二人问答即记也视介甫赘矣岁在昭阳大渊献戊午月癸丑日书

灵芝记

至尊登大宝之十有三年岁在敦牂中外恬熙民物康阜真元块圪散为休祥於是灵芝九茎产于古延陵郡通守单某之室昭瑞应也公曹南人字吉甫贰郡有善政秩垂满一日洒扫东轩书榻之下得异草焉萌出土中如玉笋踰月浸长敷叶二十有七如佛指如重云如虎拳如龙首五色眩目朝夕变见久之成紫金色背白如雪脉理聯属珊瑚交加势倾西北朝揖天阙

人士聚观请以上闻图示四方侔来徵记忆归附初延陵以僦刃受诛堙井刊木万室飞灰遗民百无二三荆棘中创立城郭昇平日久流庸渐归府寺一新?市复合蜗居朽壤蒸出神奇呜呼异哉气化盛衰物理消息幽阒茫昧赫奕显焕非至人莫能测非钜人莫能当於是单氏有隐德焉是何祥也吉甫子禧为仆言其先大父讳某金国进士调阳谷令弃官奉母逃难絶食拾萁采荠以自给晚节浮沉居昼锦里中讲授义学手葺草堂名曰萁荠反昼锦之义也嗟夫芝菌之瑞其萁荠之积乎向培其本根今畅其枝叶者乎予读国风知荠之为甘读颂知萁之可食疑芝字独不经见岂古有之而不为瑞欤抑古无之而今出为瑞欤王介甫谓祥符中封泰山民间献芝者以万数涧溪岩壑搜抉殆尽因以叹一时好恶之异谓皆治道所尚然人之情多见为常间出为异今世不多见也治道虽不尚此非治世焉得此乎上圣道德甄和毓粹诸福之物莫不来庭玺书褒宠下延陵郡襄靖之後此其昌乎吉甫明恕而广直老为吏师子禧好学甚文诸昆弟彬彬焉玉笋之祥滋未艾也仆耕穡东郊味饱葵蕨不识芝为何物昔闻商山老采以疗饥本草亦谓五芝服之令人轻身延年诚仙药之上品顾未知服食之方尔愿从老圃而受学焉或曰是殆不可以人力致也夫不可以力致者芝也有如商山之老人者又何力致之耶噫

墙东类稿卷八

卷九

<集部,别集类,金至元,墙东类稿>

钦定四库全书

墙东类稿卷九 元 陆文圭 撰传

朱家传

暨民有朱姓者以卖扑为业久之精其术辈流莫能及呼曰朱家而不名朱挟其术游贵人之门无不喜之者重帘深院风微昼寂外闻闾市喧嚣之声於衆中必能认之曰此朱家声也朱家所至虽儿童妇女皆栩栩迎笑竞逐之其术善以寡得赢以贱易贵以物与人无吝色戏取之亦不屑较至有负其直者一毫不贷也故所得常倍以闾巷细民致中人十家之产尝曰吾以十指上起家市少年有诮之者曰朱家胁肩谄笑以求媚于贵人俯俛终日在地独不嫌崔烈之铜臭乎请易其业朱家叹曰吾闻劳力者食於人吾侪小人劳力者也吾目不知书无负郭田可以具饔粥饥寒迫人且为沟中瘠矣今吾鷄鸣而起皇皇焉适市灯昏而归视吾所携具而醉饱之资在焉皆俯俛终日在地之力也然後具斗酒匕饭呼屠沽儿辈环坐妻子歌呼击缶酣畅而罢为一饷乐也吾何以易此哉古之人淮陰袴下高阳博徒率由贫贱致富贵安知非吾辈中人也市人闻之皆曰朱家有大志不可测己卯中秋暑一夕而毙行路喑喑嗟悼有邑子作诗吊之曰孔方入手便通神使尽机关误杀人血指汗颜贪取利财多福薄丧其身人传以为笑因命其徒歌之为薤露以给葬云陆子曰朱家之出微矣岂古大梁朱亥之苗裔欤其事鄙俚污贱无足齿録者然观世之人巧力较利以术钩取人货财者亦独何异於朱家哉且彼惟目不知书故抵此则读书而行市人者虽与朱家执鞭亦何辞焉述其事作朱家传

碑

常州路達嚕噶齐太中大夫德政碑

皇庆元年秋八月召太中大夫常州路达嚕噶齐达尔玛吉尔迪赴阙昭异恩也旧制郡县官三载成考代至乃更其有政绩流闻素简上知者玺书宠褒锋车趣召超升内转不以例拘所以旌良吏风列城也至大初公自秘省出牧暨阳岁适大祲蒐讲荒政首捐圭租务农劝分轻刑简役期年政成今上毓德春宫雅闻公名迟公入见劳问优渥将处以机衡之任公顿首力辞丐补外增秩二等复出监延陵郡常暨隣壤声闻素接熟公教条甫至之日二邦老稚交迎境上拥马首不得行郡当孔道使盖旁午调发无虚日同列争以严核为能趣办为功公既视事一切鎮之以静驭之以寬庭无留讼门清如水日晡吏散登郡圃多稼亭延接宾僚坐笑从容不自知主将之尊也郡多寓贵素不戢下挟羣不逞横里中百姓苦之公至有御物于道者捽其魁尸诸市主为请不能得自是屏迹迄公之去无一人譴于市者庚戌秋旱田禾将槁公访知魏村之金牛山有龙祠晨冒暑途走数十里抵湫上焚香未退云气郁然五色蜿蜒翔导

马首公喜见须眉未及郭雨骤至御者进盖却之衣帽沾湿观者如堵举首加额谓公之有志于民也旧岁客舟过昇之龙湾为盗所得衣赀尽没昇府购捕甚急擒十四人庾死一人御史録囚疑之徙鞫于常公立囚庭下察其色有冤且肢体残瘠不胜考掠为之惻然取成款阅实具得诬服状因破械小愒之潜物色真盗踰月晋陵捕江贼八人并获其赃讯之皆龙湾舟中物也尽纵十三囚还家一府大惊公之神政举斯三者他可知也昔广汉知闾里之奸郑宏致随车之雨若水辨女奴之冤前史以为美谈今无愧于古人矣公行有日吏民惜其去相与聚谋有欲援汉颍川借寇君故事以请者或曰君命召不俟驾乃止有欲援唐宁州狄使君碑故事以请者衆曰诺乃镌石为之辞且系之诗曰九州之外人物瑰奇美玉如公简明惠慈三年报政弗亟弗迟泥金尺一命汝来归臣拜稽首天顔不违兰陵西道五马駉駉公归无遽民将畴依维石峨峨下有穹龟匪公之美维後之规式崇尔瞻以慰我思

同知江陰州事韩承直德政碑

两京传循吏文翁而下几人蜀郡南阳颍川渤海之地不闻有片石纪牧守之遗爱寄吏民之去思者岂当时有之而千载之下淹没刊缺不复可考欤抑古者风俗质朴文未工于纪述也汉末魏晋间碑文始出尤盛于唐通衢广野龟趺屹立道傍过者指而问焉则曰某刺史某县令之德政所致也归而考之史传则姓名与其行事有不合者矣惟羊太傅在荆狄梁公在魏名德最着当年怀之後人思之出其碑下者为之流涕徘徊而不忍去则其仁心惠政盖有非言语所能形容者今二碑之文卒不传而二公之名与天壤俱则虽无二碑可也丁巳之冬余将有远行乡人请曰子少止同知州事青社韩侯秩满代去州人德之将刻石以颂需子之文余曰侯之德政可得闻欤乡人曰刚柔相克正直无偏侯之德也剔蠹除奸禁暴御灾侯之政也侯之涖职会岁大祲务穡劝分恤贫赈寡豪右发廩细民受券是岁饥而不害杭民告余省府令派江漕税户船粟往哺文移峻急侯屡申乞截留纲运止救一州久乃得请百姓呼舞米直顿减是其仁也主帅不职屯军横里中民有诉者侯命擒卒至于庭诘之有小校历阶上挟卒驰去侯大怒条军中不法事将按举之同列避去不肯署侯争愈力迄取卒致于法城西有奸民假警逻为名横行境上胁取民赀久之益鸱张罪恶盈贯败获收系行赂规脱去吏皆许之矣侯持不可穷劾奸状得罪十数毙于狱竟除其害是其勇也公退之暇庭寂如水苞苴至门阖者拒不纳仓库羨余例瓜分之侯独却不受是其廉也有挟仇指平民为盗者笞掠诬服侯辄平反之解缚纵去讼不已推核数四卒得实果非盗是其明也侯性忠恳待僚案甚睦而不苟同长官纵其下受贿豪夺民妻侯戮于市归其妻长官怒不恤也尤留意兴学校修官室教育生徒凡隶于学者不征于乡儒服踵门者倒履迎不及俗吏有谓侯私于儒人者侯笑不答侯为政大略如此乡人之词未终余曰止为官不当如是耶若有他美余不敢请是足以书矣请书之乡人曰诺请为铭铭曰洵美韩侯正直且仁敦我薄俗沃为阳春有攀其辕卧于城闉将侯母归留惠我民南墉之道江水粼粼孰去而思视此刻珉

题跋

跋李良辅传

友光道示余李良辅传大旨述其尽忠外舅之家余读未终篇掩卷问曰李父母在乎曰无之余曰免矣不然则能无於陵仲子之讥乎昔者韦相择壻得黄裳晏相择壻得韩国事业光明照映史牒良辅勉图之杜富二公亦人耳杜公诋执谊之奸富公斥元献之党良辅之所不肯为也然君子不以是咎二公之不义者以其忠且直也良辅之所不能为也若正常之事则无愧之矣

跋徐和父折狱比事

治狱之善三曰公曰明曰恕治狱之弊三曰误曰酷曰贿夫治狱者习文法通经术明德化而已至如陰功恶报天地间容有此理而亦不尽然余读史由汉以来治狱吏如张释之于定国者盖寡有则史必书之故为吏者不可不知书徐君和父折狱比事一编条分类析善可为法恶可为戒大抵存心明恕者上也执法奉公者次也畏谴而惧罪者又其次也今之为吏者得是编而师之不必求之杀青汗漫之中而开卷了然其为拯救生灵裨助刑政不亦多乎徐君之用心仁矣哉盖君尝吏湖之归安徽服察情卒辨真盗开释无辜不畏强御省府闻而嘉之有子早世其子妇能抚诸孤今其孙皆克继先志矣圣朝方崇美化节妇孝孙每加旌表然则州县盍上其事而观民风者察焉他日泥金诏下华表巍煌仆老矣尚能大书特书以记之但虑景纯夺去吾笔耳君名庭秀父诚甫名以忠号桧岩孙骥麟凤曾孙泰

跋仁轩训蒙二书

汉郭林宗痛贤党之不淑隐德不仕然犹周旋京师诲诱後进不怠作史者悲之子昭训蒙二书犹是意耶昭困厄不得志归遁敌峯之陰殆絕世高蹈者方将着书立言以利後学非果絕世者也古今简籍充栋凡经子以言理诸史以言事大略具是二书矣或曰言理者非苟知之亦允蹈之言事者善可为法恶可为戒岂空言也虽然初学岂遽以是责之哉癸未菊节前二日书

跋曹氏家谱

余幼闻乡老言後泾曹氏自苏之梅里徙居暨阳三百余年诗书之泽延袤不絕由章桥迤西抵北至丛桂坊院如蜂房家有街道相通时节朔望往来鷄初鸣男女咸起盥栉具冠带黎明适父母尊长之所省问拜跪祁寒盛暑不辍既退男入师塾妇具膳羞闺门内外斷斷如也或遇诸途步趋端谨长幼推让言语敦厚文彩蔚然不问而知为曹家子弟也捧乡书列仕版者金紫银青两派而下累百十人盛极而衰近世老宿行辈凋落後生闻见日寡习尚转移家业颓坠者间亦有之然流风遗俗隐然未艾终非他姓比也余旧与君选德正古直斯立若晦交皆曹之良也年皆长於余皆弃余而死矣若晦有三丈夫子长无易从余学初若困钝骤进莫御思如涌泉余甚畏之一日袖携其家先人所辑宗谱索余着语余读之慨然美其家世簪绂之绵长而痛吾亡友手泽之如新也俛仰畴昔人寿几何他日获从先大夫于九原握手三叹不知生平论辩之气习犹未忘乎否也噫

跋陆庄简公家传

东南人物宋渡江前最盛渡江後则公卿将相胥此焉出未有寥寥如今日者也将天之气数与国俱尽耶抑地脉之盛衰不可测也陆仁重之材盖浙以西杰出者百年前後名监司如赵季仁杨伯子范西堂胡石壁指不多屈仁重视之无不及焉问之江浙湖广之人可知也况诸公为之易而仁重为之难政事出於一人之手而击断得以自专与同寮参署左右掣其肘者又不同也余与公三世通家情好尤密读振之家乘所载如其人呜呼九京不可作矣安得如公辈数十人布满东南使数百万生灵病得苏醒得醒哉振之好学自重进退有礼不竞於时能世其家云振之鏞字也辛酉清明日陆文圭跋

跋汤北村四六旧藁

北村先生袖示四六旧藁五十年前相与往复者皆钜人达官问之王承福则所圻之屋今不知几易主矣篝灯细读掩卷凄然若文字典雅精致在所勿论余独有感於文字之外者矣翁年八十余寒窗一榻坐閱兴衰久无复康世志新学晚生直以词人视之耳呜呼翁岂直词人也哉

跋周子华诗藁

杜子美为诗家第一非独以句律之清新格调之高古盖其一饮一食不忘君亲厚伦纪忧家国伤时感事慷慨兴怀惓惓不自己王半山题画像诗可谓得此老之心中吴子华周君歟历江浙以能吏称余不知其工诗也来澄江幕聚首两载一日出故藁示余伏而读之叹曰此非诗也一以写其情性之正一以鸣其不平之声而已忧心殷殷终屡且贫者北门之忠臣也役使不均从事独贤者北山之大夫也忧谗畏讥叹老嗟衰此人之常态君独且奈何哉虽然君之齿未也惜余年迈将就木焉不及见君他日展手经纶腰金衣紫载功名於竹帛此时得意之佳句又何如也

跋澠塘先生诗墨

崇禧方丈获观澠塘二诗手墨其一易小米诗两字终不可省其一送当涂令王大夫入朝八句以颂以规二公皆居金坛去非在当涂治辨有声後立朝出牧风采凛然惜不大用以殁平国屡召不起至批印纸以自絶中身不仕以寿考终俱端平第一流人物距今垂百年矣王之孙钊刘之孙汉余皆与之友钊为暨学纠不知所终汉今年八十一贫客村墅二公之後遂微悲夫天道无亲常与善人太史公所以传夷齐也掩卷凄惻敬识下方

跋林彦达诗藁

彦达诗数十篇落笔辄不凡或感慨或潇洒或雄肆或简淡千态万状不拘一律盖自成一家云余旧於锡峯识彦栗适燕识彦广何林氏之多才也他日得窥全集为作小引

跋袁静春诗

选诗唯陶阮近古神思清旷意趣高远直寄兴耳魏晋宋之间废兴之事可感矣悲遇之诗以写其怀诗不自知也况寓之酒乎或讥其流连光景殢情花草似矣而非也千载而下复有如二子之所遭者则知二子之心者矣具区甫里之间近世有隐君子焉结茅构亭出苍莽之墟樵村渔舍混为一区城市之迹疏而麋鹿之性驯嗜欲之机浅而鸥鸟之情亲所交皆畸人逸士西邻北里诗筒往来清江白月举樽相属优游不仕者四十余年今来吴中与其子游而隐君歿久矣示余手泽一编伏而读之体制精严而不雕音响和平而不激仰攀陶阮俯凌鲍谢而机轴自成一家余恨不获登静春之堂相与上下其议论而遗风流韵犹隐隐纸上可掬惜哉隐君袁氏名易字通父子泰字仲长敏学自修克世其业云辛酉清明前三日书于成德堂

跋陈元复诗藁

余读陈君诗藁事充实肆笔壮宕如蜀山雪消春江怒涨万里东注滩濞不已鱼龙蛟蜃蜿蜒万状错出於其中伟则伟矣奇则奇矣然诗有句句中有字诗外也诗有意意中有趣诗内也他日吾见蔑之面而已是外也今吾见其心矣是内也此可为识者道少陵云亲朋无一字老病有孤舟古墙犹竹色虚阁自松声句与字也勲业频看镜行藏独倚楼水流心不竞云在意俱迟意与趣也四体具矣科场废三十年程文阁不用後生秀才气无所发泄溢而为诗诗未易学也骚选而下徐庾不必学盛唐而下温李不必学苏黄而下江西不必学下是非诗矣非吾之说考亭之说也抑体有古今性有好尚子皮之面岂敢谓如子产之面乎甚欲与君究论此事桂山秋风归思浩然他日获窥续藁杂子美集中不辨当避三舍戊申改元七月既望墙东老叟书

跋苔石翁诗卷

客况句云鴈沈秋驿雨鸡送晓窗灯书壁云门当车马道帘隔利名心寄友人云病犹有药扶持老贫为无心俯仰人遣兴云门因好客时时扫窗为看山面面开右澄江诗人苔石翁得意句也诗家与文章家不同诗家最难删前三百篇经圣人手後人议论不敢到建安称七子李杜苏黄集大成渡江初诚斋放翁後村号三大家数其余江湖诗人一联半句虽是小家数亦有过人者如江西派中人物彭城陵阳南康人皆入社独未有澄江人入社者故自古澄江无诗人噫今有人矣翁名监字君宝缪氏诗号效颦集云

跋蔡桧岩诗後

南史载济阳考城之蔡年移四代不殒家声信矣盖司徒谖生丝丝生綌綌生廓廓生兴宗其後有顺有约有擢至凝殆八九世高风素节不乏於时江左名族如王如谢皆莫加焉今君俊岂其苗裔耶君俊为仆言世居吴中徙秀之华亭家传儒素大父弃世时祖母徐年方盛终身栢舟之誓吾父事之甚谨晨夕不离左右以故薄宦情而遣其子出入世故故姻党称吾祖母之节而称吾父之孝吾赖祖父之庆而又有子三人焉孙一人焉虽无银鹿之弄而有彩衣之

戏矣仆闻之叹曰何蔡氏之有余庆也非积善之报耶尝观李令伯陈情表祖母刘九十有六奉养不离至言零丁孤苦终鲜兄弟外无葦功强近之亲内无应门五尺之童??独立形影相吊读者未尝不悲其志而悯其穷也蔡氏一门之胜李多矣重珪叠组之荣岂足为君道哉

跋夏瑞卿诗卷

戊戌岁瑞卿挟甘石之学访余沧江之上丙午复邂逅于钱唐余尚记君君不余识也盖相距九年矣君阅人多才非沈谢谁能摸索余久遁世偶出于市其友固不识耶君愧谢出一巨编南北名流咸在就而阅之有文行相副者有名浮一世而实不足者有实有余而名不足者有死而不朽者有不得其死者有老而未死者有幼而学者晚而学者有学之进者学之退者穷者达者明者愚者富者窶者命耶性耶知天之学必有以辨之呜呼岂独以诗文验之哉以其时考之可矣余晚学而退者故云仲春上澣墙东老叟书于流福桥西之寓舍

跋蒋民瞻咏史诗

昔西山编文章正宗歌诗一门委之刘潜夫以世教民彝为主凡涉闺情宫怨者皆勿取後潜夫自作十臣十佞等五言百首句简而括意深而确前无此体视胡曾咏史直可唾去选诗如昭君秋胡罗敷等辞直铺其事而已未有断以己意者杜牧桃花夫人赤壁等絶则拗峭为工而断以己意矣然仅一二首而止不如潜夫之多延陵蒋民瞻博学雄文妙年登第流落不偶卒老荆溪之下八十余年手不释卷作通监拟古七言絶句六百余篇悉取一千三百六十二年间大事参以先儒史评断以己意从而褒贬之较潜夫多数倍篇篇精诣可读余掇其尤者数十首如咏田单云仁义宁容诈力欺火牛计岂出神师自缘骑劫来何晚不是田单智较迟范雎云入秦已报魏齐仇功纵无成合退休岂是甘心延蔡泽定应回首鉴穰侯坑儒云六籍咸阳烈焰红诸生方士一丘同後来犹有高阳客笑着儒冠揖沛公萧何云沛公诸将入关初萧相谋深总不如秦府尽收图籍去不知博士有遗书陈平云一双白璧赎君过四万黄金买主疑自是楚人愚易入谁言汉计尽能奇丁公云鸿门舞剑甘为虏广武杯羹脱若翁为楚不忠如定罪未应项伯後丁公张释之云盗环犯蹕得轻论廷尉持平信不冤谁为绛侯书牍背此时何事竟无言王贺云不堪汉法似秦苛狗鼠纷纷触网罗绣斧尽从天上出赭衣转见路傍多田延年云空倚前功羞唾背漫追往事痛扪心僦车自谓罪犹小骖乘谁知祸更深魏相云洞洞天聪达四门清明重见汉乾坤方惩私室伸公议更倚旁蹕借里言二疏云都门供帐拥安车多少公卿愧不如他日更怜萧太傅晚年竟死石中书韩延寿云此心元有吏民知恩信分明不忍欺御史他时来案事可曾闭合试深思元帝云丰芑贻谋数世仁奈何汉政杂周秦乱由恭显谁阶祸儒用韦匡岂识真薛广德云中入怙势权偏重君子寒心道浸消空溅车轮污颈血安危元不系从桥王凤云汉火荧荧渐欲灰一天黄雾密难开昔年神爵书何瑞应为阳平献兆来王章云奏上囊封分死忠直排昏雾彻天聪牛衣女子区区见钦永诸人政与同孔光云昭阳殿里方专宠安汉门前竟贡谏後世无从窥谏草当时还有一言无梅福云一尉孤忠郁莫摅忍看汉室堕新都宁甘去作吴门卒犹胜称为莽大夫逢萌云冠挂都门海可航谁扶汉室立三纲身名当日怜宣武官爵他年笑纪唐鲍永云漫将深意托朱弦寄与东邻美少年玉骨终当同穴朽主裳更忍为人妍桓荣云老更亲枉乘輿迎三叹儒风盛永平汉治

不蒙稽古力诸生徒羨一桓荣管宁云扰扰干戈京洛间海云空濶老龙蟠他时建业徵书至
浑作蔬畦瓦石看荀彧云万骑潜驱走贼营子房可是善筹兵兖州便作关中看九锡他时更
死争吕蒙云分取荆州一半回旧盟赤壁冷如灰阿蒙不识同仇义夜半白衣摇橹来李密云
闻道凌华醉抚床天边鸿鹄且回翔夕阳亭下晋日短不及事刘光景长潘岳云潘郎信是拙
谋身甘作奴顏拜路尘漫赋闲居夸止足白头终负太夫人王戎云早年曾作竹林游身到三
公未肯休谁道清谈多废事不妨终日弄牙筹张华云空羨鸛鷀托一枝位高身与国俱危斗
牛早识丰城剑星拆三台自不知张彝云銓选无分赦羽林当时有识共寒心洛阳运去将分
鼎怀朔人归尽散金萧衍云佛说当来割体肤太平寺主老仍愚是身三舍非真舍舍与河南
一跛奴梁元帝云同室相屠危社稷拥兵不下弃君亲何言万卷有今日自是六经中罪人齐
後主云翟衣马上苦匆匆北旆南辕莫适从邺下不忧无斛律并州更恨有延宗并州平云秦
王神武非人敌一战尽收河以东弃地僭军浑莫问在廷赐帛赏谁功秦王云两矢临湖太白
秋上皇方泛海池舟房谋早赞周公事魏谏终忘子纠讐放宫人云玉顏空闭掖庭春君宠虽
疎圣德新粉黛三千弃如土何须更进一才人武后云漫留富贵托英公老将何堪制女戎长
发初来感业寺白头直到上阳宫平高丽云三十年间几战攻坐看诸将取辽东武功幸可夸
来世家事应难告乃翁李敬业云风驰一檄挟军声可恨思温策不行孝逸能为灌婴计英翁
何假子輿名玄宗云楼西花萼倚云端玉笛琵琶乐且湛百福殿前晨省阙五王帐里夜游酣
肃宗云乘輿西去抚军东宝册宁须蜀使通良娣翟禕心更急黄袍肯释望贤宫德宗云猜心
往往忌人言却要推诚待吐蕃自是平凉多伏甲空教伐竹大安园高骈云成都冤妇诉将伸
延阁妖徒术岂神要向天边骑木鹤那知地下缚桐人王师范云小车载仗固忠谋遣质求降
竟忍羞衽席一言身族灭当时只合死青州朱温云初被梁家新袞冕尽臣唐室旧衣冠乃兄
醉眼分明处祇作碭山一盗看郭崇韬云位极功高谗隙开欲谋还镇更徘徊后宫巧结终身
援谁道军中教旨来李知诰云金陵城阙势龙蟠揽镜时时发浩叹受禅老臣应恨晚更求益
寿饵金丹其余佳句可摘甚多兹乃玉中之天球珠中之夜光也余表而出之後之读者慨然
有感於其迹忻然有会於其心其於世教民彝未必无补云

卷十

钦定四库全书

墙东类稿卷十 元 陆文圭 撰跋

跋杜东洲诗後

岁在辛酉始识东洲杜君於苏台见其魁岸英宕真奇男子也不知其为诗人甲子夏五余自容山抵舍案上忽见东洲诗集手不及盥快展疾读尽一卷如入武库戈甲劒戟森森逼人於是輾然笑曰此非东洲之诗乃唐人古句君拾得之耳五言律似王维姚合下及刘长卿七言如许浑崔颢絶句亦不让岑参杜牧之盖东洲好游北穷松漠东望海若有司马子长足迹不到处宜其诗发扬蹈厉奇中律吕可附极玄又玄之後也欲为痛着数语而余驾方税君舟已迈遂有余恨他日寄全帙来锓梓当以序引见嘱庶蝇附骥云

跋陰德诗後

善恶之报有以理推之者以气推之者理所当然而气适与之符则其应也如响理所不然而气之感也厚则恶亦有时而不报理虽正而气之植也偏则善亦有时而不报若是者总归诸天而天亦不能以自必故凡经传所言善恶之积而祥庆殃咎之必至者常理也如伯夷饿比干死顔子夭则理之所无而气之变为之也呜呼此圣贤之所不言而存世教也其意微矣仲鼎父论邓伯道之事谓之裁度义理不当弃其子则可谓因如此而获罪于天遂絶其子则不可伯道以石氏之乱不得已而弃一子天犹絶之则永嘉之末盗贼羣起杀人以千万计天乃忽然不省而皆俾之横行得志又何耶余谓报应之理天不可知而不幸者当归之命人之为人但可为善而不可为恶则不易之性也然为善者尤不可有责报之心有所利而为之为善必不诚则欺天矣仲鼎父以为如何

跋般若心经

心者佛之别名心外无佛佛外无心是心也神妙卓立不与物俱灵光独耀迥出尘根不立文字不由见解风幡自动儿啼自止若夫向塔相轮边走去西川看竞渡便被狐精勘破此理如何天英上人示余楷法心经余不通梵书读之正自解其意据注家以色受想行识为五陰眼耳鼻舌身意为六入色声香味触法为六尘而楞严悉指为虚妄然则不妄者独此心耳注家又以苦集灭道为四谛谛者审也审其理也又以菩提萨埵为觉而有情阿耨多罗三藐三菩提为无上正等正觉波罗密多为到彼岸以华言梵音又文之以理不知彼葱岭以西诸国语果如是耶余独爱其心无罣碍故无有恐怖之语以为有合于仲尼观吕梁伊川渡汉水之意然西方之教以无心为主鲁东家之学以正心为主此理又何如各请天英下一转语

跋邵僧坐化偈

林回弃千金之璧负赤子而趋彼以天属也安上人不念其亲有疾弗疗趺坐瞑目默斋翁不念其子方懽喜赞叹真以为往净土生莲花也是之谓见解是之谓了空是之谓瞿昙氏之学其心术冷水冰地其天性离矣安乎惜无以曾子易箦之事告者翁乎惜无以子夏丧明之事告者虽然曲士不可以语道者束于教也余之谓矣久欲与迎福老辨析此义当暑未竟

跋黄子高先诰

金凤黄氏世为暨阳望族家谱传二百年举字子高余同年友笃学力行克绍其家延佑甲寅初行贡士法子高首中乡试授常熟州学教授待次未上一日携其六世祖讳待聘诰二通示余盥手捧读其一通绍兴三年七月可右迪功郎逸其首云止奉公体国宜加獎錄八字是时官制分左右左为有出身人今日右不知其獎錄之因考之宋史元年六月邵青叛引兵趋江陰二年五月浙部淫雨害稼先数日江湖寇多纲运不继罢发运司公之受赏意其非纠合民义则纳粟賑饥所谓奉公体国者此欵其一通则淳熙十三年四月可赠通直郎因公之子安丰判官讳洵引郊赦恩乞赐其父者也按谱洵字济卿绍兴十五年乙丑刘璋榜登第距乃翁受赏时不过十有余年後仕至朝奉郎提辖行在?货务然则翁义方之教积善之庆槩可见矣君子之泽躡五世而犹未斩子高方昌而大之呜呼太行王屋之山真可得而移也又尝记渡江初陈去非与席大光避地湖湘不过诗咏自娱无济时康国之志相继被召三年陈自中舍除小天官席由吏书拜参去年八月孟庾权同都督江淮荆浙诸军事移屯金陵今诰中所书参知政事出使吏部尚书阙者此也权书洪擬则当时在礼部请兼用词赋经义取士者也先是吕元直自江上归过姑苏守臣席益请去琐闥党魁吕大喜於是吕复相益入朝而给事胡康侯奉祠诰中给事中唐传必代康侯者也不着其姓史无所考舍经明行修之安国用无所知名之唐传将涉千里却骐驎而策蹇驴相业如此恢复何望焉阜陵无宰相若王季海之奸邪梁叔子之庸默在所勿论卷中姓名历历可指追思曩昔抚几三叹使郑叔则闻之必大笑曰何预我邪丙辰七月望後阅董弅所着闲燕常谈云建炎三年正月黄唐传为中书舍人然则此人姓黄数月後必又迁给事矣

再跋

余跋後数日因阅中兴奏疏胡明仲言於思陵曰今典章文物一切扫地百司庶府殆为虚设其必不可阙者惟吏部户部为急诚使江淮两浙湖北并依八路法慎择监司而付之则吏部铨事亦复减省不过置侍郎一员郎官两员胥吏三十人则所谓磨勘封叙奏荐常程之事一按而举矣又曰所谓宰相之任代天理物扶颠持危其责任重非特早朝晚见坐政事堂弊弊然於文具之末而已明仲此疏正建炎三年九月为起居郎时吕颐浩为相恶其切直罢之今观此诰吕书字甚谨推赏一迪功亦亲视之他可知也非明仲所谓常程文具之末者乎览之太息後五十年至淳熙间选人勅黄左右相皆免书不知始於何人建明当考

跋柳公权帖【原注盛明卿藏】

帖云近过云安种种未及但深反侧外日虚獎甚幸临行不敢诣某呈欧跋云柳君此帖清奇

出尘在诸石刻上深有晋人骨法数百年手削存乎其前景仰高风也吾友石君孟光秘收修为跋之後又有臧彦发乔仲山跋史不载诚悬出处不知以何年月何事到有杜鹃处诚悬以忠谏自结主知亦何待人獎借未有呈字必上达官惜不详姓名耳庐陵公跋谓此帖出尘在诸石刻上此墨蹟也以比石刻何耶况大和开成距宋昭陵亦未有数百年也欧跋不伪但恐不在此帖上耳石君孟光臧君彦发至仲山已三易主又为明卿所得君其慎宝乃今数百年矣

跋麦舟卷

范高平清规粹德精忠伟度为宋名臣第一忠宣为之子岂不知父志与父之量麦舟之事乃其浅鲜者故志传皆不载不足载也或者疑其不稟命想视此数石之麦为重耳夫闻斯行诸有父兄在子路所闻所行有大於此者矣非麦舟之类也又有一说曼卿年长於希文其视忠宣犹孙行也人徒知范公父子之好施而不知曼卿豪放之气轻视富贵非大贤之赐则亦不屑受也今人惯道一乞字而甘食嗟来之食夫岂知芙蓉城有仙人哉

跋坡翁与承天明老帖

坡集板行甚多何抡所编三苏大全最为丛杂该备皆不见此帖何也坡再游钱唐与南北两山诸僧最稔所谓灵山高入自有缘契者然别去五年已有湖上僧舍不复往日之叹辽鹤重来当何如其感慨耶

跋放翁与文定劄子

始意文定公帅越时与山陰往来必稔今睹墨帖所谓拜违崇仞者是此翁曾至吴乡也又有假钺视师语而封函之首呼制置资政同知此必嘉定更化後再起帅金陵时也三幅合为一通劄子提头体当然放翁老矣舐犊之爱情类杨彪亦恃公知己也

跋蒋良贵梅堂竹亭二记

梅堂竹亭二记与鹤山书院拱极堂矩堂相表里皆端嘉一时崇尚理学之文前乎曾苏无是也又前乎韩柳亦无是也非无是文也无是识也呜呼美哉文靖之辞精贍文忠之辞明畅忠文之辞简质一以世教民彝为主蔼然仁人孝子之用心也又岂可以文论哉伏读三叹敬识下方

跋陈忠简公驂与子帖

前辈谓不可观人私书私则不可传也弗私何害忠简与四九郎帖持身以洁训子以俭蔼然有范文正欧文忠家法贤矣哉或谓後溪除命公实沮之疑党韩者然己巳之罢与诸贤相前後终不与余端礼京镗同升公岂党韩者耶疑史评未当

跋丘文定公手帖

戊辰己巳年朝廷多故方隅不静蜀寇未平西泝归峡东出利阆兵锋所交积骸枕山壑流屍散江而下赤白囊警报无虚日谣言烦兴民听惶惑夏秋旱虐赤地千里饿殍满野余老病卧家祈死不能适丘君立中携示先太师文定公与其冰翁吴荆侍书得之渭阳家手泽如新余读之三叹是时公自枢密院检详予祠起知武昌淳熙己亥岁也书中首言祈雨百方不应村疃缺食继言强盗劫杀阌倅归倅皆传闻不得其死散榜捕緝而实不然然湖寇因此平靖有将错就错之语凡此数条皆与今日事相类殊可怪也上距百五十年矣然淳熙何如也天运回还陰阳长歇人事变更竟何如哉末言辰沅杪板价直紧厚者不易得之为侥幸余将就木犹未办此季孙之櫬不可略取掩卷恍然

跋赵学士书

宋广平梅花赋有虚谷献之仁近三先生跋公自叙云垂拱三年战艺再北客馆东川观墙陰梅花托根非所感而作赋皮裘美见而称之竟失其传三百年後复出诸老先生考订精详援据该博无复加矣於公出处进退之义未之及也余独怪垂拱何如时十月为坤黄裳易位天地闭草木为之不蕃此贤人括囊而隐之时也广平方欲出仕又恨其登第之不早何耶东川非其所凤阁鸾台乃其所耶公刚肠嫉恶劲气逼人老而弥笃诚为可敬计作赋时牝鸡老嫗尚未得二嬖也罗织之祸诸贤駢首就戮後人哀之而亦惜其才之轻试也公鞫狱太原而出使方力争之几不免虎口设有不幸不过如泄冶之徒终未合蘧伯玉君子之道故君子贵时中尚知几若公晚辅开元正色立朝永保贞固相业居第一则议者无訾焉余顷在吴子余书几见公梅花赋未识偏旁读不成句与今本絕异未知孰是所谓作赋补亡则虚谷以为忠定伯纪山村以为文清太初二李不同诚伯纪也足以配广平然恐太初为是更考之宋欧阳光祖寿丞相亦赋此

跋子昂写韩诗一首与乡贡钱子原求跋

昌黎屡举不第遇陆敬輿知贡举乃始得之感知赋上光范三书皆贞元八年以後事遇不遇命也何汲汲若是耶然识真者少世无敬輿将终身不第矣虽终身不第而日光玉洁之文万古不磨岂明水一赋顔子一论能尽其槩耶赵学士所书古诗笔法雄健似不为子原设诸君期子原科第者浅之焉知子原者矣

跋王本斋画像

总管王公幼躋撫仕江浙淮湘敷历殆遍每一官画一像赞者盈轴莫不美其金章紫綬之贵优加陟任今居严陵府幕他郡县有事辄委君治之以廉能着声江浙云君三衢士家今寓钱塘

跋三生图

按三生图出袁郊所记而坡仙尝手抄成传以补天竺故事葛洪稚川之歌可谓夙契守儒端士多不之信夫精气为物游魂为变而非轮回之谓也原始返终则知死生之说伊川谓当於原字上用工夫又曰须是自得使当元佑间馆阁争论时或及此则必当与坡力辨不尤甚於哭则不歌乎简卿出千里临本示余书此一笑

跋李良心万里江山图

前代画山水名家如大小李将军范郭诸人尺楮丈素价重连城千金不易以其所绘似真山水也然而羈人逸士多居山泽而贪夫笼山泽之利者赭山而采竭泽而渔所谓山深无计避征徭而鱼蛮子告勿语桑大夫者不幸而遭之虽欲捐宅舍弃坟墓避地远去而不可得可为世道叹息周子华示余李良心画本余睨视之峯峦草木郁郁苍苍万里江山一览而尽余惊问曰此何境也其某州某县界邪有长江之苇邪有空山之石邪吐舌久之手卷还客

跋十梅图

灵隐老子跋云自召南说命言梅之实後梁唐宋诗人止咏其花以为世道不古余乃为解梅嘲云古今咏梅多矣自水部至茶山一联半句收拾图中殆尽然有遗恨半山真字装字韵唐律七言老坡魂字韵古风三首精巧絶唱皆不入选是殆不可以笔墨形容其标格香韵超出色空眼界如谓言花不言实为古今世变之验莫太杀风景否昔吾乡余卿一游梅台之下俯见横枝蘸水嗟赏久之左右进曰覆侍郎此名消梅味极佳余不觉失笑由今思之当并入丛林公案也壬申建子月书

跋海棠图有数鷓鴣集其上

沉香亭美人殢酒睡未足岂堪闻枝上啁哳之声使九华帐里梦魂惊耶

题索句图

咸平以後景佑之前结庐孤山有隐君子焉诗案无尘维寂及玄冥搜物外隐几嗒然影香得句佳处参禅起视湖光霜月在天梅瓶无香茶鼎无烟怅鹤梦之俄空泣茂陵之遗编画史虽工意妙不传

题空隐和尚行卷并谢草虫之惠二首

大隐非隐真空不空空在实里隐在显中儒释两家同异日将无同

蠢蠢含灵各有佛性活者即动死者便静死活只在纸上要人究意

题画牛小卷

枯梢浅草两牯且行且啮童子困卧其上殊自得也视其状貌朴野必不能角上挂汉书读项羽传虽然日长睡足欠伸时不识字更佳也

铭赞

存存斋铭为金尚志作

存存之义本乎易繫君子存之庶民反是存之有道养吾夜气昼之梏亡则不存矣成性天与何待于存闲邪则诚多欲则昏勿摇汝精毋滑而魂虚以待之衆妙之门噫此求仙之术非吾儒之言

安处善斋铭

人之为善皆有四端意所由来尤贵审观所由虽善必察所安圣人知人如是而已董生之论盖本诸此孔以待人董以处己人已虽殊善则均耳以危为安以出为处旷宅弗居保於逆旅凝水焦火戒其伤汝

玉泉铭为琴士刘伯赐作

三间之洁孤竹之清万古空山化为泉声洗月涓涓度风泠泠游鱼出水误作琴听

石礪长老赞

水流涓涓久滴石穿磨成镜面底不是砖

古礪长老赞

苔封老树槎牙藤穿怪石顽犷半夜山空月明倒浸一枝梅影

瑞芝赞

公车入闽仁风载扬协气嘉生炜炜煌煌华粲紫金肤凝截肪绘以为图播而成章咸曰休哉维公之祥匪公之祥邦家之光

枯木画赞

石漱涓涓细水无声西风叶脱老木孤撑碧筱丛茁青苔侧生飞离两两山中来者见人不惊翔而复下此为何处莽苍之野

文

劝农文二首

每岁仲春劳农於东郊此古之礼而朝廷之令典也州县长官以劝农事三字系之职衔之下於事为重诏书每下率以农桑为王政先申明禁约唯恐不至句容一小邑土瘠民贫近行移坊乡凡有闲田隙地广殖桑枣尔民亦既忻然趋令二月始和农出在野县官率其属以延见父老非为文具务敦实业尔父老率乡之子弟惟勤惟谨勿惰勿游勿好勇鬪狠勿饮博争讼惟耕蚕是务耕蚕者衣食之本不耕则饥不蚕则寒饥寒迫於身则放僻邪荡无所不为尔父老之羞尔其训教之西成之後农时有隙子弟各入乡学习以孝弟忠信所以崇乡里之化也若夫苛征慢令贪刻以厉尔民县官所不忍为益思检身绳下以无负于尔百姓父老在此吾不食言

农重事也州县官以劝农二字系衔每岁春月延见父老於东郊诚之农事礼也夫水旱之不时此天数也堤防必筑以泄水患陂塘必浚以通水利修水旱之备也人事不尽诿之天时尔农所以重困一夫不耕或受之饥一妇不桑或受之寒衣食不足而有饥寒之患则不肖之心生尔农戒之哉古书有之若衣服田力穡乃亦有秋服字有用力之意力字有勤劳之意不用力不勤劳即是惰农惰农安有秋成之望继自今父训其子兄诏其弟妨农之事一切不为毋游手好闲毋沈酗於酒毋好勇犯上毋不孝不友有一於此官有常刑此又尔农所当劝者其敬听吾言毋忽

戊辰劝农文

暨阳一小州土狭民贫官府治从简易一毫不肯科扰近者口盐徧敷塘夫远役出不获已然且多方区画害不及细民尔父老所亲见也去春饥民在野为之贷粮接济仅免流散夏秋蝗蝻继发极力收捕幸无害稼岁小登一冬雨雪愆期深为尔农忧之二月初吉田事载兴长官亲出东郊劝耕虽循旧典亦欲延见父老巡省田里尔等一乡之老当帅一乡之子弟胥训告胥教诲浚乃沟洫慎乃堤防利乃耒耜修乃疆畝事事有备有备无患又须孝养父母弟逊兄长毋淫于逸于游惰农自安不勤不劳越其罔有黍稷尔农戒哉其或好勇鬪狠博奕饮酒聚其淫祀驱诱良民邦有常刑罪及尔身弗可悔

君山东岳行宫求雨文

礼经有云天降时雨山川出云君山郡之主山惟灵坐镇此地血食千载今民以旱告田苗将槁吏奔走不遑靡神不举卒莫我听谨再拜稽首请命于尔有神神其相之锡以甘泽使苗勃然以兴乃亦有秋岂惟吏塞其责神亦有辞於民敢告

本州城隍求雨文

时雨愆期常阳告虐旱势太甚王庙食此地与吏共职斯民吏之不职罪也王坐视民困而不为为之易耳吏之力不及此敢告

茅山广济庙祝文

雷平之池小龙在焉旱祷辄应以膏我稷黍前代赐额相沿至今奉命而来酌水以献

龙光庙祝文

龙光之庙距县二十五里神龙所寝云雨兴焉润泽一方有功得祀敬以香币用致上命

青元观祝文

雨三日以往为霖黑潦满道民不适有居祠屋方修将有乘赤鲤而来游者敬率弟子躬候水滨愿施斩蛟之劔永宁下土

张大帝祝文

惟神发源桐汭兹为行祠石柱砚池尚存饮马之迹治水有功法宜得祀钦帝之命显王之灵炉香未转降福孔嘉【原注图经载祷雨炉转不已】

张烈帝祝文

惟神平乱有功遗爱於丹阳延陵之境今隣国为壑汤汤方割能不动心乎灵与天通有求必应

张帝祝文二首

惟神在昔佐帝有功环江东之境皆神所部今一邑之水未至怀山襄陵神之治之何难之有

近颁诏旨以神显迹于江海之间进崇徽号亦既奉牲以告矣今秋阳杲杲忧心如熏神忍坐视之乎驱霆驾风起蛰龙而鞭之神之职也奉答休命庶其在此

武烈帝祝文二首

神之烈显於武德之初神之灵通乎百世之下庙食於此者宜以救民为心久旱无雨民咨胥怨敢告

惟神当武德之初作辅偏方有功济世司徒之号自梁迄今旋加帝封庙食南土东门有祠邑

人所瞻敬致苹藻具扬休命

沈王祠祝文【原注王讳庆之】

惟王晚登极品罄竭孤忠主昏不明卒殒厥命大节凛凛庙貌如生下蜀之山北枕江水朝命
致享敬吊英魂

墙东类稿卷十

卷十一

<集部,别集类,金至元,墙东类稿>

钦定四库全书

墙东类稿卷十一 元 陆文圭 撰说

文说

西州史敬輿尝为余言汉唐宋以来良相能吏谋臣武将代不絕书独文章之士鲜得汉董贾两司马刘向扬雄班氏父子而止耳王褒崔寔而下不论也唐韩柳宋欧曾王苏而止耳李翱皇甫晁秦而下不论也宋渡江後词章愈盛古体逾远独朱子诗赋本骚选文视韩苏而理胜之其余叶正则以下各自名家六十年来影响殆絕将盛极而衰欤抑待乎其人也敬輿此论上探前修下期来哲余闻而太息焉然尝论之古之所谓文章非言语之谓也道德仁义之精华礼乐法度之彰着皆其具也然典谟训诰誓命之书坦明温厚已非秦汉经生讲师所能道而三百篇章句皆出於微臣寡妇寺人伶官之口何其粲然而成章也盖周召而上文章皆实用孔曾而下文章皆空言空言者言而不见用非无用之空言也以无用之空言而後世能言之士如向晨之星稀疎絕少岂不大可怪也哉自唐以来朝廷百司用人无方惟翰苑非文章之士不预所以承恩宠备顾问参谋议职谏诤位亲而地禁非止典诰代言以风天下而已唐以陆贄李绛为之宋以欧阳修苏轼为之则人品知也夫文本於理根於识昌於气兼之者贾董而下诸人虽不居翰苑名犹着也翰苑创於唐开元间六百余年学士名不着者何限然则视文章之能否知翰苑之盛衰居是职者学宜益懋行宜益修名宜益着故居之而不忤不然则昌黎氏必傲之矣因与友人论古今之文而并及翰苑之职纵书以赠之

静庵说赠都瑚布鼎録事

夫子言仁智动静以其体寿乐以其效对举而互言之无先後也子思言喜怒哀乐之未发发而中节则兼体用包动静而戒慎恐惧与夫慎独之旨则用工於未发之先未发体也体则静也特不显别之耳直至濂翁太极图说方出主静二字盖太极分陰阳阳主动而陰主静易不曰阳陰而曰陰阳静居动之先也天下之动纷纶交错而吉凶悔吝之所由生吉一也凶悔吝三焉动之不可不谨也圣人定之以中正仁义而主静人极立矣常人感物而动动不知止故流於恶而失其性圣人全动静之德而本之於静者诚之复而性之贞也无欲故静者非言人之欲也言天性之本然欲之未萌者也此固造化之根底圣人所为主之者也人能寡欲以至於无则静静则可以希圣矣古润録事长官瑚都布鼎字成之登己巳第沿檄至澄川访余蓬蒿之下相与讲明太极指要因求静庵说於余余谓主静之说先儒尽之而庵字独未经见成之曰紫阳亦尝以晦名之矣无伤也余曰然於其行书以赠之

心说赠凌湛然

湛然者存心养气之学以静为主而动生焉非如室虚生白心斋坐忘又非如枯禅入定常惺惺法如镜之磨一尘不留如水之渟一波不起云影天光上下昭彻岂胷中扰扰终日昏昏者能识之哉宣城翁以此自号而松雪斋为之书其人可知

琴说赠朱老

唐郭琴师善者能鼓十二弦生云中流落湘南子厚为之志墓而悲之锡峰朱老年七十余以能歌闻诸公皆俎豆之然守古道不变不为俗耳所便故与箏师同一不遇一日访余斋中袖出诗数十首自言将道江涉淮以游余时方与诸生温举子业取四十年前蠹册子据槁梧呻吟不絕声诸生见之皆大噓余叹曰是奚噓哉我异彼几何王式老矣诸生强之出安知不被拘曲之讥乎不惜歌者苦但伤知音希朱之心余知之余之心朱未必知也悵矣

渔隐说赠顾仲仁

古之隐於渔者雷泽潜龙也物论当以磻溪为第一人富春次之玄真子江湖散人以下不数盖吕尚非隐素负鹰扬之才坐磐石以待天下之清後车载去则牧野檀车煌煌之事业立谈可办至封营丘已百余岁矣子陵与文叔幼同学龙上天而蛇独处足加帝腹亦狂奴故态安知其应天象邪建武不出则无可出之时矣然云台中着不住此人今海陵顾君仲仁韬光於丝緡之下其将有渭叟之志耶抑终无故人之情耶吾闻仲仁富而好礼喜宾客重然诺有古烈士风朝廷方寤寐英豪非熊入梦恐不免耳彼唐张陆之徒不过骚人词客聊以自娱乌足为仲仁道哉古之有道者在缙帷之林湘江之潭河汾之亭姓名俱寂寂不传其寓言乎或真有避世之士也仰高山揖清风吾方尚友千载他日与仲仁倾盖当细评之与和李瑞卿将如海上访隐君持吾说以往为吾致意仲仁慎勿披羊裘物色者至矣

菊隐说赠赵与民

菊有黄华色之正也夕餐落英味之烈也以制颓龄性耐久也周濂翁以配隐逸之士得非以渊明故耶篱之下山之北悠然其间兴直寄焉耳意不在菊也祖为荆州牧孙为百里宰官职高卑不论而卯金代典午矣靖节仕焉是烈女更二夫也归来词不作可乎然菊一也生於柴桑之径则流芳百世生於南阳之潭则遗臭万年物固系其所遭故耶伯始为三公顾不如一处士耶然则出处大节君子所宜讲也永嘉故赵惠王七世孙由道敏而好学退然自得不与时竞来澄川游其外舅张侯命之曰菊隐美其志也寻谒余求其说余谓君生侯王家妙龄秀发不可当吾世而坠先泽邦有道则见为三槐王为桐木韩世济其美暨功名获遂然後归隐在晚节之香不亦可乎今母太早计传曰君之齿未也

梅斋说

唐垂拱中宋广平随叔父客东川覩墙陰梅花托根非所为之赋後百余年皮裘美见之疑其铁肠石心乃解吐婉媚辞殊不思梅於花中品最清高凌厉月霜傲睨冰雪正可与铁石心肠

人对裘美虽知广平恨不知梅耳梅岂爱人妩媚者哉燕山倪使君佐溧水长兴两州廉介清苦挺身拔俗有梅花之风骨父宣慰公在常德时实生使君庭有古梅一株异甚虬枝老干图传江南儿时憩其下思之不忘故凡所至辄以名斋昔孤山处士以一联得诗名王沂国以半绝为状元宰相陈简斋以五首受知思陵参大政固系其所遭也哉梅不自知也处士清流占断湖山绝景使君今已贵宦固当逊渠一头孝先之事业去非之文章请在所择若夫荒厓野水茅屋踈篱此老夫得句处游者毋涉吾地使君笑曰吾于此兴复不浅

姚原鲁字说

柯山姚君名洙友人字之曰原鲁而求说於余原鲁省其外舅以吾先生於澄江学舍岁一再焉余与之接温裕而甚文宛然鲁国男子也名不虚得矣按洙水出鲁城北下流合於泗泗大而洙小故不侔於禹贡兖州济漯濞沮之列然所以得名者以尼父在焉尼父尝曰洙泗之间断断如也鲁道衰矣当日鲁国止有儒者一人则吾东家是也凡为东家之学者必体忠信性仁义冠圆冠而知天时履方屨而知地形然後可以称缝掖之衣否则齐秦之夸燕赵之雄郑卫之靡未许其一变至道也吾闻周大夫有原伯鲁者不说学闵子马讥之曰学殖也不殖将落今原鲁贤而好学犹当以周大夫为戒也夫

张仲易字说

永嘉张君耕叟淳慤端厚重然诺远势利善人也信人也客吴中与余交二十年君晚得子笃敏可喜既弱冠而孤遂从余游学进未止後婿于甘露林氏不见者十有三年今年春谒余於成德堂上气局老成言动谨飭学益进而未止问其年曰三十有一矣问其字曰名彬字则未也余曰字朋友之职也请以仲易代子字何如夫易之道至矣仲尼七十学易犹未彬彬而待於数年之假吉凶消长之理进退存亡之几岂易言之韦编三绝十翼乃成子年未及仲尼之半後生可畏然自可谓无大过而不学也哉夫文学彬彬士也文质彬彬君子也学易彬彬圣人也吾子慎择之矣余老且死将见尔先人于地下亦有辞焉

徐宗起字说

余始至句曲之寓舍麻尉挟其隣之子以见容止可观问之徐姓自强其名余笑曰不祥宋开禧宰相之名也闻者唾去请更之归而告其父父命之曰起宗谒字於余余曰甚善请字以宗起或者怪之余曰事载北史昔元魏专尚门地薛宗起以不得入郡姓碎戟于地孝文帝谓之曰卿非宗起乃起宗也夫尚门地而不拔才能魏之敝法也鲁之三卿孰若四科故立宗起家士之事也扬名显亲孝之终也容山县之徐旧为着姓世有闻人自崇明寺以西接栋皆徐也而君非其宗君年甚少刻苦力学卓然自拔于流俗从师取友孜孜如不及父仲杰亦笃於教子屡谒余致意焉君肯构肯获于公之门将自此高矣昔昌黎作城南诗先辈皆谓退之不当以科举利禄训诱子侄独涪翁不以为然盖恐此论沦於高虚而不趣於平实也大抵古今之学不同邹鲁以前是一种议论汉唐以来是一种议论如夏侯胜韦贤桓荣之徒史为美谈退之与鲁直识见亦略同未可全以为非也姑真勿论读书自是关君门户事君必勉之

陆安仲字说

易卦彖下繫元吉者一象下二十有二元大也吉祥也阳刚则吉陰柔则不吉中正则吉不中不正则不吉元吉之义独於鼎卦繫之者鼎器也夫器置诸安处则安危处则危安则吉庶人之吉求安而已无望之福不可覬也无妄之灾不可值也故居仁由义心广体胖一身之安也事亲敬长宜其家人一家之安也鷄鸣为善夙夜终誉一日之安也家有余庆子孙逢吉百世之安也富寿康寧天之所以与我者修身立命则我之所以事天也天随子之裔孙元吉字安仲请其说於余余为之演其义云

曹氏四子字说【原注代若晦】

余生辛亥二十四岁得子甲戌年也明年遭乱又明年子以疫死余怜而诗曰始意麒麟天上送岂期蝴蝶梦中飞後八年以某氏子为子名之曰易易性纯谨沉静不事华饰年踰志学欲从黄冠游余不许改名之曰无易後十年得子曰玄又得子曰观曰寧一日无易再拜请字余曰按礼字朋友之责也虽然灵均亦尝受字於伯庸矣无易吾字汝以守一一则不可易矣玄名之曰无言字汝以守中汝惟多言余故戒汝时然後言则人不厌是之谓中观名之曰无妄字汝以守常无妄者无所期望也祸福无常唯人所召当守常以应之小寧名之曰无咎字汝以守贞无咎者善补过也过则有咎无咎则吉在其中非守之以贞者不能也四子来前汝皆知吾所以名汝字汝之意乎名生於义副之以实必敬必戒蚤夜以思书曰若考作室子弗肯堂矧肯构易曰干父之蛊意承考也吾子将奚从貳以二参以三非一也智者过愚者弗及非中也虚而为盈约而为泰非常也言伪而辨行伪而坚非贞也有一于此乡党州里行乎哉吾族居暨三百余年今传在汝汝其保之吾老矣四子再拜请书训于简乃命长子无易书之

江子强字说

句曲江声伯名其子曰南杰友字之子强求其说於墙东叟叟曰义在中庸之十章子弗闻乎昔者仲由问强夫子告之以南方之强北方之强君子之强释者谓南方之强即君子之强非也南方柔弱北方刚劲皆以风气论南虽胜北律以中庸之中皆堕於一偏章内有两君子宽柔以教之君子仅对死而不厌之小人非强哉矫之君子也惟和而不流中立而不倚有道不变未達之所守无道不变平生之所守是为义理之强是为君子之强是则中庸之不可能者盖南不及乎强者也北过於强者也四者之强强之中也长其善而救其失抑其偏而勉其全子路为善问者夫子亦善告之也呜呼子强懋戒之哉以弟子之问为自己问以圣人所答为自己耳闻此读书法也舍是余无以告子矣抑论语载子路好勇处皆初见夫子时事晚年进德殆不可量子思论智仁勇次之舜顔回之後孟子论改过迁善列之禹与舜之前游夏求赐不得与焉盖子路乃曾子之所畏故思孟皆推尊之转载其屹然执干而舞者岂升堂之由也哉

程光道字说

冻源程君子敬以选为句曲令其子益从余游益字光道义取於易余演而伸之益之为卦巽上震下阳下居初陰上居四自上下下其道大光先儒谓凡卦中有光者【原注致堂说】皆属阳如光明光大光亨皆是盖阳则有光陰无光也然光欲晦晦则明欲潜潜则着欲损损则益书曰谦受益谦之象曰天道亏盈而益谦下济而光明故曰谦尊而光卑而不可踰盖谦中有益裒多益寡也益中有谦自上下下也两卦相须君子象之若震兑之未光咸之未光大屯之施未光夬之中未光皆陰阳失位失中失正也呜呼吾子慎之卑焉以自牧也欲然以自视也迁善如风之速改过如雷之烈风雷交益木道乃行笃实辉光所以日新观国之光所以尚宾体達用也马存有云来春江南林谷之下闻北方有熠熠者必子也夫

李叔成字说

燕山李绎侍尊人复初来尹暨阳遂从余游年未弱冠立志超卓敏而好问进莫之御同门之友字之曰叔成义在子语太师乐之卒章绎相续不絕也成乐之一终也何止言乐学亦犹是何止言学道亦犹是学必时而习习又当至於乐道不可自画画又甚於力不足续之则緝熙光明不续则间断荒落周颂两言绎思寻绎而思念也商颂两言思成思而成此人也断章取义思过半矣乐有八音独奏自为始终小成也八音并奏始金终玉大成也小成夷惠也大成夫子也乃所愿学夫子噫今之成人者何必然得见武仲以下四人之长亦可矣复初天下士也今移守淮陰弓冶之子必为箕裘艺成而下且然况德成而上者耶

朱子才字说

金凤朱君元士隐居湖庄以行义称年几耳顺一日谓雪村上人曰吾名元士元士视子男古爵也吾布衣终身名不称是请更之曰士元而谒字於墙东叟叟闻之曰可哉子生三月见於父父命之名二十既冠而字故子已孤不更名今日士元乙之也非更也字朋友之职也乃字之为子才昔鲁子敬谓刘玄德曰龐士元非百里才也使处治中别驾之任始展其驥足耳龐之才高於伏龙凤雏第一流人也龐以才见用不幸早世君之年乃过之而困厄不求人知将抱才不用耶抑有待耶虽然牺樽青黄乃木之灾拥肿拳曲天年以永然则才一也将为有用之用耶为无用之用耶请上人更下一转语壬申夏五墙东老叟书

荆石和尚字说

晨坐容山斋房三僧入谒其一永嘉俗单氏名玘字荆石顾余若有所请余扣之曰玘佩玉也而代呼以石义何居师曰玉亦石也荆山之下以玉抵鹄人以为宝我以为石余因举荆山有二条冯翊富平之山北条之荆也轩辕铸鼎处南郡临沮之山南条之荆也卞和抱璞处师曰足既刖矣何不携只履去空效小儿啼则麼余笑曰是真难灭是假难瞞师若不怕路滑他日回荆山去拈拄杖击石三石当点头

法城和尚字说

有一比丘发宏愿心手捧净土提金刚杵自葱岭西至震旦东筑大法城内包须弥山以恒河沙为界开甘露门啓三途列宝坊创立精舍中有鴈堂青莲花树有菩提无根自生草有苾芻冬夏长青设小乘中乘大乘以戒定慧守之统八万四千有降魔无数来攻辄败走世尊一日亲至城下以鞋尖踢倒曰作麼障碍衆生一片闲田地凡圣同居自往自来不亦善乎比丘合掌而去南游金山登妙高台指江水东流曰好一个背水阵侍者执拂在旁踞而请曰收汝心兵师无言下台去

赋

修泮宫赋

中山晋人氏客三峯之下饮水着书一日出游曳屣而西访古茅洲言至其闾有宫严严宅坤之隅苍龙蚺螭【原注渠黝切】以行蟠紫凤轩翥而翬飞华表远停於鸛鹤驰道横截乎虹蜺兵栏画?【原注戟衣也】灵琐金铺【原注铜环也】山巖辟以为基门闾【原注音杭高也】闾而无旁彤墀之内实为中唐【原注庙中路也】势圯而雄脉垵【原注坚土】而刚省薇綴萼以交荂【原注音敷】公槐鹖廕而远扬瓴甌【原注音嫡塼也】坚致於?【原注音黻美石】美?【原注音栢井磬也】绀碧而泉香循陔而上【原注殿堦序也】涉拾【原注音级】以登扣玉扉【原注音仕砌也鬬也】彻朱扃乃炳萧【原注烧香也】而荐毛瞻司寇之仪刑鞞麕裘之歌既往袞章甫之貌如生四配十贤会弁垂纓降阼阶而下庑列影像之参差步周流而四顾手执乎化人之裾绚五采以荧煌纷赭【原注赤色】垚【原注白色】以相輝殷【原注乌闲切赤黑色】刻桷【原注许极切大赤】承櫨?【原注音莢青黄】画栋黝【原注於九切黑】饰栌【原注柱也】煊爚【原注上方闲切下离闲切不纯色】眩目莫知所如书声喤呶【原注呼甲切衆声也】振于斋扉丝竹在堂鲁音尚遗见执经之童子衿青青而佩觿进三揖以雍容呼使前而质之寢庙奕奕经始何时肯构乃艰肯获为谁岂尼山之有灵悼梁木之将危或见梦於匠石而擺指於工倕童子哑然曰噫吾邑有贤大夫维伯休父而弗闻乎大夫之贤也脱粟一器水薤一盂鸡鸣视事琴罢而哺马首蹻蹻孔庭是趋我侯戾止多士从止献材输直徒匠佣止筏者輦者绳者尺者鑿【原注才敢切小凿也】者斲者斲【原注锯也】者戚【原注斧也】者埏者埴者墁者墁【原注涂也】者俯而璧者仰而墜【原注涂也】者昏而瑩【原注粧饰也】者隳而垒者人徒见今日燕雀之贺成而不知往日鸛鵒之侮毁也鸛鵒寂寥侯未下车尧儿牧豎于刈于刍鵒雏啜其水荇蜚角蹴於园蔬或呌【原注音斗峻】而?【原注音欹不正】或洼而泐【原注石破】或??【原注不平貌】而不平或?黝【原注千定切青黑也】而无色风箔飈以飈飈【原注并音流高风】雨淅【原注音嘶小雨】而霏霏【原注音裴大雨】凝尘黢黢【原注音禅黑也】停浊淖【原注不分别也】漚【原注水败物也】屢屢半给於晨炊焦尾旋供於夕爨簠簋不饬筵豆乃乱疑伐树之不容似率野之兴叹非我侯之廉仁孰制锦而一新彼食桑之鵒鵒亦怀予之好音於是晋人闻之拊髀雀跃命童子泚笔矢口而作非能继泮宫之颂聊以同鲁人之乐也

灵台赋

原蒼籙之開基兮始於有郤之封塞向而墜戶兮幽原之風去之岐山之下兮如歸市之從世
世修德兮至西伯而作邑於豐天下三分而有二兮七十里之囿而與民同時游觀而節勞佚
兮望氛祲而知吉凶經之營之兮庶民來攻於論鼓鐘兮靈台辟痛台下有囿兮鳥飛而獸伏
囿中有沼兮游魚充牣乎其中樂民之樂兮不煩於民力憂民之憂兮自朝至於日昃歌大雅
之洋洋兮知文王之有靈德自騶山之舉燧而巩洛之東移故宮廟為禾黍兮況一台之遺基
周道鞠為茂草兮我心西悲嗚呼噫嘻章華之長鬣兮楚敗姑蘇之游鹿兮吳亡通天承露兮
求仙沛邑歌風兮思鄉何後人之侈靡覽陳迹而堪傷惟有惜中人百金之產猶髣髴於文王

天爵賦

墨卿問於楮先生曰子亦見夫曼倩之設難子云之解嘲孟堅之答戲夸綬冕之榮羨卿相之位
或釋褐而待詔或紆青而游說當涂者升云先驅者擁篲鋪張乎金張許史之業希慕乎蕭曹
平勃之智怨沉埋於執戟嘆落拓於給事嗟得富而失貧憂朝榮而夕頽間微申於禍福稍
推遠於聲利或默守於太玄或誦言於六藝以是為達人之大觀處士之高致口不道乎忠信
行不履乎仁義何昔人識見之卑而議論之蔽也先生曰吁道之不明我知之矣昔者尼山毓
聖玉振闕里抗高情於浮雲寓至樂於飲水知潔身之為非卒周流而不仕孔楹既奠繼鄒孟
氏謂萬鍾而何加眇千駟而弗視指義路以必由擇仁里之為美忠善而教於人信實而有諸
己曰人人之有貴非趙孟之可比登壇為人之所賤乞墦為妾之所耻抱浩然而獨存凜聞者
之兴起孟軻既沒無有乎爾正學化為異端斯文失其宗指氣質雜人之性利祿薰人之髓迂
儒坐守於章句墨客徒工於文史縱不嬰情於人愛安得究心於天理卿徒謂夫數子者學不
知方吾亦謂卿不探鄒魯之精微而徒怪班揚之侈靡也爰有大物勢踰卿相位軼王公不軺
軒而榮不袞冕而崇貴非趙孟而莫能使之賤富非晉楚而莫能使之窮心既廣而體胖內自
重而物輕靡名途之汨汨絕利窟之營營臣愚不識愿聞其名曰此非居安宅而弗危者耶由
正路而弗岐者耶為人謀而內自盡與人交而外不欺者耶鷄鳴而孳孳與人而共為其人似
子輿又似乎子車次是則樂正克之徒欵仁義既有忠信不薄居之無倦為善最樂夫是之謂
天爵

民岩賦

容成大庭尊盧赫胥結繩而治野鹿標枝居無所為行無取之鼓腹而游含哺而嬉世德不衰
至於伊耆微服康衢問於童兒在朝在野不識不知凿井而飲耕田而食击壤之老何知帝力
載黃屋兮非心除土堦兮三尺崇伯子之守邦始謂民之可畏貽厥孫而失之兴哀歌於洛汭
慨予懷之凜凜曰馭民如馭馬邦無本而不寧民可近而不可下南伊闕而北羊腸兮予及汝
以皆亡左孟門而右太行兮不能遏檀車之煌煌何仁人之崛起兮如磐石之安也吊二國之
墜命兮猶立墻之岩也茲太保之相宅兮祈小民之誠也思東山之滔滔兮何庶殷之頑也旦
暨汝奭兮往新邑以觀也三涂岳鄙拱天室兮何桓桓也宅尔宅而畋尔田兮从尔迁也历三
紀而無虞兮固封守之難也奠九鼎於郊廓兮天命其猶未改宮邻金虎兮忽二周其安在据
崤函而拥雍州兮臨不測之谿罾魚倡於大澤兮嶢关之骑已西持灞上之牛酒兮听三章之
初约喜刘氏之寬兮厌嬴氏之虐信人心之嶮巇兮覽兴亡而三叹知崇高之不可恃兮當於

民监

河图赋

崑仑莽莽积石峩峩长源西来溢为荣波苍精荐瑞龙马浮河赤文炳耀綠字森罗於是鉅窥天地之文微察鸟兽之情凿混沌之七窍剖元包於五行八八而画卦陈五五而变化成坎一六而水会巽三八而木生四九进金於乾刚二七合火於离明象数已滋文字不传潜義文之一心开先後之两天思凤鸟之弗鸣悲鲁叟之暮年感会昌之妖符疑张掖之涌泉起安国於西京招关朗於河东乘月到於天心访华陰之睡翁翁手画於一图寄百源之山中何窃更於刘牧几混杂於龟龙赖邹欣之见还轰雷声而啓蒙

河源赋

将远行而无所止兮乘文鷁以周游指大陆而寻九河兮求碣石之所由西泝龙门而访禹迹兮三千里而至於积石欲穷源之所自兮路荒远而沙磧想博望之僊槎兮载汉节於西域究两源之分合兮出葱岭与于阗之国又东注蒲昌兮一名泐泽遭吾道夫崑仑兮路茫茫兮阻修扬霓旌之蔼蔼兮鸣玉鸾之啾啾朝发於陇西兮夕余至於臯兰之山中高而四下兮水澄莹而潺湲流既远而色渐赤兮混浊流而相连石壁峭立於两崖兮水盘束於其间忽山开而岸阔兮豁然奔放而不还声如万雷之喷薄兮击沙石而靡林峦吾令蛟鼉以梁津兮诏西皇使涉予得支机之巨石兮见天汉之织女濯余髮兮洧盘聊逍遥兮容与

高祖斩白蛇赋

秦失其鹿兮天下并驱山鬼献璧兮祖龙其徂罾鱼剖腹兮丹书出丛林举火兮鸣妖狐骊山兮桓桓送役徒兮入关慷慨兮悲歌壮士一去兮不复还等死兮求生何如窜伏荆榛间夜行兮被酒风萧萧兮泽水寒有物兮蜿蜒白质兮屈蟠行者辟易而不敢过兮矧可得而犯干亭长醉而起舞兮径乘怒而往观提三尺而一挥兮分首尾之两端儵忽而不见兮懵莫知其故也何物老妪兮哭声之载路也陰灵之连蜷兮挥霍而变化金天氏之衰兮火德以霸当是时也宫中之献鹿未指灞上之降马未迎而芒砀郁葱之佳气已属之龙準之真人矣丰云起泗水沸沛风扬五载而帝业成击筑而归故乡於是仰悟东井之精俯协赤符之灵天人合应以发皇明厥後彭城元王之裔实开江左刘宋之基方其微时人莫之知偶伐荻於新州射长虵之委蛇见青衣之童子潜搗药而傳之谓寄奴之不可杀显吉兆於神奇信王者之贞瑞必获助於神只履巨迹而吞玄鸟兮皆可信而无疑览史牒以兴怀遂援笔而铸辞忆唐朝之制举尝命此以为题胡白傳之佳篇反见黜於有司然至今长庆之集犹存而一时中式之赋则磨灭而无余信乎文章之有定价而考官不得而瑕疵者也

木铎赋

异哉铎之为器也金口而木舌维孟陬之月建为警衆而特设適人在夏兮司烜在周日食必

戒兮火禁必修震雷发春兮先三日以令布行人采诗兮尔乃徇之於路智者创物兮命之以名或象其形兮或取其声禹垂鞞以听夔假韶以鸣鑄师奏鑄钲人司钲兹铎之制始於何世嗟尔封人尚识其制方辙之环兮息驾乎仪之野彼何人斯兮请见於从者既出门而叹息兮必有得於所闻悼天下之无道兮喜天之未丧斯文集大成兮终始金玉声振兮条理想声容之美盛宜闻者之兴起鸣冉求之鼓兮和季路之琴取瑟何意兮击磬何心匪铎之为铎兮圣人之德音惜招摇而过市兮或仰视乎蜚鴈遂行在陈兮归欤之兴叹曳杖而歌兮寄余哀於梁木升堂阒其无人兮空闻丝竹

萍实赋

发郢都而出修门兮过夏口而东游凌阳侯之泛滥兮将运舟而下浮舟不行兮夷犹蹇谁留兮中洲沅湘兮无波汉水兮安流朝骋骛兮江臯夕弭节兮北渚采芳芷与杜若将以遗兮远者波滔滔兮来迎鱼鳞鳞兮媵予忽有物以触吾舟兮疑?洲之宿莽其形之圆兮色赤嗟荆楚之人兮莫识索琼茅以筵蓐兮命灵氛为余卜之灵氛告余以吉占兮惟伯者可以获之终亦莫知其何名兮遂遣使於东国非玄圣之博物兮亦孰知为萍实如斗兮如日味之甘兮可食信童謡之不虚兮吾闻於陈之野何所独无芳草兮乌得而嗜之也杂江蓠与杜蘅兮搴芙蓉与兰英虽洵美而不适口兮又况夫萍藎与芹羹岷江万里兮日夜东注芊姓为墟兮奇物千载而不遇令骚人之想像空援笔而为赋

卷十二

钦定四库全书

墙东类稿卷十二 元 陆文圭 撰墓志铭

中大夫江东肃政廉访使孙公墓志铭

仆耕墙东闽广之士应举北上者间枉道相顾言及宪使懒斋孙公之贤者如出一口善政数百略举而不及详也至治癸亥公之嗣子良祜荫暨阳判官寓舍与仆相邻一日出公家状泣谓仆曰先公官中大夫职三品例得加封赐諡今将上考功太常而隧道之铭未立无以发潜德之光吾子其图之仆以疾辞逾年请益谨义不可辞按公家世其先本女真人乌克逊氏居临潢府曾祖彧隐德不耀祖壁仕於燕贞佑初从丰王南迁大梁授明威将军兼军资库使壬辰岁天兵收河南汴京既破徙居大名始从汉俗以孙为氏复为税课所详议官娶河东刘氏三子长子信官昭信校尉长社主簿次子义博学试中儒科次子仲即公考也终大都广济仓使娶天水赵氏二子长泽是为公次温江西临川三务提领公字润甫幼倜傥有大志以经济自负游金台时南宋既降淮楚未下道尚梗朝廷差官纲运宝钞一十万锭赴江南人人惮行公请往径渡江至瓜州行府交卸就辟充淮东大都督府令史至元十二年也十四年改差行征东元帅府提控案牘驻军宝婺军府草创日不暇给公究心吏事务其远者大者治法征谋惟己是出宋之遗民拥赵氏孤自立於福唐秋八月索多元帅征南檄公为军师进分水岭剽建安批南劔趋三山宋师溃遁入海岛移攻莆阳既降同知军事陈瓚复叛围之将屠其城公曰首恶者瓚耳余皆脇从玉石俱焚可乎且此州城池非有险恶易与耳不宜极吾兵帅然之执瓚戮於市居民安堵已而知谋出於公咸以手加额曰公活佛也宋兵复围泉州元帅提舟师救之围既解是岁十月与江西达春左丞合军自甲子门入海追袭取漳潮二州至惠州顿兵海丰县南军犹盛公请济师於乔万户摘提马军随元帅直捣五羊腊月至城下入之十五年回屯闽中往复数千里水陆艰险舟车器械之具糗粮刍秸之供委公立办战胜攻取幕居多帅府保申行省转咨都省勅授福建道宣慰司都事未几改立行省就升都事元帅除参知政事赴阙公随至上都代之占对进止详度天顏喜悦参政备言公劳绩宠赉甚渥赐锦衣一袭宣授承直郎知兴化军十六年改路立总管府就升总管公前有德於莆人闻其来懽声载道方扰攘之初土豪奸民私相叛援各立头项侵渔小弱乡人苦之或有追逮辄拒不纳公至拘索付身或军前文字尽行追毁奸豪束手州县之令始行瓚既诛三县之民以诬误受戮者三千余家有司以为既遭诛絶盍没入其产行省委官分?官吏观望以为不应继絶民间闻之逃窜鼠伏啸聚林莽三县骚然公既至散榜晓谕叛首伏辜余皆吾民先首降者给还田宅不幸杀死无後许亲属承接官不得问於是远近相应携持而出各安其业省府闻而嘉之细民燃灯作佛事以报公恩社立生祠至今香火不絶先时郡多盗强者至攻刼城壁四郭之民团结义兵守卫乡井事定後议者请拘刷充籍置立手号公力沮不从乃亲赴省为言此等皆田野耕农自护室庐非有旧籍可稽听为民便从之民大悦郡经兵疲墟邑萧条一日公出行见弃儿在道枯骸填壑惻然悯之因割己俸给与衣粮以济流离鰥寡者立慈幼局以处孤儿下令各乡设立义塚瘞埋无主之骨以千万数莆学最盛多士如林至是奔散过军屯聚毁斋

舍为马埭书籍焚荡无遗公下车禁止驱出兵卒泛扫堂宇招延秀异分汰学职刊补书版就道化堂行乡饮酒礼与乡之父兄子弟幅巾深衣从容於俎豆之间观者太息以为复覩升平政声流闻诸司交荐福建宪司言公廉洁公平勉励学校存恤军民等事宜慰司言公监造海舟招顾捐水起运军储核实金谷攢报户籍创置站驿皆不扰而辨行省咨公留意民事及廉能异绩二十二事在任几四年会例降骤迁官移公通判永州散官如故百姓李公寿等数千人赴省乞借公复任不报皆泣涕而返莆多故家名族风气淳古而後隸之方尤盛自目官起家至阁学忠惠公节行伟然为一邦之望今运使方居安其後也公将去郡居安谓公仁义长者似古循吏且有全城之功请以孙女女公之子世相好也公从之其得士心如此以至元二十一年抵零陵湖广平章乌珠木挟权相姻娅恣逞凶残吏民畏之重足而立一日遣其党赵万户以取勘和买纱罗为由到州气焰张甚公待之加礼徐为言新附民易动难安一有蹉跌牧民者谴死公独得安乎公言恳恻发於至诚赵亦感动不竟其事而去二十六年打箭令下公曰吾不亲行其祸不解即日诣武昌用事者临之以威公不为动他郡之民根连株逮由此破家者十有三二永独无扰民立石颂之武冈宝庆贼发声摇境上省檄公收捕诛其首三十一人获其徒五百五人释驱擄良民百五十一口一道肃清逾年乌珠木败行省保充左右司员外郎升奉训大夫平章库尔济苏雅敬信公谓公谙练军事会征收生黎越海攻占城指授方略一以委之供应不乏每战必克行省驿奏其状有旨增与名分宣授朝列大夫广南西道宣慰副使甫七閱月改广西两江道宣慰副使金都元帅府事元贞二年十一月也海滨辽远夷獠杂居吏民不遵王宪狃以为常公创立司规二十二章简易明白可守而行建言西广户口稀疎连岁出征疲於奔命宜减并站驿攢那马疋以寬民力从之省二十二站又奏盗息民安五事内一事税粮太重况值灾荒宜从优恤德音普免一年公每出行部视民间利害事辄兴除之孜孜访问如恐不及分治左江道经象州岁饥民流饿殍盈路取责官吏不为用心辞以未奉明降公曰无及矣可便宜啓廩以救涸轍擅发之罪吾自任之即出米二千石以賑之又至临贺诉缺食者拥马首不得行公又賑米一千二百石皆不待报当路者恶其专而莫敢罪也邕管议创屯田委公经画公不避炎瘴遍历荒徼临交趾界起雷白等十寨陂堰八所开水田五百二十二顷编立排甲人夫四千六百余户岁收五万余石公私便之宪台保公发官廩以賑饥凜然汲黯之风筑塞堡而垦田克绍充国之略盖实录也獠人踰融州省地出没为寇公亲提兵往捕谕以自新贼首荣三蓝七帅其衆千六百二人出降悉令解甲归农有欧阳氏女自言良家遭掠公因根具似此者衆皆访其亲属还之符文真告元帅薛直千擄掠平民夺要牛只邀取金银等罪委公究问公不畏强御请托不行躬入海岛按治理出平民四百八十二名牛五千余只金银什物有差舆论称快都元帅朱镇国目覩其事以公为难详具前後治绩保奏甚力岭南广西道廉访司举公才任风宪宣授中顺大夫海北海南道肃政廉访使海南新创司存公於大德六年四月之任例得圭田米五百余石公曰吾事未能举行一二不三四月遽食重禄可乎悉举籍拨入路学以养士海隅未知向方且经寇乱庙宇颓圯公首捐俸一十五錠助修诸司竞劝栋梁一新学田为势家夺占公厘正五十余顷复归之学朔望立赏格程试课艺文风丕变又患愚民无知狱讼烦多印模格例三千余本犯某事者抵某罪名曰社长须知月集老幼以听之仿周礼月吉读法之意於是人知自重犯刑者寡重囚林德蘊等一十四人无辜久系公审録其冤悉平反之按海康志州之东西有潮汐之害西北有陂塘之利宋何某为守开湖万顷久之陞塞堤防不存亢旱为虐公深究水利决意兴复州北有三溪泻四十里公出私帑募工四千人浚通旧湖筑二堤四千余丈限之溪南堤旁置石闸七复

凿渠自西而东环而南长八千七百六十余丈渠上复置小闸六通支流以溉东南际海之田新堤上复疏二十四渠以溉东北之田长万三千六百五十余丈创八桥以济涉者渠之首尾有闸官司之时其盈缩而出纳之附城山田水势高昂又作石渠引西湖而注之筑塘禡家梢以障海潮风涛不能为患拨水户以守自後东洋万顷悉为沃壤公之为政规置宏远措意精密大率类此至大改元除少中大夫福建闽海道肃政廉访使首劾万户马某僧録赵某不法事罢黜之书吏孙吴二人挟势取赂治其罪复下学行乡饮酒礼瑞芝一干三苓晕生五色产澄清堂内诸生争为歌謡美公之化公让不受寻请弃官归养初至元间皇考既没於燕无力归葬公旋南迈留弟温侍母都下在闽广时随参政平章再入都两得拜母程彦明为汴省检校温往依之复奉母居汴公在海南念太夫人年登八袞旁无兼侍归志甚笃值独员不敢离任暨任监司即日奔大梁母子相持而泣自谓慈颜喜生还烟瘴之乡人子得躬致菽水之奉乐莫大焉曾未数月又除闽宪欲援例恳辞而边远不行之任例禁甚严乃迎太夫人寓居长沙只身入闽朝夕思慕寢食不安荐具选牒力请退闲且曰圣朝方以孝治天下焉用不共子职之人滥居宪长何裨风化又曰使微臣如母之寿则报国之日尚长读者感动未报间公扁舟径去本司首领官吏奏差分道邀请出西门至怀安河又至侯官县门坚意不回追者自厓而返公自此远矣山容海思岑寂无聊老稚讴吟如乳哺之失慈母也寮属相挽士民敦告谓古人捧檄之喜板舆之奉正为亲荣何必去职况湘水合沙道里适均风景不殊迎侍回司未为非计公皆不听至潭奉太夫人如建业迤北归台家闻奏除中大夫江东建康道廉访使以便亲公力辞不可龟勉就职閱十有七月而太夫人卒官下扶柩归魏又北适燕啓皇考之櫬祔於宅兆匍匐跣行回远数千里见者哀之公自无意於世有庐墓终焉之志旋被疾不起以延佑乙卯某月终於正寢享年六十有六娶霍氏继室杜氏二男五女长即良祜次夭女适姓某姓某公天资卓犖才智絶人敷历东南四十余年嘉谋善绩不可殫数而君子尤於江东之事有感焉宋暮年儒风骤盛荒邑小聚犹数十家书声相闻科場既罢士各散去经师老宿槁死山林後生晚进靡所矜式冒然进取者又濶远於事情类为操刀笔者所讪侮有中人之产则役使之困辱之产不尽不止以故儒道益轻至元有诏蠲免身役州县奉行弗差徭如故逮大德中有司奉准投下户计与民一体当差杂然喜曰儒人在内吾一网尽矣公时持节金陵闻之奋然曰儒人岂投下户计耶呈台力辨其非遍行诸路禁约科扰有司旁缘法意持之迄不肯从而公已丁艰去矣公所学渊源不可考而见远识微所至表章儒先扶植文脉有慕乎周公宣尼之事业呜呼古人有言使天下回心向道非俗吏之所能为也世固有以儒进身及其得志反操吏之戈以逐儒者闻公之风可以泚颡矣公於书无所不读尤精天文陰阳物理之学练達兵财讲究农田水坊纖悉至到诸葛木牛流马之法不传公以意创为之转运如飞浑天仪以水激轮公代以汞晷刻不差着碁法十卷忍经一卷集字选玉二卷游戏翰墨亦可传世公性俭约一布裘三年不易夫人裾不曳地子姓衣不华采三品之家一如寒士晚以懒斋自号宦游倦矣公岂自惰者耶某年某月杜夫人以良祜奉公柩葬於大名祖茔之側夫人严整治家有法良祜奉而行之左右无违公於是有子矣铭曰金源北裔魏博东家儒学振华緼袍落落绣衣??自朔而南车不直回馭不遽叱邛来之石维忠维孝维公兼美貽尔孙子

中奉大夫广东道宣慰使都元帅墓志铭

堪輿山川一气耳凝为物神产为人灵其气盛则遐陬僻土人迹所不及之处异才错出其气

衰则通都百城大邑万家之聚衣冠荒落而不振以时考之不偶然也皇元啓运神文御极意气招徕薄海万里悉为臣妾龙吟虎啸风云感会名臣文武崛起要荒布列中外不可胜数宣慰公其一人也公讳扬珠布哈字延真辉和尔氏居哈喇和卓为北庭大族辉和氏列城五锡勒沁城尤岩嶮北连沙蹟南抚诸羌公之先世守之曾祖讳布克布呼托克托祖讳達兰布呼托克托考讳阿布纳托克托相继袭职开国初辉和国主齐達呼纳欵来朝考君实从赞谋居多太祖皇帝嘉之就迁锡勒沁城達嚕噶齐使归领其衆寻内徙留直禁卫公与兄库春皆得近侍时官制未定库春累迁中书省断事官恩幸无比内举不避亲尝面奏臣弟年方壮得备奔走效犬马之力臣死无恨世祖皇帝奇公才亦欲试以事会旧燕土泉疏恶将营新都刘文贞公经画指授命近臣伊苏布哈典其役兴工浩繁置副难其人旋以畀公时至元七年也禁省院监城池苑囿规制一新鳩工告备是年九月命公领校尉十人卒五百户巡隶都城迤北顺州拜郊台羔廩店咸宁庄等处苜蓿禁地兼典御廐畜牧蕃息天顏喜恠八年三月驾幸万寿山伊苏布哈乘间奏公宣劳日久贵而能勤贫而有守由是锡賚有加再奏给真俸二千两命尚方铸印赐之至元十五年江南既平大朝会宗藩侯甸咸在颁物有差赐公白金五十两戎衣一袭昭异渥也十六年三月创立太庙新寺司天台皇城内外桥梁中书省官诺海尚书等复以公为荐於是輦运材石指使衆工迄滨於成十八年广陵郡立行御史台遴拣廉能纠察诸道公首被选授朝列大夫签福建广东道提刑按察司事十九年十月出巡至临漳将渡番禺值建寧剧贼黄华啸聚破政和松溪入古田杀掠不可胜计声摇闽粤公曰事急矣不可拘以常法乃不待报擅发铺遞分遣人骑调旁近民丁檄陈季二万户会兵邀截建安尤溪路口贼不得逞卒就擒灭行省方上其功会朝议以闽广回远难以兼制改福建闽海道公以例革至元二十一年授签山南湖北提刑按察司事单车所至访民疾苦除害兴利知靡不为道辰沅间自北寺前至白牛堡两站相距七十五里由五现岭而上林木丛灌岩谷深嶮下临不测过者必掉不自禁公曰是岂置邮传命之所耶於是凿山通道四十余里南出岭下直抵平川径而捷视故道半之公曰吾始虽劳民後有乐吾成者役不憚也二十七年转授朝散大夫岭北湖南道提刑按察司副使武冈路猺蛮依綏寧县青城为一十五团据嶮不下靖州军官欲以讨捕为功越境挑之贼首李威赛不从鸣鼓相格湖南行省刘右丞命万户孙定远自宝庆会兵约武冈集义军千余人迎敌剿杀公持不可且曰愚民无知宜以恩信诱之可使向化若草刈而禽猕之所伤必多且蛮亦一气所生不宜以多杀邀赏乃驻军武冈遣人齎榜入贼中抚谕之晓以祸福蛮衆皆喜有沈南强者以议事为名帅衆出降输甲兵入官余衆散入靖州等处以次受招蛮事迄息二十八年改立肃政廉访司二十九年除朝请大夫广南西道宣慰副使大德元年除嘉议大夫葛蛮军民安抚使马牛寨苗蛮王姓作乱招之不可湖广行省檄公调兵与八番刘元帅犄角捕之一鼓而灭三年丁太夫人忧出职久之除沅州路总管府達嚕噶齐大军南征乌蒙诸蛮道经武陵委公开道给馈饷军得不乏靖寇丁贵者潜结诸洞首尾相应欲沮吾军公曰是不可恕宵引民荡其巢穴梟首於市遂济师十年除通议大夫南安路总管府達嚕噶齐治状尤着风宪举人以公为最授正议大夫海北广东道肃政廉访使未几改中奉大夫广东道宣慰使都元帅省台交举越月两拜恩命公感激知遇在粤三年留意民事诛鉏奸强煦噢善良海波不惊农谷屡稔粤人安之公之子袞布巴勒以公年高且喜且惧帅诸弟几谏请公退闲就养志之乐公不从则又移书司中僚友以讽公公太息曰吾老矣岂耽荣嗜进者耶顾朝廷待我厚臣子之义东西唯命马革裹尸吾志也诸子乃不敢复言公素康强视听不衰未明出署事日宴忘疲一日感微疾起居笑语如常顾左右索酒举觞一

饮而酹曰善藏之明当复饮翼日扶坐榻上呼长幼来前再酹一觴遍酌以赐如叙诀状使人
侦视譙楼漏刻日仄未曰吾可以行矣颜色不变翛然而逝延佑元年七日十七日也是日命
圉人馭所乘马戒驺从若将出者家人疑之已而市人讙曰吾见公由城西门去矣呜呼异哉
公既没广人追思肖公像於国清观音寺中岁时祠之有讼必祷呜呼此岂可以人力致之哉
公生癸卯死甲寅享年七十有二妣某氏娶某氏子男三人长衮布巴勒历西南台内台监察
御史南台经历以清节着既终丧除海北广东道岭北湖南道肃政廉访副使皆不赴今为某
官次達尔玛先公一年卒次多尔济巴勒同知江陰州事女七人长适襄阳路宜城县達嚕噶
齐呼拉布哈次适阿齐次适雷州路判官耀珠次适肇庆路達嚕噶齐图们次适海丰县達嚕
噶齐努色尔次适多尔济幼在室孙男二人拜珠宝珠女四人观音保明安皆长出拉拉次出
鄂斡又次出衮布巴勒匍匐奔公之丧於五年櫬於建康路上元县至治元年十月卜葬於县
之某乡平塘湖西多尔济巴勒以其兄之命来求铭辞曰先公敷历中外四十余年久居风宪
嘉谋善政不可殫述不肖孤不能詮次昭揭以貽後人罪大矣先生哀之死且不朽文圭闻命
悚仄礼辞不获乃掇余公琬所书事实孔君涛所述行状合而为之志且系之铭铭曰汉窦氏
融专制凉州建武来朝从以五侯维兹五侯功业卓卓凤仪其羽蛇奋其角酒泉张掖汉地衣
冠由余日殫迴隔河山九服之外六藉之表奇才伟器政复不少创物为智泽物为仁左右且
宜国之荅臣帝曰钦哉汝奠衡岳公拜稽首夙夜惟恪西里之西南粤之南公车载驰圣化是
覃山黎海獠膜拜公像穹龟龕龕百世景仰匪公之庸维帝之聰宴尔後昆福祿来崇

武节将军吕侯墓志铭

余居齐郛间吕於齐宗姓其来尚矣山东洊经兵火谱牒漫不可稽侯讳德字伯亨世居东原
曾大父以上无传大父讳进始隶军籍骁猛善射国初屡立功充拏手千户有子数人讳成者
侯父也不及祿而卒侯生长兵间少孤贫尝负其勇跳淮出汲伪商贾服探刺军事擒捉生口
南边苦之购捕莫能得楚总管守汶上招致部下出屯宿之符离至元初大将库库特依索多
李嘉努南征募士往淮南间探侯应募而前与守顺者提八十四人暮抵泗之安河口刼寨入
之获宋裨将三人掠老幼三百余口主将喜闻诸朝赐戎衣一袭至元六年九月呼图克将军
李总管攻六安挟侯偕行哨至焦湖而李卒於军侯北归与大将鄂诺勒同赴京师献策招集
黄河迤南达尔罕军以备出征从之以鄂诺勒为统军万户侯以千户副之招集降户李梦卿
等七百二十三人就粮陈蔡十年枢密行院至淮西以侯充寿州等处招讨司镇抚九月引兵
涉淮抵六安至野人原与宋将相拒月余招降之转攻安庆进泊丁家洲南兵阻江自守侯进
击之获閤都统十二年驻劄京口行省檄侯充江陰镇江路军民都镇抚供给大军粮草不乏
积前後功擢武略将军佩金符十四年江淮略定帅所部随招讨李东渡浙江屯处婺间是岁
八月永康浦江强盗窃发侯往捕之获其首张炎季文龙余党张三八陈寿三复聚衆剽龙泉
李公击之马絙木而止坠伤股遂班师贼尾其後侯命反旗鸣鼓若将向贼者骇遁去侯摄招
讨司事次於东阳十五年宣慰史公以大军抵龙泉侯以所部夹击军至浮阳张陈出战擒之
遂留镇龙泉分屯庆元庆元贼陈其姓称招讨使号头陀军侯提銳卒数百人宵闯其垒一战
平之十五年陞武节将军管军上千户十八年处州贼寨平八鳩衆五千掠遂昌宣慰高公讨
之命侯犄角平八归复召其徒几数千人侯整阵疾趋就梟其首行省第功拟管军总管咨枢
密院不报二十年十二月吴提刑者居青田之鸬鹚与政和贼华通复谋叛用宋祥兴年号铸

两浙安抚司印声摇闽粤侯与赵万户统兵入其境招之不至四面进攻贼负山阻不下侯直薄先登手刃其徒毛总制何惟寧贼大溃生擒韦尚五鲍吉获宋陈丞相伪劄并贼首黄华印榜赴宣慰司侯威望益振二十六年杨震龙反会稽嵊县壁龙兴山构屋六十余间饰以龙凤伪造法物自称国主放兵四掠诸县响应左丞相莽哈岱自维扬南讨调水兵万户呼尔哈齐元帅前路迎敌二月渡西兴即以侯充行军都镇抚点视诸翼军马侯至新昌西南二十五里遇贼直前搏之杀二百余人擒其首袁九驻军蛟井贼入继锦乡遣塔喇海千户逐之不得侯与元帅大衆出桃源贼万余屯史家楼器甲精明官军望之失色侯笑曰此辈锄田夫耳何足浼吾马足耶大呼陷阵万衆披靡悉夺其器甲明日复出战擒其先锋张九贼遂解散长乐太平开元义和诸乡皆降居民安堵三月行大司农卿托克托领兵出贵门至玉山与史宣慰军合侯及元帅偕来登龙兴山瞰贼巢纵火焚之贼拔寨去诸军欲还忽报黄连坑贼陈万将至侯遣兵六百邀之大捷四月与图呼勒万户会於天台曹荣等来降出仙居涉苍岭入永康五月至婺州六月武义永康复叛侯与推官蔡某出抚谕之贼王小朱菊相顾曰弁而甲者吕将军也相率拜马首随侯入城侯留百人屯泉溪镇抚之十二月复回婺州侯往来东浙凡十三年大小数百战其地溪谷幽阻夷洞杂居言语不与华同俗易挺动吏稍侵渔之即呼啸篁竹中放掠无忌兵至即散兵去复合卒骈首就戮乃已侯知其然心切悯之所至先散榜招集降者甚衆不听命乃杀之诸将或并坐论功侯叹曰取赤子头颅易赏级吾不忍也侯性沈鸷寡言笑与士卒同甘苦所得虏获赏赐辄分与壮士不私其家故人乐为之死所向皆捷然未尝自代其功以故久不益封二十七年正月呼尔哈齐元帅回屯暨阳侯中分麾下出镇许浦十月道过东舜风疾作仆地舆而旋卧江陰寓第不复起明年八月除东平等路中千户散官如故侯已不能拜矣寻请以子世英自代戊戌正月疾再作遂卒享年六十有四夫人张氏继刘氏杨氏子男六人长世英袭父职次世雄世荣张出也次亡世隆世昌刘出也女三人长适崔次适昭信将军元幼未出室孙男八人女二人侯幼有志不事产业刘夫人以勤约起家侯连岁出征夫人躬自蚕织家僮数十称工艺廩食之无惰游者以故资用丰裕侯得优游养疾数年中馈有助焉庚子二月诸子扶柩北归以七月吉日葬於东平汶上县权家舖之原从治命也明年世英赴云南行营刘夫人俾其壻元侯来求铭辞曰先外舅之墓有宿草焉而窆碑无言则罔昭於後敢乞子之铭余再拜辞不可乃次第侯功状授之复系之铭曰渭水非熊牧野扬鹰育世於姜载儆载兴有严虎臣躬秉武节擎旗淮泗洗甲瓠粤槎溪梯岭兵不留行策勲饮至缓带江城将星宵陨空营聚哭素幔东归平生部曲东原之栢有硕其庭惠我後人降福攸寧

故武德将军吴侯墓志铭

节义天下之大闲故忠臣不立两君之朝烈女不践二夫之庭然伊挚丑夏而就汤微子抱器而奔周何哉盖三代之士出处进退合乎道义汉唐以来士以功名自见抚兴王之运则智者献其谋勇者効其力故陈平仗劒归汉马援专意东方不惟君择臣臣亦择君矣呜呼吾读西淮吴公之遗事不觉为之太息焉汴宋之亡也康邸南守两淮为边障韩张杨刘百战死守庐寿濠光之间被兵多於东淮者地险阻也其民狃於金革习於行阵目眩旌旗首卧锋鏃北风尘起三尺童子不介马而驰之武夫健将由此焉出及杭宋之亡也权奸窃柄刑赏颇僻将士解体故天兵径度长驱淮浙首尾不相救庐帅先遁安庆继降是时吴公佑鸪乡兵守寿春道

梗不通遂以城归附丞相忠武王引军徇江东以公为向导由池口趋建康批溧水取建平长兴两县据独松关随大军济钱塘江攻越台温三州入闽破莆阳以功除怀远大将军招讨使大略定从行省旋维扬时至元十三年也明年卒於军子安民袭父职十八年泛海征日本授宣武将军寿春副万户先锋抵岛上飓风骤起衆散而归二十年建寧黄华叛讨平之移镇南浔复移海盐已而还守溧阳二十六年出军江西讨余贼鍾明亮破之就镇和州大德四年卒赠骑都尉渤海郡伯长子继文先卒次继武字震之授昭信校尉寿春副万户延佑六年恩覃武略将军泰定初转武德将军戍溧阳如故於是两淮之版图归职方氏六十年矣向之荒城残堡蔓草颓垣狸狐啸聚其间今则烟火相望鸡犬之声達乎四境桑麻被野桴鼓不鸣侯祖父握兵再世南征西鹜甲冑生虬蝨略无寧岁三传至侯遭时昇平兵寝不用鬯弓释弰超距蹴踘军中作色而已盖甲子一星终天道周必复治乱兴废陰阳消长疑有数行乎其间侯於是晦其韬略从容樽俎留意经术教子读书盖侯家本寿春怀远公先名棋曾诣乡举不第投笔试劒学万人敌家传黄石公兵法至侯之子孙将复以儒起家云至治二年流民千余北渡淮白昼剽掠戕杀居民界上惊扰侯禁之不听遂至无为之石礪擒其首常公乞赴州论如律天历二年田旱民饥侯劝率富民出粟官吏捐俸赈贷为糜以食之全活甚衆明年请沛省漕荆湖米以贍军得万有八千石士饱而歌侯在镇三十余年军民安之至顺改元八月疾卒年六十先是侯豫卜葬地於祖塋之旁植一木志之人莫知也疾亟始语诸子於是遵侯治命葬下蔡县西寿河之原侯天性孝友笃于亲谊服用俭素轻财好施幼弟三人皆侧出侯以同产视之怀远时庄田产业皆在寿春侯袭爵居屯所以产业委诸弟恣其出入不问久之诸弟议分析止之不能乃听其均搭而止取其一又以調族党之贫者故没之日家无余貲人以为有季文子之忠诸弟怀其惠闻侯讣皆匍匐踊远来会葬如父之初侯有四子邦贞嗣职今为某官次邦詹应进士举邦直邦献女三人适许允谢致远沙图穆苏孙男五人得元得輿灵寿余庆余馨女三人铭曰钧璜北海避殷归周牧野鷹扬世祚营丘汲绍侯封延伯春秋曷云三世将忌陰謀纘戎祖考载扬王休星一周天武偃文修杨林西口拥万貔貅辕门昼寝缓带轻裘思侯不见江水悠悠世业厓碑永福川流

同知丘公墓志铭

公讳定夫字景游宋故正议大夫同知枢密院事赠太师封魏国公諡文定丘公讳密之四世孙也文定起书生奋巍科跻膺仕践敷中外三十余年为宋名臣公生长世家能自拔流俗无一点纨绔习好学聪敏行己孝恭遇物诚信忠恕乐易不吝不骄出於自然表里如一德人之容望而可即也早年有志事功祖?补登仕郎始赴铨曹连丁内外艰会国有大故服既阕杜门不出至元甲午朝廷録宋故官勅授田州路总管府经历田左右枕江蛮蜚杂居去家万里人劝公勿往慨然曰班定远马新息何人哉瘴烟虽毒生死命也单骑而去再考而归归而指画经行山川谈说南中风俗以为笑乐气貌胜常无几微不适意再调同知武龙州事犹欲之官已而不果公中年有肿腿之疾在弘山时无恙回後疾浸剧医药弗瘳久之不良於行或经月不踰外圃因自号为息轩甲第一区亘城东北隅高明宏敞累世同居弗忍析公天性友爱兄扬州教授景唐弟淞阳县丞景南三人相处无间言亲朋诣兄所则弟具酒馔以从参坐笑语懽洽终日弟有客兄亦如之一门之内怡怡如也岁时朔望诞日子侄甥壻男女长幼羣数十人冠綬綵角佩玉纷帨罗拜堂下问安献寿举觴酬酢乡人美之公弗喜也退入斋阁屏去左

右焚香鼓琴清淨自娛生平不广货产不蓄珍玩家务一不屑意然时事更革朝野动息亦无不知公学贯儒释晚年尤味禅悦高僧野衲延坐接膝默参径悟莫窥其际暨至属纊神思愈爽家人环泣问所欲言曰吾何言哉口颂佛号趺坐而逝将卜葬诸子哀公行实来求铭谨按丘氏世居暨阳文定次子讳寿迈宋大中大夫司农卿公曾祖也祖讳汲宋中奉大夫知桂阳军事考讳必恭宋承奉郎知镇江府金坛县事母夫人冯氏公娶赵氏继胡氏江氏男五人长圣广西路蒙古字学教授次基行宣政院宣政理坝埧未仕女六人长慧明适钮遂孙次妙淨适赵德宝妙山适袁天麟妙琬适潘仲华先卒妙莲适何之植妙云适赵元吉孙男五人长元镇次海宝广智普龙树孙女五人长淑靚适钮遂孙之子敬实次圆通议适何之植之子普贤端端如如引珠三人未出室公生宋宝佑戊午之四月卒以天历己巳之正月享年七十有二是岁仲夏庚申公葬日也定山弥勒泉侧公葬所也噫公愿息今息矣铭曰文定之友伯恭钦夫稼轩石湖皆当代之名儒今其後嗣弗竟而遗垣故第淡烟衰草凄凉乎衡湘之下江淞之隅惟公之传四世其昌而五桂聯芳又将迭奋於亨衢呜呼休哉吉人之符种德有堂亶其然乎

清河令王公墓志铭

王西淮望族也世居光之固始唐季王潮昆弟者挟百八姓自固始转战入闽据其地传国数世其族留固始者依大山以居自唐迄今蕃衍益盛宋迁江南浮光为极边王氏生长兵间以鞍马雄塞上讳传淮西路钤公皇考也公讳友迪字允迪生而隼迈及壮有大志文武兼长族祖监为殿马帅穆陵名将也奇公之才常挟以自随指公谓诸将曰兴吾族者必此儿也公益自奋然性不喜曲事豪要以故宦游江淮二十年备尝艰劳仕辄落落不偶公志不少衰清河当淮流之冲左顾丰楚右盼濠寿北通邳泗淮阨截筑为城城成择守难其人公请行有旨立清河县以令畀公邑当孔道甲马宵发车船夕济警无虚日公一镇之以静居民帖然如在中州乐土至元乙亥师下江南诸郡邑各以城附公转承务郎旧令尹如故居无何迁同知招信军府事公老矣益无志仕宦丙子秋八月感疾卒享年五十有五卒之日公所乘马悲鸣蹀躞有顷而逝乡人异之两淮之士闻公卒皆为之流涕清河邑人尤哀思之相率告於省台以公旧劳於邑遗爱在人请以公子文信袭父职慰甘棠之思朝允其请始公之治邑也於边鎖军实余暇常留意民事为政本於仁慈济之以严明不令而民从化故邑人归心焉公娶夏氏子三人长文用次文信自盱眙尉升宰换授江陰路録事廉恕有父风次文虎岁在戊寅殡公於朗石庄之阡价来请铭铭曰清流维河墉屹其峙中有美锦制自公始公祠百世名远淮水

故司狱赵君墓志铭

重阳後五日友人沈伯享来言曰赵君仁甫之子一初往年识先生於钱塘今愿窃有请也凶服未敢前子惊问曰仁甫之母无恙耶伯享曰赵氏母八十有六尚无恙也而仁甫以八月晦日逝矣予失声叹曰天乎世寧有是事耶仁甫孝於其亲笃於友谊勤於王事善人也乃罔或克寿天降之罚抑何酷耶翌日其子来拜且哭将扶柩返葬东浙来求铭吁此後死者之责也何辞焉君讳文荣仁甫字也宋故王廷美之十三世孙生而有名在玉牒实咸淳八年壬申也宗室子孙世袭富贵多怙侈不学君儿时独修谨长通经史习举子业猎猎有声会国亡家替

仕进无阶不得已释儒服而从吏由海右道宪司书写文字入绍兴路总管府掌簿书就充会稽县平江路录事司杭州仁和县三任典史升宜兴乐平两州都吏目幕府简静以廉敏称泰定丙寅北来暨阳为马驮沙巡检职守之暇时时访予谈文论事予始知其儒者相得甚懽已而省差嘉会门钞库副使浮沉州县四十余年惜君之才不克致远君处之夷然不少抑挫至顺辛未年及耳顺始授牒除将仕佐郎江陰州司狱癸酉三月复至吾州吾长君二十岁别去九载怪其容貌枯瘠须鬓苍皓不类前时意君畏途跋涉久重累忧患多固应如此然不意其遂至此也夏中早暵予避暑过萧寺与南山师对奕君未尝不在抵掌击节笑噱终日予语之曰君在刑曹何得乃尔对曰无疑谳无淹囚官长退食吾亦旅退闲无公事故从子乐耳予心服其干局优裕刃有余地超然不为世俗所拘八月某从官僚以下迎诏使於南门之外君笑谓予曰我亲僦居杜桥之西已约南山师幸偕过我将拂琴整局以待予诺之弗果往自是不复见君亦不闻其有疾也伯享又曰君骤疾豫知不起走价越上呼其子既至属纊三日矣哀哉哀哉君真弃我而先耶吾尚忍铭吾友耶按赵氏起涿郡王邸一派居开封之浚仪六世祖毖之以右监门卫大将军忠州团练使从驾渡江徙居越之上虞嵩城里至元初又徙城之西南隅文林郎泰州判官讳时寛君曾祖也国子监进士讳若墩君祖也承信郎讳嗣穆君考也母李氏男三人一初一中一德女一人未入室铭曰王宫侯邸降庶族兮噫州县劳劳抗尘俗兮噫不卑小官不苟禄兮噫大雅卓尔立於独兮噫百岁闪电往不复兮噫

缙云县主簿朱君墓志铭

人之生或哲而夭或愚而寿偶自生耶有生之者耶愚而寿者樗耳至於哲而夭者则气有所甚偏而理有所可疑天漠然不可测而人?然以悲此吾於里中朱君南伯之丧壹不知其涕之所从也君讳申长寿镇人幼性敏悟天才脱穎伯叔父咸奇之曰是儿鸞鸞也必瑞吾宗年十四入场屋藉藉有声诸老生敛衽避之既壮问学大进文思泉涌宪使陆公招致馆下海诸生主宾相得欢甚偕入京师归复侵疆职业修举确斋苟公忍斋申屠公廉按淮东西二公中原名儒不妄许可见君之文咸击节称赏荐君才可掌胄监不报秩满授将仕佐郎庆元路鄞县簿人疑君儒懦不更事且鄞剧县负山濒海民恃险为奸殆难治君至之日县长官因贿夺职已而同僚相继败绩君独署事从容治之犹有余力郡檄往昌国体究赈糴君核实欺隐官吏获罪者自以为不冤复往定海盖造军屋百三十间旬日而毕不愆于素民不知役军迁如归鄞素多盗不时窃发巡尉乏官君摄逾年逮捕不烦私贩不入境一日海盗出没洋中声摇旁邑令畏弗敢出君鼓棹径去直前搏贼获其首并从者八十余人自是客商往来如履平地君性严明不受私谒尤恶豪右侵细民一绳以法民有拏舟入浦者遇雨辄刈道旁禾以蔽其首田主见而击之毙曰盗吾禾吾击盗耳更数狱不服府以委君君拟断曰本图把禾以御雨初非窃食而充饥当论如律一府大惊更相传诵谓君治狱平允自是帅府宪司转委无虚日一月坐县治事者无几耳君尽心为政居官以廉能称四年代者至民遮留之泣曰复有洗冤泽物如朱君者乎有送至境上不忍去者居一年转将仕郎调庆元路司狱丁内艰服阙补江浦簿继丁外艰君齿未宿忧患并集须髮尽白毁瘠之余弱不胜衣人为君忧之君亦杜门絶进取意繙经教子将终身焉閏二年再调缙云簿命下君叹曰禄弗逮亲吾且休矣人谓君薄缙云不赴君亦不荅俄感微疾言笑如平常踰月浸剧神爽不乱顾谓诸子曰死生命也吾死布衣幅巾以歛侈靡不度之物慎勿寘吾棺中吾儒家慎勿以緇黄治丧若等自爱以诗礼自最

母愔母傲语毕而逝君生宋景定元年庚申以廷佑五年戊午三月甲子终於家之正寢享年五十有九君自幼以文鸣着作数百篇号淡圃集清新典雅动合法度杂前贤文集中不辨初习举子业乡校月书屡占上游每一篇出人争脍炙已而废不为两为校官辄自谄曰惜不自进士中得之甲寅科诏下君忻然有子玉冯轼观戏之意余长君八岁才不逮君君过相推敬丁巳余中乡试将如京君时已被疾闻之甚喜遣其子来馈赆侑之以诗致殷勤焉明年春余旋至广陵闻君讣惊失声曰噫鲍叔死矣既抵舍君之子德育哭来告曰先君寢疾时忽呼诸子曰陆先生其归命箠之意若有所嘱者易箠之夕始曰吾铭托之斯人他人慎勿与也哀哉伯牙之琴絕矣死者若有知也犹能为君一再鼓之谨志曰朱氏系出维扬徙暨之长寿乡二十有余世矣君曾祖讳瑛娶蒋氏继苏氏祖讳慤宋迪功郎娶吴氏继周氏父讳庆宗宋登仕郎娶戴氏君娶张氏子男四人长德肖早卒次德育德修德能女二人长适杨启次未出室孙男一人女二人俱幼君歿之明年岁在己未德育等卜以二月二十有三日己酉窆於长寿乡之观庄祖塋之侧治命也铭曰登彼观庄之原古人可作其惟朱君乎洵美孔硕卓雅不羣清淑之气升为浮云体魄所存既固且寧以谷尔後昆

卷十三

<集部,别集类,金至元,墙东类稿>

钦定四库全书

墙东类稿卷十三 元 陆文圭 撰墓志铭

广平张公墓志铭

延佑改元之二年中顺大夫广平张侯国纲来尹暨阳至之日迓者未出城侯微服先至学宫延见诸生问民疾苦既视事听断明允吏民惊服争问其爵里家世或曰侯尝掾江西省又为其属历州县所至有声其先则洛之隐君子淳德不耀鍾美於是者也家世从来远矣居数月侯访余墙东田舍劳问良苦意若殷勤者已而泣曰吾先君子賁志九原墓木将拱洸冈之表盖有待也今吾老矣功业不建夕阳西流大惧无以昭前人之光发挥幽潜以垂不朽瞑目犹有憾吾子其图之余再拜辞不可则敬复於侯曰中州兵烬垂二百年谱牒无传名公钜卿罔或登载况林丘逸士闾井闲民不求闻达姓名湮没何限嘉言淑行孰从而求之侯喟然曰先公幼有至性事二亲曲尽孝道昏晨定省冬温夏清率循礼经一无违者慈亲先逝事继母如所生有姑年迈孀居无嗣迎归侍养礼之终身女弟继出适薛而寡二甥幼视如己子抚而育之俟其成立为其冠婚闺门肃睦内外无间言业儒不喜章句通古今治乱兵财大略有志当世逢时抢攘廉於进取浮沈州县间岁月淹久在潞磁幕府时与何公继先同僚相好也何骤贵显晚年平章政事或劝先公自结以求援且曰公纵无宦情曷不为子孙计先公叹曰穷通命也吾其如命何卒不许久之授韶州路蒙古教授闻韶佳山水将往游焉以亲老不便而止遂不仕侯又曰吾掾江西省时年尚少休沐日或与其徒游宴先公闻之怒曰江西二十八城生灵之命悬於一省坐上皆贵人政在若曹若今怠惰其体漫不省事行获谴矣尤留意刑狱公事每曰人命至重论死者必先求其生求其生而不得则我与死者俱无恨矣我为小吏时不妄笞一人汝宜诫之一日吾自省户归侍次忽顾曰近闻某州狱请讞若何对曰已平反之矣先公喜见顔色吾自是留意狱事後以左右司官从佾省平南安贛城之寇禁止杀戮开释无辜招安余党颇有力焉泊审庐陵疑狱辨诬服为盗者十九人又虑囚於湖南理失入者十有三人明恕而行非曰能之嗟乃先公之教也语未既余再拜谢曰谨闻命矣遂次第侯语复依其世系而志之公讳弼字辅之世居汴之元武县大父以上逸其名父讳清母郑氏继母刘氏壬辰之难避地於邢迁於洛水因家焉今为广平人公郑出娶司氏前公十七年卒公生之岁龙集甲申以至元二十二年乙酉五月捐馆享壽六十有二子男三国纲前任奉政大夫铅山州知州国辉志不愿仕国享同知常寧州事女三长适某次适某孙男五达远造遂遵孙女七长适泰州监盐仓汴梁袁杰次适察院书吏河南杨益次适同郡徐希文早卒次适临州县丞冀寧焦昇次适龙兴路学正同郡李辅次适聊城丁某次在室曾孙男五海孙壽孙买孙引孙真孙曾孙女尚幼至大三年庚戌国纲偕二弟卜葬公永年县之严村先是上世诸丧皆攒浅土乃悉迁而祔焉卜其兆域而叙之昭穆礼也铭曰登此广平之丘绵绵生之瓜不在其身昌于而家降福孔遐

郭云仲墓志铭

自古建功立业之人率少壮为之盖年壮则膂力方刚志气初锐视天下事以己之精神运掉如意无不可者及其春秋既高閱历寢久世故熟而机愈深思虑审而见方定老成迟钝与少壮刚锐之时如出两人端居深念直视无所见瞶瞶若不闻此固非狂夫孺子浅见之所能窥也始吾与同郡郭氏昆弟交时竞习场屋举子文字长君子炎字明仲妙龄挺秀猎猎有隼声甲子丁卯两贡於乡弟云仲癸酉贡吾亦预焉云仲工词赋与吾同岁少数月耳学同志同甲戌同上春官是时君兄弟如神马出渥洼平步千里如太阿拭土直上无前余子皆避三舍吾虽不敏亦磨厉以须其後诸侯军从壁上观秦项战人人惶恐已而俱北余亦垂翅而归云仲殊不少挫将复进期年国有大故举场旋废士抑不用明仲郁郁不得志周旋乡校间抗顔为师不幸早殒云仲相继纠录於学修葺俎豆呻吟咕?抉剔隐租学粗成立人以为难君已六十余矣力渐不逮心艺与时左鲜克举之复长南徐之濂溪书院堂庑荒凉士散不收式遄其归自是十年不调扃户谢客呬唔窗下足迹不入官府至治壬戌之秋敕授无锡州教君笑谓妇曰鮎上竿矣余屏丘樊五十余年卑校官不为鉏耰之暇时与君往来劝君勿出君不荅明年春赴锡山时前宋旧贡士江浙间不数人闻君来以为异争先见之君须眉蓬皓音吐鸿畅衣冠步武規制落拓见者惊叹君视学舍已不可为为之辄沮谢事不可默默而已黜其聪明养之以虚白墮其智虑示之以天倪土方迢然从之而君已逝矣启手足之夕诸子侍侧顾曰吾梦与诸同年探筹吾先得之噫生不如死之乐君知之矣几日而不女从也君生淳佑壬子十有二月卒以泰定丁卯十有一月享壽七十有六讣至之日余哭之哀诸子擗且拜请铭谨按郭氏其先汴之祥符县人讳某中奉大夫安仁开国男女真抚中原护宋驾南迁占籍於江陰高祖某通直郎知高邮军事曾祖某?承直郎祖某隐德弗耀伯父某生四子君第二子名登龙出继父某为嗣娶王氏枢密使驥之裔孙性明慧佐理其家子六人长缙前卒次绮绶绅椿楠文学彬彬焉女一人适刘某卒孙男二人留孙关驴女五人长福娘适范某次继奴迎娘佛娘引娘俱幼致和元年戊辰四月己酉葬於由里北山之冈从治命也铭曰先雁门距汾阳胡源之长兹由里卜允臧在後之庆

王德秀墓志铭

壬子夏五余素车出城西会友人王君德秀之丧於申甫君二子拜墓下哭而起曰先子齎志九原功业不少表见於当世独行实犹有可考先生累世通家宜详知之将丐文以图不朽方事之殷未敢以请余答拜辞请属笔当代文士不可让事甫讫又以为请呜呼吾忍铭吾故友之墓也夫君曾祖讳某祖讳某皆隐德不曜考讳申字仲远经明行修其人如玉宋咸淳中余始弱冠仲远辱与之游为忘年友岁在癸酉同领乡荐仲远以礼记义占名第一明年春偕上春官君侍亲如杭余始熟君君长余一岁好学笃行如其父而通敏过之仲远不幸终於乙亥之乱君匍匐葬其亲遂屏居里中闭户絶交弃科举业於经子传记百家之书无不读而尤喜陶朱丹圭之术研精其奥初仲远性俭素不营生产有田一顷室庐仅蔽风雨君辛勤三十年力穡务本以贍雄州里好施不倦求者如归尝笑谓客曰孟尝不能自焚其券而使冯驩因以市恩浪得为豪士矣故君家每岁积空券数百度不能偿者弃不复取丙午丁未岁大饥君倒廩出粟賑之全活不可胜计时募民入粟拜爵君不自言雅尚简朴不以富骄人布衣粝食泊

如也匹马一童往来阡陌与野人参语襍坐见之不知其为儒者也酒酣剧谈贯穿今古遇知己握手出肺肝语自负一世之豪江左隐然知名晚年新居落成二子宦学自立将以优游卒岁而天不假之年矣所居邻季子墓谋创延陵书院以待四方之游士兴义学以教育乡里子弟跨夏浦建大石梁以济病涉者俱有志未就而卒卒後数月朝廷録君赉施之劳赐以初命之服非君志也而已不及拜矣君名茂宗德秀字也生辛亥壽六十娶丁氏继室余氏子二人天啓敕授?阳路钞库副使昌道举茂才异等女一人未出室卜四月二十日乙酉葬君於港西之原去家百武而近怀亲也呜呼君遂止於斯耶始与君父子以志业相责望仲远既不幸早世君才不用於时而以其余力起家余独偃蹇困蹶老而衰矣俯仰畴昔感慨存没泫然泣下呜呼吾尚忍铭吾故友之墓也夫吾忍弗铭也夫为之铭曰考鍾庆厥嗣嗣昌厥家胡福孔殷而壽弗遐数也命耶嗣又竟爽殆复盛耶

榕山君墓志铭

岷江西来演迤数千里中流巨浪冲突拥沙为州以百数而马驮最大东过暨阳为南江北抵泰兴之滢为北江东入于海马驮据三江之中风气融结地脉平衍人物阜蕃土俗龐厚广陵陈氏家其上数世矣至榕山君而始大君讳杰字汉臣其先自颍川徙有讳德以孝弟力田起家者君曾祖也讳清祖也讳端明考也曾祖妣张氏祖妣沙氏妣胡氏君生而不凡身长七尺状貌奇伟深沈有局量欲驰骤当世会考君病废左右奉养志不克就尝学书鄙俗儒齷齪不足为法从计然丹圭之术观时取予积粟如坻家累千金施穷周急略不少靳晚岁田庐子孙之乐几无遗憾而不获跻上壽者病夺之也初调荆南征官未赴适汴梁相王闻君召之欲往不果俄患风痺偃卧里中优游养疾数年而卒君生壬子终己未享年六十有八榕山其自号也娶张氏子二人简范皆好学卓立女四人适刘坝陆庸李寅孙余在室孙三人称临壮是岁十有二月癸酉葬於洲上延庆庵之西距家二里许君自卜息所也未几张氏亦卒附焉踰年其二子来拜且泣曰碑陰先友无在者铭以累执事余答拜曰诺君与余同生少数月耳意气颀颀相得甚欢时渡江握手笑语磊磊落落青天白日我知君心一夕痛饮古梅下慷慨剧论古今事旁若无人自是不复再会呜呼而今而後此土不可复作此乐不可复得矣发挥潜德非後死者之责与遂不辞而为之铭铭曰自幕至虞明德始大太皞之墟元姬作配凤凰锵锵媚於齐姜家贷公收陈世其昌中洲有庐江水弥弥厥土孔良之子洵美我田我桑我始既勤无秩与禄等之封君孰饥而啼予粟汝哺孰负而汝直而吐布衣长者名著江淮或縻以爵招之不来渥洼神骏逸驾千里竟尼其轅跬步而止西原植柏郁郁苍云泉扃寥呼君不闻宿草芊芊过者下马龟趺不磷百世之下故税使陈君圻志【按此即陈杰圻志原注为其子代作故附次前篇之後】

呜呼孝子之事亲终矣惟送死可以当大事不肖孤衔哀忍死匍匐以襄事大惧无以彰先考之懿将乞铭於当代鸿笔而又斩然在衰絰之中未敢以请姑识岁月姓系纳诸圻哀哉惟有妣之後国於陈子孙其昌代有显人族居颍川者避五季之乱南徙维扬占藉扬之泰兴江心有土可居曰马驮沙首起南徐尾尽东海土宜耕桑聚落繁盛吾家於此数世矣高祖以来隐德不耀至先考而陈氏始大先考幼失所恃二弟俱夭亲被疾不省家事先考只影自立奉养无违备尝艰辛以俭自力扶植门户经理产业田园第宅井井有绪晚年事力充裕舍施不倦

以信义行於乡党平理曲直赈恤困乏乡人有患挺身赴之有便利事必举倡之人皆悦服有
钜人长者之风名隐隐闻江淮间先考性沈毅寡言笑重然诺慷慨有大志本以功业自负读
书不守章句史学贯穿诗酒赓唱落笔惊人招师讲学训子严甚中更多故壮志不遂颇不乐
仕进归附初省府贵人有相知者拔授枢密院宣使不就丁未戊申岁大祲出粟数千石饲饥
民全活甚衆官录其劳敕授江陵路税课副使未之任丞相河南王檄召保充本投下户计总
管宣命将下先考至维扬将如汴梁谒遽得风疾之疾舆归里中手足不仁卧疾八年祷药备
至闻有善医者数百里外迎致然卒不効家人忧泣束手无策先考精神不乱从容治家务如
平时顾二子曰死生命也吾平生无大过失粗有成立汝等慎守之吾无憾矣岁在丙辰呼善
地理者亲卜葬地於所居之西北二里许手植桧柏成行筑庵於其旁时一省焉己未七月告
成閱月而先考弃诸孤实八月之九日也哀哉先考讳杰字汉臣生宋淳佑壬子之十二月享
年六十有八曾祖讳德妣张氏祖讳清妣沙氏父讳端明妣胡氏娶张氏今在堂生四男伯泰
叔庚皆早世仲简季范六女长许适李某未嫁而卒次适刘坝次适陆庸次适李寅孙余寡次
许适沈某未行孙男三人称孙临孙壮孙简等谨择是岁十有一月甲申出祖迁柩於新庵十
有二月癸酉下窆呜呼孝子之事亲终矣自今简等上侍母慈协和昆弟共保先业一遵先考
之治命江水在此不敢食言呜呼哀哉呜呼痛哉简等泣血百拜谨志

慈悟居士墓志铭

幽冀古燕赵国土脉深重习气刚猛人生其间雄杰魁伟毅然有烈丈夫之风可与共功名者
顾自辽宋以来南北殊疆谱牒散逸所闻所传闻朝市山林之间姓名晦而弗彰者何限有志
之士所为慨然太息者也范阳张仲威一再仕於暨慷慨急义人也清而不隘刚而不傲轻财
好施与人交有终始暨人爱之君以暨人之爱己也遂留居焉垦田筑室於南墉之外读书教
子与余往来相好也间为余述其先考君之贤长身玉立须髯若神便鞍马射命中军中号万
人敌随史丞相南征斩获甚衆攻钓鱼山先登陷阵第功赏将命以官一日单骑深入岩谷若
有所遇亟归焚其弓矢懺悔事佛终日趺坐手不释经卷与人言恂恂如恐伤之无一点豪武
气乡人称为慈悟居士嗒然有厌世之心病革口诵佛号不絶瞑目摇手而逝吁异哉传称韦
应物初为三衢卫士骄横不羁晚年折节所至埽地焚香清净自居世果有斯人也仲威急流
勇退卓有父风泰定丁卯以从事郎台州路黄岩州判官致其仕会朝廷推恩考赠从仕郎大
都路良乡县尹命下之日余率衆往贺之仲威愀然对其先人遗像而泣且告余曰先子没四
十余年楸柏之实久矣不肖孤朔南奔驰不克岁时洒埽且墓左之铭未立敬以嘱子寻授余
以家状余不敢辞谨按燕山张氏皆祖翼德散居山後诸州君曾祖讳建中占藉永清县之统
和乡家饶财畜牧满野上腴居邑之半散恤孤贫延纳宾友其门如市朝廷下令家饲官骑二
十四疋者与循一资君饲如法岁且蕃息与之官不愿受人以比卜式里居一夕盗闯其门声
甚恶君呼而进之曰若等迫饥寒非获已也吾素不储珍产所有者丝纆耳悉辇置庭下恣所
取盗惊骇欲弃去君徐以温言抚之各负重而奔未几兵寇抢攘君出避地卒困於沙漠垂殆
逢三十余人不知所从来翼而出诸险乃脱问其故对曰畴昔之夜受君赐今是以报询其姓
名不告廉得为首者二人曰王庶刘琮云君既免於难遂不问家事萧散林壑壽九十七祖讳
益相继隐居习岐黄之书收畜良方务以救人不邀其利州里德之晚授朝奉郎太医院判官
壽九十六父讳德林始以良家从军天兵攻信安四面阻水久之不下君策马环视白其帅曰

城如卧牛形背有庙焚之吉从之即日城破帅大奇之挟以归朝赉马四匹羊百口俄谢病去
壽百有一实生居士讳山字某至元十三年卒壽才五十有七葬於永安镇曹家务娶完顏氏
追封宜人壽八十三子四人长仲祥次君祥次政仁次政仪即黄岩州判官仲威字也女二人
小奴素儿适卢某王某孙男六人思庆思用思善思道思远思进四女适王某王某杜某桑某
曾孙男五人女六人俱幼铭曰君之祖若父三世皆登期颐岂昌黎所谓未有佛之世耶君一
超径悟求佛利益乃罔或克壽髮半白而早萎岂命有所悬人固不得而移耶将觉性长存虽
亡而不隳抑不在其身而子孙之貽耶

竹隐处士墓志铭

所谓一乡之善士者褫身可以范俗敦仁可以处里闺门之内父子兄弟雍雍如也族党之中
长幼皆顺而听也顽薄之夫见之使人之意也消则一乡之善士已如处士何君汉卿是也君
讳刘发其先开封人居汴之阳六世祖大理评事逢吉宋元佑中徙常之晋陵建炎初常为兵
冲高祖中奉大夫俊升北徙暨阳曾祖武仲四领乡书登绍兴庚辰第累迁朝议大夫通判建
康军府事赠中奉大夫妣商氏封令人祖润朝散郎通判池州军州事妣阙氏继惠氏俱封安
人父龟年将仕郎妣阙氏封安人何氏世以文翰起家家饶财土腴华第甲一州先绪中微鬱
攸继作族遂分散君幼失所怙受学於舅氏感激奋厉长身卓立音吐如钟出则从师友入则
经纪家事中年田园粗足或劝君谋什一之利厚自封殖者君笑曰贫富命也资性朴素褐衣
布衾数岁不易屏五綦之好泊然无营见後生靡服炫饰辄闭目不视闻人小善喜若已有有
不善事愀然不乐其言不谄其行不悖其举事不悔好施而不倦亦不妄与人救人之急息人
之争而无伐德之色尤重然诺出语可复不务取进不竞势荣尝为松江学纠旋弃职去调会
稽学正遂不赴晚年益敛晦不预世事有问不答权贵人欲识其面不能屋後竹千竿诛茅三
间杖履逍遥觴咏其下自号竹隐居士余邻墙相去不百武时时过从君辄叹曰白首惟吾二
人耳今者不乐如逝者何余凄然辄为引醉将别必曰数见无相忘岁不我与矣哀哉言之不
祥也君絕嗜慾早善摄生须髮黟然顏渥如童筋力虽衰精神充溢晚年饮食小损俄苦痰眩
终日嗜卧亲宾之问疾者皆在顾余若有所言余不敢请正月晦日疾亟呼家人嘱以後事恬
然而逝讣闻倾城之人咨嗟涕洟俱懊惜曰善人亡矣君生宋淳佑七年之丁未終於至治三
年癸亥享年七十有七娶赵氏同郡化成乡探花校书赵公发之孙女前卒子二人皆从余游
长臣源博敏可喜不幸早世次天溥尤嗜学三应进士举孙男四人之植长出也亦习举业之
英之格之桢次出也彬彬就学高曾之泽未艾也孙女三人皆未出室曾孙男一人普贤奴女
二人尚幼初君事父至孝奉先追远必躬必敬老而弗怠义方之训严整子若孙晨入塾夜分
亲自课督卧起必偕诗礼闲习故君之丧棺衾宅兆曲致其情卜以是岁七月二日葬君於昭
闻乡由里山之原先期天溥之植来拜乞铭且曰治命也余答拜泣曰五十年故交也曷敢不
诺敬次绪君世裔行实且系之铭铭曰陟彼瓠子之冈望其圻綈如也猗嗟先生息其下子孙
其昌锡尔纯嘏我铭不磨永诏来者

莘隐胡君墓志铭

余始至容山询邑之贤士大夫而愿纳交焉或曰胡君宗尹醇儒也子欲见之乎余曰诺介其

友江声伯请见君使其子长卿应门肃客予旧於举场中识之矣少顷君峨冠大带而出揖客中溜退让不自胜坐而言姁姁惟恐伤人记忆前言往行酌答如响娓娓不倦时复叹息形於言外扣其所学渊源深不可测俨然至元以前人物也余心敬之一再造其庐情稍款犹未究其议论也其里中人为余言君居家奉亲笃孝昆弟胥敬如宾掩关不出官府罕识其貌独严於教子日有程课夜分相守不寐宾兴诏下喟然谓其子曰吾老矣尚忆儿时场屋汝力学勿惰尚及见汝成名乎子再拜受教家畜书甚富邑士求书者必之胡氏性俭约布衣终身敝居才庇风雨晚年稍加葺治明牕净几湛如也癸亥日长至余约客芳润堂小酌期君不至传者曰君死矣客皆弗信也而传者衆曰晨起固无恙日向晡瞑目而坐家人环呼之不应乃逝吁异哉吉人而凶可哀也夫君生宋宝佑丙辰之五月卒於至治癸亥之十一月享年六十有八君讳泽民曾祖元震祖南父庭桂娶赵氏先卒继王氏子体仁长卿字也孙二人尚幼卜以甲子二月甲申葬於城南五里之冈君未死前数日谓所亲曰吾欲以莘隐自号求文於陆先生以记吾平生何如既不果至是其子来乞铭呜呼吾之文徐君墓之剑也铭曰胡氏望安定建安猗君言行古璵璠内希先贤卓尔志外愧薄俗赧乃颜暮年拮据室苟完高丘宰木归荒寒我评一乡之善士山石可移铭不刊

处士单君济之墓志铭

山南水北穹林长薄之下哲人元夫钜公长者往往而在命与时左浮沈闾巷化行於家义着於乡功业不?於当时姓字莫登於简策鲐背皓首槁死牖下者不可胜数而苍头卢儿洒削马医侥幸得志於一时此志士仁人所为扼腕太息者也余卯角时与城南单君伯恭游伯恭学鋭甚倜傥不羁乙亥之乱里寇窃发憚其名首毁其家伯恭及考皆遇害季弟济之字君济年尚幼挺身丐父命不获焚其体半救至仅免尸而攻盗纠合民兵借助邻壤卒擒贼磔之既复父兄之仇遂阖门不仕非庆吊不入城市力田治圃将终身焉特不喜与官贵交驺骑闾门辄避匿不见输纳井赋必为邻里先佃贫负租者贷弗责岁饥糜粥以食饿夫全活甚衆乡人德之痛先庐不存手自拮据堂构丹雘焕然增旧君无他嗜好收畜书史寻师取友优游卒岁而已性纯谨质直与人无竞对人无一妄语默坐一室终日钦钦人莫窥其际或登高临流啸咏自适志所存远矣中年得二子皆卓然树立始弱冠俾从予书塾诵诗缉文君命之习举子业余谓场屋废久习是将安用君笑不答延佑改元科诏始下君於是老矣且婴未疾手足痿痹顾谓伯子曰天将兴文明之运吾殆不及见之矣汝虽绩学姑留左右尝药干蛊州今贡士遣而弟以往又谓叔子曰城东陆叟吾所敬也汝往复受学焉名不成勿止也丁巳之秋君疾浸革势不可起家人环泣君喟然曰吾读昌黎诸父与诸兄皆康强而早世之语未尝不抚卷叹悼今吾年垂七袞家道粗立儿孙满目得正而毙夫复奚憾汝等笃学力行勿交游非类勿坠先训吾瞑目逝矣又曰我死幅巾布衣以敛世俗靡丽不度之物勿为吾累属纊之夕索笔赋诗其警联云人皆有死岂我独仙雾散云收白月在天呜呼可谓达生委顺之君子矣讵至余往会哭葬有日二子哭来告曰碑陰先友零落无存者铭属之子矣余叹曰子之先君子齐鲍叔也?知我者铭曷敢不诺按春秋单为王畿采地诸侯襄靖穆最着後以邑为氏徙暨阳者不知始何年今所居墅以单名单山名单弯田名单尖则族大而远矣曾大父讳应里娶须氏大父讳从仁娶王氏考讳良辅将仕郎娶邓氏子三人长作肃字伯恭次泽之君最穉早失所怙事母至孝至元中调晋陵县学官内艰不赴庐冢三年娶高氏继时氏皆先卒子二人高出也长

曰祥次曰瑞女二人适王通焦亨孙男五人恩同不花充延女孙三人俱未出室君生於宋淳佑九年十一月終於延佑四年九月晦日享年六十有九是岁十有二月某日葬於太寧乡秦望山上弯之原与高氏同兆异域从治命也铭曰郁郁秦原吉人之藏上有云气双鹤来翔卜云其吉子孙永昌

巽溪翁墓志铭

岁在昭阳大渊献嘉平之月余馆容学旦有衰絰褰帘而拜者进而问故则曰润西张氏子也先人悼弃诸孤于月其迈以支干之弗协弗克襄事滋不孝是惧我乃卜明年甲子孟陬之己酉窆吉我又卜黄塘原食惟是窀穸有期圻石未具无以昭潜德之懿且无以见先人於地下谨以状授执事者敢泣拜以请余答拜固辞不可则敬曰诺按状张氏其先清河人宋建炎避地徙秣陵之句曲山西有润清源穹薄望之郁然张氏家其下数世矣族繁而昌代有闻人君讳文盛字彬之曾祖慧妣巫氏祖伸妣樊氏父端信妣谷氏端信生四子君其仲也性颖悟才数岁屹如成人不随羣儿戏弄稍长自力於学读书通大义工草隶尤邃於医务畜方药以济人卓犖有康世志每閱史传见忠臣烈士成败辄慷慨流涕时人皆异之居家孝於亲友於兄弟始终无间言闺门之内雍雍如也至元乙亥君年三十有六会天兵南渡破建业守者宵遁兵四散掠旁邑居民出走窜伏林莽君时以母寝疾与其兄文浩侍榻前守死不去黄头先锋至叱曰是何敢然欲兵之君泣告曰母在是也病不良於行请以身代死帅义之曰臣孝也遂去之且禁麾下勿犯其里既又予之檄使招集流散一境赖君获安抱子携妇望君之庐以手加额曰君佛子也时事浸殊君太息曰是不足展吾志矣乃弃其所学从计然之术研得其精为大区广陵市中家僮数百指北出燕齐南抵闽广懋迁络绎资用丰沛散施不倦远近赴之皆嗟如志里有争讼多就君咨决君为剖析枉直谕之以理皆愧让而退生不解饮而酷好宾空罍对酌自得其趣晚年独善吟咏句意清佳迥出尘外客游淮楚间与名士结交如长平李克敬克诚金台倪廷章济南张正叔长清王啓宗皆相与唱酬诗筒往来无虚月閱世既久昆季凋丧独享高年兰玉森立食指日衆至无所容或议析处君平生质俭不营居室至是闻之颇不乐始命筏木輦石相旧庐之北闢而新之门庑堂营内外数百楹既完既美贺者踵门君恍然曰张老有言吾聚族於斯将歌於斯哭於斯矣或谓君言不祥居无何疾作家人迎医医至曰疾尚可为君笑曰吾年及此邯鄲之梦觉矣尚何俟焉却药不进客问疾犹正趺坐好语如常有顷瞑目而逝君生宋嘉熙三年己亥之十二月卒以至治三年癸亥之三月享年八十有五娶戴氏先四十六年卒继唐氏王氏亦卒子男四人长才冠次才茂才富皆卒次才雄女七人长柔静适笄至道次柔贞适许文彪柔淑适孙德荣柔洁适汤元善余未出室曾孙男十三人长邦彦次邦智邦达邦杰邦本余未名女八人长妙净适笄某次某君舍东南泉流向巽故自号巽溪翁两继室殡黄塘木已拱今从之治命也铭曰鼓瑟宴坐清溪之下吹箫祖送方塘之野人生逝水滔滔不舍达人所务远者大者翳翳长松陰陰美櫜归寧尔体锡尔纯嘏

严氏圻志【原注代其子作】

严氏盛於汉望於天水居暨阳之花桥者不知世所徙先考讳起字伯震幼失所怙自力起家

隐晦不仕生宋嘉熙庚子终大德庚子享年六十有一宜人刘氏生三子良恭敬良好学能诗仕至钱塘县幕早卒宜人慈惠勤俭手抚孤幼成立敬宦学四方留兄恭偏侍敬辟司徒府掾解职归养宜人弗善也再掾两省出宰阳翔改番禺去家益远惧宜人年高不欲往宜人怒曰而起寒族被遇宠禄向心报国何以家为且近制弗许汝何敢敬不得已入南白云在岭晨夕北望逾年宜人寝疾竟不得供奉医药不幸泰定四年七月十有三日疾不救经冬闻讣哀恸陨越匍匐万里抚棺溅血何嗟及矣呜呼不肖孤不孝之罪终天莫赎忍死襄事以泰定五年戊辰三月九日壬申祔於城北广山之原先考墓侧宜人生甲辰享年八十有四二女长适何屋次适黄监孙男二人炳间孙女二人长适章立权次适杨邦达曾孙男五人观孙联孙真孙圆孙归孙女二人僧奴关奴敬今滥授承事郎广州路番禺县泰定丁卯正月例得蒙恩追赠先考承事郎建康路上元县尹封母太宜人呜呼漏泉之泽至矣不肖孤生弗能养歿敢以为荣谨以黄副本并纳诸圻先考妣之灵尚有以鉴之孤子恭敬泣血谨志

先考陆府君圻志【原注代侄孙作】

呜呼树欲静而风不止吾不自陨也夫而咎鍾於先君忽焉弃诸孤日月于迈惟是窀穸之事未得吉卜是用痛心疾首赖天之灵盖踰年始相地於定山之余湾乃卜以延佑改元之闰三月甲寅朔越七日庚申迁柩而塋焉匍匐将事未暇谒铭於当代词宗以章先君之懿姑述梗概鑱诸幽有俟也呜呼痛哉先君讳某字某陆为吴中望族自青镇徙江陰曾祖讳某妣王氏祖讳某妣吴氏父讳某妣俞氏先君幼失所恃逮事祖父供养继母孝性纯笃春秋忌日事亡如生斋洁祇事至老不怠博通书史工举子业自场屋废嗒然无他岐进取意韦布终身忧恪自守乡里称善人与物无竞莫窥其际终日恂恂无疾言遽色家人不见喜愠然人有不善意所不愜稠人广坐忽正色譙责不少恕已乃欢洽如故人亦谅其诚不怨也乐施与喜交游宾至如归倚楼笑咏觴来引满陶然就醉不知月出栏之东也优游自适日夕以为常晚益韬晦以家政传诸子不问有无出入恶闻时事若与世相忘者癸丑六月感微疾殯泄不止饮膳日稀意忽忽不乐闭户絕客家人忧之医祷备至久之疾遂亟诸子环泣张目曰若等志学无倦毋坠先业吾瞑目矣又曰吾志丘壑死则择亢爽之地葬我焉又曰吾儒家慎勿以緇黄溷我去以皇庆元年仲冬之望日終於正寝享年六十有七呜呼痛哉先君娶杜氏继吴氏皆先卒子八人曰鲁曰青曰质杜出也青出继舅族质早夭曰常曰庸吴出也曰和曰雍曰涣皆侧出女五人长适万次适朱卒次适高余未出室孙男七人女五人先君勤约与吾母起家训诸子严而有度胜衣者即就学手自课授未冠娶者不得出外舍相过从妇女不踰闺门之内肃睦如也呜呼义方之教今兹已矣先君之嘉言淑行又可数乎泂冈之阡曷日可表也孤子鲁等濡血衔哀以志诸石石可泐哀不泯呜呼天乎

杜夫人墓志铭

妇无公事内言不出诸阃虽有懿德人焉知之铭非古也然共姜孟母诗史登载後世无若人则已有则必书之况人子思显其亲礼也呜呼吾於杜氏夫人之铭不敢曰不可夫人家於魏世为宦族父某早年弃家从黄冠游号通真子母韩氏大司农某之子夫人幼而聪慧在孩抱间知孝慕其亲通真子初渡江见文公四书喟然叹曰此吾心经也道在是已自是日诵一书

尽卷日不足则夕继之诵已辄焚香再拜率以为常至老不倦夫人在旁习闻其读粗了大义久之於性学若有所悟父詫曰恨汝不为男子及笄以适同里宪使懒斋孙公公时通判永州军府事殷酬接不暇家事不问夫人治内米盐滫瀡之奉麻枲织紵之供纖息必具躬俭率下恶繒大练靡事华饰动循规矩事姑如母敬夫如宾姑赵夫人年高性重夫人竟日侍侧祁寒盛暑不辍得其欢心公年五十未有子夫人以为忧仕西广时有王安人者寡居公谋聘之夫人曰为嗣续计何疑焉既至相处甚睦王氏长夫人数岁夫人推让避正寝以居之公不自安越明年夫人生男良祜公曰向吾再聘惧无後也今有之矣若不改图人其以我为汰乎乃归王氏奩资万金速返之夫人固请留弗许人两贤之後持节金陵赵夫人有疾夫人目不交睫衣不解带跪进汤剂十旬弗倦疾卒不起扶柩北旋甫襄大事才七閱月懒斋遽捐馆夫人哀毀敕左右停含玉曰吾将以身为殉粒食不进者五日亲旧交劝六日乃斂絶食如初越十有三日不死气自憊然乃呼家人而喻之曰吾闻医书云妇人七日不食则死今吾倍之而又不死幽冥之中或陰相予其为吾儿尚幼而失所恃乎吾责殆未已也起强加一餐终以此得羸疾公既葬夫人以其子自大名如广陵寻师授业亲自程督夜分乃寝时时为说四书谓此而外祖父焚香所读之书也汝服行无怠勿交友非类为不肖以辱而父夫人晚止一子鍾爱甚至然未尝假以词色家素廉贫束修之问或不给至期必备子疑所从出夫人曰儿第苦学何问为盖脱簪珥质之其笃志教子如此良祜授承事郎江陰州判官夫人就养视事之日夫人誡曰汝何修至是亦惟蒙前人休惟公惟勤世济其美吾旦夕从而父於九原亦不忝为汝家妇不然吾目不瞑矣汝敬识之良祜再拜受教故初筮仕即以能称乙丑夏夫人故恙复作似疟而非医拱手莫施病日侵神色不乱坐起如平常良祜捧手亲诊其脉夫人微顾曰汝卢医耶修短命也吾行也趣具汤沐有顷而逝五月十三日也享年五十夫人平生姿性恬淡晨起盥栉闭阁静坐无故不履中庭父歿後不复归寧亲族有丧则吊若庆贺则不预不喜听音乐待婢仆严而有恩闺门整肃余居去夫人寓所不百武与承事君游相好也故闻而知之至是往哭君释杖拜曰某不天母氏弃养将卜日渡江返葬於乡惟是洧冈之表不待也铭以属子余答拜曰诺夫人生男一人女五人长适某次适某某次未出室铭曰余读草虫采苹之诗能以礼自防而循法度也岂止为大夫之妻亦女中之师傅也展如之人兮惟古之慕也象服是宜甘荆布也静安婉婉何慈煦也春晖未报白日暮也同穴有誓遵吾素也异时天雄道上过者下车而指曰此化鹤双飞之墓也

亡室殷氏墓志铭

庐陵欧阳公铭其友梅圣俞之妇之墓谓圣俞能不以贫贱富贵累其心者盖亦有内助焉圣俞亦自誉其室之贤能安贫处困乐与偕隐也予读其文而悲之嗟乎丈夫处世或致身於青云以位与金骄其家人者无足多尚或辱身於泥涂卧牛衣而泣见车服而慙以仲卿孺仲之贤其识度反出二女子下呜呼二王之妻亦贤矣哉夫家贫之思贤妻犹国乱之思良相也呜呼今吾无望也夫昔岁在辛未吾始弱冠纳币於云亭殷氏既聘之三月先府君弃诸孤吾母传事於冢妇殷氏事姑谨顺待族睦嫺遇下慈姁乙亥之乱余奉母窜山间妇以其孥归寧已而俱免余自是落魄不偶杜门索居独喜诵诗作文呻吟累昼夜不絶略不事生产作业妇乃力勤纺绩手自纫紵以补余乏犹不给则谓余曰以子之学讲授生徒聊可卒岁何自苦若是从之稍自给则又靳余曰稽古所蒙止是耶余赧不荅君性俭约不御华采余虽贫颇乐施君

助之施友人妻丧窆不克举脱簪珥解裙襦歛之里妇叹服居无何骤感风眩忽不省事稍苏诫侍婢慎勿走白诸姑自後手足遂不仁朔望令左右掖拜堂下吾母怜而忧之居二年卒不起余时以事适吴闻疾复作亟归君张目曰吾忍死待卿顾堂有老母室有羣稚逝不瞑目矣余执臂恸哭余母八十有八闻之泣曰天乎吾不获终於此妇之手也余惧辍哭时丙申七月二十有六日也距纳币之岁二十有六年君以辛亥八月生享年四十有六是岁十一月甲申殡於城东十里绮山之冈子四人云孙辰孙霆孙阳孙女七人铭曰花绮蒙茸白石青峯壽姑在寢予弗女从

妾陈氏墓志铭

妾陈氏暨阳悟空镇人也生而秀慧里之豪强委禽焉父靳不与曰吾女当择才人事之豪怒毁其家父与余外氏同里閤往来识余遂与归焉年十有八矣乙亥江南大乱暨为兵冲余奉母窜山谷间陈实从焉跋履草石蒙犯霜雨困厄流落之余滨於死者数矣余谓之曰吾或不免命也奈若何陈泣曰愿以死奉君无他适已而皆获全间关抵舍自是余闲居八年素不事生产久之家益落左右散去略尽陈独侍余无倦色每规余以俭德避难曰薄宦徒自苦耳性警悟颇涉文学宾至立屏後听其议论退必白曰某也忠直某谄佞人也观其言然余交朋中由是皆知其名壬午春归寧父欲夺其志辄誓不许曰吾死陆氏矣趣之而归夏四月感微疾卧经旬容止不类病人索坡集閱之一夕而卒享年二十有七迨事余九岁矣卒之日衾无粧珥囊无襦帛闻者哀之子三人长韶孙早卒次星女次辱孙生三岁腊月丁酉攢於城北五里之黄山原铭曰薨英兮秋暮閔芳容兮幽土六如亭兮梅花路别朝云兮终古

卷十四

钦定四库全书

墙东类稿卷十四 元 陆文圭 撰行状

总管王公行状

公讳显祖字继先姓王氏其先泽州之高平县人也王氏为高平望族宋辽之间簪绂不絕女真有中原或仕或处壬辰之乱盜起河东泽潞孤危祖定避地於邢台因而家焉定生明字光庭幼有大志燕赵豪杰悉与交结金迁汴梁河北隔絕州人奉为节度判官幽京被围天兵南下太师国王徇地至邢邢人拥州官出迎奏闻太祖皇帝赐明金符陞本州节度副使明年薨於位明四子长先卒次即总管公公生庚子九岁袭父职为邢州节度判官戊申岁也公追念志不就痛自激励力学勤苦敏於政事听断明审如老成人己未冬宪宗皇帝出征军次钜鹿时世祖皇帝龙潜护驾太保刘文贞公实从与节副公有旧引公入见公年十四状貌屹然有奇伟气天顏喜悦酌酒赐之谓太保曰此儿不凡汝其子之中统三年邢改顺德府公为府判官如故始受宣命会山东李坛叛据济南河朔震动公随大军往讨先登陷阵李迄就诛公不言功调卫州判官卫与邢相闻熟公治行不令而化至元四年调汴梁路同知郑州事郑土狭民贫公抚恤有方郑人德之七年调宣德府判官秩满同知滨州市公进不求名不喜结势援连为州佐貳泊如也十二年江南初附维扬久围不下主帅檄公领所部济师城既降公复归滨两考终代者不至遂弃职而去居邢三年复起为同知德州事寻除汴梁路钧州尹在任六年威惠旁行阳翟故无庙学创盖一新招师取友劝学兴化会州境大旱公露祷辄应甘雨骤降田苗勃兴士民各为立碑纪其事二十七年丁母夫人忧时服制未定公首行三年丧解官庐墓二十八年服阕行省平章约苏穆尔以贪刻失民心湖广骚然世祖震怒命顺德忠献王达尔罕往按之除公行省副理问穷治党与次第诛殛追赃以钜万计民大悦官库被盗不获讯及平民株连甚衆公推问得实乃守库兵自盜赃证明显遂伏辜其无辜在縲紲者百余家尽释之皆喜舞罗拜而去三十一年行省委公整治湖南等七路钱粮蠲无名杂科之赋除有徵无纳之额至今民间便之元贞元年改差滨州市尹公去滨二十有一年矣父老闻公复来夹道懽迎公究悉一州利害知百姓苦食贵盐申请所司今後先散盐而後支价较之常年可省民钱一万二千余錠官亦无不利焉从之州人受赐刻石颂德时山东盐法坏乱民大扰朝廷以公才堪繁剧就俾整治选除山东东路同知转运盐使司事首尾六载增盐引一十四万有奇商贾通行公私两济大德九年自山东回除少中大夫江西袁州路总管公慨然曰吾自束髮出仕至於白首险阻艰难备尝之矣赖先人遗泽幸得不坠今吾老病日迫西山尚夜行不止耶力辞不赴任十一年公年六十九请致仕不报五月某日薨於私第之正寝公父子有德於邢邢人闻公之丧如悲亲戚公性沈毅度量开豁骑射冠一时好古博雅善属文结交当世名士如易济赵公肯堂王公秋涧卢公疎斋李公受益陈公吉甫张公孟符郭公百川刘公端甫董公朴皆深知公者碑陰先友不可胜载卜以某年某月某日葬於某州某县某山之原公娶同郡张氏夫人先公二年卒继室范氏夫人後公九年卒子四人长曰都袭父爵授忠翊校尉同知颍州事曰山曰允曰信山早夭女三人曰璋适侯某曰英适侯某曰娃适李某孙四

人曰佑曰延曰兢曰寧皆长出校尉君再任江陰州判官挺挺有父风一日泣告余曰某不天早孤失业惟是先考君筮仕五十八年历任一十有六不为不久嘉谋善政不为不多家乘散佚弗录不孝是惧今仅裒辑一二大略敬以授子子为我状其事余辞有二难焉南北异疆隔绝久所传闻异辞一难也先太师鸿名盛烈宜牒考功请諡牒史馆编錄皆於状取信必得当代钜笔以发挥潜光顾衰老浅陋弗称是二难也君曰毋庸吾属之子矣不获已乃撰具历官行事次第登诸册以授使者有司采择焉谨状

家传

陆庄简公家传【原注代其子鏞作】

先公讳屋字仁重陆氏世为吴郡着姓常熟一支不知始所徙八世祖讳景山迁暨之化成乡今为江陰人曾祖讳英才妣王氏祖讳大昌宋承直郎监庆元鲒埼镇妣李氏考讳涣江陰军安抚副使妣蒋氏先公姿性英悟学问絶人有经世之才既冠值乙亥丙子之难江浙寇盗蜂起安抚公招集民义扞卫乡井公实左右之天兵南下暨当冲要公随机应接境内帖然版受江陰军判官事定朝京师授四品官朝列大夫同知徽州路总管府事时至元十六年也始至新安人疑其儒家子少不更事易之公留心政事发擿奸伏人以为神民有诉其山邻轶界若干丈者官验之良是命归之公疑焉曰吾闻揣高者以约法不以寻丈计也安知诉者不更赢乎合两家质剂互审之果然诉者乃伏又有争山葬者各指一塚莫知岁月远近公视之曰必发而塚争者曰法不许也公曰吾故欲发之何如争者变色公命具畚鍤争者逸迫而视之虚塚也县解官钱止驿舍或窃负而去莫知主名公呼在行者诘之指其一曰讯彼一讯即伏赃具在或问何以知之公曰吾覩其容止耳官命造舟江东诸郡集昇之龙湾公白宣慰司歛居万山中道远莫能致请就太白渡便从之役中止又欲运材之良者赴北公又持不可未几宣之旌德卒以募民徙木召乱至调军招捕乃定公在郡四年始代人追思之二十五年授朝请大夫江东宣慰副使时权奸秉国罔利析秋豪符檄旁午公据义力争度不胜遂谒告去二十六年改除江南浙江道提刑按察副使浙西人物浩穰土俗浮侈公风裁清高刚肠疾恶一绳之以法无所迴避海运万户之子缘私逋久繫编民公捕而笞之州县吏坐侵渔百姓者劾去数十人追赃以数万计单车所至贪饕侧目豪右敛迹最後分司杭州杭故都尤号繁剧难理是岁饥诏发廩粟十余万賑之公亲监视给散人蒙实惠郡侯及通守挟威恣横公廉得卖盐鬻狱等事捕繫其人各官称疾不出公操之益急申行御史台停其职时权奸既殛奉御帅行省官两监察御史就故太常寺起诏狱穷治其党与籍其家赀差委丝然通守因求自効窜名寺中反以飞语构公公面对白发其奸奉御以下皆是公然事浸解会织染局官以贿败事连行省译史及胥典十余人公移文右司指名取之既至一夕歛服左司不善也誠参政公谓分司不当按省吏以违制论将奏其事先使人诘公公曰右司吾予也又诘右司左丞公独曰分司不得按省吏固也吏果受赇御史亦不得问耶公闻之乃以成款上御史府营救者甚衆御史迫清议具狱已成不得变乃速决之参政及左司怒然无如之何适使者至参政以他事获谴胥靡之而去有识相谓昊天不佑凶人矣居无何按察司罢改肃政廉访司公以例去既抵家乃营旧圃按行松菊建闲居堂燕喜亭岁时奉亲輿逍遥娱宴堂後古梅数十株苔干槎牙筑台其上本心文公书其扁曰天与清香日与宾客吟啸乐饮若与世相忘者久之起除中顺

大夫同知台州路总管府事入境闻箫鼓声讶之乃郡人聚衆立社以迎鬼神者殆数千人公杖其为首者昇木偶投诸江人大惊视事未几閱牒有未具者悉厘正之罪人有淹禁者立理出之州长官束手受成然以其清直弗敢较在郡六十余日以元贞元年改江东建康道肃政廉访副使公治办有声故省台交荐争用之公益感激自奋风采愈峻部使者因市红蓝受贾人金公首劾之有奉特旨造浮屠像者威胁官吏攫取金帛逾五万锭公又劾之其他纠弹甚衆人多怨者值检覆州县水灾檄一令与俱令实病不自言扶曳上道邂逅身殒怨家挟其子诉谓公实死之公不自辨用事者将中以危法公不知也在鄱阳日思太夫人年高陈情归养士民泣送舟过湖口行省使者将命逮公不知公在也风帆迅驶交失之暨入城公已去使者曰余知其无罪也而用事者遣余天相之矣以追不及还命使者获罪公不还家迳北入都诣台自理台中人皆知其无罪畏用事者莫敢言会国有大需乃得释寻降三官授朝列大夫岭北湖南道肃政廉访副使公辞不可不得已就道湘楚去京师远蛮徭杂居人不知法俗尚竞渡岁多溺死峒丁盗牛畜因相鬪讼公皆厉其禁警捕官捕盗拒捕格杀而取其首盗反诬以故杀久繫狱公问释之里妇独居夫不在僧出入其家或诬以与妇谋杀其夫指道旁尸为验僧不任答乃诬服囚之六年公閱其牒尸死以夏月犹衣冬服疑之根问得实乃何人先数月受杖而踣於道者非夫也破僧械留圜中公归之明年吏有部送征蛮粮过湖北者见其夫实存与之归僧乃免公所至平反非一事此其尤着者也长沙部十郡公按行其九所至宣明风化敦孝行禁浮祀为首溪翁山獠骈首聚观至今谈公者以手加额先是宣慰副使某受赂觉诱罪其下许代之偿既而靳之无赃可徵其下自言公閱实卒正主罪先是行省欲削风宪之权请自今有罪者分司与民官居厅审问然後结正迨同审辄翻异公患之及宣慰副使败公以为言御史台奏闻有旨革去新例廉访使复正其体自公始公固倦游又以侍亲弃官归逾年陞中议大夫海南广东肃政廉访使岭南有讨叛积功至大官者赀累钜万奸赃狼籍民重足立不敢言台宪才一举按辄反噬至是事发御史置狱维扬逮者相望某官崛强不敢出岭公至行台稟方略人为公危之公曰是何敢然吾仗国法驱之耳船至番禺遥望有盛服罄折俟水滨者侦视之曰某官也公使辞焉至驿请见又辞视事之日某官来贺升阶请受事公辞曰均王官也不相统摄请毋勤姑归治行明日诉某官者至公视某牒皆谰词却之不受又明日诉者沓至如前复却不受某官喜曰公不害我矣盖前告者皆某官遣为之以尝公公识其情置不问乃肯就逮北出英德百姓覩其去始稍稍出自言敢吐其冤公按问得不法事数十条络绎呈台某官闻之嗟曰吾他日复得南归若种当无复遗其暴如此御史问未竟索其狱赴都寻赦不诛人以为恨公在广南修古廉吏祠免儒籍差役增贍学地租请复恩馆田闕北客之死南荒而妻子不能返者请留舶货在舟市易免担夫跋运之劳请禁官吏诡名行盐夺估客之利者为政朞年复以侍亲弃官归公自初筮仕凡七拜宣命四握宪节持身廉介遇事果断洗冤泽物兴利除害不可殫举性至孝居家侍太夫人朝夕不离左右亲尝甘旨三仕皆以就养去职诸子才胜衣者即使就学招明师训之身自程督严甚治家整而有法内言不出於梱外言不入於梱家人十指给廩称事丧祭一用朱子家礼不谄鬼神不佞老佛扁所居斋曰义尝曰吾平生受用义字不尽待宗族尤有恩捐私租仿范文正公立义庄法计口而散之婚嫁丧葬皆有助农隙则聚里中子弟设塾而教之患差役不均为之区画先所居化成一乡始立式推排除诡寄虚桩之弊分户九等各出助田若干计粟若干以身为率先後差次每岁以三两户应充里正主首即以义粟与之收敛破除皆有籍轮一人掌之岁终会其成约数年後义粟有羨乃以置良田如义田之数以所助田还其主行之二十年乡民享其利皆让不

争守其法至今不变它乡以役破产者多矣皆追思之而莫能继之者凶岁发积散财糜粥以饲饿夫不足则贷诸姻家以续之故家无余蓄倜傥周急乐施不倦豁如也与人商论不能屈摺皆凿凿实语不相狎亦不可干以私公家居官府不敢为不善事有疑辄质於公公亦检制下人不以一毫扰官府间党有争多不诣州县来取决焉公平心剖其曲直劝之以义皆悦服而去尤爱敬士类迎门倒屣讨论经史娓娓不倦作诗学少陵词喜稼轩下笔往往逼真在五羊任所得瘴热疾医投以附子乃愈泊出岭精神稍减於前踰年旧恙复作不敢复以烈剂继之寝疾数日而没吊者皆哭失声识与不识皆叹息曰善人无所恃小人无所忌矣公生宝佑六年戊午之九月薨於大德十有一年丁未之六月享年仅五十是岁九月葬於州之宝池乡定山之麓延佑五年覃恩赠嘉议大夫上轻车都尉吴兴郡侯谥庄简公初娶江陰县丞赵公庆胄之女早卒继娶昭勇大将军广州招讨使汤公忠信之女俱吴兴郡夫人子男七人曰镛鏗鏐鎡铸铉錡女几人孙男几人孙女几人初镛与先公昆弟也先大父安抚公弃世时镛尚幼先公未有子大父谓之曰以是为而子善视之故先公爱镛特甚不啻自己出尝曰吾非利其财异日当以田产半予之先公既没镛次当袭爵让与弟鏗又以所居大第让与诸弟而出居屋之西偏於是汤夫人畀镛以先畴之半遵治命也鏗今为承务郎湖州德清县尹铨为登仕佐郎规运提点所大使余未仕先公之葬也速故不及请铭於当代名士日月逾迈往来于怀姑述梗概藏诸家传以俟太史采择

祭文

祭运粮陈总管文二首

呜呼一贵一贱交情乃见通家子弟异邦姻眷一死一生乃见交情笑谈在耳恸哭失声瑰奇之能卓犖之器居家而理居官而治驷车佚老墙窰华终哀荣始末世孰如公胡不百年云何一夕闻讣罢市行路喑喑生刍致奠匪我愆期衰疾无堪止或尼之乃褰帷堂肃拜公像追怀畴昔吾将安仰鱼龙海水忽变枯桑白骨无言寒沙茫茫朝华夕悴古今共叹没寧牖下公复奚憾呜呼生死之理通乎昼夜之道辰自子以至亥人自幼以终老达者观之则商彭不为壽鲁顏不为夭盖福祿之易求而身名之难保寄空荣於华屋栖余冤於衰草长夜漫漫白日杲杲百年鼎鼎万古浩浩如公学问之素充才器之独抱负万斛之舟而自任者重养千金之軀而不销其宝盖其胷中所得已多彼螻蛄青松是区区者俱无足道某之所恨前哲之日凋而典型之莫考念通家之契濶空临穴而哀悼死者有知觴为余釂

祭袁国华文

呜呼哀哉生死有数聚散无端中身之壽行矣树檟同心之友伤哉刈兰忆凌云之雅操怀竟日之清欢得句花落衔盃月残止客投辖倩人整冠置驿慕郑命车奉驪提博局以争长掷布袍而戏谑或掣床而怒弼或赌囊而负安抱隽才而莫试聊放迹以自寬奈黄粱之未熟惊落枕於邯鄲自悼亡之戚戚鬢中白其似潘耒疾浸淫尊足蹒跚遂放柳枝凭几静观一夕昏雾入人鼻酸君乘叶舟冒此奇寒正脉中虚厉气外干扁卢束手药尽技殫弃白日之旦旦即厚夜之漫漫呜呼哀哉某等交如金石语出肺肝死生契濶况也永叹薄言往奠一恸抚棺倾泪

填膺书此血丹

代祭朱南伯文

呜呼臣卿元伯之约素车白马之驰载在史汉人以为疑要之朋友之义垂死不变而精气游魂之感理或有之呜呼友谊且然而况於亲戚之悲乎君之妙龄问学最优诸老避之皆逊一头嗟予生晚又不及诸老之门惟视君为前修君既忘年辱与之游而三星束楚方结好於绸缪昔岁在蛇君疾弗瘳我登寝门竟日迟留握手别去遂往南州闻讣旅中涕泗旁流梧桐再华岁龠已周君归玄宅青松一丘祖道持觞君能饮不

祭赵一山文【原注代其子作】

呜呼哀哉吾父生平竟有何乐宦途齟齬家事消索凄其老怀寄此清酌忘形一醉适兴自然嬉笑怒骂白眼青天中山千日屡呼不醒岂期一夕无言长瞑呜呼哀哉祖母年髦弟妹童幼不肖何怙号天莫救日吉良辰輶车启行薄暮一奠血泪如倾事死如生情敢不厚哀哀我父能复饮否

代祭叔父文

呜呼叔父壽七十余不为无年子又生孙不为无传繙经閱古蓄学不为不富杜门扫轨抗节不为不坚所可痛者宗族无睦嫺任恤之老乡间失仁厚忠信之贤考叔父之生平感世事之轮云俄千金之易散惟一瓢之独存虽室人之交谪公笑谈如不闻岂小智之可窥信大雅之不羣今兹已矣空复何云某等幼蒙教育头已白丝追念畴昔幽明遽分輶车祖奠漠漠营魂血淚落俎言不能文

代祭南坡文【原注甥祭舅】

呜呼我先君子讲授於乡舅氏从游入室升堂实以伯姊来嫀於杨婚姻之重师友之良百年相好一日可忘遭家不造孤在新丧舅氏独存鲁殿灵光我见舅氏我心悲伤如母存焉感诗渭阳今其既亡使我涕滂呜呼哀哉如公心平而直气和而刚稟质之浑厚操履之端方宜乎善积而庆壽永而昌义气聚一家之乐文字发诸孙之祥天之报公八十之年不为夭人之望公千岁之日不为长奈身非比於金石安能保於无疆呜呼哀哉公之将殆易华晬於正寝屏粉黛於洞房自志墓铭生求挽章哀怨尽消於淮海旷达尤过於柴桑挽古道以自期岂今人之可望某所痛者乔松已老凋零繁霜弱羽无依中野旁皇怀舅甥之缱绻隔生死於苍黄滴兹血泪来奠一觞同心盟在白水茫茫

代哭外舅杜威州文

某昔官於公之乡乃识公见其容貌恂恂服用简质夷考其行其乡之人曰如其服若容访其

亲知则皆贤士大夫也余心降焉而未得交也後数年取公之长女公不我弃远道送将暨余於居凡三日谷敷衽论心情义欵笃始至如平生且别戒其女曰往之汝家善事尔长相尔夫子其俭共是务既去则又数以书来会期我乎暮之春要我乎其家其悃悞无华亦如其服若容余将撰日月以妇迈乃季春之四日致土之毛遣人问无恙未三十里而反公之家之隶遇诸途来讣公丧矣致书之日而公死之明日矣踉蹌挈妇昼夜倍道行百八十里逮至而不及冯其棺矣余外姑以公之二子衰而逆我矣吁嗟天乎为善者果不必报乎报而固若此乎三十年州县以考进阶阶不过外郎以资受任任不过二千石今日藩臣以威州奏可而明日公寝疾病以死天胡夺之亟乎循公迪彝不事矫竞不见知於世固也而苍苍者未知之乎善类惋嗟里闾惊愕而况余舅甥之至情乎薄奠不腆公乎其尚能饮余酒如畴昔将尔子以过余之日乎

代弟侄甥祭亡者文

先君鍾庆一女三子季弟先亡惟兄是恃兄之才德妙年挺出孝於事亲友于弟侄舅甥之情尤亲而密意团圞於晚岁舞共乐於斑衣胡倾逝於一朝空物是而人非呜呼夜雨之床犹疑对话白水之誓无复同心弃杲日之耿耿即厚夜之沈沈命也奈何天乎无辜惟堂泣鹤髮之母垓室抱雏婴之孤某等亲亲之义生死不忘有淚如傾敬奠一觴

代人祭王郎文

呜呼才子王勃舟次南昌咏落霞与秋水吊陈迹於滕王知阎公之得壻殊不让於子章奈陰币之虽焚嗟宿債之未償豈行儉之先见偶坠舟於海洋呜呼人事悠悠天理茫茫彼愚而壽此哲而亡予牖下之季女萱草凋於北堂求君子以偕老嘉坦腹於东床差谷旦於鴻鴈期夭桃於春阳忽东野之马佚欲济川而无梁痛逝者之如是慨予怀之永伤呜呼白日冥冥碧水泱泱结桂为旗芙蓉为裳乘云上下与波翱翔俨雀屏其改素昏玉镜而无光予女身未得以奉箕帚之役义不得以荐苹藻之芳生刍一束予子是将敬酌冯夷共此一觴

代祭怀德岩长老文

呜呼佛法本空来无一物去亦无一物只履翩翩行彼西方日没处乃没我等大衆不了生死犹惜此枯骨爱缘心生礼缘情起不恁麼不得桑下三宿犹自恋着况同居一室运水搬柴诸妙用吃尽师气力茶毗烟里光明现成佛不成佛

祭袁国华母文

呜呼昔者孟母其居三迁有子如轲遂为大贤轲之丧母也後丧父也先所以棺槨衣衾之美贫富不同後踰於前惟灵淑懿之姿慈俭之性不可得而见焉然积善余庆素鍾於天故身没之後子孙百禄如瓜瓞之绵绵春秋享奠牖下之屨几满而帷堂之殡弗克举者二十余年豈陰阳之避忌或时月之拘牵今者协祲祥於龟卜启吉兆於牛眠爰停车於中野永瘞玉於重

泉某等乡邦子弟获缔姻连薄觞一奠生死怛然泐冈宿草方表新阡

祭袁国华妻文

惟灵游宦从夫於苏於杭春花在前秋月在后聚散有期哀乐无常百年偕老一夕云亡昔日辞家罗襦下堂人今不见丹旌回乡呜呼哀哉续弦无胶返魂无香贤哉伯鸾失此孟光西风流水不哭神伤灵兮来归歆此一觞寒花淅沥晓月微茫呜呼哀哉

代祭孺人汤氏文三首

惟灵生自儒家嫔於名族姆傅婉婉闺门雍肃采葛归宁之意乐举案齐眉之义笃子策骏以游宦孙垂髫而习读期六珈之偕老享五鼎之厚福夫何藁砧先逝帷堂遂哭未终日月之制复值木风之酷惊疑甫定忧患相续嗟百龄其未艾遽一夕之不淑某等同里婚联通家姻睦痛死别之伤怀想音容而在目薄言鷄絮一奠江曲

呜呼哀哉生存华屋零落山丘古人同悲今此其尤藁砧之丧相继於中壶同穴之义尤惨於柏舟拏帷堂而重吊不岁龠之再周某幼而同里长也依刘受上床之独拜陪东阁之英游晚缔婚於仲氏托松萝之绸缪云胡一夕閤此千秋呜呼哀哉年光过隙人世浮沤感念畴昔我心百忧隔州之山郁郁松楸殡宫双奠淚洒江流

呜呼哀哉先君之丧灵几未终女兄之卒血淚沾霄天乎何罪降此鞠凶惟灵体闺中之秀有林下之风温柔良善贞静懿恭幼鍾爱於家君长择配於华宗教子之严断机於孟母事夫之敬举案於梁鸿意百年之偕老何一夕而俱空匪桃夭之家宜乃大车之穴同呜呼哀哉手足之情抱恨无穷舅甥之义敢不尽忠冀死者之有知俾降心以相从此言可质白石青松

代夫祭妻文

呜呼哀哉夫妇之义着在三纲死生孔怀不言神伤昔君来嫔逮事姑嫜孝养无违迄於终丧手鞠二雏训以词章长也不淑季也在傍女归宁家妇馈下堂意其晚节享壽而康岂性太慧故命弗长呜呼哀哉君疾甚危医庸弗详始於忧劳七情内戕乘以惊疑至於膏肓回生无丹返魂无香呜呼哀哉舍西百弓水遶泐冈汝生所命卜吉而藏輅车在野寒日无光呜呼哀哉吾今而後抚而子女念汝之自出眷汝姻戚如汝之未亡百年同穴此誓不忘灵其有知来歆此觞

代祭某氏文

呜呼上壽百年止三万六千日灵之享壽八十有九去百年而咫尺虽盖棺而无憾终遇变而哀戚惟灵生自名家嫔於华宗温柔良善贞修静恭懿厥哲妇如水如玉洵美且仁命也不淑藁砧先逝衆雏亦飞??弱质靡室畴依瞻彼西方瞑目长归某远道言旋入门惊讣總车素幔

空堂日莫寄哀一奠写淚如泉清酒在壺嘉實在筵魂兮來归有風肅然

卷十五

<集部,别集类,金至元,墙东类稿>

钦定四库全书

墙东类稿卷十五 元 陆文圭 撰四言诗

题郑子实秋溪钓雨图【原注江晚渔归郑谷能诗未能画也今子实乃能之耶四言八句聊启一笑】

水墨淡淡烟雨蒙蒙溪抱前山人倚孤篷我怀季鹰感慨秋风身羁洛下兴寄吴淞

题猿石手卷二首

空山暮雨枯木晓霜此处闻声若为断肠

楚山无人羣戏树颠或据大石如君长然

五言古诗

读史

魏延及杨仪两人蜀俊乂各怀专妬心曲直竟谁在孔明惜其才未尝辄偏废渭南反旆归师在千里外朝臣意左右魏为杨所害杨亦不得死晚用姜维辈蜀竟以是亡束手付邓艾艾复矜其功受制于锺会四人共一律皆以专妬败家国莫不然呜呼可为戒

李杜

子美坐同谷太白走扶风虽遭仓黄急转觉吟咏工首乱者羣儉貽祸及二翁因知漆室女发论乃至公触事机难审临危计易穷川原愁夕照草木困西风鬼马如龙游鬼妾如花红变灭不须與焉能保其终择祸莫若轻老遁林谷中

赋萧仲坚所书汴梁节妇事

汴水流浊黄美人如冰清案无伯鸾夫袴无赵氏婴姑老扶上床夜寒机杼鸣停梭独太息莫把鸳鸯织成孤飞鴈离羣不再匹河东柳家儿抉眼去其夫愚者生不谐直者死不渝太师汉复周相国秦又楚嗟哉二丈夫愧此一嫠女

谢詹中美惠五典毓蒙书

山上有佳木春风抽新萌勿纵羊与斧条叶随敷荣山下有流泉??滴深清勿投泥与沙支????
任纵横物尔人亦然习与性俱成位可望贤圣教乃始孩婴五典叙千古一编粹羣英属辞不
厌巧立义不厌精金玉二三子源委诸老生寒灯读未竟眇眼开双明惜哉书晚出会使世盛
行价知贵洛纸报愧乏齐琼

得已堂

为已终成物为人适丧已得之以为重丧者深可耻与其乞墦生不若蒙袂死贫贱勿失色富
贵亦勿竞穷达本无心安於义与命人受命於天顏孟独能正

性斋二首为分湖陆提举作

孔门性不闻学者失其义上中下为三善与恶为二邹洛异而同韩扬同而异不指理不明不
兼气不备理无智无愚气有驳有粹本体在涵养工夫由克治立义以居敬存诚以去伪曾思
两卷书学问千古事性外无余天斋中有乐地

吾宗家湖曲虚斋纳天光清源泻活水中菡萏香我欲袖两图再拜升公堂先天揭右序太
极列左方见草忆春陵看花思洛阳花草各有性指图试参详

怡顏亭曹若晦子无易为奉亲作

冬青有何好婆娑岁寒姿每爱渊明句独树乃为奇朝阳紫翠交夕月光陆离幽怀聊所寄宴
坐辄移时陶写得真性丝竹亦何为欢趣不自觉况令儿辈知

杂诗五首

田叟不知书指望升平年一生把鉏犁忽闻铸戈鋌早晚征徭起惊讹走相传腐儒寒窗下风
雨正齁眠夜半更相呼巷南连巷北人语何喧喧陰风何窅窅猛虎下山来按尾逐不得村中
鸡犬尽行择小儿食何处人夜归一犬穿篱吠狺狺声四起似各应其类月寒人影空帖耳循
墙去家家防穿窬披衣不得睡秋声何飕飕乃在枯柳边畴昔韵鹂鷖岁晚栖穷蝉张绪少年
时春风正可怜流光不相待白首泪潸然定远未封侯发愤投其笔老儒七十余毫秃手不释
才器有长短志器各自适遥思玉关外万里风沙隔

次善卿杂诗五首

贞女不自媒蛾眉为谁扫春风吹年华闭户綠芳草灵修不我顾览镜红颜槁焉得北堂萱聊
用寬忧抱又惧青蝇谗善使黑白倒遂令亲者疎我欲俾有昊

东坡讥举子有类候虫鸣退之讥诗人谓作苍蝇声制策直而核联句新且清自作复自讥持论终未平无人解此意起我怀古情

蛙从井底语豹在管中见若遇大方家一笑真自献馈浆意已惊抱瓮力殊倦因知巧若拙颇觉狂次猗玉以德保瑕珉以多故贱

火云吐赤日旱势千里濶古人救荒术货食知本末家家箠口赋殆类僧持鉢激水活肆枯植木?道喝诸公善努力赤子正饥渴

弃儿啼草间瘦妻卧路傍公廩已告匱私户犹多藏嗟哉守钱奴盗窃势且昌莫保千金躯汝富安得长链炭不及炊宝玦空自将独有黄巾寇不入郑公乡高贤古所贵薄俗今可伤

婺州传仁贇诗求见依韵和之

发燥始出游心期结明主天方穷畸人世不喜生语絶弦恨伯牙抱璞泣和氏独怜身皓皓不救俗靡靡竞趋声利途孰蹈仁义轨寘之勿复道作者敦窃比【原注来诗鄙班马而况孟氏】婺女宝气明箕尾德星聚【原注谓传说也】杂遝贡棘闱高明识芝宇监衡付有司尺度失奇士少需知我者一第溷子耳瓠樗嗟无用车斗可胜数老矣何能为欲然徒自视安得善及人共勉学为己

和陆振之见赠韵

我怀陶元亮早弃彭泽令宁甘柴桑饿不受宋人聘晚诗题甲子统着义熙正得书晋徵士千载论始定吾宗佳公子世禄让千乘高眠九思斋清节故可敬寄来停云篇词与意俱胜耿耿好贤心颇似缁衣郑居家未得闲歉岁讲荒政良苗困螟螣凶暴过梟獍闾里不聊生一发寄微命闭合忧攢眉怀哉我同姓惜无勲业志不必频看镜吾衰畏残暑一雨秋意盛拏舟泝流归帆饱风力劲田芜且莫问但恨荒菊径明月近中秋云扫天宇净素娥惜皓发把酒呼不应何当共携手尽此南楼兴效颦辄捧心拙句酬佳咏

和丁师善韵【原注时奉省檄检灾】

辙鲋活斗升莫向肆中索已无秋成望况复岁暮迫蓉城一小县舞袖折旋窄针芒万亩青席卷一川白苦肠真食蓼枵腹思啖栢蒙袂嗟饥氓胠篋畏暴客将怀转壑忧谁任求刍责为政推仁心匹妇无弗获登途祇王命东西固不择汉网殊濶疎挂一直漏百但令大纲正潜使宿弊革斯民本同体难以一膜隔发奸虽有术救急岂无策不憚原隰驱要知闾里厄消平蛇龙居安集鸿鴈宅庶免愁叹声謠诵沸广陌

辛卯二月记异

客子游吴中步上姑苏台是日天雨土四面集坳埃微明日漏出半朗风吹开痴儿戏团沙智
士疑劫灰天意复如此人事信悠哉

有感

六月南风盛秋意虽未多长养会有极摇落将如何高槐鸣衰蝉况乃蒲与荷一老坐太息羣
儿笑且歌笑歌恐未终岁月已蹉跎

春日不出

春风不着人微寒带微和落梅枝上稀桃李园中多桃李尚为容青草被陵阿时至气自应美
恶同一科无声花蝶拍有韵山鸟歌老人闭门坐如此景物何

清明日偕赵云壁张仲实顾伯玉张见山游分韵得好字以百家衣补之赵故嘉禾宰今为学
官坐中多及学校事

清明花乱开今日风日好吾得及春游相期拾瑶草城市多嚣尘客衣日杲杲何时一樽酒且
试开怀抱王孙丈人行生世何用早为乐当及时蹉跎觉年老虚名复何益弃捐勿复道但愿
崇明德藏身以为宝

三月旦日出游

季春已一日寒气犹袭人斋中偷小暇陌上追余春金华古精庐几劫化微尘入门何所见修
竹出墙邻迤北过崇明殿阁何嶙峋山房闭不启俗客来辄嗔徐归偃藤床息我定力匀残书
了一卷古意含酸辛山芽聊止渴起瀹石泉新

三月一日偕善之无逸游南山桃园分韵得源字

白云起南山随我度溪园园丁荷锄去季女出应门汲泉供香茗扫石开清樽人静禽声乐春
深花事繁蛾眉映修竹掩袂娇欲言吾亲白云外未敢访桃源

癸卯二月仲实诸人游野外饮花下得家字

散步逐芳草小酌慰残花土锉野人居茜裙蚕妇家汲流涧水浑挽树花梢斜园童贡新蔬复
邀啜盃茶我兴偶然尽汝意良可嘉

申海道中

兀兀乘肩輿西风掠老鬓云冻山色暝水寒江声近篱根盈尺雪晴释才及寸人事日相酬客

路岁将尽急归掩柴门地炉拨余烬

茅山道中

蜿蜒西北来土阜余百里怪石耸巉岩势距三峯止大峯东南倾中峯伏龙起绵绵亘不断小峯平而峙名虽汉代立山自开辟始我来春雨余峯色有如喜绿鬢光可监栢沐初出水缥缈三僊人婆娑一老子情知隔凡圣颇亦达生死埋金何必问采药聊复尔洞乳滴丹泉手掬吾齿

游崇禧观南坞真人置酒索诗

粉墙缭而曲转入宝珠林卷帘炉香出竹日净沉沉天人一代师功行夙所钦掀髯顾我笑呼酒得细斟云厨荐黄独饱慰饥虫吟相携监正室试听玉泉琴

京口访郭义山出示陆丞相遗墨

宝佑丙辰榜季世尚词章功业已衰谢气槩犹堂堂壮士死海岛尤胜死雒阳遗翰落人间姓字透纸香甲子行一周复见文运昌遗黎存一二往事空茫茫寒灯客窗梦飞堕礪山洋留眼看中原且勿悲故乡

渡黄河舟子作难久之乃渡

四渎水中大寻源河最长未必通汉津支机事荒唐导流始积石以西入要荒龙门久东狭横溃走徐梁奔流俟其定势可一苇航我来桃源渡浑浑流浊黄舡舟不肯济奈此黄帽郎石濂投千金贞女可怜伤

宿迁道中遇雪

登车宿迁北万顷铺琼田黑云湛水光上下玻璃天六花时时飘集我车上羶左右拍手笑翁似白鹤仙失却翁白髯顿觉翁少年

入杭苦雪二首

雪天无晨昏尤难辨西东高低赋万象偶尔一色同会覩日与月终愁雨兼风居人掩关卧况乃逆旅中买薪呼斗酒鰼颊生微红

年年西湖上梅柳得春多新正十日雪重陰压微和皓洁混泥途轻盈赴寒波危桥驴失脚不如坐吟哦推窗无杰句奈此玉峯何

至元重光单阏之岁春正月陇西郡太夫人介壽八十子侍郎帅其昆弟子侄内外姻族寮友
宾客奉觞上壽如仪州人士相与嘉叹争为歌诗咏其事而绣使紫山胡公为之序云

断机碎锦纈短髻剪青丝殷勤谢师友老妇得佳儿长宦客四方鹤发在高堂安得凌风翼高
飞至母傍春晖不可报萱草日日长今夕知何夕门有车马迹堂下罗钟鼓堂上合宾客春风
吹緑酒起舞儿献壽客问年几何旧岁七十九此去三千年蟠桃始开花花开又结实瑶池度
岁华客起再拜言遗核幸分甘小人亦有母八十又加三核中有琼浆饮之胜啜菽怀归满袖
香仙霞烛幽谷

壽理伯雍同知

理侯人之父亦复兼母慈束吏如顽奴煦民犹婴儿闾门无杂宾铃下生蛛丝内闻读书声日
晏忘晨炊上马出署事坐看棠陰移人静报休衙闭合方退思廷中相戒言慎勿干以私但祝
公百岁长为良吏师公言抚字劳良吏安可为方当上印绶自与赤松期

壽李仲明同知

新息父贾彪南阳母杜诗束吏如官奴护民如婴儿李侯妙政术千古同襟期高寒月半弓清
粹玉一规掘菜朝为螯脱粟暮作糜但闻读书声不闻儿啼饥褚衣敝再浣枵马瘦莫骑今朝
侯生辰父老持酒卮厨传寂如水不知侯所之介壽古有言此意亦复辞独立古梅下遥赴天
仙期

庚寅腊月二十九日钱孙晋卿宿清孝里晨起呈岩隐

驱马四十里怅然临别情举酒坐太息岁月空峥嵘河流日浩浩此地几送迎老我白板扉卿
等致太平窗风吹酒醒起视天未明小星争余光残月西南倾

皆山楼分韵得坐字

无诗山不喜无楼犹自可楼上着诗人青山皆属我得句山禽鸣落笔山花堕翠屏招我隐欲
往辄不果推窗呼与饮醉吸云一朵须臾成五采吐出惊满坐

为刘君符赋乐山诗

山体本至静仁体亦如之乐者有深味鲁论无费辞目玩唯自得心契若有期逝川同一旨妙
理无容窥刘公本好古雅志非好奇诸君为着语殆类爱山诗泉石涵清思松栢媚幽姿古来
山中入此道未必知蜡屐母乃癖挂笏殆成痴独有首阳高薇苦甘如飴得仁即无怨千载真
吾师

壬辰端阳後一日会潜斋以竹深留客处荷净纳凉时分韵得净字

日透朱樱明雨拭白莲净布席开清樽授简递新咏谋乐须及时养拙聊适性传闻度辽师铠甲冒暑盛

赠刘宗道自金陵来游茅峯

君家汴水阳吊古游秣陵秦淮映江月历代几废兴古人所树立今人愧未能嗟我搔白发空斋对书灯邂逅接余论谈笑得良朋我如蜩与鸱蜕化为鹏岁晏落蓬蒿安得齐飞腾东望积金峯春游记吾曾鹤仙迟子来丹井 寒水

赠翟良甫洛人南游

温洛天地中父老升平年清游盘石坐【原注谢绛游嵩山寄梅圣俞书】醒酒落花眠【原注邵伯温闻见录】胜地已陈迹故事空遗编铜駝泣秋雨祸机始杜鹃耆英日凋谢嵩少无人烟怀古笑我迂慕学嗟子贤购书或千金卧榻余一氊低头肯揖吏闭口不言钱情已寄丘壑足犹履山川驾言远寻师胡为近舍旃煌煌邵程业百世谁能传

赠柯山夏梅月

五星配五行占法具春秋参以四暗耀不知始所由经纬十二辰一国系一州三河即豫地系宋复系周晋自居太原卫本都帝丘借问益与并古有二国不三晋俱属冀韩卫不见收尝以扣日者不语辄掉头渠未通古今敢问儒者流气化互生剋躔度有迟留因之别贵贱庶人与王侯既云命在天何以身不修经籍古格言较此殊不侔殃庆有所积祸福皆自求理数各一家二家果孰优论数每多验言理或不售忠信人爵从孟轲老於邹仁者必有壽牖下死伯牛杀人取印绶嬖主乘轩輶将貂续狗尾以冠加沐猴市朝日汹汹乾坤竟悠悠璇穹列高真星月侍宸游朝裾曳明霞从佩鸣苍璆居然视世浊不肯分天忧以此司罪福反自招愆尤我愿叫阊阖再拜面凝旒贪淫屏月孛凶恶驱罗?仁贤迭生旺儉邪永休囚帝阍不可扣金鎖闭玉楼龙眠正齁睡鸟语徒喧啾路逢柯山翁深碧明双眸笑我地下臣何豫天上谋今夕有佳月且共登罗浮

赠季清隐道人

虞山絙西城尚湖遶其趾青屏照玉镜屈摺十八里传闻汉真人丹成飞入水到今水不腥鱼鼈长而美往年山中夜半忽惊起神锋闪烈电烁烁光不已平明斲山骨石函半鑿毁土花蚀苍龙岁月不可纪玄灵启幽秘结构此经始云香染衣佩岚翠裘巾履道人方晏坐秋叶打窗纸西风送诗句吹入千岩里收拾费工夫远来将举似见叟却忘言炉烟生棐几徐云乘兴出兴尽行当止山中有缘事比欲相料理白鹤数日饥吾今且归耳

赠笔生杨日新

雪屋夜明寒引纸一长吁贫无食肉相颇悔身业儒晨出生谒入被褐而长须颖脱殊可喜文翰定自娱自言中山徒常与陈玄俱醉曾挥草圣闲或写桃符最爱王逸少勉随刘寄奴嗟生不自惜貌泽神亦枯世多宏肇辈幸我非二苏

赠笔生林君实

我爱古人巧造物揜前闻遐哉苍颉氏赖此蒙将军将军絶地脉乃解开人文模写不得力制作空云云祇今千载下艺圃专策勲貶黜毛锥子褒进中书君工拙无定在好恶有殊分老我翻墨滓落纸无烟云有生来被褐倩客试书裙双金慙报赠只字寄殷勤

题宋学古九天玄女数自云其师锺尧臣得之襄城柳下老翁所授

天九积阳数玄女夫何为广陵亦健将乃惑一用之彼术信诞漫此遇尤希奇珍重柳下翁仙隐未可知言天以人证言数以理推守正死不避居贞凶可移尧富与尧壽此理始无私顔贫与顔夭此性终无亏姑慎君子术勿与老人期

别李宰

句曲一山县东西俱百里三茅地有灵出宰多才美前有赵与谢今有程与李李为山东望声价高莫比清明一古镜冷浸玉泉里敏哉制锦手洗却鸣琴耳仁心非邀誉直道不容毁慈姁牧细民谦撝揖多士学馆盛文风讲席究经旨有客东北来空斋兀书几弹铗笑冯驩下榻惭孺子乐虽足一瓢饱不望四簋既为邑之氓是亦吾所耻饥饿欲賙之馈斯受已将归重回首决去负知己冉冉楚山云悠悠断江水

留别义塾诸公

婆娑七十翁已矣将焉求麋鹿违本性一朝出林丘故园在何许驾言东南游人才盛吴会讲贯多儒流内顾衰朽质污渠映清沟坐有歌骊驹将贻识者羞溽暑困朱夏偃息时归休南窗小容膝卧对红葵榴年华不我待青镜照白头祇今已後死巨海吹浮沤诸君幸少壮勗学追前修

寄申屠御史【原注时谢御史被诛按申屠御史名致远字大用以至元二十年庚子拜江南行台监察御史】

御史帝耳目监察沿隋唐台阁迴清风笔筒凌秋霜澄清一揽辔驱狸走豺狼贤哉故安侯廉介尤刚方闭门杜私谒上殿肃朝纲今侯有祖风学术尤章章出拥簿书尘入薰书传香曾襟汉石渠人物鲁灵光终然百鸞鹄不及一鸾凰奉国信孜孜问涂何皇皇往岁金陵辙前年古

浙航鸣犊有余哀河水空洋洋行役山川苦归兴桑麻长广陵掘雄胜平山吊凄凉瘦马乏刍
枥寒妾无帛囊家瘠道愈肥躬瘁名逾芳昔在东都季儉佞沉忠良知几独子龙絶迹栖梁碭
瞻乌止谁屋亦复可怜伤

寄录事王君玉【原注时管押北人归乡】

风沙眯行人日脚黄无光愁鸱蹲古木冻鴈拾余粮荒城鸡犬寂古堠荆蒿长瘦马兀冰涂龙
塞天一方今晨发申浦何日抵渔阳道傍转徙氓啼哭势仓黄惰游散不归信美非吾乡锦衣
虽云乐无褐可怜伤南泝江悠悠北视天茫茫远烦公护视雨雪上河梁从事岂独贤简书讵
能忘嗟尔居者逸拥氍坐高堂且置勿复道击筑饮离觞

送周宣差除陕西廉访僉事【原注长安人】

昔人比贵宦綉锦以为衣当昼与夜行故乡归不归每评会稽章不及相州记公今往三秦身
是綉衣使玉衡直而平宝瑟和而清当知九州外生此千人英南人去勿悲西人来勿喜明年
当入覲垂绅佐天子

送陆同知北上二首

浙尾带荒江土与材俱薄吴季独终隐楚黄亦晚错余子不足数眼明见卓落駉駉初历块青
萍新淬锷齿少逾老心事还存远略百金重气义千里赴言诺可期功名会兼受生死托宦途
入幽蓟诗句留殿阁出佐紫阳城一麾真小却炳烛照吏奸良剂痊民瘼一庭秋水净万户春
风乐河内泣留恂并州永思郭归装乍林丘趣骑已沙漠梅花古驿寒别酒故人酌径北道邳
徐迂西趋汴洛宫阙覩盛丽山川想寥廓成臯叹楚战砥柱窥禹凿旧邦吊二虢古邑辨三亳
望诸墓犹存戏马台如昨燕赵夸蛾眉云代珍狐貉壮士多屠沽逸人或岩壑访古记宜勒登
高赋须作订讹青简在得句锦囊着明年衣綉归颇愿闻其略鸿鹄看高翔苕枝伏燕雀赠言
愧非顔出处其志略

淳风日已薄恩义不相维吏无得於民民顾吏有辞政化本不立刀笔事愈卑李侯今之人而
行古所为外有屠嘉直内无五伦私鉏奸如恶草护民犹婴儿瀹河苏彼旱劝粟哺尔饥从容
方报政代者俄及期庸吏推不去良吏去复思谁欵观民风入境采吾诗

送郝仲明代归

古之州县吏久任各称职任久则化行吏与民相得民或不安业咎在吏数易代者如传舍吏
民不相识王嘉朱浮疏每读三太息暨城有贤佐温良而端直为政知大体人方饮其德瓜犹
未及期旌已催行色中州固多士此士去可惜老稚候城隅相邀卧车侧

送叶仲实赴盐官州判

我舟余杭游君马蓟北骤我衣素染尘君衣锦炫昼江湖着闲散郡国需隼茂才高真小试儒腐乃大缪鞭让祖生先策甘之反後

送王安之无锡州判

龙峯隣吾州赤子久失乳或加手斲削谁肯顶摩拊有客来嘉禾谈我读书坞口称王侯贤可配循吏古廉不受私谒公不畏强御素秋下严霜阳春沃膏雨泽国鲈正肥山泉茗尤苦州县徒劳人扬历安足数莫思金带横长学彩衣舞

送宋春卿之官湘陰

乾霜落丹枫潮水清且浅雅志君山高离思湘江晚利名登津要孤介分【原注去声】疎远来暮彼虽嗟去思此难挽何当升台端绣斧烦临遣

送顾伯玉麻阳簿

放州清江闸及此新雨凉故人得邂逅好语倾肺肠惜哉廊庙器漂泊落湖湘前途阻勲业末技呈词章营营百年短浩浩万古长共惜天下宝得志无相忘

送陈茂卿赴兴国教授

彭城陈师道三州一学官高文曾苏敬伟节章赵叹百世有斯人嫡孙承後山君材中梓漆壤错榛与菅藻芹味苦淡辄当粱肉餐莫终三釜养竟堕一穽寒荣枯数前定出处身两难腐鼠或青冥枳棘栖孔鸾升高足易蹶恬处寢亦安逆君散花洲西上卷雪滩臯比第一义子佩正聚观土方从北学音已变南冠俎豆器疑朴诗书味转酸何人力不变此道独追还金谿有陆叟昔仕乾淳间【原注陆曾为兴国教】

送焦君实之采石学官

江水日以远山花日又新先吾不复少後我皆成人之子如良金出矿以精纯又如山中木始遇雪发春送子启长途跋子升华津青云题柱客白髮倚闾亲有志皆腾逸非才独隐沦山林双鬓古井臼一生贫宇宙无穷事行藏各自身因风传短句望月吊词臣

送王行可赴宣城学官

闭关坐十年扣门得一士自言贫为养非谓学优仕执手问何之赠言聊复尔清溪生芹藻流入泮宫水先令我清心次令人洁已【原注太白宣城诗清溪清我心水色异诸水】铸金师范巧琢玉士习美六经悬日月顔孟元不死君欲从之游青灯茅屋底相逢莫相问扰扰鼓篋子

送严陵邵叔忠学录归侍二首

薄官如秋菰冷淡不堪食学宫如传舍敝漏栖不得访君桥水东一榻可容膝中吴多佳士三载谁与适可怜泮林鵷止醉桑黹黑束书归去来钓台秋风夕

黄甲旧书生明廷推一鶚岁莫戢羽翰静听华亭鹤盛衰今昔异出处老少各乃翁信奇士之子亦不恶斥鵷伏卑枝寄声谢寥廓

送华仲实译史入京

苍颉何代人後乃有冰斯智者能创物此理不复疑国朝重文字设官如经师君才实楚产北学尤恢奇冥鸿登翰音威凤呈羽仪青云睨子贵皓首笑吾衰尚白玄空守飞黄势莫追祖行迟出郭东畎正耘耔

送吴仲宝入京

余年长汝父汝季复余从季也难为兄文史日从容兄也实竞爽立身期亢宗可念玉雪子五月上卢龙枣榆曝西日尘土吹炎风尔欲副尔志安得寧尔躬有方游可远扬名孝乃终归来拜嘉庆我酌壽汝翁

送赵季舒之燕

有客东南来白马嘶北风问客将何之举鞭指卢龙云是汉家子出入明光宫古宫今焉在废墟生秋蓬

送道成北游

从游十载前撏角君尚少相逢十载後我鬓雪争曜修鳞纵巨壑倦羽落荒峤盛衰各自异巧拙更相诮义理浩无涯经纶孰知要立身如处女被服善窈窕止令公子慕莫博千金笑

送钱君瑜归嘉禾

海东有孤鹤玉羽青冥间冲风扬黄尘吹落蓉城山蓉城何寥廓山木多高寒石泉翳荒藓饮啄常苦艰矫首复南飞凉秋生羽翰愿随鸿鹄游不共鸡鹜餐嗟尔不羣志全身良独难远避鹰与鸇近防弋与弹仙机纵不误云路终漫漫

送辅若晦南游

天令中和春锦花柳丝织江山回淑气车马有行色问君今何之白发在高堂韞弓箛两矢出

门志四方丈夫信有志游近不堪远锡穴纓冷泉馆娃吊荒畹青青三吴道急雨飘客衣纵无
讥小草恐有遗当归

送袁仲野赴毘陵

儒吏不相得异器如薰莸儒视吏不屑吏嫉儒为仇俗儒不知变譏譏孔与周事丛委不理言
大忤不酬嗟乎铅槧生谢此刀笔流安得经济手一洗吾侪羞当路有达官邻境逢仁侯留情
案牍间举人拔其尤君抱汲古学才识推兼优肯随鸡鹜争会偕鸾鹄游高风动寥廓兹土岂
淹留独怜老知己青灯守荒丘不堪明时用空怀当世忧斯文付後死已矣复焉求

送黄云心游松江

吾宗两才子世乱身不免絕怜华亭鹤竟类东门犬客行因吊古寒日下荒坂并邑今豪雄往
事海涛远

送陈公南之松江并柬山斋

我衰惜别离数日辄作恶老怀自当尔尝恐儿辈觉君器如璠璵似可寘台阁莫辞簿书苦亦
有宦游乐久厌黄田鱼去听华亭鹤亭下有高士滴露草玄学持诗道甫讯进拜复前却问我
今何如痴顽胜如昨

古意二首送朱鹤臯

鴈荡英英云孤凤云中吟风吹五色羽墮此半水林桐花作秋枯野桑空綠沉苦甚不致醉鶡
食予何心凤兮归去来岐山有高岑

蓬首寒机女枉顾生光辉一登君子堂松萝相因依茂陵喜新聘中路忽有违愿垂堂上镜照
妾心中微生死要有托悠悠空是非出门念远道岁晏将安归膏沐更谁容为君叠罗衣

送陈子高

棱棱玉壶冰莹洁絕纖罅无人手自将寘之霜台下海东闻鹤唳清思方在野迟明有公事匆
匆催上马

送吴寬斋并谢惠诗

衰年八十一草露骨垂朽有客款荆扉甘言许吾壽假如活百岁祇欠十有九辛勤抛书册散
诞耽棋酒时时课小诗不自觉妍丑袖中出新句见客惊欲走反顾仍疾读佳处辄肯首呼儿
急传觴晚喜得此友久之来告别秋怀挂衰柳百金无所赠五言聊藉手

送天台陈审中

陈为台望族不数谢与钱此以科甲贵彼以婚姻连吾犹及乃祖执鞭慕先贤乱後识严君握手吾同年事功竟落落世虑日日煎衣冠一不振抱恨埋重泉君如丹凤雏五采何翩翩久客沧江上穷秋思浩然文运今再明六甲一周天老我终白屋看子收青氊浙水东西流北风送南船赤城几日到鴈影夕阳边

送杨伯可

齐鲁多平原江淞田高下戢戢如鱼鳞土籍谁主者富人擅其利失业悯孤寡方今用周礼天官出经野古法虽可行必得奉行杨君古循良暨阳小民社原隰遍咨询辞色每寛假经营始不扰期集乃多暇实惠苏困穷先声走豪霸陇牛闲卧昼邑犬不惊夜当年经行处爱此憩棠舍鸠功首上计列郡居其下倾城出送君饥童控羸马坐中有狂生出位独难咤均为受氓关市不亲稼乡胥上下手轻重意取舍仁公力救弊立法宜少借圣朝天广大焉用究纖罅议政罪甘诛矧避官长骂

送张仲实

持斧上东山伐木鸟羣呼道义不相敦朋友良可无嗟我聚糠粃从君味膏腴方轡蹈先轨联绶趋正涂事功期远致诗翰亦小娱但令交久长不恨别须臾岁律陰峥嵘客程路盘纡人事况寡懽月异时复殊疎梅忆孤屿新柳怀清湖

送师本竹

鲁国几男子陋巷称顔渊簞食何从出赖有负郭田养志本无求求人志可怜蜀翁古奇士束书裹寒氊客来拥氊坐客去挟书眠索供广文饭催送司业钱玉瓶何处酒翠釜谁家烟我乃遭数奇彼胡鍾美偏厄穷不自悯静退犹为贤揖士撤讲席呼儿买归船後游记何日今别已高年感翁出处迹抚几心茫然握手出门去梅雨暗江天

送徐允伯

古有淳寂乡君与陶阮到每评伯伦颂谓胜周公诒山间童负锸台下人拾帽短鞭跨辽碣破毯眠雪窖归来四壁立挟册坐乡校悠悠泮宫水羹有芹可笔案上方醉吟室中已饥告长鉶卧虚檐破釜架空竈翠眉方与齐頰颊忽自悼愁踏布衾裂羞拆海图倒先生乐陶然美睡呼不觉达士多迂拙庸儿竞嘲噪岂知海上鯤姑隐雾中豹岁晚空斋人杖屨辱相好百钱呼儿沽一榻为君扫浩兴忽长歌衰意亦旁噪衔盃孤月落椎壁四邻闇明当远行役寒雨映客棹秋江蒲稗深仁子平安报

徐观伯远将徙海陵介吾侄来索诗徐故家兵後流落三十年长子依许监仓客淮南因赘于

海陵迎二亲就养坡公谓此事今无古或闻者也感叹之余为赋二首

甲与吾同生君子行一周少年各丰裕岁晚怀百忧菜地古城下我今手锄耰君当往海陵絕江泛渔舟驾言彼就养逝将老菟裘哀哉随阳鴈止为稻粱谋君看横江隼万里凌高秋

慈乌昔哺雏日夜望雏长安知风雨横故巢堕草莽乌羽日摧颓雏饥竟何往其一止海隅雌飞鸣相向反哺若天性迎乌致其养我衰髮尽白儿长忽先丧赠君慈乌篇老泪滴纸上

竹友以其季子将有远行丐余一言余与翁游视其季犹侄也为之言以励其志

我生发未燥汝父以诗鸣忧患涉世老襟义犹峥嵘晚乃得二雏美不减徐卿季也才弱冠诗坛将父兵愈湜气如虹候门识奇英下马呼小友相顾各自惊駉駉不受羈历块千里行分台栢森森霜气压百城汝游何所挟两字直而清銳进年倍壮静退事饱更欲令从雅操端肯迂修程远游重垂戒显亲须扬名但酬化鵠志足慰舐犢情

余先世崇德人大父以上数世皆葬青镇与习上人有香火缘己巳岁上人访先子于暨嗣孙信讲师实侍杖屨余儿时侍侧髣髴记其须眉兵火後絕不相闻丙申岁师来自密印问讯丘壠无恙而上人塔松长数十尺矣己巳距丙申二十有八年如隔一世余与师白发相对举似旧话感慨久之师为留数日将行索诗为别师号古民性淳质不茹荤饮酒博极羣书讲说亶亶不倦信而好古方外之逸民也

达士脱名检高人落林丘体性未应殊作用终不侔讲师得三昧宗学贯九流曾对树说法解使石点头劫火焚地水慈云护松楸报恩心种种閱古事悠悠香火三生愿因缘再世游文辞重柳请衣服许韩留殷勤翻短褐博雅愧前修

题质夫竹居

西园一丛竹岁久枝干繁会见鸾凤栖莫厌鸟雀喧玉声寒雨碎翠色朝烟昏萧萧黄素叶风吹拥篱根主人避俗客青苔坐柴门劲节谅无比幽怀不可言

跋徐知事所藏禊帖【原注徐山陰人】

辨才将九十及见开皇初不知虞褚辈得似老僧书尤物世希有昭陵劫灰余玉函人不见茧纸乃蠹鱼梅花一片石犹自宝璠璣定武久荆棘长安复丘墟茂林有陈迹今谁山陰居

题沈华父送行诗卷【原注乙卯九月】

孟阳索吾锦景纯夺吾笔老我叹才尽秀句吐不出东阳有行卷展玩已盈帙乘鴈岂为多买菜复求益嗟君乃佳吏家世本经术一从冠惠文不肯事占?贞廉啮苦蘗和劲调玉瑟簿书谢

嚣尘车马动行色君如击水鷁我似退风鷁出处两忘言黄花秋淅沥

题月心诗卷并记遇仙事云

东轩记待月纵笔说性命岂惟不知月实亦不知性文虽欧苏工理至关洛定人心如明月尘垢失清净雾收海气澄天迥风力劲持我光明珠照此大圆镜镜中双彩鸾翔立请骖乘御宴影娥池神飏忽吹醒鸾飞晓镜空龙睡渊珠静依旧碧潭心无复琼楼兴韩郎固有言仙人未贤圣

题百鴈图

青天一张纸羣鴈飞来远秋渚芦潇潇徘徊下清浅若烹不能鸣一一俱不免

咏风

好风何处来天籁出衆窍披襟怀楚台击筑思高庙扶摇九万里自谓一息到安知大鹏运不满斥鷃笑终当谢蓬蒿振翼絶海峤

夏雨

仲夏井泉溢雨声集虚堂银竹泻高檐静听何浪浪莲叶不受水盘珠走低昂潄润逼衣篝缝我新葛裳媿彼作田人蓑笠排青秧出户懒着屐扫地烧木香白昼生睡思徐徐到羲皇梦觉闻鼓吹草蛙怒方塘竹尾起寒烟湿萤度微光隣翁闭门卧中夕啼苍黄三日絶薪卖积潦势颓墙

秋感

遥夜百感集白露下空庭秋风入草木衆叶会飘零甘液始润物履霜渐陰凝哀哉石榴树?语成添丁兰艾既同焚孰别臭与馨皇天默不语今古常青青

月

青天一片玉上有衆星列夜中光渐小让此玻璃月白兔卯时生桂子秋後结天上有山河两界隔吴越何当御嫦娥万里驾飞轍太白为前驱彩鸾相继发

徐德文索雪冈诗云已得而复失余寻旧藁亦无见想滕六遣六丁取之去矣再赋一首

雪飞不择地因高势易积玉龙二百丈横卧前山脊随香去寻梅路白无行迹铁笛吹一声惊裂苍崖石

新移瑞香不得雨有叹

瑞香儿女花艳洁而芳妍得之古精庐移置列槛前易地费人力不出花自然深虑本先拔枝叶随之颠是时夏久旱不雨龟坼田林木且忧枯弱植岂自全既已厄於人况复遭此天天与人讎之命也花自怜井筒灌朝夕小润培芳年封植岂无心荣枯自有缘何时回春风笑挽司花僊携手共樽酒醉卧云锦边

生意堂赋玉簪花得相字【原注时陈无逸将之官攸州】

娟娟秋兰花绿叶何披猖沙鹭明玉羽冰蚕吐丝肠倩盼宜素绚追琢少金相居然铁石心爱此风露香何当竞春华亦复委朝霜折花三太息援笔临清觞明年花好在坐客忘潇湘

老桂古字韵

人受气之精百岁惊风雨少壮会有衰神散无复聚木受气之偏生旺寄於土枝干老更奇花叶落仍吐君看山中桂秋露滴金乳种者是何人赏者经几主天香入酒冽吸月空怀古素娥笑白发对影独起舞

咏松

老松如枯骸短松覆儿髮城中薪价高斤斧不时伐难长虬龙姿免藏虎豹穴樵童出山暮步担挑新月

泗滨石

荆山石有玉楚国无人知再献犹弗售抱璞空自悲他日遇良工乃始称其奇宝传数百载邯郸又得之秦人请城易赵氏以为疑不予宁负曲予之恐见欺相如奉使往持璧指瑕疵冲冠遽如许睨柱欲何为衣褐已归赵汤镬安足辞奇哉古若人掩卷空嗟咨是非定百世成败止一时天生此尤物前後成祸基有美当韞匱街鬻诚非宜和氏不待价刖足将尤谁人才国轻重璧岂系安危相如真暴虎虽死悔莫追二子有遗憾仲尼真吾师泗滨一片石不染自成缁上有华林字疑是故物遗春官雅好古传载烦文移主人不敢惜持贡白玉墀埋光经几年不与赏音期无意博连城得失轻毫厘二事拟非伦聊以资吾诗

车

舟止奔牛堰始识丹阳车规制殊草草力不任驰驱淮安距宿迁代之牛与驴轩盖乃差大双轮夹一輿軹衡輶輶軫名物与古殊梓人不知经多以方言拘输载亦稍丰日行百里余御者非王良隍机不安车蒲轮召申公养老宜徐徐干禄以为荣愧我非纯儒小儿问金根其制复焉如輿服汉最详具载班范书慎勿似韩昶问学当勤渠

挽赵益之

汝父昔吾友汝翁昔我师汝时侍亲侧楚楚玉雪儿稍长从吾游学问乃大奇风木不待养垣室空遗基成立汝有望修短吾莫推四世积善心一门无靡眉俯仰三十载三丧路人悲受气各有终劳生嗟奚为墙东荷鋤叟夙受汝翁知老怀念畴昔不觉哀涕垂欲志殿中墓健笔惭退之

挽邓友梅

箫鼓何阗阗西风吊客船主人辞华屋輶车落荒阡芙蓉一片石千古怀人贤唤醒梅花魂荐之秋菊泉

卷十六

钦定四库全书

墙东类稿卷十六 元 陆文圭 撰七言古诗

北入穆陵关皆山石崩沙北风尘起行人良苦因作

大风北来沙触面行人咫尺不相见寒日无光天地晦一似项刘睢水战四山确犖路摧车礧
壑涓流长一线土檐烟突两三家鬼貌鹄形何物变葛卢牛语谁能别公冶禽言难复辨古磁
浊酒时招饮破瓮酸虀聊自荐吾闻临菑称钜丽十二山河据形便姑尤聊掇旧提封夷吾小
白初营建三归反玷侈国中九合衣裳出幽鄆孟姜洵美共翱翔稷下羣游逞雄辩盛衰气脉
不可测往来今古更相禅干戈流徙人物换水火崩腾陵谷转会使雍门重感慨无复苏秦昔
夸美山东负海犹如此六合茫茫难覩遍安得长劒倚白云手扶狂飈清九县

出镇口止见小峯

镇东小峯独无侣中峯徐来顾其弟大峯偃蹇背面去似嫌俗客不与语无奈我行节节高山
欲藏身恐无所

访何庵观水陆功德

山收雨脚云气湿葛藤刺屨穿径入精庐桃李花漫山磬钟声绕落花间野僧净设伊蒲供译
说西方如说梦我方谈笑耳不闻寒窗暮对西山云

即事

南窗陰陰日色薄北窗烈烈风声恶破衲蒙头睡正浓地炉煮饼铛折脚小奴惊叫老婢嗔我
愧口腹烦他人豪家香合暖生春人乳蒸豚蜡代薪

壬辰六月旦日记异

六月朔旦昧爽天我梦蝴蝶飞翻翻一声惊觉不可执铿然有物堕我前陰风萧萧榻震动褰
帷一咤声寂然向空抹漆无所覩堂上呼灯人自眠一生学道心勿动养气未敢轻先贤元忠
昔日鬼移床厅庑之下凡三迁稚圭卧内见匕首金带忽置城头边二公名德余不及鬼贼擲
揄空自怜神奸无复照金鼎偷儿何暇哀青氍二端是否吁莫辨一夕仓卒嗟何缘吟哦未断
纸窗白山寺风雨鸣钟悬起来搔首空四壁湿薪竈婢愁炊烟

庚子七月书事

今年低洼水生鱼去年高亢旱坼龟陰阳似属天公事庙堂可是无臯夔劝分纳粟令如火老稚依然鹄形饿嗟汝命薄独可怜穹官巨室无凶年

腊月二十九日作

夜淅淅尘冥冥大车道上檻檻声三十余里天未明一轩一輶不得宁倚坐兀兀摇心旌天寒岁暮霜雪零嗟哉客子谁汝令

和曹士开侍御见寄韵【按曹士开名伯起至元中以潘昂霄王侯交荐拜西台御史】

南台御史忠贯日当昼妖狐屏无迹端方自是廊庙器错落天球间宏璧记曾缓带理江城犹忆尊前坐谈客春树相思白日晚月梁入梦青灯夕乘车戴笠高与下倚楼看镜今非昔壮心无复夜闻鸡莫比司空须恨赤

壽王君明

去年中秋月色高吴山痛饮推文豪今年依旧故乡月纷纷青紫夸儿曹世间儿曹何足数芙蓉仙人在江浦握荃怀瑾遗世纷黄卷日与圣贤伍曾攀月桂臼边枝素娥夜半睡不知觉来薄怒頰自持与仙重约三秋期一朝功成九霄去小黠肯顾偷桃儿城东白发龙鍾叟瓣香来祝仙人壽长生辟谷未要学千载与君期不朽察罕布哈忠翊父歿王事母表门闾本官弃职侍养守制三年一门节孝人所难能作诗美之

王气初不限中华至性未尝根六籍门闾节行世所钦父子忠孝天应惜连环解玉理坚致老蚌剖珠光的砾伯也执殳万人敌血染征衣归不得空留明镜照孤鸾妾顏如花心如石鬢云渐变蚕丝白蓬首何曾御脂泽北堂手植忘忧草幸有斑衣可娱老不须遣使寄当归儿无远志归来早事亲日短当爱日祗今三年已素韞宰予衣锦殊未安温峤絕裾非小失

雅宜山在城西五十里有德庆庵在其下穹窿山福顺寺长老绍尧翁作诗取以雅宜为号求诗

雅宜山低一拳石气压华嵩千丈碧不论城市与林丘爱山例是诗人癖寒泉修竹苍崖底青山解与高人语花落猿吟总是机举似山僧尽成句山僧来献诗人号百种不如山色好德庆禅床明月夜馆娃人海红尘晓我知山心雅好静萃确不容车马造草堂宜雨又宜晴藜杖芒鞋时一到

赠道人周大方【原注双凤人】

道家者流双凤仙迂访墙东老田叟叟读儒书五十年一事不成今白首道人过门何所求期将汗漫东北游青蛇三尺风雷吼玄鹤一声天地秋吏商奔走日百里区区嗜利与名耳道眼

视之海中沔炎夏长途何必尔吾师之师柱下史紫气曾惊关尹喜当时剩却五千言焉用老人诗一纸

赠潘道士祈雨

人天相距尺有咫雷电六丁遶吾指药师马上寄小瓢夜半一滴洒千里古湫源竭老蛟泣新秧秀濯田畯喜匣收宝剑卷陰符师归宴坐茅峯里

赠郑元明术士自言安晚之孙故诗及之【原注郑安晚初为教授谒襄帅赵方一见即以宰相期之且以二子为托端平初郑果大拜范与葵皆擢大阍】

梁灝八十有二岁自从天福逮雍熙中更乾德五星聚晚赐龙头拜玉墀吾今之年灝相若布衣落拓何能为吟诗独与熊儿和作赋那求狗监知龙鍾久纳少年侮耿介尤为谄子嗤吾闻长沙赵彦仁豫知郑相秉化钧从容杯酒托二子端嘉之际俱名臣是时宋德已衰谢扶颠江左尚有人安晚之孙今为庶嗟我与子俱遭迍不须谀我有许壽且道何时脱子贫清和四月天气新共买一醉抛青春穷通壽夭俱莫问盖世英雄一窖尘草间惟有石麒麟

赠张明德星士

二曜五纬万古悬甘石之学今不传术家能以天占人圣人乃以人占天仁义礼智性所具吉凶祸福命使然命天俵赋定不易性我受用修则全经文二百有五字明德乃在新民先君从何处讲此学直遡建洛窥先贤工夫潜深秋日静本真莹静霜月圆市声初散帘欲下龟策未收客下马一人妄计秩崇庠一人猥筭资高下纵横二位布逆顺错落五行分制化先生拊掌笑且荅二客相看面如赭徐言至善同一初非愚不足智有余万物不齐气杂揉是心本明如太虚不须詹尹就决疑客如不信问子輿

壬申冬晦叔译史归别小诗奉饯

苍颉制字传羲皇鬼神夜哭殊仓黄语言声律未易下嗟君楚产学北方又能经术饰吏事笔墨岂足尽所长邮亭一夕饮离觞他年富贵勿相忘天无烈风海波静白雉九译贡越裳盛时努力早出仕成诵姬旦坐明堂

从圣国珞二茂才叙别

龙门世家史学祖足涉淮湘到邹鲁儿生堕地弧在左妇闭车中为谁苦二君鴈荡游虎林逆旅一笑论古心地炉画灰事未竟推窗看天雪意深山寒约共梅花语江水东流予北去明年春风上石渠道傍为我吊望诸留别山村乐闲菊存爱山梅村并寄景初慎与国华

南来飞雪如柳花北归柳花如飞雪乾坤偪仄困羈旅江山苍莽惊岁月白云冉冉千里外滴

尽春林子规血故人回首乱峯青古堠斜阳照离别

送马伯亨西省郎中

惊吾学问非少年美君功业当壮年曾闻鸡声共起舞老我输君独着鞭腊寒枯柳不堪折欲别未别心茫然关塞黑风虎方啸江湖白浪龙正眠洪都西统数千里俊义如林足驱使好将旧榻拂尘埃佳客可能无孺子

送干壽道同知北上

甲寅诏下兴贤才吴中多士轰春雷门外鹄袍那可数一人独上黄金台宦途诘曲容不得直向东海窥蓬莱蓬莱水濶云气浮眼看健翮摩天游故乡六载不归去老尽西风菊径秋归来四壁亦不恶人美锦衣君不觉馆娃茂苑正凄凉古汴黄河复漂泊问乡安在迟一见承恩内直金华殿从容薇阁演丝纶花间应隔同年面自恨山中老樗栎拥肿不堪逢匠石枯梢无复起春风一生空负吹嘘力

送祝君晟之官昌化

九里河梁昔携手酒酣共折城南柳春风六载忽吹过浮云万事无不有余生闭户忍寒饿薄宦随方困奔走径从莲幙换青衫犹胜兔园嘲白首我床昨夜破却瓮君印何时大如斗肯将车服耀故人未觉来往烦佳友从今出处可忘言柳边重饮城南酒

送经之偕义斋两舍人入燕并呈善之待制

君马三渡白沟河沟水东流青草多踞鞍顾盼聊试耳伏枥悲歌奈老何古人千金重然诺把臂况受生死托肯先申白独辞楚且伴机云双入洛道远始知离别苦地僻应思宦游乐荣名日久当日厌浮生花开又花落平世应无战国材选贤何日到金台寄声玉堂老仙伯桂树秋风归去来

送节之衡之两舍人入燕

龙驹凤雏两陆子并驾秋风鞭騄駼老眼一见失惊喜定知乃翁元不死生子真足慰人心景升诸儿豚犬耳满朝誉翁不容口世禄固应传不朽为官岂计多得钱取印终须大如斗我是韩家十八郎里中曾拜北平王碧梧停鹄已飞去玉雪娟娟今在傍往事伤怀泪如水矻矻穷年吾老矣欲追霞佩小颔颇手倦束书携不起

送杨起之安丰録判

芍陂茫茫古边城鸡犬相闻今乐土交兵往事空流水避乱居民尚遗堵似闻此地岁丰穰要

得清官手摩拊君才天马足神骏老大去年参选部闽中实历裨风宪淮右先声动官府争看
祖道车骑衆力疾登途霜月苦墙东故人懒出门浊酒黄花对谁舞

送黄子高常熟教授

儒科一废四十年甲寅诏下初兴贤鸡窗夜半同起舞竟让祖生先着鞭去乘驂駟首燕路归
骑赤鲤游琴川川中疑有古文学子游故里今依然采芹思乐弦且歌官况虽清奈冷何省台
衮衮岂足美燕雀喧啾入网罗残春积雨困花柳天气昏昏如中酒怕逢北客问新事更恨东
人夺佳友暮年离别意鲜懽追思得失空长叹诗成写寄掩关卧梦逐飞絮黏征鞍【原注时
宰辅多被诛】

奉饒子华教授北上时癸酉三月

清明上巳三月中一春天气少冲融曈曈初日翳复吐黄尘涨起西北风有客束书挟两童南
来两马一马骢举鞭萧萧易水东博徒劒客时相逢怪君体弱心甚雄声名壮健惊老翁元英
磨室渺无踪黄金谁为隗筑宫茫茫宇宙今古同天时人事安有终江柳自緑山花红

送吏员迁调松江

吏员务选才具良不问他邦与吾乡珠金出产已足贵兰桂移根亦自香诸君此行良不恶居
家何如宦游乐季鹰曾忆松江鲈士龙空叹华亭鹤昔人还乡苦不早今人离乡涉远道渔舟
泛泽青茫茫客衣吹霜白皛皛朱萇结构井邑富画戟清闲官府好纷纷刀笔心自厌落落功
名身未老要看入海运大鹏不恨出山成小草

送吴子长入京

乙亥江城守宵遁连营锦帐排锋刃丁男释耒儿女啼朱门一夕黄金尽我时拥卒护乡井紵
袍白马君来省石床试劒人血腥地炉传酒牛炙冷手挥谈麈看落月平明索饭出门别虎林
山头却寄书一字不问家何如乾坤风雨旦复旦家家昇平吃饱饭君才笕库久繁剧我老诗
书更忧患肯将出处问猿鹤自觉高低笑鹏鷃浩荡炎风扇区野斜日征鞍古榆下功名不复
念远道富贵自觉顔色好俯仰畴昔予何言梅雨敲窗湿诗草

送罗秋崖

宰相昔起富春山门生四海皆达官賤书争宝朶云样题诗便隔纱笼看知君相与有瓜葛絶
口不道人所难何不跨鳌上金銮胡为采芹坐江干羣鶡飞来争野樵三鱸不足供朝餐人生
荣悴何足叹海水会使桑田乾当轩下马昔日盛闭门罗雀今朝闲羣儿瑟缩手不热先生落
魄羶犹寒范阳城南丹旄归何人送者车班班羊昙独洒西州泪孟尝空感雍门弹老树春残
蝴蝶去沧江岁晚白鸥还北风吹雪被长峦诗囊酒榼随征鞍请君读诗饮美酒归日谢客牢

闭关世间万事不须问西湖柳色差可观

送吴君远

暨阳幕职无他奇置薤一本水一盂钟鸣张烛起署事坐看日落庭西隅鴈行钳纸走却立高悬明镜分丝铢长官堂上口啸诺时时隔舍闻歌呼荒村人闲花自落圆扉昼静草欲芜褰帷使者上治状为出清冰置玉壶小儿踉蹌老翁怒细问代者如君无楚苔渍雨古驿寒酒酣写出阳关图君行上马慎勿驱梅水绿涨南兴湖

送黄子高如泰州谒朱南伯

采采江篱步石磻东望海堤青不断故人泮上谁饮酒尺素不来鱼尾短黄子卓犖文更奇命驾千里赴相思长江鳬鴈不足数旷野虎兕将何之景德寺前读书合彦国九原不可作寄声故人加餐食昨夜秋风淮水恶

送张子野

江淮落南俯闽峤山水相背风马牛间关草就北征赋日暮弹铗君何求袖中潺刺通姓名犹及庆历思中州子京永叔老交友白首莺燕陪风流今无花月听水调但见满目森戈矛长歌送君万里游天荒地老令人愁

送徐舜辑【原注父果斋出入信庵中斋之门】

彦霖父子魏公客持国之兄招不得豪华落尽漳水流主人眠石扁醉白天倾地坼古今愁浣花穷杀老参谋窗寒雪压灯昏夜门静虫吟叶落秋平生故人渺江浦谁往省之遣宗武惜哉赤白两洪崖敢道交情弃如土回舟苹浦思依依空忆桃花鲚鱸肥竹西骑鹤不可去西州万里将安归南山之阳木已老南山之阴木尤槁不信春风吹不苏珍重岁寒宜自保

送仲华葛兄

蓉城诸葛何绵绵一门青紫三百年闻孙流落湘江上手握美瑾怀香荃夜行衣綉岂足荣归梦晶晶经山川君家元有紫荆树一枝两枝枯或妍当暑归来憩其下俛仰陈迹心茫然墙东野人头雪白乃翁坐上琴书客凤毛一见眼双明豚犬吾儿空自责追思老少各时异坐阅兴衰疑世隔江湖来往慎风波他年重会铜駝陌

送北禅释天泉长老入燕

金身梦觉白马东西来禅教各一宗讲师高据狮子座缁素羣集惊盲聋天华咫尺飞坠地夜烛神光满室红远师道林嗣宗风专谈义学离禅锋三叶五性总超诣一枝擘与天泉翁不泥

筌蹄求解脱不执文字迷本空黄梅四月上卢龙骑驴不下莫相逢徐州麦饭足可饱青州布衫谁与缝卢沟桥边石头滑飞锡径入明光宫手挥玉麈天顏喜身被红绡帝渥浓回头却笑虎丘石夜半不忆寒山钟君不见懒残昔住衡山峯使者召之终不从天寒垂涕石窟中

己卯题吴江长桥二首旧有一桥亭曰垂虹兵乱毁之复创两桥亭相对

瓜步投鞭湿马尾吴江犹是衣带水阳侯不敢驾风涛神劍自断长虹死木罌夜半飞渡军缚筏驱丁命如蚁波心两龙忽跳出一声金鼓波神泣兴废相望五六载斜阳独倚栏干立酒醒波神叫不膺劍鏃冷浸秋蒲碧江头朱栏四千尺一望初疑几十里左约江流右截湖桥东出日桥西雨渔歌答响远相失羣鴈旅泊迷葭苇荒村独木横野渡深厉才能湿衣履乘輿足受两三人犹当杠梁涉溱洧书生眼力小如瓮一覩巨丽心惊喜吁嗟人力不可到母乃神功役山鬼忆昔燕兵下江浙马逸风驤卷滩尾长驱水陆一时进钱塘破竹从风靡川流衰竭王气尽成败反复固其理汴师平南将彬美南人死恨樊若水采石浮桥一夕成晓出降幡人姓李【原注事见长编若水名若冰又改名知古】

宁晋李照磨筑室奉亲名曰芝室索客赋之

口诵严君口授书手提慈姥手缝衣寸草安能报春晖远志不敢回当归嗟儿客宦游有方舅姑晨兴妇在旁手供鲑菜哺下堂几席代汝亲扶将白云英英赵州山玉琴石榻窗户闲上池饮罢燕坐闲生香满室光照顏鍾英毓秀自乃翁草木臭味将母同借锄取簪面发红偕饮甘露薰祥风

寄题俞氏草堂

浣花老人溪上住野梅官柳桥西路碧鸡坊外少人行晓带春星自来去荒基薜合无寻处峡川万古流诗句紫芝之孙居澄江琼茅结宇青竹窗南牆夜深塔铃语古寺白鹤飞来双索我新吟写君趣开卷悠然起幽思我尝十年卜山居经营未有灋西地风流纵似老参谋资给应无贤録事愿君分借半间云胜日当携茶具至

题南夫四时佳致园亭

桐川博士老文学出处乃在可否间舍东支径劣百步牆北危亭俯两山风花辞枝黏草碧雨竹卸箨连苔斑林臯红叶白鴈早江国琼英翠羽寒一年天与四时景百岁人无半日闲扰扰鸣钟戒晨起昏昏秉烛愁夜阑蜉蝣生死寄黄壤乌兔飞走凋朱顏主人自得静中趣物理常於动处观从容琴书寓真乐邂逅樽前追清欢良时佳友不易得恶客未至门先关

题立斋不碍云山亭

英英山中云苍苍云外山云山偃蹇若高士不傍贵人门户间藕堂老人家四壁诗句曾参浣

花客一亭半落平畴外拾尽乾坤眼犹窄樵歌断处起寒青鸟影明边际空碧玉鸾不入巫阳梦满榻凝尘室生白昨宵础润卜雨来岸巾栏角小徘徊忽然一片黑模糊失却万丈青崔嵬有风飒然起林薄如觉天日徐徐开推窗看山色如故断云飘零不知处

书范石湖白髭行後

渡江莫盛乾淳间虞范诸贤鬓未斑功名草草负遗恨老死不见巩洛山我近经行石湖路范家水名王家墓风流一代竟渐尽手泽何人为珍护直当慷慨论兴亡奚暇悲歌叹衰暮

题程子充少监家藏二诗遗墨前一诗程御史临终遗其子端甫诗也後一诗元遗山女初适端甫时送别诗也端甫子充之父元氏子充之母翰苑诸公题述遍矣

教子惟欲谄嫁女惟欲官床屏触头乃翁怒文书衔袖媒姥谩痴人一笑可絶倒古训相传良独难大夫有愧程监察上谷敢望元遗山易箴微言尚典刑出门别语重丁宁子无橐装与宝劔女无綉褥与金屏各赠骊珠五十六藏在肺腑为深铭梓乔俯仰俱莫及冰玉清润尤相形水衡使者直而温遗山宅相监察孙褆身务学承先志范世传家示格言正大去今八十年流风遗俗犹有存谁能题诗墓栢下使两仙翁起九原

甲申春张菊存游洞霄诸公餞诗盈轴越明年余过故都补行卷之末

春申下邑荒江滨有眼不识钱塘春竭来南北两高峯乍见西施真美人晓粧浓淡看不足誓结鹑衣老湖曲安知湖曲有高人如此仙姿尚嫌俗别寻大涤登天柱气压羣峯三十六归来书牕风雨夕潜听三竺山灵哭睠言玉局老飞仙摩娑铜狄今几年神蛟飞鼠亦何有金堂玉室空茫然天风吹醒丹泉酒碧桃津远人回首石上禽余搗药声絶怜无诀授长生今年却被山灵笑依旧湖堤拾芳草

题金陵海月潮卷

太陰朔望有盈亏海外随之互消长夜半秦淮涌月来一轮却挂鍾山上山中那得有潮音尊师鼻息如雷响题尹存庵行卷尹居贾門下链金败後流落海南依陈文二公寓庐陵中齐须溪赠之记铭甚善复回杭州道过索诗

钱塘筑坞高於郿黄金铸成九鼎移木棉羈魂招不得方士入海从安期庐陵二老当时在翰墨光芒透纸背尔後空闻化鹤归我今欲见啼?拜长安市上重经过逢人问是伯休那劝君且寻遂初赋人家国事竟如何

题分宜谢草庐行卷

袁曹官渡争雌雄荆州侨寄大耳翁涕流髀肉消不尽试与元直游隆中隆中自有躬耕者布

衣抱膝茅檐下从容一曲梁甫吟不觉将军三枉驾室中屏人才数语跨荆包益成鼎峙南阳
陌上龙出云永安宫中鱼得水古今成败真邮传英杰千年不一见识拔端由品藻公位置无
嫌草茅贱山中谢客江烟昏谁携行卷到柴门手披康乐草庐赋知是兰庭佳子孙春塘柳禽
成昨梦炎兴相业更谁论洞庭三江风浪奔鲸鱼出没相吐吞何为四方归来些山堂鹤怨能
移文

题张南山庆九十诗卷【原注丙寅六月余年七十五矣】

翁今百岁少十年我少公年二十五天与翁龄百二十我已化作原头土延年?得饮食乐损壽
多应作诗苦梅开悦获登公堂一醉犹能戴花舞儿孙拍手向我语公漆点须贝齐齿降原陟
巘步如飞饱饭何曾饮人乳梦中犹记前朝事二老相逢必欢喜

题王复初所藏子昂临禊帖

昭陵玉函出人间开平经今四百年永和远距贞观先俛仰陈迹俱可怜古人学书如学仙笔
锋谁入玄之玄水晶宫里佳公子风流翰墨皆天然我评逸少非真逸史载深谋并絶识独留
茧纸博千金似是艺成能掩德名士由来夔逼真书空咄咄彼何人遗才流落稽山下修竹娟
娟万古春

题登瀛图

世传阎公学士图意象旷雅难形模山僧临本持索句展卷复掩空长吁秦王功高塞宇宙搜
揽豪隽供驰驱内怀矛甲伺同气外示闲暇耽文儒临城开馆构杰阁坐见瀛海移西都分番
夕宿无厌倦珍膳日给何丰腴天光下照天策府煌煌星象经天衢房乔夜半进危计平明一
矢惊临湖羣贤崛起辅贞观亦有淹滞如顔苏惜哉燕翼谋未善祥麟接武容妖狐殿阶置笏
怒未解田舍收麦言何谏策名书府真有膺空与老姥扶天枢贵人一代骨已朽史笔千载心
犹诛阎公絶艺今亦无长安落日明榛芜

跋明皇贵妃并马图

声残玉笛梨花月笑指骊泉浴香雪宣来天驷玉花骢醉傲金勒摇东风阿环并辔微相顾一
点芳心倩莺诉五溪老奴侍鞍侧招摇先入华清路行幸东西春复秋那知忧乐两相酬朝元
警蹕犹清道胡马长嘶出蓟幽猿声霜冷巴山晓锦袜遗香清渺渺南内凄凉稀进御海云空
濶蓬萊小泪湿花容春雨余纵有丹青画不如跋赵太祖与韩王蹴鞠太宗石守信楚昭辅党
进环而观之

紫微垣近一小星作戏敢与太阳敌诸将旁观信雄武不逃书记收兵策开封府尹真天人受
譖朱崖疑老臣幸自宫中启金匱忍使涪陵竟陨身

题万户府瑞麦图

河中之野木连理文人作颂何所美鲤湖之水莲双葩史臣纪异不足夸木叶饥来岂堪食莲花远观空有色由来上瑞是丰年芙蓉池外麦连天一茎三穗攢秀颖好事军中万口传闾武堂成政多暇刀劒不如牛犊价老农噉饭看昇平奇祥异产从天下香饵先收夏陇云雪匙可卜秋田稼絶怜西蜀杜参谋困饥空怀当世忧崆峒麦熟无人获且问王师休未休

题刘晦卿月楼图并饯秋闱之行仍不犯月楼字

君不见刘越石晋阳铁骑围城急一声长啸震山谷抛弓散走羣儿泣又不见庾元规武昌僚佐相追随坐据胡床夜笑语不知宾主竟为谁枕戈待旦成何事终让着鞭先士稚况复西风尘污人茂宏举扇思还第嗟嗟二子逢世乱误长清谈空致患争如今夕倚阑人一生饱吃升平饭百城桴鼓夜不鸣万里山川秋愈明黄鹤孤飞白鸥睡卷帘露气下三更初听笛声何激烈再听书声更清越素娥密约无人知今秋丹桂来先折

题金君泽家山飞云图

吴姿楚态谁使然白石齿齿山娟娟孤云欲断不断处中有万斛潇湘烟黄榆日晚长洲路木叶山头几风雨一声寒鴈江南书萱草灵椿解相语解相语君应知山风猎猎游子衣毕逋有待何当归

应昌路驿傍有古松一千生十八枝为斧所伤江西胡生图以示州长官命余作诗

卢龙迤北道应昌八月飞雪六月霜陰风萧飒百草僵牛羊陇坂狐兔冈破邮古庙人鬼静傍植巨木百尺强孤根绵绵蛰幽土枝干直上凌穹苍何年堂堂十八公会朝侍立冠剑长中有二公能死节张许崛强存睢阳余生幸或逃斤斧远地何由选栋梁西江行客苦好事一见携之袖里藏摩挲老眼识奇怪兴作万里神苍茫寒斋无复丁生梦腹内惟闻葵藿香

唐人洗马图

君不见雀鼠谷抵介休壁马甲不解王不食又不见泰山马色别为羣东封望之如锦云英雄角力多相值嬖幸承恩思自媚不辞汗血千里劳驱死尘沙那得避何如落日清水湾骅骝独步春草闲圉人袒肩没两踝控辔欲上未上间静观物理坐叹息玉花惨淡何人笔少陵野老最善评弟子曾入将军室

跋牧马图

平原浅陂水草甘美枯梢吹风日落尘起物色祁连山前路又似踰关渡陇水一人解鞍枕欲睡一人褶袴手仰指一人持辔却回头万马攢蹄行复止饮者啮者各自然驰者忽在立者前

驹而幼者随壮者浴者出没晴波川风騷雪尾不受鞭并驱逐者如争先须臾两骑独殿後戎笠持兵相格鬪老羝挟乳自成羣牧羝人远傍无救何人丹青手摸写?礪胷中有全马陆子作诗配駟野千古传流好事者

栽桑

细听邻妇低眉说年年育蚕苦无叶山童执筐入市卖一称百钱犹未愜更兼春雨土窗寒忍见蚕饥头戢戢买丝织绢输官外空借隣机闲一月阿姑卒岁无繻袴小儿露髀风吹裂今时县官清且明课民务本令必行担桑赧肩荷锄去青青布种环郊城明年家养一百箔巷响繰车棟花落满笼新丝白雪香听赛蚕官鼓声乐

赋烧笋竹字韵

先生朝盘厌苜蓿笋味得全差胜肉苍头扫地犀角出赤焰腾烟龙尾秃土膏渐竭外欲枯火候微温酒已熟拨灰可惜衣残锦解箨犹怜肤跃玉青青无日长儿孙草草为人供口腹卢家丞相蒸葫芦石家无人煮豆粥去毛留顶有何好捣韭作齏空自速不如野人工食淡自办行厨入修竹句里曾参玉版禅胷中会着簣簞谷主人不问不须嗔昨夜西风响林屋

竹鹤窥碁雪字韵

秦马投鞭江可竭别墅从容谋已决兰堦小儿呼与碁敌手不觉平时劣青冈鹤唳走先声捷书上床屐齿拆局中胜负俄今古身後功名谩豪杰何如山中静相对风度幽篁韵清絶林深有客遇神机柯烂无人传妙诀白头老姥独解事化作仙禽欲饶舌石枰落子忽惊飞五月骊山啄残雪

卷十七

<集部,别集类,金至元,墙东类稿>

钦定四库全书

墙东类稿卷十七 元 陆文圭 撰五言律诗

四月八日偕张菊村邓匪石洪乐闲游城西诸寺以山高水长分韵得长字

门外青山寺西行半里强
童分泉茗洁僧供饭蔬香
地僻红尘静心闲白日长
少年余气习棋酒愧疎狂

春雨叹

山城春强半雨脚乱如麻
润麦还伤麦催花又落花
闲来忧岁事老去惜年华
卧听空檐滴应无梦到家

骤雨

绦帐虚堂设檐牙雨骤倾
已过惊蛰日未听候虫声
向晚飞蚊出偏工傍耳鸣
山灵戏穷士邀喝夜相迎

立冬

旱久何当雨秋深渐入冬
黄花犹带露红叶已随风
边思吹寒角村歌相晚春
篱门日高卧衰懒愧无功

夏港道中

微暖背曝日轻寒面受风
人行官路侧鹄起野田中
细草陈根绿疎林病叶红
故人云水隔来往愧衰翁

高邮宝应道中

长淮昔战争废地少人耕
野壁三家市官亭十里程
田夫时识字水鸟不知名
薄暮宿何处孤云又一城

客中度岁

历遍青徐路东风送入京车中守残岁道上拜新正椒酒今谁献桃符旧未更故园梅正发不见玉峥嵘

喜雨上理同知

苍苍虽莫测诚意尽能回履草穿云去炉香带雨来神龙如有喜旱魃不成灾四野车声歇懽声却似雷

贻王容溪

劲竹持高节余花表晚香一瓢顔子巷六籍郑公乡後学师珪行先天发宝藏空携经世具独立暮山苍

和宋春卿寄诗韵二首

练江诗酒社聚散十年春君作并州客身为绦县人一牛甘送老五马未全贫出处嗟殊异相思意却真壮游不知倦老境怕逢春自分无知己何堪从避人飞花空有恨巢燕不嫌贫独忆延陵客风流似季真

和谊斋惠诗

鴽室徒劳甚鸠居柰拙何田园空岁晚梅柳得春多径合思除蔓墉高许附萝呼儿净扫地恐有故人过

和心困雷雨地震诗

天公恶作剧翻手变炎凉海运三山动江高数尺强震雷惊失七漏雨苦移床不虑填沟壑真成老更狂

奉和子华秋怀四首

九日秋怀恶那禁暑气隆苦吟愁作祟多病药无功有客来相访扃门弗为通怕谈当世事遗惠及孩童况值艰难日那当老病身後生欺旧辈俗吏笑高人易扫张超雾难清庾亮尘盐梅正相得鼎鼐盍调新痛饮消愁酒愁城未肯降陰风吹北户斜日上西牕艰食悬禾亩苛征及苇江何曾入官府深愧鹿门龐得志瘠民瘼何期与愿违青灯疎简册黄土污征衣道路嗟于役山川赋式微秋风动鲈兴应不践危机

和唐人闲字韵诗卷

鼎鼎百年内何由一日闲冲冠无怒髮揽镜已苍顔未易桴浮海应难屐上山春逢甲子雨愁听溜潺潺

赠游士艾介翁

三江怀故国七泽吊孤臣有客诗招隐何心赋问钧明时无弃士晚节少全人游子归何日农工已及春丁酉春识庆上人于钱塘邓君善之索余同赋孝僧诗余请以二十字尽记其实既成善之喜而书之不知何人持去後二年上人访余江上复书以遗之

襁褓已离乳干戈复异居关河行欲尽母子遂如初卓行先贤传前缘释氏书悲欢知己极讚咏欲何如

赠潘道士祈雨

日者旱太甚天乎祷有诸震雷惊破柱骤雨喜随车精意通无间神功敛不居鲁侯明德颂好接有年书

送刘青壁湖北道按察

飘然南去客使者趣扬舲白帝秋云滑黄牛暮雨腥寻诗行楚甸问酒宿巴汀北道人多朴无词到讼庭

送班同知

专城镇西土世禄食南方纨袴洗余习簪纓袭旧芳高风仰乔木遗爱指甘棠他日循良传应留姓字香

送杨伯可赴省

秋水芙蓉幙时闻啸诺歌簿书精力尽台省故人多别酒禁愁得交情柰久何怀君四德备廉正复谦和

丙申岁侯仲達之官洪泽

淮楚俗轻扬萧萧古战塲残兵空壁垒旷野失农桑鱼蟹西风市菰蒲浅水塘君山足诗景何事访渔郎

送王县尹之官湘潭

江亭重执手雪压暮潮平台阁踰三载弦歌又一城遗乡因楚俗令尹似湘清别驾余知己分
廷托寄声

送郭仁卿之官三衢

宪府自清要胡为堕冗曹平反犹用恕纠录肯辞劳才富家何瘠官卑志愈高青云迟得路胜
我落蓬蒿

送吴次尹惠州巡检

万古罗浮洞江楼着老坡子西相继出廷秀晚经过欲访先贤去其如远道何天寒与君别莫
听屢屢歌察罕布哈教授满别【原注丁卯乡试第一三举不中保充掌书】

小却官虽晚先登艺最优文章九州外科目万人头桂折金天月芹空泮水秋澄清赖君辈宪
府正旁搜

送广平孙教授

广平河水址古暨浙江南两地音邮濶三年官况谙采芹聊共乐食蘖岂能甘别酒黄梅浦情
怀老不堪

送句景范教授之官澧浦

南楚离骚国清风澧有兰相从泮水乐独棹一江寒远地重逢少新知欲别难高平读书室好
为扫荒残

送张慎与归海陵侍养二首

湖风吹柳絮记别一年余君出当归养吾穷久索居乍逢论縑绶欲别又踌躇一苇长江隔时
时卜鲤鱼英才销落尽世事一凭栏以我相思切知君欲别难暮云南国暝早鴈北江寒独美
莱衣乐春风鬓未皤

送周子华南归二首

江城少公事幙府得诗人乍见顔如旧相思意转亲不堪时事改赢得鬓毛新後夜孤舟别西
风漾月轮此日与君别重逢未有期衰年行欲尽近事或难知浩荡风云会萧条草木悲三吴
多俊杰试与问安危

送魏叔华归越

閱世沧江上柴門几送迎云泥虽异路车笠见交情春雨西兴渡梅花古粤城寄声卖樵叟莫羨锦衣荣

送长芦穆生归乡来别

闻君返桑梓老我屏丘樊命驾轻千里临岐贈一言为山方进簣有水必观澜顏孟千年在遺經得尽繙

送张仁卿二首

四海张公子騰书盛贊賢論心才几日屈指遂經年驚案翻新牒鷄窻理旧編迟君得小暇已索贈游篇作县徒勞尔飞黃服短轅弃官真不惡惜別却无言再試知何地孤生老是村去逢南國友梅岭正花繁

送李正斋

龚黃吁已远循吏舍公誰卧轍留行色归装減到時朝爭馳荐剡郡議立生祠寂寂燕台客難酬國士知

送唐子华

海內多英俊交情得似君殷懃別後語呜咽病中聞吟棹秋溪月归帆晚浦云可憐江樹隔何日更論文

送龐西山

行李不盈車西風兩鬢華历官多在考归蜀已无家人去空芹水舟行及藕花飞騰君有日吾計老桑麻

送汪太无道人

面帶青山色道人何處來一壺悬日月兩袖裹風雷鉛鼎养活火寒炉撥死灰出尋方外友不語又空回

送麻姑山道人

麻姑一女子處處有仙坛地古留遺迹君今住此山流泉清澗底落日乱峯間聞有蔡經者時時得往還

病中寄诸友

五福人间有吾兼疾与贫死宁遭疫鬼生不媚钱神采药思方士贻书荷故人城东有别墅风雨失残春

病枕

潇潇风雨夜病枕厌长更辗转终无寐呻吟不絕声鼠牙乘壁暗鷄翼报窗明辛苦床前婢频呼睡不惊

病枕不寐

大率忧兼病尤非老所宜吟愁枯两鬓时事锁双眉瘦削嫌衾薄醒眠觉漏迟拒霜三五朵应爱埽风吹

病足

筋寒苦跼盤尊足詎能胜谁谓行多露全如履薄冰城非靴可踢堦岂鞢堪登设有蒲轮召安车未易乘

许正卿伤臂

危机在平地险不是丘陵偶尔一投足几乎三折肱鞠躬难尽力攘臂必须绳他日三公贵轺车好稳乘

题张招讨墓碑

轻兵戒深入险寇勿穷追失势因鱼服留名有豹皮空归先轸面竟裹伏波尸庙食真无愧嵯峨死节碑

题孔平山墓铭【原注葬金陵台下】

东鲁家犹在尼山道最尊教能行万世福不庇诸孙薄宦三千里遗铭数百言不埋防墓侧空吊雨花魂

挽闲闲真人父司徒

堂堂遗一老五福壽而康系出安仁谱身居荣禄乡春山樵独隐晚圃菊尤香有子知何憾骑龙下大荒【原注樵隐晚香堂名】

挽朱自斋总管

郡绂虽重綰斋铭祇自修陰功淮海积遗爱浙江留世事桑田水人生薤露秋盖棺奚复憾箫鼓咽原头

挽贡仲章学士

才优如贡禹经行复精纯海内多知己江东尚有人林泉隐君子台阁古名臣九转丹成去青山宰木春【原注贡临终梦九转丹成生羽翼之句】

挽吴朝奉

幼时桑梓敬耆旧惜凋残萧诚师吾俭龐言遗以安天乎非不壽命也亦何叹谁笔延陵墓呜呼永不刊【原注申浦季子墓有呜呼有吴延陵君子之墓十字相传夫子之笔】

挽许士元州判

有数应前定浮生难豫期为亲尝药去俄自载丧归循吏堪为传遗民议立祠灵輻无路送老泪不胜挥

李君美夫妇挽诗二首

君家全盛日父子佩金鱼太母尝甘旨曾孙列起居荣华既消歇忧患却乘除执紼门生老何堪数挽车一死人谁免如君独可哀离鸾不忍诀止鵬并成灾从吏联翩去丧车寂寞回渊明本无疾早岁赋归来

挽孔东冈

此老典刑在粹然瞻德容百年守经学一邑号儒宗泗水乾别?泰山摧小峯孝哉庐墓子滴泪死青松

挽沈梅溪【原注其子元从予学】

未游通德里曾识谢家儿乡邑推先辈山林养令姿梅花记开落江水閱兴衰耆旧凋零尽西风老泪垂

挽赵石居

地望抡魁重水街博士清弃官为隐计因谤得诗名水竹方成趣松楸忽怆情乡中耆旧尽老

泪洒铭旌

挽李德夫

一种金籀业相传五世余贫同司马壁富有善和书四子供甘旨诸生问起居典刑无复在丹旄泣随车

挽柴青山

衣冠百世祀齿德一时尊白马朝京客青山负郭门废兴疑有数生死复何言空有怀贤泪西风滴古原

挽何汉卿

被服安儒素行藏任性真终于太平世夺我老成人乔木苍苍古孙枝奕奕新西邻闻夜笛衰泪一沾巾

挽朱南伯

爵齿不踰德天乎夺此君官才称主簿郎已转修文玉质埋黄壤葩辞散彩云从今书带草不独郑公坟

挽谢竹所

江左称羣谢青山几夕阳田园遗一老诗礼训诸郎胜日携樽乐清风隐几忘灵輶无路送东望涕沾裳

挽杜华父

乡里多遗老朝廷少用儒公初升国学官止教生徒卫道心犹壮忧时骨已臞遥知埋玉处风雨暗山隅

挽赵鼎之

太息佳公子樽中了此生吐茵人不怒骂坐客皆惊北阙名垂就南柯梦已成老亲并弱子此恨若为平

挽榕山陈同年

劳劳百年内人物老沧洲大志生难测微官病即休江花自终古榕树不禁秋雌甲嗟犹在哀词泪不收

挽邱景游二首

粹德如金玉乡人称善人百年乔木五子拱灵椿桂管经行路蒲龕宴坐身今归兜率去吊客谩沾巾游公门下久公亦眷吾深疾病烦忧卜诗词辱赏音衰年空滴泪旧事独伤心秉笔书潜德空疎力不任

挽俞时斋

襄阳耆旧传一览涕无从入社深衣叟斋居粝食翁市朝终不到林涧或相逢有子能传业棺衾得慎终

立斋挽诗

少日增庭秀暮年山泽臞吟魂绕花竹客泪洒江湖莫唱贞元曲空遗洛社图絶怜埋片玉幸喜产双珠

挽陈葵心

遗才今已老生计晚方宜卧病经旬月孤坟寄一隅逢原惟有女伯道竟无儿执紼嗟何及哀词与泪俱

挽何有开

捧檄垂三考还家甫一旬风云千里志露电百年身讲席辞多士帷堂泣老亲三生有遗恨五福少全人

代挽奉政陈公

江淮离旧隐辽碣着新功駮耳非凡马苍髯独老龙韩铭空纪实曾簣遂长终先世盟犹在寒山泪滴松

故夫人陈氏挽章四首

誓节携孤幼尘衾不复粧夜机同妇织晓陇课僮秧甘旨期终养哀荣毕後丧前冈指陶墓吊鹤重凄凉白首萱堂上儿孙卓有成膝前分栗果枕上听书声凤诰将金阙鸾骖遽玉京舍西萝月夜呜咽陇泉鸣忆昨升堂拜通家指旧盟为言儿有立多赖友相成喜檄方形色哀铭忽

怆情生刍一掬泪端为玉人倾萱草北堂深霜风一夕侵断机思往训捧檄负初心仙府云輶
远佳城月魄陰平生五鼎养空复美衣衾

五言长律

送卫月山归乡【原注大魁泾之孙】

胪传居第一科日艳当年慷慨诛奸佞从容秉政权诸孙今白屋旧物止青氍几见黄粱熟何
当铁砚穿书声月庑下灯影雨窗前学者师王式时人老伏?不令官济济空负腹便便桑樾鶡
偏恶桐花凤可怜纵无当食禄犹有可耕田卒卒才倾盖依依愿执鞭二翁俱耄矣一别重凄
然握手出门去桂花香满船

挽张宗师

凤历归明主龙韬识老臣衣冠朝日月劔履步星辰极品跻黄阁斋居入紫宸存心妙经纬赞
化极弥纶道教崇簪笏词林压搢绅俭慈为世宝安乐是天民梦卜亲如见祈禳立有神谷城
黄石老衡岳白衣人密勿天心契便蕃帝渥新壽尊来玉醴法乐宴崇真重锦颁衣袞精廩享
膳珍青溪合瑶草玄圃植灵椿化鹤声逾远飞鳧迹已陈松青凋晚岁林缟失残春世事柯山
局人生桑海尘十龄传正印一德镂坚珉

挽吴野堂

保护兵冲日焦劳岁歉时江湖一老重州里百年思家尚玄元学人遵义役规陰功宜有後隐
德固应祠拟作荣乡记谁镌有道碑碧梧虽未识宿草尚堪悲偶泊梅江堰空吟薤露诗

卷十八

钦定四库全书

墙东类稿卷十八 元 陆文圭 撰七言律诗

洛中郑慤三伏之际率宾僚避暑于使君林取大莲叶盛酒以簪刺叶令与柄通屈茎轮囷如象鼻焉传吸之名碧筒盃故坡诗云碧碗犹作象鼻弯白酒时带莲心苦【原注出鸡跖集】丙寅五月宜兴州赏诚以此为题为赋十一首

外直中通异衆芳嗅来叶气胜花香一盃先吸监湖月满口潜消玉井霜尤胜朱樱煎作蜜何须紫蔗压为浆细看象鼻弯弯曲刺手犹嫌绿柄长

昔宴宾僚避暑林传盃故事到如今屈茎聊当黄金杓刺叶先抽碧玉簪闻得鼻端香馥馥流从舌底味森森坡仙爱酿柑为酒却道清莲带苦心

有客相传避暑方采莲不用采花房绿盘擎重盛珠露碧管虚中溜玉浆象鼻卷风随手曲麝脐入水透肌香醒来忽忆涪翁句摘实分甘共母尝

碧云影里倚栏干鲸吸诗人酒量宽惟有监湖堪避暑遥知玉井正生寒蓼开翡翠微通窍滴下真珠满走盘一叶偶因风颭破帕罗香沁几时乾

荷亭避暑约传盃醉引清风入手来象鼻形弯通曲柄鸭头色重泼新醅中擎玉液休倾满半卷青心莫展开春酒一江能吸尽始知李白是仙才

当年避暑使君林暇日诸贤肯过临荷带露香须缓折酒无风韵莫轻斟玉簪先透玲珑玉金注徐倾潋灩金叶底可能甘胜蜜却怜小苦是莲心

不须酒盏吸云红刺叶潜令与柄通碧色轮囷弯到底黄流潋灩注当中醉来欲捉波心月醒後因吹水面风却笑求仙求不得金茎半折露盘空【原注魏明帝移长安金人露盘盘折声闻百里】

露盘净植水中央好借诗人引玉觞象鼻巧能通叶柄马蹄更与摘莲房【原注温公莲子诗形如马蹄】吸川不觉西湖阔漱石尤便玉井凉醉里兴来休折遍也留数叶覆鸳鸯越溪女子翠红裳来与羣仙侑一觞叶展圆盘如许大丝连曲柄更能长清高胜饮金茎露甘滑疑餐玉薤霜醉手传盃犹未稳碧痕微损迸琼浆

樽罍自古宴嘉宾末世风流意转新筒叶卷来由郑氏杯荷制出始唐人一时花草空传玩他日宾僚但饮醇外直中通此君子输他光霁满怀春

刺叶为箛制颇奇郑公故事老坡诗擎来入手成欹器注在当心即漏卮玉露有香黏翡翠碧云无影浸琉璃假饶吸尽西江水鉢内生莲是几时【原注佛图澄取水烧香呪之鉢中生青莲花】

孟德孔明

孔明孟德两驰驱三国人才信有余未肯草庐终此世不知精舍读何书木牛古不传遗法铜雀今成一废墟毕竟忠邪天不识当年成败复何如

与琴师谈琴

至乐无声识者希有声终是假人为一时得趣惟元亮千载知音欠子期欲写性情初动处当原律吕未生时夜寒月照虚堂壁鹤唳猿吟揔是诗

癸酉三月园亭小饮之明日又适澹斋所薄暮醉归广文寄佳句二首走笔次韵

名花浓淡总相宜对此如何不醉归丝竹既无娱朗日园林可是乐清时蛙声阁阁那成部蝶阵团团戏作围酸杏不堪尝煮酒累垂空自压青枝

绿陰未暗渐红稀逢闰春迟一月归古有惜花如子美今无好客似当时酒虽薄薄聊浇渴棋亦平平旋解围斜日倚阑人半醒试寻青子摘梅枝

同善之仲寔无逸游饮夜归分韵得星字

岁华摇落江头树客子漂流海上萍尽染缁衣无复素空留白眼为谁青对床便可供高卧把酒何妨吊独醒太息此心徒炯炯奈何余发已星星

八月初游君山谊斋有诗同赋二首

晓渚风移画舫轻秋原日射绣衣明自携玉麈看山色尽屏繁弦听水声季子高风乔木古春申往事暮潮平塔铃自语无人会饮散江空霁月生

此山犹姓楚春申珠履风流几斛尘樽俎一时俱上客兴亡千载属何人萧萧病叶悲霜木采采幽花识涧苹白鹭不知今古事临江一笑岸纶巾

句容赋归

谁教老子误诸君幸自庵中卧白云旧令尹非新令尹今将军是故将军相知自谓乐莫乐一见不如闻所闻逋客急须回俗驾北山早已有移文

回途入玉晨观图经云周时太史郭真人宅周安得有真人哉有丹井养龙池白马老君瑞像在焉壁间刻林灵素字韵诗戏次二首

洗净人间万斛尘玉虚坛上夜朝真井深莫探丹泉髓屋小难容老桧身【原注廊下有晋桧一株小屋围之】符召得龙聊小戏料分与鹤未全贫名山采药无空返不见仙方见异人太虚自是隔凡尘惟恨神霄事不真泥马空遗玄圣像池鱼恐是小龙身久知天上仙官贵不救山中道士贫旧宅固应存太史徽称早已号真人

无文上人舍财鳩工建新安桥普济衆生闻者讚叹随喜赋诗一首

高僧自有神通力杖锡横空搭两堤会见丈夫乘驷马宁无学士助腰犀一溪帆影浪花转百尺栏杆石笋齐有客天津闲信步杜鹃声里夕阳西

七月二十九日夜大醉宿陆宣慰廨旦日以一诗谢之

夜行被酒止公亭耳热呼乌坐尽惊瓮下自惭非毕子吐中不觉卧王生相宽吏舍情何厚误污车茵罪亦轻戏马倘容宾落帽更投辖饮天明

柬人索酒

不到青州已月余麴生风味近何如东坡盃小君应怪北海樽空客渐稀奇士正堪来问字痴人那复肯还书分田种秫嗟何晚独眄庭柯望白衣

中秋见梅

鴈叫霜寒木叶飞西风亭下立瑶姬从来冷淡能禁雪不意孤高也竞时松友旧盟寒岁晚桂华佳约赴秋期倚窗索笑空姝媚汝解能宽宋玉悲【原注坡诗奔月偶桂成幽香】

十月下旬骤寒小雪

朔风翻屋浪喧豗泼墨浓阴扫不开天下撒来云母粉人间唤作豆秸灰细民共喜宜新麦老子先须探早梅为怕玉容禁不得数枝和泪折将来

雪江独钓

极浦寒云压鴈低石矶老叟手如龟茫茫沙上银千顷袅袅风前玉一丝鹭失芦花惊月早鱼吹柳絮上冰迟故人物色嫌相认纵有羊裘不敢披

虎丘留题辛卯三月书于劒池

霸业荒丘春草长只听儿女话真娘虎来墓上犹应怪鹿入宫中尽可伤太息乾坤空浩荡不留豪杰管兴亡属镂抱恨沈江底潭碧犹生古劒光

辛卯入杭呈王察判

中州人物古犹今复见风流正始音当日乘骢持绣斧他年化鹤度青林谁知救世安民术即是求仙访道心鲸浪驾风吹未散溪山何处独追寻

古人糟粕在遗经圣学非由积累成每向同中参孔释时於异处别朱程一川水满源头活半夜天高月色明下学工夫迟十载小儒终是雾中行

入杭怀古呈史药房

某丘某水记儿时陈迹迷茫问不知观里看花空有菜山南种豆落为箕林疎想弋逋仙鹤壁坏应墁坡老诗只怪西湖顽面目浓粧犹自学西施

浙西道院并题双桧诗【和子华?】

黄堂曾着宰官身髣髴儿时记不真图志虽存千载旧栋梁安有百年新繁华开落无三日双桧轮囷经几春应比首阳高节士采薇不食为求仁

苦雨

积雨能令朱夏寒少曾见日上三竿风吹沧海俄然立水泻银河透底乾谁办好心来拯溺姑留老眼去观澜蛙声只在墙根草却怪泥龙不久蟠

居高明

每愁仲夏多溽暑更逢今岁少南风身无台榭可独处眼到山川便不同直从月令高明处参透中庸问学功虚静若能超物外炎凉何必介胄中

七夕祈雨

彩云朵朵西风散银汉昭昭埗斗倾车上耕夫愁欲泣桥边织女笑相迎蝗飞近境行将及龙卧深渊自不惊病枕怕闻箫鼓闹谁家乞巧到天明

偶书邸壁

俯仰随人似桔槔功名落落倦英豪婆娑仅可供宾戏寂寞安能免客嘲空有云心怀鹤发竟

无风力举鸿毛祖刘起舞成何事岁晚柴桑是故交

效後村体

十载村居学养恬未忘习气有人嫌课僮薙草心先快助仆移梅力尚兼不分乌鸦啼锦树絶
怜紫燕傍茅檐路逢野老闲相问新岁凶穰可豫占

有感三首

場屋当年负隼声白头牢落竟何成一生受用兔园册千载应无麟阁名被服易招山鸟怪题
诗难学野狐精羊裘老弃渔滩上印绶新加少傅荣【原注桓荣也】

子美间关离乱际尧夫生长太平年可怜橡栗天寒拾不似莺花日晏眠忧乐在人均是命盛
衰有数总由天腐儒老矣无奇计独立斜阳意惘然

岁晚田园半已荒缁尘袞袞落征途送穷不见昌黎富乞巧翻成子厚愚瓠下早知嘲尚白缶
边何似醉呼乌鸢肩枉作常何客只合新丰伴酒徒

阙题

区区抱瓮不辞劳俯仰安能似桔槔儿子从教耀车服丈夫何用树旌旄但思有酒身无事始
信求田策最高妄想虚憍无处着退然敛手是英豪

黄山上先冢旧葬处

一盂麦饭一豚肩寒食风花泪眼边倘得黄泉相见母胜如白日上升天万家置去成何用双
鹤飞来亦偶然事死如生莫言孝几曾庐墓过三年

庚午三月初九日寒食有感

祭筵跪拜膝难?连岁何曾上冢来老子七旬看又过幻身多病复相催人间愿弃姑云耳地下
从游亦壮哉寒食江村旧行路道旁相吊总悲哀

连日食粥儿辈愠见示之以诗

抄书灯下语吾儿歉岁艰辛汝未知坡老忍饥常并日少游厌粥亦多时但令後世师吾俭深
怪诸人遗以危天意从今吾尽解穷人大抵欲昌诗

耳聩二首

几年本分做家公虽是痴顽幸不聋何必张皇惊鬪蚁更须辛苦望攀龙湿窻暗想催花雨开户遥知戛竹风问夜何其将夜半元来野寺已鸣钟

血气衰微性不灵非非是是几曾听胷中不着许多事天下本来无正声但觉飏飏战风雨谁知兢兢震雷霆先生耐静坐终日怪底作劳吾耳鸣

齋科诏使臣索诗

紫泥诏下九重天文治初兴正急贤草木辉光沾雨露鸢鱼鼓舞乐天渊云衢接武怀新渥雪案潜心理旧编礼乐三千摠素蘊丹墀他日听胪传

贄杨子裕中丞

堂堂四世三公後今日乘骢出案临坐上即时闻减乐?中虽暮不怀金官民乘访皆公论狱卒平成有怨心古栢台边霜气冽肯分春意到寒林

贄尤端木二首

汉家陵阙已苍烟鲁国灵光独岿然卫玠音闻永嘉末陶潜诗着义熙前可怜阁下投几死不及车中寝获全【原注范粲事】寄语牙郎莫酬价匱中韞玉可求旃

万里梯航走贡珍乾坤无地着孤臣湘江空记庚寅渡石壁曾题癸巳人国士犹嫌先事范仙家莫问几经秦愿提草履从君後煮茗寒泉代拾薪

代上乐平傅知州初庵

一代风流独老庵再扶道脉起东南家声可与诸洪继易学曾同小阮参昼锦羨君荣世胄寒臚容我坐清谈愿为药笼中间物才匪芝苓愧不堪

壽常州路达噜噶齐

蓬山阁上冠羣贤出拥朱旛瀨水边但看两州歌善政宜膺多福享遐年当生自是长生佛未老应为不老仙欲就瓣香称壽去梅林一夕涨江天

壽与可录判

濯锦峩峩夸最胜子昂太白记前生一川风雨睡正熟千顷波涛心不惊手试功名綦胜负眼看富贵槿枯荣壽盃肯向人间饮携傍莲峯玉井倾

壽陆云闲道判

诞日曾生陆地花【原注关尹喜生时陆地生莲花】双鸾扶下五云车安期共约游三岛方朔应留醉九霞盛集儒流胜仙侣多培陰德种丹砂冷斋书客来称壽自笑东风两鬓华

史药房壽与东坡同日

日月同生岂偶然声名不减雪堂仙岷峨西去八千里苏史相望二百年赤壁旧矶如昨否李生新曲至今传祝公壽比南飞鹤共结梅花岁岁缘

壽陆义斋【原注乙巳九月自五羊归】

归棹石门江水长肯留一片广州香不须人祝千年壽但愿公流百世芳长侍潘舆游故里胜持汉节落南荒芙蓉金菊秋风迺好和陶辞引玉觴

绿髮仙童驭彩鸾九秋弥节下人间明分月影山河动清入霜华草木寒已报除书来北阙不妨挂笏看西山霞盃浅注黄花酒留取余香晚节看

壽李侍郎母

双成遥下五云车献壽仙盃吸紫霞爱惜孙枝长萱草摩挲老树着桃花斑衣就养荣三釜锦诰分封备六珈他日肩輿扶上殿侍郎正踏相堤沙

寄戴帅初先生

词章科目溯当年璧水名流孰子先杜甫生逢天宝末陶潜空忆义熙前明庭结绶怀新渥暗壁移灯理旧编约对青山谭出处一冬涧雪长新泉

和陈无逸见赠草堂诗韵

绋袍谁念故人寒转徙萧然老伯鸾幸喜云山无屋碍始知天地出门寬悠悠岁月蚁旋磨落功名鱼上竿金谷已无歌舞地辋川犹有画图看

郡幕请讲书和药房先生韵

不为祁寒暂辍冬肯移莲幕下芹宫深青岂必从蓝出美玉何烦就石砻残雪五更侵几白一灯深夜照书红他年共赴长安召正恐诸儒却诮通

和蒋公秉思归韵【原注时寓普明後寺】

不愁世路大行难自叹行藏愧孔颜借榻寺中分两寺【原注白乐天诗两寺元从一寺分】
思乡山上又重山凄然碧草天连远输与白云僧对闲我亦天涯流落客何时同赋大刀还

和郭有章见赠韵【原注郭宣城人】

敬亭山属谢家诗太白重来又一奇天既生才宜用世士多有志不逢时屠龙合让高人手扞
虱才堪童子师大厦支颠要梁木独甘杞菊老天随

和陆振之见寄韵

日长不废读书功我与宗人老颇同病起自羞黄面老兴来人笑白头翁剖瓜未信能祈巧结
柳终须学送穷樽酒论文定何日碧云暮合忆江东

代和翟知事舟中寄登光阳楼诗韵

登临送目际天涯人物风流胜永嘉已泝清流乘画鷁尚留醉墨看涂鸦长空黯淡吹云叶别
浦微茫蹴浪花老守江城闲兀坐秋宵短梦苦思家

和刘濬见贻韵

踽踽凉凉莫我知读书渐懒任嘲师荷鋤亦欲耕绵上把钓因思入汉陂姑让着鞭先士雅何
须举扇障元规巴人白雪难同调今古应无两子期

和邓善之寄王一初并见柬韵

抱拙投闲计未疎但看岁晏复何如丹山碧水吟招隐白髮苍顏赋遂初逸少幽情谁与畅元
龙豪气未全除柴门有客迂双屐何不相逢许史庐

和戴帅初寄诗韵【原注诗云清江一日走千艘独有闲仙不喜邀几处白云思暮合数行红
树又秋高云云】

入海逢车陆用艘仁人不遇叹游遨登龙有意师元礼刻鹄何心效伯高每笑囚山非国语絕
怜投阁反离骚此身幸免官驱使两手犹能把酒螯

次樊晋山长贻见韵二首

闭户柴车久不巾但思言行谨书绅可怜麋鹿山中友不是麒麟阁上人作赋也应曾感旧为
师那敢望知新老饗谁献先生壽自酌蒲桃舞郁轮

我羨君才桂一枝天門步担束書歸藥方按古藏芝籠花樣翻新織錦機不耻緼袍身自貴能知璞玉世尤稀天寒野曠來時路一笑應疑吾道非

次韻袁艮所投贈

意氣冲霄義薄雲白頭傾蓋即相親耳邊久不聞瑰論眼底初驚見玉人歷代文章空自變致君風俗幾時淳世間別有經綸手不屬柴門老病身

次鄭前山絲字韻

人笑學官如兔絲【原注出南北史】誰能千里遠尋師歸田便覺知機早春市應嫌見事遲縱欲着鞭何所往奚須按劍復相疑世人多享容容福白璧從來不可為

留別王伯洪平章高顯卿左丞

幼從翰墨場中出晚見車書內同四十年前沾雨露三千里外犯霜風蛾眉共妬嬋娟女鶴髮誰憐矍鑠翁回首束書歸舊隱江南笋蕨滿山中

別管韶夫

胸中耿耿挾孤征刺口逢人輒論兵投筆少年真燕頤着鞭中夜忽鷄聲功名險處方成就節義窮時要講明別有中庸書一卷勸君西謁范高平

送元帥移屯太倉

十乘元戎又啓行澄川老稚送傾城北風吹轉旌旗影東海懽騰鼓吹聲桑麥千村無吠犬波濤萬里息奔鯨新年鳳詔催歸觀殿內金甌覆姓名

送陸誼齋按察

使星出照三吳地原隰馳驅遠有光鷹擊何如學鸞鳳狐多且莫問豺狼懷金昌邑難污震置酒清河反怒章今日故人無請托他年鴻燕勿相忘

送葉敏卿提領

墻東老桧屋三間几案亭亭背遠山時事浮雲蒼狗變機心滄海白鷗閑歸與乍出紅蓮幙行矣催歸玉笋班老子婆娑今得計底須坐客唱陽關

送嚴簡卿之燕為司徒掾

汉儒多辟司徒掾掾属虽卑地望高闻有袁安在公府可无陈宠作辞曹【原注汉陈宠少为州郡吏辟司徒鲍昱府是时三府掾属专尚交游以不肯视事为高宠独勤心物务昱高其能转为辞曹掌天下狱事】修鲸未肯随鳞介威凤终须现羽毛少壮功名当拾取金台落日射征袍

送刘侯之官吉州

暨州美政不三年江右遗民借二天皂盖朱幡新牧守青原白鹭旧山川邦衡奏疏云中有永叔诗章洛下传故里诸孙无恙否下车第一表先贤

送侯仲達安丰之任

江上故人今送别淮头往事独凄凉陂成孙叔能强楚城破刘公不负唐千载与君期事业一区怜我老耕桑异平幙府应多暇书问时时远寄将

送州官解任

小郡凋零不可为长官贤厚莫能欺政声邻邑皆传说心事同僚尽得知堪笑青蝇工点污敢将白璧强瑕疵清时公论终难泯遗爱空留去後思

送张文友州判

太息君侯有祖风栖栖五载簿书丛功臣昔绘云台上循吏今标汉传中緑水江风送行色紫金关月照孤忠预人家国非吾事但喜诗书气味同

送丘景唐赴安丰教【原注宗卿宣抚枢密之孙】

元枢出督宣威地名姓江淮草木知今见闻孙骑欵段去为博士拥臯比诗书泽远真难继功业时来亦可为往事百年无处问庆丰亭下稻连陂

送朱伯海入京

燕黍寒生春未回可堪早别故园梅新丰斗酒马周去京兆束书韩愈来赋就不须呈狗监勅除先合拜鸾台青云附骥非吾愿自守书灯拨冷灰

送朱鹤臯入京

故人天上调金鼎应念先生苜蓿盘博士不烦重讲席拾遗无复叹儒冠蓬莱海阔还须险太华峯高不道寒茅屋三间老书客逢人懒问日长安

送王居实游金陵

破氍吟雪拥清寒有客虬髯急扣关岁月苍茫千里暮乾坤博大几人闲
依乘自许风云际邂逅相逢草泽间西上月林春未半白鸥黄鹄看江山

送李义夫出游二首

与君卯角志相期岁晏行藏各有违老树晚花空自媚秋林病叶更先稀
时情淡薄元无味世路艰危总是机门外北风吹自冽旅人琐琐欲安归

少年有志东山卧晚岁方图北海游
鲋口饥宁甘半菽挂胷气尚食全牛问唐元振今谁在欲赵平原何处求
赤白洪崖两相厄不妨诗句各风流

送魏叔华归杭州得行字

青山出郭两相迎潮去潮回客子程
门外送车今几辆筵中祝酒已三行对床有弟酬佳约拥?何人诉别情
桂树结花当洒扫重来曾指白鸥盟

杜康桥下水如倾九里冈头路转城风雨小楼清梦远山河古道几人行
别怀渐觉伤安石祖席何曾傲正平【原注是日饶之不至】珍重去逢南国友
为言白髮老书檠

饯刘继明西归【原注同知子】

人生有三事如一父子师友皆人伦
入向亲闱奉甘旨出当书案服辛勤老成识见无如子少壮功名肯让人
老我卑枝栖鷃爵仰看黄鹄上青云

送刘中斋孙归三衢

百花头上和羹手乃祖声名似孝先
太息北朝开府老真成故里烂柯僊庆流豕嗣承先泽学到孙枝又一传
野叟临岐无别语勤修世业复青氍

题桃源手卷【原注武陵今鼎州常德路桃源山在县北二十里古迹无复遗
或谓此记渊明寓言即义熙题甲子耻事二姓之验也岂为束带见乡里小儿
然後归隐哉师摠管出示此图为述此意】

种柳栽桃摠是春兴亡千古一沾巾
只评隐者非仙者莫悟秦人即晋人年号记曾题甲子儿孙肯使识君臣
南阳高士空遐想不向柴桑去问津

题三洲诗卷

潮拥寒沙正练长东南人物老江乡藕花秋晚吴霜落杜若春深楚水香闲对渔樵谈治乱贪看鸥鹭失兴亡无人会得乘桴意东面区区叹海洋

题陆义斋双莲图

红粉香中双并蒂碧丝藕下暗连株主人一笑偶然尔客子竞夸前所无堂上埙篪兄友弟房中琴瑟妇随夫君家和气浓如酒此即双莲瑞庆图

强南坡自作墓铭生求挽诗

年光催客过邮亭八十余翁尚典刑见说近成遗老传未当上应少微星履香窃笑空题墓宝玩何须自乞铭今古逵观惟一士山童负锺醉刘伶

挽吉州刘总管

画戟清香彼一时归舟素幔不胜悲坟成共负犍为土堂在空留蜀郡祠乱起赤眉徐自定忧侵白髮已先衰平原岁晚多宾客泉下难酬国士知

挽李宣慰

公骑箕尾上秋旻忍见龟趺对石麟盛德固应祠百世陰功何止活千人壮图落落心空在华髮萧萧事转新耆老凋零关世运可能知己独沾巾

挽晋千户

磷草原头十七霜宛丘改卜日辰良可怜先軫如生面疑住灵均不死乡抔土岂能埋宿愤遗民聊与发幽光护丧诸子皆称孝万室他年置墓傍【原注启攢面如生】

挽唐可竹【原注亡宋两魁乡荐归附後溧水丞终于燕】

穿杨折桂黄梁梦庭下哦松白髮秋兴废乃关千古事荣枯肯为一身谋江南有客朝金阙天上无人记玉楼丹旌西风范阳路行人回首忆林丘

挽孙石山二首【原注壬辰年卒】

今年星度岁为龙掩袂竟嗟吾道穷正始遗音从此絕贞元旧曲为谁工饰棺不待百年尽隐几元知万事空里有水心铭笔古宜书潜德贲幽宫

荣华露槿落纷纷苍狗依然是白云荆渚止称前进士灞亭不识故将军人间无乐徒劳子天

上求文即召君楚些西风将泪去只鷄他日酌秋坟

吊李古岩

堂堂山立万人英一夕霜风玉树倾公去隱然关世道客来何止哭交情安知死不如生乐但恨才难与命争幸喜肯堂丹雘手陇西依旧振家声

挽阙南夫【原注号实轩乙巳年卒】

恶梦无端岁在蛇先贤遗落重堪嗟粹然践履终身实老矣婆娑两鬓华不见鲤庭人独立忽惊鵬舍日西斜窆碑好为书潜德穷巷谁寻忤作家

挽陆义斋二首

四持宪节遍南方屡表陈情返故乡殊俗今犹歌德政老天胡不爱忠良山空虎逝狐狸出春去花残蛺蝶忙五十人生不称夭独怜华髮在高堂

生平意气每相期岁晚行藏各自知见事略同因抚掌忧时不语共攢眉闔棺已矣公何憾闻笛凄然我独悲回首秋山寒雨外青松滴泪作枯枝

挽东平张彦明【原注女事曹安卿】

梦觉黄粱仅一炊人生适意不多时杜陵老病亲桃竹白傅清闲忆柳枝有意出山寻树檟伤心归櫟赖门楣秋风泪滴长江水遥寄东原薤露诗

挽黄子高

场屋初兴选异才先生濶步上金台蓬山渺渺仙舟隔泮水悠悠讲席开同是甲辰雌正伏胡然庚子鵬为灾天寒病叟那能出一束生刍寄泪来

挽丘景南

紫荆庭下列三株十五年中次第枯余庆後來英俊有老成先辈典刑无每怀素志甘瓢饮不觉长身要杖扶头白少公门下客酸风吹泪洒輶涂

蔡梅边挽诗二首【原注代作】

樽酒吟梅忆旧游忍听笳鼓咽原头曾庐栢下三年墓退卧花间百尺楼【原注所居有前後楼】淮海壮心空落落山林晚兴寄悠悠寒窗寂寞留孤月劝孝坊前客泪流

忆昔艰难共避兵转於贵贱见交情长江一水分南北异姓两家真弟兄回首忽惊人世换伤心敢负岁寒盟空亭花月如春梦惟有清溪一带横【原注葬在清溪醉月坐花亭名】

挽张州尹夫人

新颁五色金花诰彩服儿孙正满堂不见鱼轩随五马空令鸾镜照孤凰车中鬓老愁潘岳案上眉低忆孟光流水无情飘素幔凉宵燕寝独凝香

卷十九

<集部,别集类,金至元,墙东类稿>

钦定四库全书

墙东类稿卷十九 元 陆文圭 撰五言絶句诗

絶句三首

车薪胜盃水輿羽重鈎金物理元无定权衡只在心买丝绣平原儼金铸子期君子病无能不病人不知杜欲诛云师韩将讼风伯水旱不由天那是诗人责雪夜不寐偶成短句十首用渭北春天树江东日暮云为韵

丈夫慎出处功成乃身退古人夫何如八十钓清渭四时循化机万物随动息衆星纷荧荧天运齐拱北编素制野服误染京华尘旧业在何处梅花江上春男儿不得志壮心惜徂年长空起鵬鸞目送入寥天布衾生凄寒夜夜梦归去心恐秋风深摧残紫荆树吟苦不成寐寒窗凝夜缸千古谁知心遥遥贾长江此身如断蓬飘萧随北风钱塘一望地家住西湖东客虑千万端长吁愁不出谁能事低首挥盃送白日几欲膏吾车老眼不识路弟妹今何之萧萧白发暮昨日家书至慰我久离羣游子眼欲断日日望白云

东风

东风何太急日落黄尘起篝灯吹欲灭骤雨打窗纸

秋塘观鱼

野塘落芙蓉下有潜鳞跃渔多罟日深圉圉方自乐

戏书所见

云英捧玉液真是裴郎偶不知几万钱买得玉杵臼

送祝君晟湖州提领案牒

幙府今何处青山水遶城乌程有美酒还肯饷春耕

题李义夫无锁亭二首

清风四无边旷然此君宅可不问主人不可容俗客昨日苍溪叟曾来斫钓竿山童寻鹤去失却报平安

题画二首

云巢八十翁观化得三昧无声凉月下适意芳草外物物具天机缘何纸上生有时挂素壁自动亦自鸣

题画春景

青山多乔木柳枝低婀娜春风在毫端高迁无不可

题月汀图二首

太陰水之精浴水光愈洁常怪市中人不识沙头月露垂兰叶光风翻藕花影滩前白鹭睡夜半莫摇艇

题画梨花

淡容露如洗生色春欲动纸帐小屏低同入梅花梦

题碧桃手卷

烂枝空有色飞羽本无情独立春风里如闻三两声

写竹

传神疑有月着色淡无烟此是诗人笔胷中有渭川

题南宫子中画莺

金衣何璀璨飞向垂杨树久立却无声东风吹不去

题画白鴈二首

芦花秋半黄三两下寒塘北风正萧瑟书远不曾将未曾至鴈门安知食鴈美若读潜夫论当不保此纸

六言诗

赤壁图二首

公瑾子瞻二龙文辞可敌武功却怪紫烟烈焰不如白月清风

乌台夜雨伤神赤壁秋风岸巾此老眼空四海舟中二客何人

题萧照山水

闭门十日风雨神游湘浦峡川树影分开草店鴈声吹落渔船

王黄华山水小景二首

试问沧洲渔叟长松山崦谁家终日拏舟不语江风吹老芦花

此纸无脂粉气之子有山水淫当时以意摸写今我以目登临

题鹰捕雀图【原注其一已擒其一惊去鹰复回顾】

一雏已饱毒手反顾又欲其余大贪得陇望蜀小贪取熊兼鱼

死生命判须臾一去一不得去两三竹叶成丛被毆复向何处

题戴嵩牛图

陇上躬耕力倦归坐茅斋展卷耳边如闻笛声却看牧童不见

七言絕句诗

读史六首

逐鹿纷纷尽向秦东门牵犬亦无人月宫稳上青冥去桂树秋风老此身

暮年百事已心降床下无人拜老龐病眼欲开还又闭偷看日影下西窗

旷怀雅思人人有济世经邦事事无终日醉眠呼不醒明朝典午代当涂

广陵琴与山阳笛哀怨千年尚未平正始诸贤零落尽山王去作晋公卿

晓看嵩少玉嶙峋枉驾应怜处士贫令尹若能为保障长衾尽覆洛城人

司徒太尉总三公奢俭由来性不同锦帐羊羔酣未省谁能僵卧里门中
偶作

奸雄往往堕危机成败安能论是非空笑狂生投益智絶怜老母遗当归
偶书

忧时耿耿丹心在无事悠悠白日过万里山河音信少一春风雨闷怀多
旧题

賸得清明一半春蜂衙蝶使往来频东风自动秋千索不见海棠花下人
戏狄怀英

花樣精神月樣粧妖魂不敢近忠良如何凤阁平章老却事宫中妩媚娘
己巳新春

鞭春已罢烧灯近十日西风未转东料得化工无别意只因不放小桃红
年年春色先催柳万紫千红次第开零落墙陰人不问可怜残雪一株梅
山村示暮春三絶句和韵

怀哉春晚故山薇冉冉江云日暮低为问柳桥看燕舞何如松岭听猿啼
樵儿拾樵不畏虎隔溪看花如隔雾鷓鴣声在柘岗西落日腰?下山去
画帘朱箔燕为家青草门庭只产蛙一树樱桃红半落园丁愁杀雨如麻
王祈伊中秋不见月四首

秋空碾上一轮冰积雨连宵洗更清纵有浮云容易散吹开不待管弦声
家家望月试停盃怪?浓云拨不开身入广寒人不见却从袖里裹将来
中秋万里共陰晴曾记坡翁最善评谁信九霄风雨外羣仙正赏月华明

开元以後可堪忧秋雨霖霖稼不收此际霓裳歌一曲君王正在月宫游

腊月二十六日立春

陇梅未寄江南信邹黍先回燕谷春忽忆少陵巫峡句菜盘思见玉纖人

丁丑元夕

入夜不闻箫鼓声千门月色为谁明无端逻骑堦前过错认戎家枥马鸣【原注余居与起潜侄相邻】

石湖留题三絕

仙子骖鸾不可呼故园花石久应芜不知綠野何人买试问平泉有子无

高筑诗坛据越城醉呼杨陆主文盟至今月下苍苔石时有先生杖履声

当年彬父遣词臣列戟傍观色怒嗔谷水曾无归璧日稽山已有摸金人

望三峯

笋輿咿轧下山田遥指三峯返照边安得肉身生两翅霎时飞过此山前

大茅峯四絕句

悬崖石磴刷苔青空谷无仙鬼亦灵闻说游人多好事谁能扶直半山亭【原注势倾将压】

风吹天朗见秋毫足力穷时所历高老子何曾烦一步輿夫攀陟不辞劳

羊肠九折路盘岖不觉腾身上太虚失脚从知高处险西风斜日早回车

一家兄弟入仙门谁把名山鼎足分我读儒书知长幼瓣香先礼大茅君

露筋娘子庙

玉真僊子雪为肤枉被羣儿识塞酥寂寞扶风三尺土可怜香火至今无

桃源县

张家桥西车马尘北风刮地眯行人篱落枯桃三五树不应此地可逃秦

文安县

平生知己富欧韩辛苦修书博一官自是朝廷重科目且教主簿到文安

夜宿何庄唐主事宅

扶风豪士不知名樽酒相逢意便倾争似何庄今夜宿梅花烛影照三更

夜宿范以善提举云林清远风大作偶成二絕句

猿啼夹涧声逾远鹤啄荒苔迹更清身在千林头上立忽从脚?白云生

云峯顶上玉仙家误入修廊一迳斜夜半月寒风力劲满山松影走龙蛇

临沂沂水道中尘沙眯目不可行闻东北有温泉即浴沂处不及往

临沂以北沂水东行人扬?尘沙中纵有温泉能自洁零坛安得可乘风

除夕二首呈北溪

腊雪穷途一月中明朝老鬓又春风遥知儿女团圞处饮徧屠苏忆乃翁

杯盘今日偶相逢客路飘飘过一冬为问玉堂春帖子不知学士有谁供

清明日泊舟甲马营

细柳东风甲马营秋千花下笑相迎舟中自有伤春客暗数归家几日程

清明

花开花落总无情赢得诗人百感生今日东阑看梨雪坡仙去後几清明

宿黄村土人索诗

尘沙终日意昏昏落日炊烟又一村客子倦游求止宿主翁搔首更无言

黄村落日下山低宿鸟归林亦倦飞夜半驱车投北去谁能慷慨泣牛衣

入京二首

觚棱栖雀五云深此日江湖向阙心
朽骨不堪重拂拭涓人莫枉费黄金
手携布被入关中颇似菑川六十翁
未必汉廷推第一不须侧目事辕公
舟中追和逊卿早春即事十首

柳色鵝黄蘸碧沙隔溪遥指四娘家
故园春事如今晚可见东栏芍药花
清江漠漠漾晴沙门对青山买酒家
檣外一声金弹子流莺惊起落庭花
莫惜春衫污酒痕欲将遗恨寄芳樽
清明客里匆匆过不记桃花笑倚门
草色青青没烧痕山川满目酒盈樽
只愁逋客回家日先被春风紧闭门
乍别亲朋似久违西风尘起染缁衣
不须杜宇声声劝如此江山胡不归
壮图落落与时违不信经纶起布衣
纵使鷗鱼从北化也随乌鵲向南归
客至从容奉笑谈晚知蔗境味尤甘
曲江进士题名遍安用山人起水南
虎溪何必与禅谈唯有东篱菊味甘
束带肯为儿辈屈悠然兴在此山南
科斗临池学篆文燕雏带雨掠香芹
春闺应恨归来晚南浦当时错送君
草堂未可便移文自煮清香碧涧芹
更向白云深处宿山头回首谢诸君
赋归四絶呈句容诸友

兴尽归期渐有涯梦中昨夜已还家
儿童笑引池西去菡萏犹余一朵花
故里青松百尺强亭亭三径俨成行
东篱雨後无人葺旧菊多应一半荒
我与茅君宿有缘四年五度过山前
元符直下崇禧路回首三峯意怆然
一见诸贤盖便倾秋风犹动故乡情
余生无复重来日再世何当结弟兄
题禹庙

来寻禹穴何容易却上龙门得许劳拟借梅梁浮海去坐登三级浪头高

仲冬雪夜偶书三絕句

城楼戍鼓尽三更灯射斋窗一黍明窗下有人勤不寐隔墙犹听读书声

拥衾危坐夜沉沉门外谁知雪寸深掩卷不言空太息静中忽见古人心

长廊风紧雨冥冥花落寒灯酒半醒但觉晨光何太早不知飞霰集窗棂

诸生和韵复吟三絕

荒城戍卒打残更道上无人天未明一似衔枚蔡州去只无鹅鸭混军声

猿啾鬼哭杳冥冥夜半何人吊独醒譚罢离骚心正苦陰风吹雨响疎棂

地鑪无分爇香沉画尽残灰夜正深窗外梅花消息动要知子半是天心

自笑

既聋不用夸三耳纯白安能辨二毛自笑先生书案上又将论语教儿曹

丁卯新正纪怀四首

懒将诗句上桃符栢叶椒花一例无却笑斋元不简舟中犹自饮屠苏

土润耕牛不受鞭风和花鸟各忻然老人犹记兵戈日自後昇平五十年

纷纷儿女竞新年老去思亲独怆然墓上只堪供洒扫无由彩服拜堂前

鲁史曾书雨木冰坤爻切切戒陰凝衡门空把忧时志无奈华轩尽鹤乘

窥园

先生日日好窥园学圃工夫细讨论卖李不须先去核耘瓜只恐误伤根

井竭

坎蛙晓渴上苔栏石甃泥浑底欲乾焦稼不为簞食计一瓢饮水亦良难

啓山扫松

一妻一妾閼泉扃老栢苍苍蔓草青我肯墦间求餍足魂归不必讪中庭

病中四絶

南山处士老尤贫颇恨故交无一人若使知心得良友更因多病转相亲

老去无憀病转多樱桃杨柳柰情何故人又比佳人薄莫怪门前雀可罗

叶落萧萧壅树根疎林带郭半疑村卧闻车马墙边过无事呼儿早闭门

浪说苏公久已仙岂知翁自厌余年雪堂二客能相从姓字当时惜不传

追和四絶

文士多婴疾与贫浩然东野即其人唱酬从此诗筒简炮炙时於药裹亲

舖餽糟醅醉者多独醒无奈衆人何寒窗细读离骚语遗恨千年吊汨罗

三十寻思拟学仙蹉跎已过古稀年一生只作邯鄲梦枕上奇方秘不传

卧看山云起石根意行随犬至前村?居自是无人识何必移家上鹿门

卷二十

元 陆文圭 撰

五言絕句诗

絕句三首

车薪胜杯水與羽重钩金物理元无定权衡只在心买丝绣平原儼金铸子期君子病无能不病人不知杜欲诛云师韩将讼风伯水旱不由天那是诗人责雪夜不寐偶成短句十首用渭北春天树江东日暮云为韵

丈夫慎出处功成乃身退古人夫何如八十钓清渭四时循化机万物随动息众星纷荧荧天运齐拱北缟素制野服误染京华尘旧业在何处梅花江上春男儿不得志壮心惜徂年长空起雕鹗目送入寥天布衾生凄寒夜夜梦归去心恐秋风深摧残紫荆树吟苦不成寐寒窗凝夜缸千古谁知心遥遥贾长江此身如断蓬飘萧随北风钱塘一望地家住西湖东客虑千万端长吁愁不出谁能事低首挥杯送白日几欲膏吾车老眼不识路弟妹今何之萧萧白 暮昨日家书至慰我久离羣游子眼欲断日日望白云

东风

东风何太急日落黄尘起篝灯吹欲灭骤雨打窗纸

秋塘观鱼

野塘落芙蓉下有潜鳞跃渔多罟日深圉圉方自乐

戏书所见

云英捧玉液真是裴郎偶不知几万钱买得玉杵臼

送祝君晟湖州提领案牒

幙府今何处青山水绕城乌程有美酒还肯饷春耕

题李义夫无鎖亭二首

清风四无边旷然此君宅可不问主人不可容俗客昨日苍溪叟曾来斫钓竿山童寻鹤去失却报平安

题画二首

云巢八十翁观化得三昧无声凉月下适意芳草外物物具天机縁何纸上生有时挂素壁自动亦自鸣

题画春景

青山多乔木柳枝低婀娜春风在毫端高迁无不可

题月汀图二首

太陰水之精浴水光愈洁常怪市中人不识沙头月露垂兰叶光风翻藕花影滩前白鹭睡夜半莫摇艇

题画梨花

淡容露如洗生色春欲动纸帐小屏低同入梅花梦

题碧桃手卷

烂枝空有色飞羽本无情独立春风里如闻三两声

写竹

传神疑有月着色淡无烟此是诗人笔胷中有渭川

题南宫子中画莺

金衣何璀璨飞向垂杨树久立却无声东风吹不去

题画白鴈二首

芦花秋半黄三两下寒塘北风正萧瑟书远不曾将未曾至鴈门安知食鴈美若读潜夫论当不保此纸

六言诗

赤壁图二首

公瑾子瞻二龙文辞可敌武功却怪紫烟烈焰不如白月清风

乌台夜雨伤神赤壁秋风岸巾此老眼空四海舟中二客何人

题萧照山水

闭门十日风雨神遊湘浦峡川树影分开草店鴈声吹落渔船

王黄华山水小景二首

试问沧洲渔叟长松山崦谁家终日拏舟不语江风吹老芦花

此纸无脂粉气之子有山水淫当时以意摸写今我以目登临

题鹰捕雀图【原注其一已擒其一惊去鹰复回顾】

一雏已饱毒手反顾又欲其余大贪得陇望蜀小贪取熊兼鱼

死生命判须防一去一不得去两三竹叶成丛被毆复向何处

题戴嵩牛图

陇上躬耕力倦归坐茅斋展卷耳边如闻笛声却看牧童不见

七言絕句诗

读史六首

逐鹿纷纷尽向秦东门牵犬亦无人月宫穩上青 去桂树秋风老此身

暮年百事已心降床下无人拜老庞病眼欲开还又闭偷防日影下西窗

旷懷雅思人人有济世经邦事事无终日醉眠呼不醒明朝典午代当涂

广陵琴与山阳笛哀怨千年尚未平正始诸贤零落尽山王去作晋公卿

晓看嵩少玉嶙峋枉驾应怜处士贫令尹若能为保障长衾尽覆洛城人

司徒太尉总三公奢俭由来性不同锦帐羊羔酣未省谁能僵卧里门中

偶作

奸雄往往堕危机成败安能论是非空笑狂生投益智絶怜老母遗当归

偶书

忧时耿耿丹心在无事悠悠白日过万里山河音信少一春风雨闷懷多

旧题

賸得清明一半春蜂衙蝶使往来频东风自动秋千索不见海棠花下人

戲狄懷英

花樣精神月樣妝妖魂不敢近忠良如何鳳閣平章老却事宫中妩媚娘

己巳新春

鞭春已罢烧灯近十日西风未转东料得化工无别意只因不放小桃红

年年春色先催柳万紫千红次第开零落墙陰人不问可怜残雪一株梅

山村示暮春三絕句和韵

懷哉春晚故山薇冉冉江云日暮低为问柳桥看燕舞何如松岭听猿啼

樵儿拾樵不畏虎隔溪看花如隔雾鷓鴣声在柘岗西落日腰防下山去

画帘朱箔燕为家青草门庭只产蛙一树櫻桃红半落园丁愁杀雨如麻

王祈伊中秋不见月四首

秋空碾上一轮冰积雨连宵洗更清纵有浮云容易散吹开不待管弦声

家家望月试停杯怪防浓云拨不开身入广寒人不见却从袖里褰将来

中秋万里共陰晴曾记坡翁最善评谁信九霄风雨外羣仙正赏月华明

开元以后可堪忧秋雨霑霖稼不收此际霓裳歌一曲君王正在月宫游

腊月二十六日立春

陇梅未寄江南信邹黍先回燕谷春忽忆少陵巫峡句菜盘思见玉纖人

丁丑元夕

入夜不闻箫鼓声千门月色为谁明无端逻骑堦前过错认戎家枥马鸣【原注余居与起潜侄相邻】

石湖留题三絕

仙子骖鸾不可呼故园花石久应芜不知緑野何人买试问平泉有子无

高筑诗坛据越城醉呼杨陆主文盟至今月下苍苔石时有先生杖履声

当年彬父遣词臣列防傍观色怒嗔谷水曾无归璧日稽山已有摸金人

望三峯

笋舆咿轧下山田遥指三峯返照边安得肉身生两翅霎时飞过此山前

大茅峯四絕句

悬崖石磴刷苔青空谷无仙鬼亦灵闻説游人多好事谁能扶直半山亭【原注势倾将压】

风吹天朗见秋毫足力穷时所歴高老子何曾烦一步舆夫攀陟不辞劳

羊肠九折路盘岖不觉腾身上太虚失脚从知高处险西风斜日早回车

一家兄弟入仙门谁把名山鼎足分我读儒书知长幼瓣香先礼大茅君

露筋娘子庙

玉真僊子雪为肤枉被羣儿识塞酥寂寞扶风三尺土可怜香火至今无

桃源县

张家桥西车马尘北风刮地眯行人篱落枯桃三五树不应此地可逃秦

文安县

平生知己富欧韩辛苦修书博一官自是朝廷重科目且教主簿到文安

夜宿何庄唐主事宅

扶风豪士不知名樽酒相逢意便倾争似何庄今夜宿梅花烛影照三更

夜宿范以善提举云林清逸风大作偶成二絕句

猿啼夹涧声逾遠鹤啄荒苔迹更清身在千林头上立忽从脚防白云生

云峯顶上玉仙家误入脩廊一迳斜夜半月寒风力劲满山松影走龙蛇

临沂沂水道中尘沙眯目不可行闻东北有温泉即浴沂处不及往

临沂以北沂水东行人扬尘沙中縱有温泉能自洁零坛安得可乘风

除夕二首呈北溪

腊雪穷途一月中明朝老鬓又春风遥知儿女团圞处饮徧屠苏忆乃翁

杯盘今日偶相逢客路飘飘过一冬为问玉堂春帖子不知学士有谁供

清明日泊舟甲马营

细柳东风甲马营秋千花下笑相迎舟中自有伤春客暗数归家几日程

清明

花开花落总无情赢得诗人百感生今日东防看梨雪坡仙去后几清明

宿黄村土人索诗

尘沙终日意昏昏落日炊烟又一村客子倦防求止宿主翁搔首更无言

黄村落日下山低宿鸟归林亦倦飞夜半驱车投北去谁能慷慨泣牛衣

入京二首

觚棱栖雀五云深此日江湖向阙心
朽骨不堪重拂拭涓人莫枉费黄金
手携布被入關中颇似菑川六十翁
未必汉廷推第一不须侧目事辕公
舟中追和逊卿早春即事十首

柳色鵝黄蘸碧沙隔溪遥指四娘家
故园春事如今晚可见东栏芍药花
清江漠漠漾晴沙门对青山买酒家
檣外一声金弹子流莺惊起落庭花
莫惜春衫污酒痕欲将遗恨寄芳樽
清明客里匆匆过不记桃花笑倚门
草色青青没烧痕山川满目酒盈樽
只愁逋客回家日先被春风 闭门
乍别亲朋似久违西风尘起染缁衣
不须杜宇声声劝如此江山胡不归
壮图落落与时违不信经纶起布衣
纵使鸚鱼从北化也随乌鵲向南归
客至从容奉笑谈晚知蔗境味尤甘
曲江进士题名遍安用山人起水南
虎溪何必与禅谈唯有东篱菊味甘
束带肯为儿辈屈悠然兴在此山南
科斗临池学篆文燕雏带雨掠香芹
春闺应恨归来晚南浦当时错送君
草堂未可便移文自煮清香碧涧芹
更向白云深处宿山头回首谢诸君
赋归四絕呈句容诸友

兴尽归期渐有涯梦中昨夜已还家
儿童笑引池西去菡萏犹余一朵花
故里青松百尺强亭亭三径俨成行
东篱雨后无人葺旧菊多应一半荒
我与茅君宿有緣四年五度过山前
元符直下崇禧路回首三峯意怆然
一见诸贤盖便倾秋风犹动故乡情
余生无复重来日再世何当结弟兄
题禹庙

来寻禹穴何容易却上龙门得许劳
拟借梅梁浮海去坐登三级浪头高

仲冬雪夜偶书三絕句

城楼戍鼓尽三更灯射斋窗一黍明窗下有人勤不寐隔墙犹听读书声
拥衾危坐夜沉沉门外谁知雪寸深掩卷不言空太息静中忽见古人心
长廊风 雨冥冥花落寒灯酒半醒但觉晨光何太早不知飞霰集窗櫺
诸生和韵复吟三絕

荒城戍卒打残更道上无人天未明一似衔枚蔡州去只无鹅鸭混军声
猿啾鬼哭杳冥冥夜半何人吊独醒譚罢离骚心正苦陰风吹雨响踈櫺
地鑪无分爇香沉画尽残灰夜正深窗外梅花消息动要知子半是天心
自笑

既聋不用夸三耳纯白安能辨二毛自笑先生书案上又将论语教儿曹
丁卯新正纪懷四首

懒将诗句上桃符栢叶椒花一例无却笑简斋元不简舟中犹自饮屠苏
土润耕牛不受鞭风和花鸟各忻然老人犹记兵戈日自后升平五十年
纷纷儿女竞新年老去思亲独怆然墓上只堪供洒扫无由防服拜堂前
鲁史曾书雨木冰坤爻切切戒陰凝衡门空把忧时志无奈华轩尽鹤乘
窥园

先生日日好窥园学圃工夫细讨论卖李不须先去核耘 只恐误伤根
井竭

坎蛙晓渴上苔栏石甃泥浑底欲干焦稼不为簞食计一瓢饮水亦良难
啓山扫松

一妻一妾閼泉扃老栢苍苍蔓草青我肯墦间求履足魂归不必讪中庭
病中四絕

南山处士老尤贫颇恨故交无一人若使知心得良友更因多病转相亲
老去无憀病转多樱桃杨柳奈情何故人又比佳人薄莫怪门前雀可罗
叶落萧萧壅树根疎林带郭半疑村卧闻车马墙边过无事呼儿早闭门
浪說苏公久已仙岂知翁自厌余年雪堂二客能相从姓字当时惜不传
追和四絕

文士多嬰疾与贫浩然东野即其人唱酬从此诗筒简炮炙时于药裹亲
舖餽糟醕醉者多独醒无奈众人何寒窗细读离骚语遗恨千年吊汨罗
三十寻思拟学仙蹉跎已过古稀年一生只作邯鄲梦枕上竒方秘不传
卧看山云起石根意行随犬至前村防居自是无人识何必移家上鹿门
钦定四库全书

墙东类稿卷二十元 陆文圭 撰七言絕句诗

丁亥壽药房先生四首

贺客门闕刺莫传日高厨传尚萧然遥知独鹤苍苔舞自防丹砂注内篇
蜀苑梅花号两龙千年矫立受霜风若为健步能移取逺供寒香壽乃翁
出处穷通若命何月居南斗类东坡底须内翰还公做勘破已输春梦婆
曲度珠帘懷吕相庑排红榜媚韩王先生清隱心如水消得编诗一瓣香
折梅壽宋春卿

南枝春早为谁容逺供寒香壽乃翁不信广平心似铁能禁索笑倚东风

又口号四首【谨案此诗壽陆义斋作时乙巳九月前有七言律诗一首编入十八卷】

洛阳亭下昔埋轮当道豺狼不避人今日黄花故园酒独携野鹤伴闲身
仁挟翔风勇驾霆皇华使者出祥刑福星一夕迁吴分却向龙山现壽星
华堂捧劝紫霞杯红粉回头御史来直道素知嫌妩媚羞将白鹤放笼开
幼安伯可号文雄词壽秦韩枉自工贤相肯交穷处士何如魏野祝莱公
赠松窻

故交皆疎柳子厚新贵不识王元之袖中刺字已漫尽一童犹负囊中诗
赠复初二首

昨夜春风到柳枝客衣偏爱薄寒欺囊锥颖脱无人见欲绣平原未有丝
有客袖中懷短刺何人门下曳长裾每评陆子毁茶论大胜顔公乞米书
宁华张尉卫辉人也因寇失官妻子为掳行乞归乡赠以二絶句

葛藟绵绵长道邊独行踽踽亦堪怜邯郸正近君乡里好借仙翁一枕眠
南来憔悴一身存归雁哀鸣久失羣莫怪夜行人不问形容岂似故将军
桂松岩以子平星禽二术推人多验戏赠二絶

十二支辰配十干此专主日论财官岂无辞禄安贫者說与先生仔细看
异类于人总不干止闻列宿应郎官区区女蝠并危燕却与蛟龙一例看
赠星禽赵显微诗三絶

显防元是紫微仙天上星辰手斡旋为向人间多漏泄谪下茅峯五百年
莫把行藏问斗牛年将八十更何求愿言奎宿长明健文治从今遍九州
奎宿如何号木狼尾箕虎豹若为详兽心人面凡皆是瑞物如何无鳳凰

和史药房三絕

莫倚承恩赋上林记曾薄幸托琴心白头又欲轻相背令蹙山眉作苦吟
出处何如汉二疏返耕聊以遂吾初虎头未可轻摇笔牛角何妨且读书
春被山颠与水涯尽供物料入诗家陆刘近世升沉异一为梅花一杏花

和张仲寔絕句四首

江梅歲晚独清妍南国相逢亦偶然料得知心有寒月不消重雾与轻烟
平生梦不到黄扉安得京尘染素衣只把一竿江海去相看鸥鸟亦忘机
十年讲席坐无羶尽把行藏付与天防马已甘之反后着鞭莫竞祖生先
兀坐书林闭董惟时寻佳句写乌丝儿时论语今忘却且让安昌作帝师

山村赠礼敬龙泽上人诗有几年不踏澄江路耆旧唯存陆子方之句和之二首

西抹东涂衙一乡阿婆羞忆少年妆如今闭户无人识旋学仙翁却老方
西山爽气入吾诗拄颊含毫有所思欲把求田语 德莫因学圃笑樊迟

次伯机絕句

梅天风雨一江寒湿却滩头旧钓竿自着渔蓑沽酒去路逢贾客问长安

留别袁伯长待制凌德庸少监周南翁待制诸公三絕句

待诏明廷百有余一人释褐向江都诸生对防无奇语田窦何曾不喜儒
书生骨相太迢迢地位还须有福人老我终身友麋鹿看君他日上麒麟
狎狎虎豹守天關月殿蟾宫不可攀归路春风无限好一声啼鸟破青山

絕句留别善之仲实并呈松涧云仲无逸四首

今夜征帆浅渚边何时樽酒落花前白云绕舍归心切不为春林听杜鹃

手拈花草弄春愁儿女安知稼穡秋山北山南防未遍归欤且复事西畴
江上春云生暮寒故城回首离长安残桃剩柳应无分留与诸君取次看
老桧荣枯不计春好花开落止经旬莫将文翰夸余子共拟勋名及古人
古意四首寄张可与孙晋卿

长安城头红日斜王孙金弹打乌鸦寄声翠凤穿云去霜寒莫恋梧桐花
长松百尺防官街街吏斧锯充官柴高寒自是饱风雪岁晚只合居穷崖
老翁持镜向市卖铜光的皦秋水清丑妇鉴容惊堕地想渠嫌杀太分明
牧儿狭迳碍樵枝樵儿格鬪暮不归于菟一声啸篁谷两儿惊散走如飞
夜得二絕寄子华

送客征衫秋八月懷人病枕夜三更床头稚子呼不觉牕外潇潇风雨声
鸡鸣风雨思君子鴈过潇湘忆故人别去情懷浑欲醉梦回诗笔已如神
絕句二首寄绍堂求巧石

篱根怪石起层云浅带春泥碧藓纹乞与诗人时醒酒也胜豪夺任监军
几年石友卧苍苔曾受南宫雅拜来老子暮年行脚倦只宜窻里看崔嵬
送唐孟方教授三首

泮水三年惟饮水不知芹藻味何如羣鴉无故争桑椹挟弹何人莫问渠
御儿溪北浣征衣重拂苍苔旧钓矶有弟对床思久别呼儿置酒话迟归
城东老圃旧书生 闭柴门懒送迎独袖篇诗与君别相看白首不胜情
送李义夫出遊二首

梅花卸玉春寒浅柳色描金雪意消老子偶然诗兴动又挑行李过溪桥

三千丈髮从渠脱九十日春須我遊出却草堂三五里囊中无得一钱留

送吴仲鲁回乌江二道【原注吴学易】

老人白防子青衿二水相滋兑泽深易学已随丁氏去金兰何日慰同心

黄田西望歷阳城风水萧萧数日程纸上陈言刊落尽沧浪时听棹歌声

送留君玉高云卿自江陰迁松江四絕

二君才幹俱优裕数载相从意未休短棹西风吹过泖相思霜月落南州

江浦买鲈秋正美山亭闻鹤夜尤清送君此去因懷古海水东来意未平

老我毕枝甘伏鷃羨君乔木又迁莺清平官府无公事分我丝莼一箸羹

暨州风土今非昔安得珠犀贾客船莫笑归装无一物江头鱼蟹亦论钱

鉴止堂

流水防防止水停要令漱玉结层冰深溪不泛桃花出谁识仙源在武陵

西苑

雪花剪白忘安蒂【原注古诗雪花无蒂】霜叶雕红不恋枝争似隋家宫树上四时锦防不曾离

丘庄多稼楼二首【原注扁庸田僉事所书】

楼上西风野望时 禾黍没高低劝农使者来行水还凭朱栏忆旧题

万畝耕耘卒歲勤可曾一饱慰农人催租令急如风火输入官仓化腐尘

喜客泉二首

幽篁夹道少人居山骨清寒草木疎泉见客来空自喜春懷 正愁余

一饮懷金出岭南【原注广东贪泉】莲花峯下絕清甘【原注庐山防泉】我来欲与流泉约独喜廉人莫喜贪

四时佳兴题徐景阳园堂五首

溶溶川上花光午冉冉
窗前草色春能识
此中真乐处
圣门只有两三人
门前车马客方散
堂下樽罍酒半醒
不信镜中添白髮
君山依旧去年青
穷秋破屋檐头雨
残腊征夫陌上霜
公子闲居无一事
可能忧乐两相忘
华阳洞口金泉水
流入宫墙作小渠
任转秦淮出江去
不应久住化龙鱼
半奁玉镜照须眉
长笑东坡与水嬉
直下琤然投小石
一波先动万波随
题园亭

把酒看花贫亦乐
携琴对竹静相宜
客来若问朝家事
回首东风谢不知
同善之仲寔无逸
共赋雪中香亭

冷云低压翠禽巢
碎玉玲珑不耐敲
蜂蝶迟来探芳信
暖风已逼杏花梢
鹤皋诗为振之作

鹤鸣于垤妇长叹
鸿渐于陆夫远征
何似山亭闻鹤唳
无人静坐月三更
刘澹斋求米船漫赋二絶

文士清高数米颠
蔡公门下讵能贤
探囊万一逢江盗
错认真州发运船
灵寶生平爱虎头
每傍战舰系轻舟
晚无书画真无益
洗手莫嫌寒具油
临山谷帖不似

曾草华清妙入神
涪翁以后更无人
捧心终是西施好
里妇何縁辄效颦
危金僊示容斋清晖堂诗求防洪景卢乃危骊塘之座主也因成二首
卷中人物想干淳
老笔题诗意转新
却怪洪杨交不合
诚斋亦自是诗人
清晖何处有园堂
消得先生句发扬
百世空留遗墨在
后生并不识骊塘

题敬威卿参政赠许正卿针诗卷末敬公之章许卿之艺诸君发挥尽矣终以二絕貂续尾蛇添足乎

江左知名许叔微公来示之衡气机天下呻吟尚未息公持肘后将安归

正人一脉系安危温公身事亦付医此身强健无着处不如枕卧看儿嬉

题李兄课卷

集中有句尽堪传一梦科名十二年音好空闻永嘉末命乖不遇竟陵前

题赵子德修屋疏二首

公子王孙逞富豪连云甲第竞相高谁是锦里秋风客不办三重屋上茅

神有青囊号救贫如何无术自谋身道南大宅今安在欲向龙舒覓主人

戲题听琴手卷

流水高山不用弹巴人下里众皆懽只今何处求钟子多向文闱作考官

题昭君画卷五絕

当时随例与黄金不遣君王有悔心近使来传延壽死回思终是汉恩深

妍丑何须问画工美人终日侍宫中奉春初计真堪恨欲望单于敬外翁

青塚千年恨不埋琵琶马上几时回宇文高氏争雄日突厥柔然献女来

已恨丹青误妾身何消更与妾传神那知塞北风尘貌不似昭阳殿里人

啗雪中郎妾不如脱身无计 相于劝君莫射南飞鴈欲寄思乡万里书【原注画中有一人射鴈】

题二乔手卷二絕

国色娇娆画不如风流二壻尽消渠阿承丑女无人聘自挈衣装过草庐

小郎斫案怒生嗔亚壻提兵算若神借使横江风不便可能铜雀鎖佳人

渊明像

宋文心腹寄王宏来刺江州却有声不怪孤臣书甲子时时送酒赏渊明

小铜屏铸渊明归去诗并坡和章以赠子华侑以絕句

五斗区区肯折腰眉山早计不如陶小屏一枕还乡梦五柳门前月正高

移居图二首

潜夫两跋最穷研通老安身是契 偶向晴牕展临本无人当日扣龙眠

细君散髻抱婴儿底事移家不皱眉有句曾嘲穷处士四婆元自解吟诗

江陰有桃源图方圆尺许宫室人物如针粟可数相传有仙宿民家刻桶板为之一夕而成明日遁去友人以本遗余戲题二絕

不自柴桑记里来似传晨肇入天台世间多少荒唐事何独神仙有是哉【原注韩诗桃源之說誠荒唐】

人說桃源是隱民神仙幻景即非真如何谷口渔舟路不许人间再问津【原注洪驹父诸人论桃源谓陶记中本言避秦者初非仙也东坡荆公诗得之如王摩诘退之梦得皆误然余考之本记亦有可疑如渔人回舟竟不能认前路后有问津者辄死桃源果在世间何不可复见耶】

题子昂学士小景

萧萧落木壤无枝冉冉细竹爱风傲疑非松雪斋中画似是唐人野望诗

马道士为詹仲明作柳城春色图城门外柳树连堤桃花夹竹小桥渔艇茅屋下有读书人不知何处景也为题二絕

渭城客舍柳烟遮渔叟桃源去路賒松竹林中读书处一图风景属三家

城外春风野水浑桥头双桨下孤村柳桃红绿撩人眼独坐书斋懒出门

题牡丹梨花手卷

沉香宴罢索人扶重向银屏覩雪肤一笑不偿千古恨玉环当日倚防图

王隱齋墨梅

曾看月下挂疎影更怜雪后折橫枝逋仙此诗真是画王生非画却成诗

题补之梅

含章殿里雪中开曾共君王索笑来着在荒蹊枯竹畔可知准勅号村梅

题扇有所赠

圆如宝月洁如霜素手轻摇玉体凉报道明朝秋节至婕妤无复望专房

亭下玉兰花开

初如春笋露纖娇拆似红莲白羽摇亭下吟翁步明月玉人虚度可怜宵

梨花

粉香初试晓妆匀花貌参差是玉真茆屋诗人嗟老去东风勿送一枝春

枯松

谁见当年长髮须变成龙虎卧交衢虽然拥肿无人问投老犹堪作大夫

鹿葱絕句

丹葩信不类苹蒿雨后常抽绿玉条此草岂宜充鹿食瘦茎却比沈郎腰【原注沈约作鹿葱诗云尔非苹与蒿岂充麋鹿食防者取此诗以白梁武帝大怒约以忧死今按此诗亦未见显然讥刺何为得罪但此花丹色畧有斑防似鹿纹所以得名非谓可以供鹿之食也】

诗余

防絳唇

情景四首

玉体纖柔照人滴滴娇波溜填词未就迟却牕前绣一幅花笺适与何人手还知否孤灯坐守渐入黄昏后笑靨多羞低头不觉金钗溜凭媒将就鳳枕回双绣月地云阶何日重携手心坚否齐眉相守愿得从今后永夜无慆更堪防滴听檐溜枕寒难就堆乱床衾绣人面桃红还忆

擎浆手君知否倚门独守又是清明后闷倚香腮泪痕一线红膏溜将身错就枉把鸳鸯绣柳带青青攀向行人手天知否白头双守破镜重圆后王仲谦席上歌者魏都惜求子华写真为赋

小立娉婷歌声低遏行云住不胜珠翠玉面慵梳洗除却姚黄魏紫谁堪比君描取卷中人美得似崔徽未

浣溪沙

次伯机

翠玉峯高鹭防明縠纹波动鸭雏生湖山宜雨又宜晴越女荡舟莲叶碧裴郎驻马柳陰青拆花调客诉

情

减字木兰花

庚申六月三日同耶律君璋赵子渊兄弟避暑饮于 妙观之荷池君璋不饮命歌者歌以劝之

双鬟耸翠低防金莲裙窣地鍊石心肠无奈梅花一防香歌声梁绕流水泠泠云杳香白髮刘郎对景须 醉一場

即席赠歌者夏奴

香肌玉润花前忽听流莺韵移步金莲斜转清眸踏舞筵困娇无力蜀锦纏头 百尺安处奴乡且住容山过夏凉

阮郎归

舟中赋所见

风吹一捻柳腰轻春柔力未胜眉儿喜学远山青终朝画不成娇滴滴笑盈盈雏莺叶防声花梢雨过夕阳明无情渐有情

临江仙

坐客有出宠歌者乃主人旧所懽也

听得雅歌珠一串飒然吹动梁尘樽前重见旧时人
主人情未重情重是嘉賓飞絮落花无定
在近前遮莫谁嗔文园倦客最伤神野亭何处泊空忆画堂春

唐多令

梅隱庵席上贈歌者

花下笑声微莺喉高又低怪穿花粉蝶成围
唯有禅心清似水相对坐两忘机莫道絮沾泥
狂风也解飞恨残春九十将归回首阳台云缥缈愁薄暮雨霏霏

寄遠

明艳注秋波轻松绾髻螺怕逢人先敛双蛾怯雨羞云情未穩佳防少遠离多
梁绕忆清歌兰舟肯再过为他垂泪染香罗欲倩鳞鸿将锦字知别后意如何

满江红

送理伯雍同知改除转运判官

双桧堂深想前日清风犹在才半载政声传播輿人称快鞠草園扉无滞讼憇棠田舍留遗爱
问方今循吏几何人公为最明而恕防而介官易进身难退苦簿书丛委米盐繁碎鴈鹜自怜
羣里聚龙猪不计儿时防望美人又向碧云西徒增慨

贈歌者

儿女多情颇自恨风云气少春梦里莺啼燕语瞥然惊觉寸寸凌波莲步穩弯弯拂黛山眉峭
似红云一朵罩江梅天然好舞腰细歌喉巧茵锦褪梁尘绕更盈盈笑靨櫻唇红小金盞爱从
心里换玉山偏向懷中倒奈刘郎前度看桃花如今老

己巳二月二十日游北门有感

试捡春光都不在槿篱茅屋荒城外牯眠衰草鸦啼枯木黄染菜花无意绪青描柳叶浑粗俗
忆繁华不似少年遊伤心目棠坞锦梨园玉燕衣舞莺簧曲艳阳天输与午桥金谷行处绮罗
香不断归时弦管声相逐怕夕阳饮近黄昏烧银烛

減字木兰花慢

滕王閣

九皋明月夜跨一鹤赴仙都听佩玉锵鸣骖鸾小驻高阁凭虚萋萋草生南浦兴未阑归去东吴笑指尊前二客昨宵良防非欤庄周蝴蝶两遽如变化一华胥叹物换星移壶中日月镜里头颅芳洲独醒人在采芙蓉歲晏孰华予欲泛兰舟容与烟沙漠漠重湖

和心困春雪词

怪东风太早未灯夕放琼花是何处瑶姬来看王树光彩交加野人但知三白喜新年天意荐休嘉肯念兵屯北塞谁上表贺南衙西斜日影檐牙又被黑云遮叹病骨支离别懷萧索空负年华鼇山已成春梦归去来空谷卧烟霞却笑昌黎才子浪吟逐马随车

念奴娇

赠韩茂林【原注魏公之后】

茂林修竹自山陰防散几番陈迹修禊年年春故事懊恨风流非昔当日兰堂后来菊圃苗裔江南北覩君雅号恍然旧事重忆歲晚木落天寒黑貂将敝尚作新丰客星斗胸中空灿烂磨蝎虚名何益袁吕相逢知音一笑肉眼无人识访予梅屋谈天聊慰孤寂

酹江月

赠王道人性初归茅山

芙蓉城郭有羽仙骑鹤来从何处曾拉茅君峯顶防瑶佩随风吹去玉笈偷开青囊拾得笑防人间世藏身壶里个中别有天地共约手种蟠桃缀花结实已是三千歲欲鲙长鲸麟作脯倒海聊共一醉偶忆寒梅更慚小草拂袖懷归计蓬菜清浅云帆他日相遇

送幕职

残花剩柳正啼防声里邮亭别馆三叠阳關听未彻手执离杯引满政坐诸君久烦老子今日才萧散翩然归去故园绿树春晚人世苍白浮云自舒自卷不入高人眼官事如麻何日了输与闲中不管翠栢台高紫微省近别有清华选功名歲晏江城回首天遠

洛阳耆英防二首

戴花刘监算耆英防上与吾同歲伊洛山川今如古人事几番兴废梦枕初残黄粱未熟已换人间世箠瓢钟鼎看来一等滋味天上赤白双丸东来西往出没真儿戲惟有神仙长年诀长似功名富贵欲搗霜难寻玉杵何日蓝桥遇裴郎老矣云英那肯随去

延年有术食古松根下茯苓千歲纵是延年知何益命也道之将废思古之人词章节行杲杲

行当世遗风流韵渊然尚有余味 无奈先哲凋零后生坦率多以儒为戲每笑唐人书不读直
把黄金买贵山泽奇才云林真隱没齿何曾遇人生如梦江流日夜东去

水龙吟

次药房韵

西州玉局飞僊袞裳曾侍槐龙翠飞花丽曲雅音犹在有人赓未千载峨峯一江川练又钟清
气叹瀛洲路近罡风吹断 自有凌霄意草碧寒窗静里折琼枝小栏同倚新吟婉美西施态
度慵【原阙】梳洗按羽调丝雪儿薄相为君心醉恨高楼暮隔江城花暗碧云遥睇

附史药房作【并序】

清明后浹日过子方小饮帘栊靚深绿陰昼寂栏边玉茶正花香韵萧逺主人出侍人弹琵琶
侑觴酒未终上马径去恍然蓝桥湓浦之遇也赋水龙吟以记其事呈子方一笑

等闲过了清明草痕深一庭新翠光风信息牡丹初褪荼蘼犹未燕语清圆梅英松润困人天
气笑文园倦客诗材减尽犹有伤春意别有留春去里小房枕玉英双倚天香浮动铢衣乍试
铅华尽洗一曲琵琶轻拢挑拨未觴先醉又忽忽上马蓝桥路隔 增凝睇

再次韵一首寄药房

燕芹香老春深微风颭动新篁翠惊敲梦断忙呼小玉故人来未香缕筛帘游丝堕几暖薰花
气问春随莺到又随燕去谁解得东君意 涧水流红影里小楼东有人孤倚残桃着雨鬟容撩
乱未堪妆洗冉冉年光悠悠时事不如沈醉更韦娘一曲司空惯见也应回眸

探春慢

和心渊己巳元夕韵

细草黏冰疎林补雪衰翁未觉春暖曝背低檐燎衣破灶谁识舞台歌馆乐事如今懒谢邻伴
东招西唤何消看试华灯月光今夕圆满 念昔繁华帝里侍鳳輦夜遊晓棚人散迺鼓方催韵
箫正美忽被西风吹断防防梅花落忍听得一声羌管懷古伤情泪痕湿春衫短

沁园春

送李同知之官邳都

东西二都史载循良不五六人记南阳有召颍川有霸并州如郭河内如恂直比朱弦清俸古

镜吏自秋霜民自春如公者守廉平二字近古名臣 棠陰手种方新又五马翩翩邺水濱想台
高铜雀尚留遗迹堂深昼锦空鎖凝尘琴瑟从容雅歌缓带美政遥知达紫宸期年后看快行
宣召班冠廷绅

送杨伯可

雨足江皋月满中秋使客将归看扁舟空载贫无长物破囊收贮富有新诗清白传家懷金不
受洁已从来畏四知民何幸尽相安田里乐业熙熙 谁知经界良规是三代相传古法遗要讲
明有素施行不扰寬严相济表里无私慙愧偏州久淹老子却怪朝家选用迟公今去定致身
鹓序接武龙墀

金缕曲

代送同僚

乍到蓉城路听儿童歌謠德政感恩如父好入西京循吏传谁道今人非古留遗爱甘棠佳树
节操冰霜清凜凜看和风吹作阳春雨程去速遽如许 我来不见空懷竚望彼美碧云莫合草
萋南浦信是有才供世用敢择东西何处又谁念婴儿思乳不恨使君吾不识恨使君不与吾
相辅聊寄意短长句